

[2000/10/22 v3.01 Landscape Pages (DPC)]

[2016/05/21 v2.44 Cross-referencing by name of section]

तैत्तिरीय आरण्यकम्

Colophon

This document was typeset using X_YTEX, and uses the Siddhanta font extensively. It also uses several TEX macros designed by *H.~L.~Prasād*. Practically all the encoding was done with the help of Ajit Krishnan's mudgala IME (<http://www.aupasana.com/>).

Acknowledgements

The initial ITRANS encodings of some of these texts were obtained from <http://sanskritdocuments.org/> and <https://sa.wikisource.org/>. Thanks are also due to Ulrich Stiehl~ (<http://sanskritweb.de/>) ~for hosting a wonderful resource for Yajur Veda, and also generously sharing the original Kathaka texts edited by Subramania Sarma.

See also <http://stotrasamhita.github.io/about/>

Contents

| | |
|--|-----|
| तैत्तिरीय आरण्यकम् | 1 |
| प्रथमः प्रश्नः --- अरुणप्रश्नः | 2 |
| द्वितीयः प्रश्नः | 36 |
| तृतीयः प्रश्नः | 46 |
| चतुर्थः प्रश्नः | 55 |
| पञ्चमः प्रश्नः | 72 |
| षष्ठः प्रश्नः | 91 |
| सप्तमः प्रश्नः --- शीक्षावली | 100 |
| अष्टमः प्रश्नः --- ब्रह्मानन्दवली | 104 |
| नवमः प्रश्नः --- भृगुवली | 108 |
| दशमः प्रश्नः --- महानारायणोपनिषत् | 111 |
| अम्भस्य पारे | 111 |
| गायत्रीमन्त्राः | 112 |
| दूर्वासूक्तम् | 113 |
| मृत्तिकासूक्तम् | 113 |
| शत्रुजयमन्त्राः | 113 |
| अघमर्षणसूक्तम् | 114 |
| दुर्गासूक्तम् | 115 |
| व्याहृतिहोमन्त्राः | 116 |
| ज्ञानप्राप्त्यर्थहोममन्त्राः | 116 |
| वेदविस्मरणाय जपमन्त्राः | 117 |
| तपः प्रशंसा | 117 |
| विहिताचरणप्रशंसा निषिद्धाचरणनिन्दा च | 117 |
| दहरविद्या | 117 |
| नारायणसूक्तम् | 119 |
| आदित्यमण्डले परब्रह्मोपासनम् | 119 |

| | |
|--|-----|
| आदित्यपुरुषस्य सर्वात्मकत्वप्रदर्शनम् | 120 |
| शिवोपासनमन्त्राः | 120 |
| पश्चिमवक्त्र-प्रतिपादक-मन्त्रः | 120 |
| उत्तरवक्त्र-प्रतिपादक-मन्त्रः | 121 |
| दक्षिणवक्त्र-प्रतिपादक-मन्त्रः | 121 |
| प्राग्वक्त्र-प्रतिपादक-मन्त्रः | 121 |
| ऊर्ध्ववक्त्र-प्रतिपादक-मन्त्रः | 121 |
| नमस्कारमन्त्राः | 121 |
| अग्निहोत्रहवण्याः उपयुक्तस्य वृक्षविशेषस्याभिधानम् | 122 |
| भूदेवताकमन्त्रः | 122 |
| सर्वदेवता आपः | 123 |
| सन्ध्यावन्दनमन्त्राः | 123 |
| प्रणवस्य ऋष्यादिविवरणम् | 123 |
| गायत्र्यावाहनमन्त्राः | 124 |
| गायत्री उपस्थानमन्त्राः | 124 |
| आदित्यदेवतामन्त्रः | 124 |
| त्रिसुपर्णमन्त्राः | 125 |
| मेधासूक्तम् | 126 |
| मृत्युनिवारणमन्त्राः | 126 |
| प्रजापतिप्रार्थनामन्त्रः | 127 |
| इन्द्रप्रार्थनामन्त्रः | 128 |
| मृत्युञ्जयमन्त्राः | 128 |
| पापनिवारक-मन्त्राः | 128 |
| वसुप्रार्थनामन्त्रः | 129 |
| कामोऽकार्षीत्-मन्युरकार्षीत् मन्त्रः | 129 |
| विराजहोममन्त्राः | 129 |
| वैश्वदेवमन्त्राः | 131 |
| प्राणाहुतिमन्त्राः | 132 |
| भुक्तान्नाभिमन्त्रणमन्त्राः | 132 |
| भोजनान्ते आत्मानुसन्धानमन्त्राः | 132 |
| अवयवस्त्वस्थता-प्रार्थनामन्त्रः | 133 |
| इन्द्रसप्तर्षि-संवादमन्त्रः | 133 |
| हृदयालम्भनमन्त्रः | 133 |
| देवताप्राणनिरूपणमन्त्रः | 133 |

| | |
|-------------------------------|-----|
| अग्निस्तुतिमन्त्रः | 133 |
| अभीष्टयाचनामन्त्राः | 134 |
| परतत्त्व-निरूपणम् | 134 |
| ज्ञानसाधन-निरूपणम् | 135 |
| ज्ञानयज्ञः | 136 |

कृष्णयजुर्वेदीयतैत्तिरीय-काठकम् 139

| | |
|----------------------------|-----|
| प्रथमः प्रश्नः | 140 |
| द्वितीयः प्रश्नः | 165 |
| तृतीयः प्रश्नः | 192 |

॥तैत्तिरीय आरण्यकम्॥

॥प्रथमः प्रश्नः --- अरुणप्रश्नः॥

ॐ भ॒द्रं कर्णे॑भिः शृणु॒याम॑ दे॒वाः। भ॒द्रं प॑श्येमाक्ष॒भिर्यज॑त्राः।
स्थि॒रैरङ्गै॑स्तुष्टुवाꣳ स॑स्त॒नूभिः॑। व्यशे॑म दे॒वहि॑तं॒ यदायुः॑।
स्व॒स्ति न॒ इन्द्रो॑ वृ॒द्धश्र॑वाः। स्व॒स्ति नः॑ पू॒षा वि॒श्ववे॑दाः।
स्व॒स्ति न॒स्ताक्ष्यो॑ अरि॑ष्टनेमिः। स्व॒स्ति नो॒ बृह॑स्पति॑र्दधातु॥
ॐ शान्तिः॒ शान्तिः॒ शान्तिः॑॥

भ॒द्रं कर्णे॑भिः शृणु॒याम॑ दे॒वाः। भ॒द्रं प॑श्येमाक्ष॒भिर्यज॑त्राः।
स्थि॒रैरङ्गै॑स्तुष्टुवाꣳ स॑स्त॒नूभिः॑। व्यशे॑म दे॒वहि॑तं॒ यदायुः॑।
स्व॒स्ति न॒ इन्द्रो॑ वृ॒द्धश्र॑वाः। स्व॒स्ति नः॑ पू॒षा वि॒श्ववे॑दाः।
स्व॒स्ति न॒स्ताक्ष्यो॑ अरि॑ष्टनेमिः। स्व॒स्ति नो॒ बृह॑स्पति॑र्दधातु।
आप॑मापाम॒पः सर्वाः॑। अ॒स्माद॒स्मादि॒तोऽमु॑तः॑॥_१॥

अ॒ग्निर्वा॒युश्च॒ सूर्य॑श्च। स॒ह स॑ध॒स्कर॑र्द्धिया।
वा॒य्वश्चा॑ रश्मि॒पत॑यः। मरी॑च्यात्मानो॒ अद्भु॑हः।
दे॒वीर्भु॑वन॒सूव॑रीः। पु॒त्रव॒त्वाय॑ मे सु॒त।
महा॑नाग्नीर्महामा॒नाः। म॒ह॒सो म॑ह॒सः स्वः॑।
दे॒वीः प॑र्जन्य॒सूव॑रीः। पु॒त्रव॒त्वाय॑ मे सु॒त॥_२॥
अ॒पाश्र्यु॑ष्णिम॒पा रक्षः॑। अ॒पाश्र्यु॑ष्णिम॒पार॑घम्।
अपा॑घ्रा॒मप॑ चा॒वर्ति॑म्। अप॑दे॒वीरि॒तो हि॑त।
वज्रं॑ दे॒वीर॑जी॒ताश्च॑। भु॒वनं॑ दे॒वसू॑व॒रीः।
आ॒दि॒त्यान॑दि॒तिं दे॒वीम्। योनि॑नोर्ध्वमुदी॑षत।
शि॒वा नः॒ शन्त॑मा भवन्तु। दि॒व्या आप॑ ओष॑धयः।

स्मृतिः॑ प्र॒त्यक्ष॑मैति॒ह्यम्। अनु॑मानश्चतुष्टयम्।
 ए॒तैरादि॑त्यमण्डलम्। सर्वैरे॒व विधा॑स्यते।
 सूर्यो॑ मरी॑चिमाद॑त्ते। सर्व॑स्माद्भु॒वना॑दधि।
 तस्याः॑ पाकवि॑शेषेण। स्मृतं॑ का॒लवि॑शेषणम्।
 न॒दीव॑ प्रभ॑वात्का॒चित्। अ॒क्षय्या॑त्स्यन्द॒ते यथा॑॥४॥
 तां नद्योऽभि॑ स॒माय॑न्ति। सो॒रुः सती॑ न नि॒वर्त॑ते।
 ए॒वं ना॒नास॑मुत्था॒नाः। का॒लाः संवत्स॑रः श्रि॒ताः।
 अणु॑श्च म॒हश्च॑। सर्वे॑ सम॒वय॑न्ति॒तम्।
 स॒तैः स॒र्वैः स॑माविष्टः। ऊ॒रुः स॒न्न नि॒वर्त॑ते।
 अधि॑संवत्सरं वि॒द्यात्। तदे॒वं लक्ष॑णे॥५॥
 अणु॑भिश्च म॒हद्भिश्च॑। स॒मारूढः॑ प्र॒दृश्य॑ते।
 संवत्स॑रः प्र॒त्यक्षे॑ण। ना॒धिस॑त्तः प्र॒दृश्य॑ते।
 प॒टरो॑ वि॒क्लि॑धः पि॒ङ्गः। ए॒तद्व॑रुणलक्षणम्।
 यत्रै॑तदुप॒दृश्य॑ते। स॒हस्रं॑ तत्र॒ नीय॑ते।
 एक॑ हि शिरो ना॒ना मुखे॑। कृ॒त्स्नं तद॑तुलक्षणम्॥६॥
 उभय॑तः सप्तै॑न्द्रियाणि। ज॒ल्पितं॑ त्वे॒व दि॒ह्यते॑।
 शुक्ल॑कृष्णे संवत्स॑रस्य। दक्षि॑णवामयोः पार्श्वयोः।
 तस्यै॒षा भव॑ति। शुक्रं॑ ते अ॒न्यद्य॑ज॒तं ते॑ अ॒न्यत्।
 विषु॑रूपे अ॒हनी॒ द्यौरि॑वासि। विश्वा॒ हि मा॒या अव॑सि स्वधावः।
 भ॒द्रा ते॑ पूषन्नि॒ह रा॒तिर॒स्त्विति॑। नात्र॒ भुव॑नम्। न पू॒षा।

न प॒शवः॑। न॒ऽऽदि॒त्यः सं॒वत्स॒र ए॒व प्र॒त्यक्षे॑ण प्रि॒यत॑मं वि॒द्यात्।
एत॑द्वै सं॒वत्स॒रस्य॑ प्रि॒यत॑मं रूप॒म्। योऽस्य॑ म॒हान॑र्थ उत्प॒त्स्यमा॑नो भ॒वति॑।
इदं पु॒ण्यं कुरु॑ष्वेति। तमा॒हर॑णं द॒द्यात्॥७॥

[2]

सा॒क॒ञ्जाना॑ः स॒प्तथ॑मा॒हुरेक॑ज॒म्। षडु॑द्य॒मा ऋ॑षयो दे॒वजा॑ इति॑।
तेषा॑मि॒ष्टानि॑ विहि॑तानि धा॒मशः॑। स्था॒त्रे रे॑ज॒न्ते वि॑कृ॒तानि॑ रू॒पशः॑।
को नु॑ मर्या॒ अमि॑थितः। सखा॒ सखा॑यमब्रवीत्।
जहा॑को अ॒स्मदी॑षते। यस्ति॒त्याजं॑ सखि॒विदः॑ सखा॑यम्।
न तस्य॑ वा॒च्यपि॑ भा॒गो अ॑स्ति। यदी॑ः शृ॒णोत्य॒लकः॑ शृ॒णोति॑॥८॥
न हि प्र॒वेदं॑ सु॒कृत॑स्य प॒न्थामि॑ति। ऋ॒तुर्ऋ॑तुना नुद्य॒मानः॑।
वि॒न॒नादा॑भिधा॒वः। षष्टि॑श्च त्रि॒ंशका॑ व॒ल्गाः।
शु॒क्लकृ॑ष्णौ च षा॒ष्टिकौ॑। सा॒रा॒गव॒स्त्वैर्ज॒रद॑क्षः।
व॒स॒न्तो वसु॑भिः स॒ह। सं॒वत्स॒रस्य॑ सवि॒तुः।
प्रैष॑कृ॒त्प्रथ॑मः स्मृ॒तः। अ॒मूना॒दय॑तेत्य॒न्यान्॥९॥
अ॒मूञ्श्च॑ परि॒रक्ष॑तः। ए॒ता वा॒चः प्र॑युज्य॒न्ते।
यत्रै॑तदुप॒दृश्य॑ते। ए॒तदे॒व वि॑जानी॒यात्।
प्र॒माणं॑ का॒लप॑र्यये। वि॒शेष॑णं तु वक्ष्या॒मः।
ऋ॒तूनां॑ तन्नि॒बोध॑त। शु॒क्लवा॑सां रु॒द्रग॑णः।
ग्री॒ष्मेण॑ऽऽव॒र्तते॑ स॒ह। नि॒जह॑न् पृथि॒वीः स॒र्वाम्॥१०॥
ज्यो॒तिषा॑ऽप्रति॒ख्येन॑ सः। वि॒श्वरू॒पाणि॑ वा॒सांसि॑।
आ॒दि॒त्यानां॑ नि॒बोध॑त। सं॒वत्स॒रीणं॑ क॒र्मफ॑लम्।
व॒र्षाभि॑र्द॒दता॑ः स॒ह। अ॒दुःखो॑ दुःखचक्षु॒रिव॑।

तद्भाऽऽपीत इव दृश्यते। शीतेनाव्यथयन्निव।
रुरुदक्ष इव दृश्यते। ह्लादयते ज्वलतश्चैव।
शाम्यतश्चास्य चक्षुषी। या वै प्रजा भ्रंश्यन्ते।
संवत्सरात्ता भ्रंश्यन्ते। याः प्रतितिष्ठन्ति।
संवत्सरे ताः प्रतितिष्ठन्ति। वर्षाभ्य इत्यर्थः॥¹¹॥

[3]

अक्षिदुःखोत्थितस्यैव। विप्रसन्ने कनीनिके।
आङ्गे चाद्रणं नास्ति। ऋभूणां तन्निबोधत।
कनकाभानि वासांसि। अहतानि निबोधत।
अन्नमश्नीतं मृज्मीत। अहं वो जीवनप्रदः।
एता वाचः प्रयुज्यन्ते। शरदत्रोपदृश्यते॥¹²॥
अभिधून्वन्तोऽभिघ्नन्त इव। वातवन्तो मरुद्गणाः।
अमुतो जेतुमिषुमुखमिव। सन्नद्धाः सह ददृशे ह।
अपध्वस्तैर्वस्तिवर्णैरिव। विशिखासः कपर्दिनः।
अक्रुद्धस्य योत्स्यमानस्य। क्रुद्धस्यैव लोहिनी।
हेमतश्चक्षुषी विद्यात्। अक्षयोः क्षिपणोरिव॥¹³॥
दुर्भिक्षं देवलोकेषु। मनूनामुदकं गृहे।
एता वाचः प्रवदन्तीः। वैद्युतो यान्ति शैशिरीः।
ता अग्निः पवमना अन्वैक्षत। इह जीविकामपरिपश्यन्।
तस्यैषा भवति। इहेहवः स्वतपसः।
मरुतः सूर्यत्वचः। शर्म सप्रथा आवृणे॥¹⁴॥

[4]

अतिताम्राणि वासांसि। अष्टिवज्रिशतघ्निं च।

विश्वे देवा विप्रहरन्ति। अग्निजिह्वा असञ्चत।
 नैव देवो न मर्त्यः। न राजा वरुणो विभुः।
 नाग्निर्नेन्द्रो न पवमानः। मातृक्कघ्नं विद्यते।
 दिव्यस्यैका धनुरार्भिः। पृथिव्यामपरा श्रिता॥¹⁵॥
 तस्येन्द्रो वमिरूपेण। धनुर्ज्यामछिनत्स्वयम्।
 तदिन्द्रधनुरित्यज्यम्। अभ्रवर्णेषु चक्षते।
 एतदेव शंयोर्बार्हस्पत्यस्य। एतद्गुद्रस्य धनुः।
 रुद्रस्य त्वेव धनुरार्भिः। शिर उत्पिपेष।
 स प्रवर्ग्योऽभवत्। तस्माद्यः सप्रवर्ग्येण यज्ञेन यजते।
 रुद्रस्य स शिरः प्रतिदधाति। नैनं रुद्र आरुको भवति। य एवं वेद॥¹⁶॥

[5]

अत्यूर्ध्वाक्षोऽतिरश्चात्। शिशिरः प्रदृश्यते।
 नैव रूपं न वासांसि। न चक्षुः प्रतिदृश्यते।
 अन्योन्यं तु न हिंसातः। सतस्तद्देवलक्षणम्।
 लोहितोऽक्षि शारशीर्ष्णिः। सूर्यस्योदयनं प्रति।
 त्वं करोषि न्यञ्जलिकाम्। त्वं करोषि निजानुकाम्॥¹⁷॥
 निजानुका मे न्यञ्जलिका। अमी वाचमुपासतामिति।
 तस्मै सर्व ऋतवो नमन्ते। मर्यादाकरत्वात्प्रपुरोधाम्।
 ब्राह्मणं आप्नोति। य एवं वेद। स खलु संवत्सर एतैः सेनानीभिः सह।
 इन्द्राय सर्वान्कामानभिवहति। स द्रप्सः। तस्यैषा भवति॥¹⁸॥
 अवद्रप्सो अंशुमतीमतिष्ठत्। इयानः कृष्णो दशभिः सहस्रैः।
 आवर्तमिन्द्रः शच्या धमन्तम्। उप्सुहि तं नृमणामथद्रामिति।
 एतयैवेन्द्रः सलावृक्या सह। असुरान् परिवृश्चति।

पृथिव्यं शुमती। तामन्ववस्थितः संवत्सरो दिवं च।
नैवं विदुषाऽऽचार्यान्तेवासिनौ। अन्योन्यस्मै द्रुह्याताम्। यो द्रुह्यति।
भ्रश्यते स्वर्गल्लोकात्। इत्यृतुमण्डलानि।
सूर्यमण्डलान्याख्यायिकाः। अत ऊर्ध्वं सन्निर्वचनाः॥¹⁹॥

[6]

आरोगो भ्राजः पटरः पतङ्गः। स्वर्णरो ज्योतिषिमान् विभासः।
ते अस्मै सर्वे दिवमातपन्ति। ऊर्जं दुहाना अनपस्फुरन्त इति।
कश्यपोऽष्टमः। स महामेरुं न जहाति।
तस्यैषा भवति। यत्ते शिल्पं कश्यप रोचनावत्।
इन्द्रियावत्पुष्कलं चित्रभानु। यस्मिन्सूर्या अर्पिताः सप्त साकम्॥²⁰॥
तस्मिन् राजानमधिविश्रयेममिति। ते अस्मै सर्वे कश्यपाज्योतिर्लभन्ते।
तान्सोमः कश्यपादधिनिर्द्धमति। भ्रस्ताकर्मकृदिवैवम्।
प्राणो जीवानीन्द्रियजीवानि। सप्त शीर्षण्याः प्राणाः।
सूर्या इत्याचार्याः। अपश्यमहमेतान्सप्त सूर्यानि।
पञ्चकर्णो वात्स्यायनः। सप्तकर्णश्च प्लाक्षिः॥²¹॥
आनुश्रविक एव नौ कश्यप इति। उभौ वेदयिते।
न हि शेकुमिव महामेरुं गन्तुम्। अपश्यमहमेत्सूर्यमण्डलं परिवर्तमानम्।
गार्ग्यः प्राणत्रातः। गच्छन्त महामेरुम्। एकं चाजुहतम्।
भ्राजपटरपतङ्गा निहने। तिष्ठन्नातपन्ति। तस्मादिह तस्त्रितपाः॥²²॥
अमुत्रेतरे। तस्मादिहातस्त्रितपाः। तेषामेषा भवति।
सप्त सूर्या दिवमनुप्रविष्टाः। तानन्वेति पृथिभिर्दक्षिणावान्।
ते अस्मै सर्वे घृतमातपन्ति। ऊर्जं दुहाना अनपस्फुरन्त इति।

सप्तर्बिजः सूर्या इत्याचार्याः। तेषामेषा भवति। सप्त दिशो नानासूर्याः॥²³॥
सप्त होतार ऋबिजः। देवा आदित्या ये सप्त।
तेभिः सोमाभी रक्षण इति। तदप्याम्नायः।
दिग्भ्राज ऋतून् करोति। एतयैवावृता सहस्रसूर्यताया इति वैशम्पायनः।
तस्येषा भवति। यद्याव इन्द्र ते शतं शतं भूमीः।
उतस्युः। नत्वा वज्रिन्सहस्रं सूर्याः॥²⁴॥
अनु न जातमष्ट रोदसी इति। नानालिङ्गबादतूनां नानासूर्यबम्।
अष्टौ तु व्यवसिता इति। सूर्यमण्डलान्यष्टात ऊर्ध्वम्।
तेषामेषा भवति। चित्रं देवानामुदगादनीकम्।
चक्षुर्मित्रस्य वरुणस्याग्नेः। आप्रा द्यावापृथिवी अन्तरिक्षम्।
सूर्य आत्मा जगतस्तस्थुषश्चेति॥²⁵॥

[7]

क्वेदमभ्रं निविशते। क्वायं संवत्सरो मिथः।
क्वाहः क्वेयं देव रात्री। क्व मासा ऋतवः श्रिताः।
अर्द्धमासा मुहूर्ताः। निमेषास्तुटिभिः सह।
क्वेमा आपो निविशन्ते। यदीतो यान्ति सम्प्रति।
काला अप्सु निविशन्ते। आपः सूर्ये समाहिताः॥²⁶॥
अभ्राण्यपः प्रपद्यन्ते। विद्युत्सूर्ये समाहिता।
अनवर्णे इमे भूमी। इयं चाऽसौ च रोदसी।
किंस्त्रिदत्रान्तरा भूतम्। येनेमे विधृते उभे।
विष्णुना विधृते भूमी। इति वत्सस्य वेदना।
इरावती धेनुमती हि भूतम्। सूर्यवसिनी मनुषे दशस्यै॥²⁷॥

व्य॑ष्ट॒भ्रा॒द्रोद॑सी॒ वि॒ष्णवे॒ते। दा॒ध॒र्था॑ पृ॒थि॒वीम॒भितो॑ म॒यू॒खैः॑।

किं॑ तद्वि॒ष्णोर्ब॑लमा॒हुः। का॒ दी॒प्तिः॑ किं॑ प॒राय॑णम्।

एको॑ य॒द्धार॑यद्दे॒वः। रे॒ज॒ती रोद॑सी उ॒भे।

वा॒ताद्वि॒ष्णोर्ब॑लमा॒हुः। अ॒क्षरा॑दी॒प्तिरु॒च्यते॑।

त्रि॒पदा॒द्धार॑यद्दे॒वः। यद्वि॒ष्णोरे॑कमु॒त्त॒मम्॥²⁸॥

अ॒ग्नयो॑ वा॒यव॑श्चै॒व। ए॒तद॑स्य प॒राय॑णम्।

पृ॒च्छामि॑ त्वा॒ परं॑ मृ॒त्युम्। अ॒वमं॑ म॒ध्यम॑श्च॒तुम्।

लो॒कं च॒ पु॒ण्य॑पा॒पाना॑म्। ए॒तत्पृ॑च्छामि॒ सम्प्र॑ति।

अ॒मुमा॑हुः॒ परं॑ मृ॒त्युम्। प॒वमा॑नं तु म॒ध्यमम्॑।

अ॒ग्निरे॒वाव॑मो मृ॒त्युः। च॒न्द्रमा॑श्चतु॒रु॒च्यते॑॥²⁹॥

अ॒ना॒भो॒गाः परं॑ मृ॒त्युम्। पा॒पाः सं॑य॒न्ति॒ सर्व॑दा।

आ॒भो॒गास्त्वे॒व सं॑य॒न्ति। य॒त्र पु॑ण्यकृ॒तो ज॑नाः।

ततो॑ म॒ध्यम॑मा॒य॒न्ति। च॒तुम॑ग्निं च॒ सम्प्र॑ति।

पृ॒च्छामि॑ त्वा॒ पाप॑कृ॒तः। य॒त्र या॑तय॒ते य॑मः।

त्वं न॑स्तद्ब्र॒ह्मन् प्र॑ब्रूहि। य॒दि वै॒त्थाऽस॒तो गृ॑हान्॥³⁰॥

क॒श्यपा॑दु॒दिताः॑ सू॒र्याः। पा॒पान्नि॑घ्नन्ति॒ सर्व॑दा।

रोद॑स्यो॒न्तर्द॑शेषु। तत्र न्य॒स्यन्ते॑ वा॒स॒वैः।

तेऽश॑री॒राः प्र॑प॒द्यन्ते॑। य॒थाऽपु॑ण्यस्य॒ कर्म॑णः।

अपा॑ण्यपा॒दके॑शा॒सः। तत्र॑ तेऽयो॒निजा॑ ज॒नाः।

मृ॒त्वा पुन॑र्मृ॒त्युमा॑प॒द्यन्ते॑। अ॒द्यमा॑नाः स्व॒कर्म॑भिः॥³¹॥

आ॒शा॒तिकाः॑ क्रि॒मय॑ इ॒व। ततः॑ पू॒यन्ते॑ वा॒स॒वैः। अपै॑तं मृ॒त्युं ज॑यति।

य एवं वेद। स खल्वैवं विद्वाह्यणः। दीर्घश्रुत्तमो भवति।
 कश्यपस्यातिथिः सिद्धगमनः सिद्धगमनः। तस्यैषा भवति।
 आयस्मिन्सप्त वासवाः। रोहन्ति पूर्या रुहः॥³²॥
 ऋषिर्ह दीर्घश्रुत्तमः। इन्द्रस्य घर्मो अतिथिरिति।
 कश्यपः पश्यको भवति। यत्सर्वं परिपश्यतीति सौक्ष्म्यात्।
 अथाग्नेरष्टपुरुषस्य। तस्यैषा भवति।
 अग्ने नयं सुपथां राये अस्मान्। विश्वानि देव वयुनानि विद्वान्।
 युयोध्यस्मञ्जुहुराणमेनः। भूयिष्ठां ते नम उक्तिं विधेमेति॥³³॥

[8]

अग्निश्च जातवेदाश्च। सहोजा अजिराप्रभुः। वैश्वानरो नर्यापाश्च।
 पङ्क्तिराधाश्च सप्तमः। विसर्पेवाऽष्टमोऽग्नीनाम्।
 एतेऽष्टौ वसवः, क्षिता इति। यथर्त्वेवाग्नेरर्चिर्वर्णविशेषाः।
 नीलार्चिश्च पीतकार्चिश्चेति। अथ वायोरेकादशपुरुषस्यैकादशस्त्रीकस्य।
 प्रभ्राजमाना व्यवदाताः॥³⁴॥
 याश्च वासुकिवैद्युताः। रजताः परुषाः श्यामाः। कपिला अतिलोहिताः।
 ऊर्ध्वा अवपतन्ताश्च। वैद्युत इत्येकादश। नैनं वैद्युतो हिनस्ति।
 य एवं वेद। स होवाच व्यासः पाराशर्यः।
 विद्युद्वधमेवाहं मृत्युमैच्छमिति। न त्वकामं हन्ति॥³⁵॥
 य एवं वेद। अथ गन्धर्वगणाः। स्वानभ्राट्।
 अङ्घ्रिर्वभ्रारिः। हस्तः सुहस्तः। कृशानुर्विश्वावसुः।
 मूर्धन्वान्तसूर्यवर्चाः। कृतिरित्येकादश गन्धर्वगणाः।
 देवाश्च महादेवाः। रश्मयश्च देवा गरगिरः॥³⁶॥
 नैनं गरो हिनस्ति। य एवं वेद।

गौरी मिमाय सलिलानि तक्षती। एकपदी द्विपदी सा चतुष्पदी।
 अष्टापदी नवपदी बभ्रुवुषी। सहस्राक्षरा परमे व्योमन्निति।
 वाचो विशेषणम्। अथ निगदव्याख्याताः।
 ताननुक्रमिष्यामः। वराहवः स्वतपसः॥³⁷॥
 विद्युन्महसो धूपयः। श्वापयो गृहमेधाश्चेत्येते।
 ये चेमेऽग्निमिविद्विषः। पर्जन्याः सप्त पृथिवीमभिवर्षन्ति।
 वृष्टिभिरिति। एतयैव विभक्तिर्विपरीताः। सप्तभिर्वा तैरुदीरिताः।
 अमृल्लोकानभिवर्षन्ति। तेषामेषा भवति। समानमेतदुदकम्॥³⁸॥
 उच्चैत्यवचाहभिः। भूमिं पर्जन्या जिन्वन्ति। दिवं जिन्वन्त्यग्नय इति।
 यदक्षरं भूतकृतम्। विश्वे देवा उपासन्ते। महर्षिमस्य गोप्तारम्।
 जमदग्निमकुर्वत। जमदग्निराप्यायते।
 छन्दोभिश्चतुरुत्तरैः। राज्ञः सोमस्य तृप्तासः॥³⁹॥
 ब्रह्मणा वीर्यावता। शिवा नः प्रदिशो दिशः।
 तच्छं योरावृणीमहे। गातुं यज्ञाय। गातुं यज्ञपतये।
 दैवीः स्वस्तिरस्तु नः। स्वस्तिर्मानुषेभ्यः। ऊर्ध्वं जिगातु भेषजम्।
 शं नो अस्तु द्विपदे। शं चतुष्पदे।
 सोमपा (3) असोमपा (3) इति निगदव्याख्याताः॥⁴⁰॥

[9]

सहस्रवृद्धियं भूमिः। परं व्योम सहस्रवृत्। अश्विना भुज्यूनासत्या।
 विश्वस्य जगतस्पती। जाया भूमिः पतिर्व्योम। मिथुनन्ता अतुर्यथुः।
 पुत्रो बृहस्पती रुद्रः। सरमा इति स्त्रीपुमम्।
 शुक्रं वामन्यदजतं वामन्यत्। विषुरूपे अहनी द्यौरिव स्थः॥⁴¹॥
 विश्वा हि माया अवन्तः स्वधावन्तो।

भ॒द्रा वा॑ पू॒षणा॑वि॒ह रा॒तिर॑स्तु। वासा॑त्यौ चि॒त्रौ जग॑तो नि॒धानौ॑।
द्यावा॑भूमी च॒रथः॑ स॒ꣳ सखा॑यौ। ताव॑श्चिना॑ रा॒सभा॑श्चा॒ हव॑ मे।
शुभ॑स्प॒ती आ॒गतः॑ सूर्यया॑ स॒ह। त्युग्रो॑ह भुज्युम॑श्चिनोदमे॒धे।
र॒यिं न कश्चि॑न्ममृवां (2) अवा॑हाः। तमू॑हथुर्नो॒भिरा॑त्मन्व॒र्तीभिः॑।
अ॒न्तरि॑क्षप्रु॒ङ्गिरपो॑दकाभिः॥₄₂॥

ति॒स्रः, क्षप॑स्त्रिरहा॑तिव्रज॑द्भिः। नास॑त्या भुज्युमू॑हथुः पत॑ङ्गैः।
स॒मुद्र॑स्य॒ धन्व॑न्ना॒र्द्रस्य॑ पा॒रे। त्रि॒भीरथैः॑ श॒तप॑द्भिः षड॑श्चैः।
स॒वि॒तारं॑ वि॒तन्व॑न्तम्। अनु॑बध्नाति शा॒म्बरः॑। आप॑पूर्ष॒म्बर॑श्चैव।
स॒वि॒तारे॑प॒सोऽभव॑त्। त्य॑ꣳ सु॒तृप्तं॑ वि॒दिद्वै॑व। ब॒हुसो॑म गि॒रं व॑शी॥₄₃॥
अ॒न्वेति॑ तुग्रो व॑क्रिया॒न्तम्। आय॑सू॒यान्त॑सोम॒तृप्सु॑षु। स
स॒ङ्ग्राम॑स्तमो॑द्योऽत्यो॒तः।

वा॒चो गाः॑ पि॒पाति॑ तत्। स तद्गो॑भिः स्तवा॑ऽत्येत्य॒न्ये। र॒क्षसा॑नन्वि॒ताश्च॑ ये।
अ॒न्वेति॑ परि॑वृ॒त्याऽस्तः॑। ए॒वमे॒तौ स्थो॑ अ॒श्विना॑।
ते ए॒ते द्युः॑ पृ॒थि॒व्योः। अ॒ह॒र॒ह॒र्गर्भं॑ दधा॒थे॥₄₄॥

तयो॑रे॒तौ व॒त्साव॑होरा॒त्रे। पृ॒थि॒व्या अ॒हः॑। दि॒वो रा॒त्रिः।
ता अ॒वि॒सृष्टौ॑। द॒म्प॒ती ए॒व भ॑वतः। तयो॑रे॒तौ व॒त्सौ।
अ॒ग्निश्चा॑दि॒त्यश्च॑। रा॒त्रेर्व॒त्सः। श्वे॒त आ॑दि॒त्यः। अ॒होऽग्निः॥₄₅॥

ता॒म्रो अ॑रु॒णः। ता अ॒वि॒सृष्टौ॑। द॒म्प॒ती ए॒व भ॑वतः।
तयो॑रे॒तौ व॒त्सौ। वृ॒त्रश्च॑ वैद्यु॒तश्च॑। अ॒ग्नेर्वृ॒त्रः। वैद्यु॒त आ॑दि॒त्यस्य॑।
ता अ॒वि॒सृष्टौ॑। द॒म्प॒ती ए॒व भ॑वतः। तयो॑रे॒तौ व॒त्सौ॥₄₆॥

उ॒ष्मा च॑ नीहा॒रश्च॑। वृ॒त्रस्यो॒ष्मा। वैद्यु॒तस्य॑ नीहा॒रः।
तौ ता॒वेव॑ प्रति॑पद्येते। से॒यꣳ रा॒त्री ग॒र्भिणी॑ पु॒त्रेण॑ सं॒व॑सति।

तस्या॒ वा ए॒तदु॒त्खण॑म्। यद्रात्रौ॑ र॒श्मयः॑।
यथा॒ गोर्ग॒र्भिण्या॑ उ॒त्खण॑म्। ए॒वमे॒तस्या॑ उ॒त्खण॑म्।
प्रज॑यिष्णुः प्रजया च पशुभिश्च भवति।
य एवं वेद। एतमुद्यन्तमपियन्तं चेति।
आदित्यः पुण्यस्य वत्सः। अथ पवित्राङ्गिरसः॥⁴⁷॥

[10]

प॒वित्र॑वन्तः परि॒वाज॑मास॒ते। पि॒तैषां॑ प्र॒बो अ॒भिर॑क्षति व्रतम्।
म॒हः स॑मु॒द्रं वरु॑णस्तिरोद॒धे। धीरा॑ इच्छे॒कुर्धरु॑णेष्वारभम्।
प॒वित्रं॑ ते॒ वित॑तं ब्रह्म॑णस्पते॒। प्रभु॑र्गात्राणि॒ पर्ये॑षिवि॒श्वतः॑।
अत॑प्ततनू॒र्न तदा॑मो अ॒श्रुते॑। शृ॒तास॒ इद्व॑हन्त॒स्तत्समा॑शत।
ब्र॒ह्मा दे॒वाना॑म्। अ॒स॒तः स॒द्ये तत॑क्षुः॥⁴⁸॥
ऋष॑यः स॒प्तात्रि॑श्च॒ यत्। स॒र्वेऽत्र॑यो अ॒गस्त्य॑श्च।
नक्ष॑त्रैः शङ्क॑तोऽवसन्। अथ॑ स॒वितुः॑ श्यावाश्च॒स्याऽव॑र्तिकामस्य।
अ॒मी य ऋ॑क्षा॒ निहि॑तास उ॒च्चा। नक्तं॑ दद॑श्रे॒ कुह॑चिद्वि॒वैयुः॑।
अद॑ब्धानि॒ वरु॑णस्य व्रतानि॑। वि॒चा॒कश॑च्चन्द्रमा॒ नक्ष॑त्रमेति।
तत्स॑वि॒तुर्वि॑ण्यम्। भर्गो॑ दे॒वस्य॑ धीमहि॥⁴⁹॥
धि॒यो यो नः॑ प्रचो॒दया॑त्। तत्स॑वि॒तुर्वृ॑णीमहे।
व॒यं दे॒वस्य॑ भो॒ज॒नम्। श्रेष्ठ॑ः स॒र्वधा॑त॒मम्।
तुरं॑ भग॑स्य धीमहि। अ॒पा॒गू॒ह॒त स॒विता॒ तृ॒भीन्।
स॒र्वा॒न्दि॒वो अ॒न्ध॑सः। नक्तं॑ ता॒न्य॒भव॑न्द्द॒शे।
अ॒स्थ्य॒श्ना स॒म्भ॑विष्यामः। नाम॒ नामै॒व नाम॑ मै॥⁵⁰॥
नपु॑ंस॒कं पु॒मा॒स्त्य॑स्मि। स्था॒व॒रोऽस्म्य॑थ॒ जङ्ग॑मः।

य॒जेऽय॑क्षि॒ यष्टा॑हे च॑। म॒या भू॑तान्य॒यक्ष॑त।
प॒शवो॑ म॒म भू॑तानि। अ॒नूब॑न्ध्योऽस्म्य॒हं वि॒भुः।
स्त्रियः॑ स॒तीः। ता उ॑मे पु॒ंस आ॑हुः।
प॒थ्यद॑क्ष॒ण्वान्न॑विचे॒तद॒न्धः। क॒विर्यः॑ पु॒त्रः स इ॒मा चि॑केत॥⁵¹॥
यस्ता वि॑जा॒नात्स॑वि॒तुः पि॒तास॑त्। अ॒न्धो म॑णिम॒विन्द॑त्।
तम॑नङ्गुलि॒राव॑यत्। अ॒ग्रीवः॑ प्रत्य॑मु॒धत्।
तम॑जिह्वा अ॒सश्च॑त। ऊ॒र्ध्वमू॑लम॒वाक्छा॒खम्।
वृ॒क्षं यो वेद॑ सम्प्र॑ति। न स जा॒तु जनः॑ श्रद्द॒ध्यात्।
मृ॒त्युर्मा मा॒र्यादि॑तिः। ह॒सित॑ रु॒दितं॑ गी॒तम्॥⁵²॥
वीणा॑पणव॒लासि॑तम्। मृ॒तं जी॒वं च॑ यत्कि॒ञ्चित्।
अ॒ङ्गानि॑ स्ने॒व वि॒द्धि तत्। अ॒तृष्य॑स्तृष्य॒ध्याय॑त्।
अ॒स्माज्जा॒ता मे॑ मि॒थू च॑रन्। पु॒त्रो निर्ऋ॑त्या॒ वैदे॒हः।
अ॒चेता॑ यश्च॒ चेत॑नः। स॒ तं म॑णिम॒विन्द॑त्।
सोऽन॑ङ्गुलि॒राव॑यत्। सोऽ॒ग्रीवः॑ प्रत्य॑मु॒धत्॥⁵³॥
सोऽजि॑ह्वो अ॒सश्च॑त। नै॒तमृ॑षिं वि॒दि॒त्वा न॑गरं प्र॒विशे॑त्।
यदि॑ प्र॒विशे॑त्। मि॒थौ च॑रि॒त्वा प्र॒विशे॑त्।
तत्स॑म्भ॒वस्य॑ व्र॒तम्। आ॒तम॑ग्ने र॒थं ति॑ष्ठ।
एका॑श्चमे॒कयो॑ज॒नम्। ए॒कच॑क्र॒मेक॑धुरम्।
वा॒तध्रा॑जि॒गतिं॑ वि॒भो। न रि॒ष्यति॑ न व्य॒थते॥⁵⁴॥
ना॒स्याक्षो॑ या॒तु स॑ज्जति। यच्छे॒तान् रोहि॑ता॒श्चाग्नेः॑।
र॒थे यु॑क्त्वाऽधि॒तिष्ठ॑ति। ए॒कया॑ च द॒शभि॑श्च॒ स्वभू॑ते।
द्वा॒भ्यामि॑ष्टये वि॒शत्या॑ च। ति॒सृभि॑श्च वह॒से त्रि॑श॒ता च॑।

आत॑नुष्व॒ प्रत॑नुष्व। उ॒द्धम्ऽऽध॑म् सन्ध॑म्।
 आ॒दित्ये॑ च॒न्द्रव॑र्णानाम्। गर्भ॑माधेहि॒ यः पु॒मान्।
 इ॒तः सि॒क्तः सूर्य॑गतम्। च॒न्द्रम॑से॒ रसं॑ कृधि।
 वा॒रादं॑ ज॒नया॑ग्रेऽग्निम्। य ए॒को रु॒द्र उच्य॑ते।
 अ॒स॒ङ्ख्या॒ताः स॑हस्रा॒णि। स्म॒र्यते॑ न च दृ॒श्यते॑॥⁵⁶॥
 ए॒वमे॒तं नि॑बोधत। आ॒म॒न्द्रैरि॑न्द्र॒ हरि॑भिः।
 या॒हि म॒यूर॑रोमभिः। मा त्वा केचि॒न्नियेमु॑रि॒न्न पा॒शिनः॑।
 द॒ध॒न्वेव॒ ता इ॑हि। मा म॒न्द्रैरि॑न्द्र॒ हरि॑भिः।
 या॒मि म॒यूर॑रोमभिः। मा मा केचि॒न्नियेमु॑रि॒न्न पा॒शिनः॑।
 नि॒ध॒न्वेव॒ तां (2) इ॑मि। अ॒णुभि॑श्च म॒हद्भि॑श्च॥⁵⁷॥
 नि॒घृष्वै॑र॒स॒मायु॑तैः। का॒लैर्हरि॑त्वंमाप॒न्नैः।
 इ॒न्द्रऽऽया॑हि स॒हस्र॑युक्। अ॒ग्निर्वि॒भ्राष्टि॑वसनः।
 वा॒युः श्वे॑त॒सिक॑द्रुकः। स॒व॒त्स॒रो वि॑षू॒वर्णैः॑।
 नित्या॒स्तेऽनु॑च॒रास्त॒व। सु॒ब्रह्म॑ण्योः सु॒ब्रह्म॑ण्योः सु॒ब्रह्म॑ण्योम्।
 इ॒न्द्रऽऽग॑च्छ॒ हरि॑व आ॒गच्छ॑ मे॒धाति॑थेः। मे॒ष वृ॑षणश्च॒स्य मे॒ने॥⁵⁸॥
 गो॒राव॑स्क॒न्दिन्न॑ह॒त्यायै॑ जा॒र। कौ॒शिक॑ब्रा॒ह्मण॑ गौ॒तम॑ब्रुवा॒ण।
 अ॒रु॒णाश्वा॑ इ॒हाग॑ताः। व॒स॒वः पृ॑थि॒वि॒क्षितः॑।
 अ॒ष्टौ दि॒ग्वास॑सोऽ॒ग्नयः॑। अ॒ग्निश्च॑ जा॒तवे॑दाश्चे॒त्येते॑।
 ता॒म्राश्वा॑स्ता॒म्रर॒थाः। ता॒म्रव॑र्णास्तथाऽ॒सिताः॑।
 द॒ण्डह॑स्ताः॒ खाद॑ग्दतः। इ॒तो रु॒द्राः प॑राङ्ग॒ताः॥⁵⁹॥
 उ॒क्तः स्थानं॑ प्र॒माणं॑ च॒ पुर॒ इ॒त। बृ॒ह॒स्पति॑श्च स॒विता॑ च।

वि॒श्वरू॑पैरि॒हऽऽग॑ताम्। रथे॑नोदक॒वर्त्म॑ना।
 अ॒प्सुषा॑ इति॒ तद्व॑योः। उ॒क्तो वे॑षो वासा॒ऽसि च।
 का॒लाव॑यवानामि॒तः प्र॑ती॒ज्या। वासा॑त्या इत्य॒श्विनोः।
 कोऽन्तरि॑क्षे शब्दं क॑रोतीति। वा॒सि॒ष्ठो रौ॑हि॒णो मी॑मा॒ऽसां च॒क्रे।
 तस्यै॒षा भ॑वति। वा॒श्रेव॑ वि॒द्युदि॑ति।
 ब्र॒ह्म॑ण उ॒दर॑णमसि। ब्र॒ह्म॑ण उ॒दी॒रण॑मसि।
 ब्र॒ह्म॑ण आ॒स्तर॑णमसि। ब्र॒ह्म॑ण उ॒प॒स्तर॑णमसि॥⁶⁰

[12]

[अ॒प॒क्राम॑त गर्भि॒ण्यः]
 अ॒ष्टयो॑नीम॒ष्टपु॑त्राम्। अ॒ष्टप॑त्नीमि॒मां म॒हीम्।
 अ॒हं वे॒द न मे॑ मृत्युः। न चा॒मृत्यु॑र॒घाऽऽह॑रत्।
 अ॒ष्टयो॑न्य॒ष्टपु॑त्रम्। अ॒ष्टप॑दि॒दम॒न्तरि॑क्षम्।
 अ॒हं वे॒द न मे॑ मृत्युः। न चा॒मृत्यु॑र॒घाऽऽह॑रत्।
 अ॒ष्टयो॑नीम॒ष्टपु॑त्राम्। अ॒ष्टप॑त्नीम॒मूं दि॒वम्॥⁶¹॥
 अ॒हं वे॒द न मे॑ मृत्युः। न चा॒मृत्यु॑र॒घाऽऽह॑रत्।
 सु॒त्रा॒मा॒णं म॒ही॒मू षु। अ॒दि॒तिर्द्यौ॑र॒दि॒तिर॒न्तरि॑क्षम्।
 अ॒दि॒तिर्मा॒ता स पि॒ता स पु॒त्रः। वि॒श्वे दे॒वा अ॒दि॒तिः प॒ञ्च॒जनाः॑।
 अ॒दि॒तिर्जा॒तम॒दि॒तिर्ज॒नि॒ब॒म्। अ॒ष्टौ पु॒त्रा॒सो अ॒दि॒तेः।
 ये जा॒तास्त॒न्वः परि॑। दे॒वां (2) उ॒प॒प्रै॒त्स॒प्तभिः॑॥⁶²॥
 प॒रा मा॒र्ता॒ण्डमा॑स्यत्। स॒प्तभिः॑ पु॒त्रैर॒दि॒तिः।
 उ॒प॒प्रै॒त्पू॒र्व्यं यु॒गम्। प्र॒जायै॑ मृत्यवे त॑त्।
 प॒रा मा॒र्ता॒ण्डमा॑भ॒र॒दि॒तिः। ता॒ननु॑क्र॒मिष्या॑मः।
 मि॒त्रश्च॒ वरु॑णश्च। धा॒ता चा॑र्य॒मा च॑।

अ॒श॒श्च॒ भ॒ग॒श्च॒। इ॒न्द्रश्च॒ वि॒वस्वा॑श्चे॒त्ये॒ते।

हि॒र॒ण्य॒ग॒र्भो॑ ह॒सः शु॒चि॒षत्।

ब्र॒ह्म॑ज॒ज्ञानं॑ तदि॒त्प॒दमि॑ति। ग॒र्भः प्रा॑जाप॒त्यः।

अथ॒ पु॒रु॒षः स॒प्त पु॒रु॒षः॥⁶³॥

[य॒था॒स्थानं॑ ग॒र्भि॒ण्यः]

[13]

योऽसौ॑ त॒प॒न्नु॒देति॑। स॒ सर्व॑ेषां भू॒तानां॑ प्रा॒णाना॒दायो॒देति॑।

मा॒ मै॒ प्र॒जाया॒ मा प॑शूनाम्। मा॒ मम॑ प्रा॒णाना॒दायो॒द॒गाः।

अ॒सौ योऽस्त॑मेति॑। स॒ सर्व॑ेषां भू॒तानां॑ प्रा॒णाना॒दाया॒ऽस्तमे॑ति॑।

मा॒ मै॒ प्र॒जाया॒ मा प॑शूनाम्। मा॒ मम॑ प्रा॒णाना॒दाया॒ऽस्त॑ङ्गाः।

अ॒सौ य॒ आपू॑र्यति॑। स॒ सर्व॑ेषां भू॒तानां॑ प्रा॒णैरा॒पूर्य॑ति॥⁶⁴॥

मा॒ मै॒ प्र॒जाया॒ मा प॑शूनाम्। मा॒ मम॑ प्रा॒णैरा॒पू॒रि॒ष्ठाः।

अ॒सौ योऽप॑क्षीयति॑। स॒ सर्व॑ेषां भू॒तानां॑ प्रा॒णैरप॑क्षीयति॑।

मा॒ मै॒ प्र॒जाया॒ मा प॑शूनाम्। मा॒ मम॑ प्रा॒णैरप॑क्षे॒ष्ठाः।

अ॒मू॒नि नक्ष॑त्राणि। स॒र्व॑ेषां भू॒तानां॑ प्रा॒णैरप॑प्रस॒र्पन्ति॒ चोत्स॑र्पन्ति॒ च।

मा॒ मै॒ प्र॒जाया॒ मा प॑शूनाम्। मा॒ मम॑ प्रा॒णैरप॑प्रसृ॒पत् मोत्सृ॑पत्॥⁶⁵॥

इ॒मे मा॒सांश्चा॑र्धमा॒साश्च॑। स॒र्व॑ेषां भू॒तानां॑ प्रा॒णैरप॑प्रस॒र्पन्ति॒ चोत्स॑र्पन्ति॒ च।

मा॒ मै॒ प्र॒जाया॒ मा प॑शूनाम्। मा॒ मम॑ प्रा॒णैरप॑प्रसृ॒पत् मोत्सृ॑पत्।

इ॒म ऋ॒तवः॑। स॒र्व॑ेषां भू॒तानां॑ प्रा॒णैरप॑प्रस॒र्पन्ति॒ चोत्स॑र्पन्ति॒ च।

मा॒ मै॒ प्र॒जाया॒ मा प॑शूनाम्। मा॒ मम॑ प्रा॒णैरप॑प्रसृ॒पत् मोत्सृ॑पत्।

अ॒य॒ सं॒वत्स॑रः। स॒र्व॑ेषां भू॒तानां॑ प्रा॒णैरप॑प्रस॒र्पति॒ चोत्स॑र्पति॒ च॥⁶⁶॥

मा मै॑ प्र॒जाया॒ मा प॑शूनाम्। मा मम॑ प्रा॒णैरप॑प्रसृप॒ मोत्सृ॑प।
इ॒दम॑हः। सर्वे॑षां भू॒ताना॑ प्रा॒णैरप॑प्रस॒र्पति॒ चोत्स॑र्पति च।
मा मै॑ प्र॒जाया॒ मा प॑शूनाम्। मा मम॑ प्रा॒णैरप॑प्रसृप॒ मोत्सृ॑प।
इ॒यं रा॒त्रिः। सर्वे॑षां भू॒ताना॑ प्रा॒णैरप॑प्रस॒र्पति॒ चोत्स॑र्पति च।
मा मै॑ प्र॒जाया॒ मा प॑शूनाम्। मा मम॑ प्रा॒णैरप॑प्रसृप॒ मोत्सृ॑प।
ॐ भूर्भुवः॒ स्वः। ए॒तद्वो मि॒थुनं॑ मा नो मि॒थुनं॑ री॒द्वम्॥⁶⁷॥

[14]

अथ॑ऽऽदि॒त्यस्या॑ष्टपुरुष॒स्य।
वसू॑नामादि॒त्यानाः॑ स्था॒ने स्व॑तेजसा भ॒नि।
रु॒द्राणा॑मादि॒त्यानाः॑ स्था॒ने स्व॑तेजसा भ॒नि।
आ॒दि॒त्याना॑मादि॒त्यानाः॑ स्था॒ने स्व॑तेजसा भ॒नि।
स॒तां स॒त्याना॑म्। आ॒दि॒त्यानाः॑ स्था॒ने स्व॑तेजसा भ॒नि।
अ॒भिधू॑न्वता॒मभि॒घ्नता॑म्। वा॒तव॑तां म॒रुता॑म्।
आ॒दि॒त्यानाः॑ स्था॒ने स्व॑तेजसा भ॒नि।
ऋ॒भूणा॑मादि॒त्यानाः॑ स्था॒ने स्व॑तेजसा भ॒नि।
वि॒श्वेष्वा॑ दे॒वाना॑म्। आ॒दि॒त्यानाः॑ स्था॒ने स्व॑तेजसा भ॒नि।
सं॒वत्स॑रस्य स॒वितुः॑। आ॒दि॒त्यस्य॑ स्था॒ने स्व॑तेजसा भ॒नि।
ॐ भूर्भुवः॒ स्वः। र॒श्मयो॑ वो मि॒थुनं॑ मा नो मि॒थुनं॑ री॒द्वम्॥⁶⁸॥

[15]

आ॒रोग॑स्य स्था॒ने स्व॑तेजसा भ॒नि। भ्रा॒जस्य॑ स्था॒ने स्व॑तेजसा भ॒नि।
प॒टर॑स्य स्था॒ने स्व॑तेजसा भ॒नि। प॒तङ्ग॑स्य स्था॒ने स्व॑तेजसा भ॒नि।
स्व॒र्णर॑स्य स्था॒ने स्व॑तेजसा भ॒नि। ज्यो॒तिषी॑मतस्य स्था॒ने स्व॑तेजसा भ॒नि।
वि॒भास॑स्य स्था॒ने स्व॑तेजसा भ॒नि। क॒श्यप॑स्य स्था॒ने स्व॑तेजसा भ॒नि।

अथ वायोरेकादशपुरुषस्यैकादशस्त्रीकस्य।
प्रभ्राजमानानां रुद्राणां स्थाने स्वतेजसा भानि।
व्यवदातानां रुद्राणां स्थाने स्वतेजसा भानि।
वासुकिवैद्युतानां रुद्राणां स्थाने स्वतेजसा भानि।
रजतानां रुद्राणां स्थाने स्वतेजसा भानि।
परुषाणां रुद्राणां स्थाने स्वतेजसा भानि।
श्यामानां रुद्राणां स्थाने स्वतेजसा भानि।
कपिलानां रुद्राणां स्थाने स्वतेजसा भानि।
अतिलोहितानां रुद्राणां स्थाने स्वतेजसा भानि।
ऊर्ध्वानां रुद्राणां स्थाने स्वतेजसा भानि॥⁷⁰॥
अवपतन्तानां रुद्राणां स्थाने स्वतेजसा भानि।
वैद्युतानां रुद्राणां स्थाने स्वतेजसा भानि।
प्रभ्राजमानीनां रुद्राणीनां स्थाने स्वतेजसा भानि।
व्यवदातीनां रुद्राणीनां स्थाने स्वतेजसा भानि।
वासुकिवैद्युतीनां रुद्राणीनां स्थाने स्वतेजसा भानि।
रजतानां रुद्राणीनां स्थाने स्वतेजसा भानि।
परुषाणां रुद्राणीनां स्थाने स्वतेजसा भानि।
श्यामानां रुद्राणीनां स्थाने स्वतेजसा भानि।
कपिलानां रुद्राणीनां स्थाने स्वतेजसा भानि।
अतिलोहितीनां रुद्राणीनां स्थाने स्वतेजसा भानि।
ऊर्ध्वानां रुद्राणीनां स्थाने स्वतेजसा भानि।

अवपतन्तीनाः रुद्राणीनाः स्थाने स्वतेजसा भानि।
वैद्युतीनाः रुद्राणीनाः स्थाने स्वतेजसा भानि।
ॐ भूर्भुवः स्वः। रूपाणि वो मिथुनं मा नो मिथुनं रीद्वम्॥⁷¹॥

[17]

अथाग्नेरष्टपुरुषस्य।

अग्नेः पूर्वदिश्यस्य स्थाने स्वतेजसा भानि।
जातवेदस उपदिश्यस्य स्थाने स्वतेजसा भानि।
सहोजसो दक्षिणदिश्यस्य स्थाने स्वतेजसा भानि।
अजिराप्रभव उपदिश्यस्य स्थाने स्वतेजसा भानि।
वैश्वानरस्यापरदिश्यस्य स्थाने स्वतेजसा भानि।
नर्यापस उपदिश्यस्य स्थाने स्वतेजसा भानि।
पङ्क्तिराधस उदग्दिश्यस्य स्थाने स्वतेजसा भानि।
विसर्पिण उपदिश्यस्य स्थाने स्वतेजसा भानि।
ॐ भूर्भुवः स्वः। दिशो वो मिथुनं मा नो मिथुनं रीद्वम्॥⁷²॥

[18]

दक्षिणपूर्वस्यां दिशि विसर्पी नरकः। तस्मान्नः परिपाहि।
दक्षिणापरस्यां दिश्यविसर्पी नरकः। तस्मान्नः परिपाहि।
उत्तरपूर्वस्यां दिशि विषादी नरकः। तस्मान्नः परिपाहि।
उत्तरापरस्यां दिश्यविषादी नरकः। तस्मान्नः परिपाहि।
आ यस्मिन्त्सप्त वासवा इन्द्रियाणि शतक्रतवित्येते॥⁷³॥

[19]

इन्द्रघोषा वो वसुभिः पुरस्तादुपदधताम्।
मनोजवसो वः पितृभिर्दक्षिणत उपदधताम्।
प्रचेता वो रुद्रैः पश्चादुपदधताम्।

वि॒श्वक॑र्मा व आ॒दि॒त्यैरु॑त्तर॒त उ॑प॒दध॑ताम्।
 त्वष्टा॑ वो रू॒पैरु॑परि॒ष्टादु॑प॒दध॑ताम्।
 संज्ञा॑नं वः प॑श्चादि॒ति। आ॒दि॒त्यः सर्वो॑ऽग्निः पृ॒थि॒व्याम्।
 वा॒युर॒न्तरि॑क्षे। सूर्यो॑ दि॒वि। च॒न्द्रमा॑ दि॒क्षु।
 नक्ष॑त्राणि स्व॒लो॒के। ए॒वा ह्ये॑व। ए॒वा ह्य॑ग्ने।
 ए॒वा हि वा॑यो। ए॒वा ही॑न्द्र। ए॒वा हि पू॑षन्। ए॒वा हि दे॑वाः॥ 74 ॥

[20]

आप॑मापाम॒पः सर्वाः॑। अ॒स्माद॒स्मादि॒तोऽमु॑तः।
 अ॒ग्निर्वा॒युश्च॒ सूर्य॑श्च। स॒ह स॑ध॒स्कर॑र्द्धिया।
 वा॒य्वश्चा॑ रश्मि॒पत॑यः। मरी॑च्यात्मानो अ॒द्भुहः॑।
 दे॒वीर्भु॑वन॒सूव॑रीः। पु॒त्रव॒त्वाय॑ मे सु॒त।
 म॒हाना॑ग्नीर्म॒हामा॑नाः। म॒ह॒सो म॑ह॒सः स्वः॑॥ 75 ॥
 दे॒वीः प॑र्जन्य॒सूव॑रीः। पु॒त्रव॒त्वाय॑ मे सु॒त।
 अ॒पाश्र्यु॑ष्णिम॒पा रक्षः॑। अ॒पाश्र्यु॑ष्णिम॒पार॑घम्।
 अपा॑घ्रा॒मप॑चा॒वर्ति॑म्। अप॑दे॒वीरि॒तो हि॑त।
 वज्रं॑ दे॒वीर॑जी॒ताः॒श्च। भु॑वनं दे॒वसू॑व॒रीः।
 आ॒दि॒त्यान॑दि॒तिं दे॒वीम्। योनि॑नोर्ध्वमु॒दी॒षत॑॥ 76 ॥
 भ॒द्रं क॑र्णेभिः शृणु॒याम॑ दे॒वाः। भ॒द्रं प॑श्येमा॒क्षभि॑र्यज॒त्राः।
 स्थि॒रैरङ्गै॑स्तुष्टुवाꣳ स॑स्त॒नूभिः॑। व्य॒शेम॑ दे॒वहि॑तं यदायुः।
 स्व॒स्ति न॒ इन्द्रो॑ वृ॒द्धश्र॑वाः। स्व॒स्ति नः॑ पू॒षा वि॒श्ववे॑दाः।
 स्व॒स्ति न॒स्ताक्ष्यो॑ अरि॒ष्टने॑मिः। स्व॒स्ति नो॒ बृह॑स्पति॒र्दधा॑तु।
 के॒तवो॑ अरु॒णास॑श्च। ऋ॒षयो॑ वा॒तर॑श्नाः।

प्रतिष्ठा० शतधा॑ हि। समाहि॑तासो सहस्र॒धाय॑सम्।
शि॒वा नः॑ शन्त॑मा भवन्तु। दि॒व्या आप॒ ओष॑धयः।
सुमृ॒डीका॑ सर॑स्वति। मा ते व्यो॑म स॒न्दृशि॑॥⁷⁷॥

[21]

योऽपां पुष्पं वेद॑। पुष्प॑वान् प्र॒जावा॑न् पशु॒मान् भ॑वति।
च॒न्द्रमा॒ वा अ॒पां पुष्प॑म्। पुष्प॑वान् प्र॒जावा॑न् पशु॒मान् भ॑वति।
य ए॒वं वेद॑। योऽपामा॒यत॑नं वेद॑।
आ॒यत॑नवान् भवति। अ॒ग्निर्वा अ॒पामा॒यत॑नम्।
आ॒यत॑नवान् भवति। योऽग्ने॒राय॑तनं वेद॑॥⁷⁸॥
आ॒यत॑नवान् भवति। आपो॒ वा अ॒ग्नेरा॒यत॑नम्।
आ॒यत॑नवान् भवति। य ए॒वं वेद॑।
योऽपामा॒यत॑नं वेद॑। आ॒यत॑नवान् भवति।
वा॒युर्वा अ॒पामा॒यत॑नम्। आ॒यत॑नवान् भवति।
यो वा॒योरा॒यत॑नं वेद॑। आ॒यत॑नवान् भवति॥⁷⁹॥
आपो॒ वै वा॒योरा॒यत॑नम्। आ॒यत॑नवान् भवति।
य ए॒वं वेद॑। योऽपामा॒यत॑नं वेद॑।
आ॒यत॑नवान् भवति। अ॒सौ वै तप॑न्न॒पामा॒यत॑नम्।
आ॒यत॑नवान् भवति। योऽमु॒ष्य तप॑त आ॒यत॑नं वेद॑।
आ॒यत॑नवान् भवति। आपो॒ वा अ॒मुष्य॒ तप॑त आ॒यत॑नम्॥⁸⁰॥
आ॒यत॑नवान् भवति। य ए॒वं वेद॑।
योऽपामा॒यत॑नं वेद॑। आ॒यत॑नवान् भवति।
च॒न्द्रमा॒ वा अ॒पामा॒यत॑नम्। आ॒यत॑नवान् भवति।
यश्च॒न्द्रम॑स आ॒यत॑नं वेद॑। आ॒यत॑नवान् भवति।

आपो॒ वै च॒न्द्रम॑स आ॒यत॑नम्। आ॒यत॑नवान् भवति॥⁸¹॥

य ए॒वं वेद॑। योऽपामा॒यत॑नं वेद॑।

आ॒यत॑नवान् भवति। नक्ष॑त्राणि वा अ॒पामा॒यत॑नम्।

आ॒यत॑नवान् भवति। यो नक्ष॑त्राणामा॒यत॑नं वेद॑।

आ॒यत॑नवान् भवति। आपो॒ वै नक्ष॑त्राणामा॒यत॑नम्।

आ॒यत॑नवान् भवति। य ए॒वं वेद॑॥⁸²॥

योऽपामा॒यत॑नं वेद॑। आ॒यत॑नवान् भवति।

पर्जन्यो॒ वा अ॒पामा॒यत॑नम्। आ॒यत॑नवान् भवति।

यः पर्जन्य॑स्यऽऽय॒तनं॑ वेद॑। आ॒यत॑नवान् भवति।

आपो॒ वै पर्जन्य॑स्यऽऽय॒तनम्॑। आ॒यत॑नवान् भवति।

य ए॒वं वेद॑। योऽपामा॒यत॑नं वेद॑॥⁸³॥

आ॒यत॑नवान् भवति। सं॒वत्स॒रो वा अ॒पामा॒यत॑नम्।

आ॒यत॑नवान् भवति। यः सं॒वत्स॒रस्य॑ऽऽय॒तनं॑ वेद॑।

आ॒यत॑नवान् भवति। आपो॒ वै सं॒वत्स॒रस्य॑ऽऽय॒तनम्॑।

आ॒यत॑नवान् भवति। य ए॒वं वेद॑।

योऽप्सु॑ ना॒वं प्र॑ति॒ष्ठितां॑ वेद॑। प्र॒त्ये॒व ति॑ष्ठति॥⁸⁴॥

इ॒मे वै लो॒का अ॒प्सु प्र॑ति॒ष्ठिताः॑। तदे॒षाऽभ्य॑नू॒क्ता।

अ॒पाꣳ र॑स॒मुद॑यꣳसन्। सूर्ये॑ शु॒क्रꣳ स॒माभृ॑तम्।

अ॒पाꣳ र॑स॒स्य यो र॑सः। तं वो॑ गृह्णाम्यु॒त्तम॑मिति।

इ॒मे वै लो॒का अ॒पाꣳ र॑सः। तेऽमु॒ष्मिन्ना॑दि॒त्ये स॒माभृ॑ताः।

जा॒नु॒द॒घ्नीमु॑त्तर॒वेदीं॑ खा॒त्वा। अ॒पां पू॑रयि॒त्वा गु॑ल्फ॒द॒घ्नम्॥⁸⁵॥

पुष्कर॑पर्णेः पुष्कर॑दण्डैः पुष्करैश्च॑ सङ्॒स्तीर्य॑। तस्मि॑न्विहाय॒से।

अ॒ग्निं प्र॒णीयो॑प॒समा॒धाय॑। ब्र॒ह्म॒वा॒दिनो॑ वदन्ति।
 कस्मा॑त्प्र॒णीते॒ऽयम॒ग्निश्ची॒यते॑। साप्र॑णी॒तेऽयम॒प्सु ह्य॑यं ची॒यते॑।
 अ॒सौ भुव॑ने॒प्यना॑हिता॒ग्निरे॒ताः। तम॒भित॑ ए॒ता अ॒बीष्ट॑का॒ उप॑दधाति।
 अ॒ग्निहो॒त्रे दर्श॑पूर्णमा॒सयोः॑। प॒शुब॒न्धे चा॑तुर्मा॒स्येषु॑॥⁸⁶॥

अथो॑ आहुः। सर्वेषु यज्ञक्रतुष्विति।
 ए॒तद्ध॑ स्म॒ वा आ॑हुः शण्डि॒लाः। कम॒ग्निं चि॑नुते।
 स॒त्रियम॒ग्निं चि॑न्वानः। सं॒वत्सरं॑ प्र॒त्यक्षे॑ण।
 कम॒ग्निं चि॑नुते। सा॒वित्रम॒ग्निं चि॑न्वानः।
 अ॒मुमा॑दित्यं प्र॒त्यक्षे॑ण। कम॒ग्निं चि॑नुते॥⁸⁷॥
 ना॒चिके॒तम॒ग्निं चि॑न्वानः।
 प्रा॒णान्प्र॒त्यक्षे॑ण। कम॒ग्निं चि॑नुते। चा॒तुर्हो॒त्रियम॒ग्निं चि॑न्वानः।
 ब्र॒ह्म प्र॒त्यक्षे॑ण। कम॒ग्निं चि॑नुते। वै॒श्वसृ॒जम॒ग्निं चि॑न्वानः।
 शरी॑रं प्र॒त्यक्षे॑ण। कम॒ग्निं चि॑नुते। उ॒पा॒नुवा॒क्यमा॒शुम॒ग्निं चि॑न्वानः॥⁸⁸॥
 इ॒माँल्लो॒कान्प्र॒त्यक्षे॑ण। कम॒ग्निं चि॑नुते।
 इ॒ममा॑रुणकेतुकम॒ग्निं चि॑न्वान इति। य ए॒वासौ॑।
 इ॒तश्चा॒ऽमुत॑श्चा॒ऽव्यती॑पाती। तमिति॑।
 यो॑ऽग्नेर्मिथूया वेद॑। मि॒थुन॒वान्भ॑वति।
 आपो॑ वा अ॒ग्नेर्मिथू॑याः। मि॒थुन॒वान्भ॑वति। य ए॒वं वेद॑॥⁸⁹॥

[22]

आपो॒ वा इ॒दमा॑सन्त्सलिलमे॒व। स प्र॒जाप॑तिरेकः पुष्कर॒पर्णे॑ सम॑भवत्।
 तस्यान्त॑र्मन॑सि कामः॒ सम॑वर्तत। इ॒दं सृ॑जेयमिति॑।
 तस्मा॑द्यत्पुरु॑षो मन॑साऽभि॒गच्छ॑ति। तद्वा॒चा व॑दति।

तत्कर्मणा करोति। तदेषाऽभ्यनूक्ता।

कामस्तदग्रे समवर्तताधि। मनसो रेतः प्रथमं यदासीत्॥⁹⁰॥

सतो बन्धुमसति निरविन्दन्। हृदि प्रतीष्या कवयो मनीषेति।

उपैनन्तदुपनमति। यत्कामो भवति। य एवं वेद।

स तपोऽतप्यत। स तपस्तप्त्वा। शरीरमधूनुत। तस्य यन्माऽसमासीत्।

ततोऽरुणाः केतवो वातरशना ऋषय उदतिष्ठन्॥⁹¹॥

ये नखाः। ते वैखानसाः। ये वालाः। ते वालखिल्याः।

यो रसः। सोऽपाम्। अन्तरतः कूर्मं भूतः सर्पन्तम्।

तमब्रवीत्। मम वैबद्धाऽसा। समभूत्॥⁹²॥

नेत्यब्रवीत्। पूर्वमेवाहमिहासमिति।

तत्पुरुषस्य पुरुषत्वम्। स सहस्रशीर्षा पुरुषः।

सहस्राक्षः सहस्रपात्। भूबोदतिष्ठत्।

तमब्रवीत्। त्वं वै पूर्वः समभूः।

त्वमिदं पूर्वः कुरुष्वेति। स इत आदायापः॥⁹³॥

अञ्जलिना पुरस्तादुपादधात्। एवाह्येवेति।

तत आदित्य उदतिष्ठत्। सा प्राची दिक्।

अथाऽरुणः केतुर्दक्षिणत उपादधात्।

एवाह्यग्न इति। ततो वा अग्निरुदतिष्ठत्।

सा दक्षिणा दिक्। अथारुणः केतुः पश्चादुपादधात्।

एवा हि वायो इति॥⁹⁴॥

ततो वायुरुदतिष्ठत्। सा प्रतीची दिक्।

अथारुणः केतुरुत्तरत उपादधात्। एवाहीन्द्रेति।

ततो॒ वा इन्द्र॒ उद॑तिष्ठत्। सोदी॑ची दिक्।
 अथा॑रुणः के॒तुर्मध्यं॑ उ॒पाद॑धात्। ए॒वा हि पू॑ष॒न्निति॑।
 ततो॒ वै पू॑षोदतिष्ठत्। सेयं दिक्॥⁹⁵॥
 अथा॑रुणः के॒तुरु॒परि॑ष्टादु॒पाद॑धात्। ए॒वा हि दे॒वा इति॑।
 ततो॑ दे॒वमनु॑ष्याः पि॒तरः॑। ग॒न्धर्वा॑प्स॒रस॒श्चोद॑तिष्ठन्।
 सो॒र्ध्वा दिक्। या वि॒प्रुषो॑ वि॒परा॑पतन्।
 ताभ्योऽसु॑रा रक्षा॑सि पिशा॒चाश्चोद॑तिष्ठन्। तस्मा॒त्ते परा॑भवन्।
 वि॒प्रुङ्क्षो॒ हि ते सम॑भवन्। तदे॒षाऽभ्यनू॑क्ता॥⁹⁶॥
 आपो॑ ह॒ यद्धृ॑हतीर्गर्भ॒माय॑न्। दक्षं॒ दधा॑ना ज॒नय॑न्तीः स्वय॒म्भुम्।
 तत॑ इ॒मेध्य॑सृज्यन्त॒ सर्गाः॑। अ॒द्भ्यो वा इ॒दं सम॑भूत्।
 तस्मा॑दि॒दं सर्वं॑ ब्र॒ह्म स्वय॑म्भ्विति॑।
 तस्मा॑दि॒दं सर्वं॑ शिथि॑लमि॒वाऽध्रु॑वमि॒वाभव॑त्।
 प्र॒जाप॑तिर्वा॒व तत्। आ॒त्मना॒ऽऽत्मानं॑ वि॒धाय॑।
 तदे॒वानु॑प्रावि॑शत्। तदे॒षाऽभ्यनू॑क्ता॥⁹⁷॥
 वि॒धाय॑ लो॒कान् वि॒धाय॑ भू॒तानि॑। वि॒धाय॑ सर्वाः॑ प्र॒दिशो॒ दिश॑श्च।
 प्र॒जाप॑तिः प्रथम॒जा ऋ॑तस्य॑। आ॒त्मना॒ऽऽत्मानं॑म॒भि संवि॑वेशेति॑।
 सर्व॑मे॒वेद॑मा॒त्वा। सर्व॑मव॒रुध्य॑।
 तदे॒वानु॑प्रवि॑शति। य ए॒वं वेद॑॥⁹⁸॥

[23]

चतु॑ष्टय्य॒ आपो॑ गृह्णाति। च॒त्वारि॒ वा अ॒पां रू॒पाणि॑।
 मेघो॑ वि॒द्युत्। स्त॒नयि॑तुर्वृष्टिः। तान्ये॒वावरु॑न्धे।
 आ॒तप॑ति॒ वर्ष्या॑ गृह्णाति। ताः पु॒रस्ता॒दुप॑दधाति।
 ए॒ता वै ब्र॑ह्मवर्च॒स्या आपः॑। मु॒खत॑ ए॒व ब्र॑ह्मवर्च॒समव॑रुन्धे।

तस्मा॑न्मुख॒तो ब्र॑ह्मवर्च॒सित॑रः॥⁹⁹॥

कू॒प्या गृ॑ह्णाति। ता दक्षि॑णत॒ उप॑दधाति।

ए॒ता वै ते॑ज॒स्विनी॒रापः॑। तेज॑ ए॒वास्य॑ दक्षि॑णतो द॑धाति।

तस्मा॑दक्षि॒णोऽर्ध॑स्तेज॒स्वित॑रः। स्था॒वरा गृ॑ह्णाति।

ताः प॒श्चादु॑प॒दधा॑ति। प्र॒ति॑ष्ठिता॒ वै स्था॑वराः।

प॒श्चादे॒व प्र॒ति॑तिष्ठति। वह॑न्तीर्गृह्णाति॥¹⁰⁰॥

ता उ॑त्तर॒त उप॑दधाति। ओज॑सा॒ वा ए॒ता वह॑न्तीरि॒वोद॑तीरि॒व आ॒कूज॑तीरि॒व धा॑वन्तीः।

ओज॑ ए॒वास्यो॑त्तर॒तो द॑धाति। तस्मा॑दुत्त॒रोऽर्ध॑ ओज॒स्वित॑रः।

स॒म्भार्या॑ गृ॑ह्णाति। ता मध्य॒ उप॑दधाति।

इ॒यं वै स॑म्भार्याः। अ॒स्यामे॒व प्र॒ति॑तिष्ठति।

प॒त्न्या गृ॑ह्णाति। ता उ॒परि॑ष्ठादु॒पाद॑धाति॥¹⁰¹॥

अ॒सौ वै प॑त्न्याः। अ॒मुष्या॑मे॒व प्र॒ति॑तिष्ठति।

दि॒क्षूप॑दधाति। दि॒क्षु वा आपः॑।

अ॒न्नं वा आपः॑। अ॒द्भ्यो वा अ॒न्नं जा॑यते।

यदे॒वाद्भ्यो॑ऽन्नं जा॑यते। तद॑व॒रुन्धे॑।

तं वा ए॒तम॑रु॒णाः के॒तवो॒ वात॑र॒शना॑ ऋष॑योऽचि॒न्वन्।

तस्मा॑दा॒रुण॑के॒तुकः॑॥¹⁰²॥

तदे॒षाऽभ्य॑नू॒क्ता। के॒तवो॒ अरु॑णासश्च।

ऋष॑यो वात॑र॒शनाः॑। प्र॒ति॑ष्ठा॒ शत॑धा॒ हि।

स॒माहि॑तासो स॒हस्र॑धा॒यस॑मिति। श॒तश॑श्चै॒व स॒हस्र॑शश्च॒ प्र॒ति॑तिष्ठति।

य ए॒तम॑ग्निं चि॑नुते। य उ॑चै॒नमे॒वं वेद॑॥¹⁰³॥

जा॒नु॒द॒घ्नीमु॒त्तर॒वे॒दीं खा॒त्वा। अ॒पां पू॒रय॑ति।
 अ॒पाः स॑र्व॒त्वाय॑। पु॒ष्कर॒पर्णः॑ रु॒क्मं पु॒रुष॑मित्युप॑दधाति।
 तपो॒ वै पु॑ष्कर॒पर्णम्। स॒त्यः रु॒क्मः।
 अ॒मृतं॑ पु॒रुषः॑। ए॒ताव॒द्वा वा॑ऽस्ति।
 याव॑दे॒तत्। याव॑दे॒वास्ति॑॥¹⁰⁴॥
 तदव॑रुन्धे। कूर्ममुप॑दधाति।
 अ॒पामे॒व मे॒धम॑वरुन्धे। अथो॑ स्त्र॒र्गस्य॑ लो॒कस्य॑ स॒मंष्ट्यै॑।
 आ॒पमा॒पाम॒पः सर्वाः॑। अ॒स्माद॒स्मादि॒तोऽमु॑तः।
 अ॒ग्निर्वा॒युश्च॒ सूर्य॑श्च। स॒ह स॑न्ध॒स्कर॒द्धिया॑ इति॑।
 वा॒य्वश्चा॑ रश्मि॒पत॑यः। लो॒कं पृ॑णच्छि॒द्रं पृ॑ण॥¹⁰⁵॥
 यास्ति॒स्रः प॑र॒मजाः॑। इ॒न्द्रघो॑षा वो व॒सुभि॑रे॒वाह्ये॑वेति॑।
 प॒ञ्चचि॑त॒य उप॑दधाति। पा॒ङ्गोऽग्निः॑।
 यावा॑ने॒वाग्निः॑। तं चि॑नुते।
 लो॒कं पृ॑णया द्वि॒तीया॑मुप॑दधाति। प॒ञ्च प॒दा वै वि॒राट्।
 तस्या॒ वा द्व॒यं पा॒दः। अ॒न्तरि॑क्षं पा॒दः। द्यौः पा॒दः।
 दि॒शः पा॒दः। प॒रोर॑जाः पा॒दः। वि॒राज्ये॒व प्र॑ति॒तिष्ठ॑ति।
 य ए॒तम॒ग्निं चि॑नुते। य उ॑चैनमे॒वं वेद॑॥¹⁰⁶॥

[25]

अ॒ग्निं प्र॒णीयो॑प॒समा॒धाय॑। तम॒भित॑ ए॒ता अ॒बीष्ट॑का॒ उप॑दधाति।
 अ॒ग्निहो॒त्रे दर्श॑पूर्णमा॒सयोः॑। प॒शुब॒न्धे चा॑तुर्मा॒स्येषु॑।
 अथो॑ आ॒हुः। सर्वेषु॑ यज्ञ॒क्रतु॑ष्विति॑।
 अथ॑ ह स्मा॒हारु॒णः स्वा॑य॒म्भुवः॑। सा॒वि॒त्रः सर्वो॑ऽग्निरि॒त्यन॑नुष॒ङ्गं मन्या॑महे।
 ना॒ना वा ए॒तेषां॑ वी॒र्या॑णि। क॒म॒ग्निं चि॑नुते॥¹⁰⁷॥

स॒त्रि॒यम॒ग्निं चि॑न्वा॒नः। क॒म॒ग्निं चि॑नुते।
सा॒वि॒त्रम॒ग्निं चि॑न्वा॒नः। क॒म॒ग्निं चि॑नुते।
ना॒चि॒के॒तम॒ग्निं चि॑न्वा॒नः। क॒म॒ग्निं चि॑नुते।
चा॒तु॒र्हो॒त्रि॒यम॒ग्निं चि॑न्वा॒नः। क॒म॒ग्निं चि॑नुते।
वै॒श्व॒सृ॒जम॒ग्निं चि॑न्वा॒नः। क॒म॒ग्निं चि॑नुते॥¹⁰⁸॥
उ॒पा॒नु॒वा॒क्य॑मा॒शुम॒ग्निं चि॑न्वा॒नः। क॒म॒ग्निं चि॑नुते।
इ॒ममा॑रुणकेतुक॒म॒ग्निं चि॑न्वा॒न इति॑। वृ॒षा वा अ॒ग्निः।
वृ॒षा॑णौ स॒ङ्स्फा॑लयेत्। ह॒न्येता॑स्य य॒ज्ञः।
तस्मा॒न्नानु॑ष॒ज्यः। सो॒त्तर॑वे॒दिषु॑ ऋ॒तुषु॑ चिन्वीत।
उ॒त्तर॑वे॒द्यां ह्य॑ग्निश्ची॒यते॑। प्र॒जाका॑मश्चिन्वीत॥¹⁰⁹॥
प्रा॒जा॒प॒त्यो वा ए॒षोऽग्निः॑। प्रा॒जा॒प॒त्याः प्र॒जाः।
प्र॒जावा॑न् भवति। य ए॒वं वेद॑।
प॒शुका॑मश्चिन्वीत। सं॒ज्ञानं॑ वा ए॒तत् प॑शूनाम्।
यदापः॑। प॒शूनामे॒व सं॒ज्ञाने॒ऽग्निं चि॑नुते।
प॒शुमान् भ॑वति। य ए॒वं वेद॑॥¹¹⁰॥
वृ॒ष्टि॑का॒मश्चि॑न्वीत। आ॒पो वै वृ॒ष्टिः।
प॒र्जन्यो॒ वर्षु॑को भवति। य ए॒वं वेद॑।
आ॒म॒या॒वी चि॑न्वीत। आ॒पो वै भे॑ष॒जम्।
भे॒ष॒जमे॒वास्मै॑ करोति। सर्व॒मायु॑रेति।
अ॒भि॒चर॑श्चिन्वीत। व॒ज्रो वा आ॒पः॥¹¹¹॥
व॒ज्रमे॒व भ्रातृ॑व्येभ्यः प्र॒हर॑ति। स्तृ॒णुत॑ ए॒नम्।
तेज॑स्कामो यश॑स्कामः। ब्र॒ह्म॒व॒र्च॒सका॑मः स्व॒र्गका॑मश्चिन्वीत।

ए॒ताव॒द्वा वा॑ऽस्ति। याव॑दे॒तत्।
 याव॑दे॒वास्ति॑। तद॑व॒रुन्धे॑।
 तस्यै॒तद्भू॒तम्। वर्ष॑ति न धा॑वेत्॥¹¹²॥
 अ॒मृतं॑ वा आ॒पः। अ॒मृत॒स्यान॑न्तरि॒त्यै।
 नाप्सु॑ मू॒त्रपु॑री॒षं कु॑र्यात्। न नि॒ष्ठीवे॑त्।
 न वि॒वस॑नः स्ना॒यात्। गुह्यो॑ वा ए॒षोऽग्निः॑।
 ए॒तस्या॒ग्नेरन॑तिदाहाय। न पु॑ष्कर॒पर्णानि॑ हि॒र॒ण्यं वाऽधि॑तिष्ठेत्।
 ए॒तस्या॒ग्नेरन॑भ्यारोहाय। न कूर्म॒स्याश्री॑यात्।
 नोद॑कस्या॒घातु॑का॒न्येन॑मोद॒कानि॑ भवन्ति। अ॒घातु॑का॒ आपः॑।
 य ए॒तम॒ग्निं चि॑नुते। य उ॑चैनमे॒वं वेद॑॥¹¹³॥

[26]

इ॒मानु॑कं भु॒वना॑ सी॒षधे॑म। इन्द्र॑श्च वि॒श्वे च॑ दे॒वाः।
 य॒ज्ञं च॑ नस्त॒न्वं च॑ प्र॒जां च॑। आ॒दि॒त्यैरिन्द्रः॑ स॒ह सी॑षधातु।
 आ॒दि॒त्यैरिन्द्रः॑ सग॑णो म॒रुद्भिः॑। अ॒स्माकं॑ भू॒त्ववि॒ता त॒नूना॑म्।
 आ॒प्लव॑स्व प्र॒प्लव॑स्व। आ॒ण्डीभ॑वज॒ मा मुहुः॑।
 सु॒खादी॑न्दुःखनि॒धना॑म्। प्रति॑मु॒धस्व॒ स्वां पु॑रम्॥¹¹⁴॥
 मरी॑चयः स्वाय॒म्भुवाः॑। ये श॑री॒राण्य॑कल्पयन्।
 ते ते॑ दे॒हं क॑ल्पयन्तु। मा च॑ ते॒ ख्या॑स्मं ती॒रिष॑त्।
 उत्ति॑ष्ठत॒ मा स्व॑प्त। अ॒ग्निमि॑च्छ॒ध्वं भा॑रताः।
 राज्ञः॑ सोम॑स्य तृ॒प्तासः॑। सूर्ये॑ण स॒युजो॑षसः।
 युवा॑ सु॒वासाः॑। अ॒ष्टाच॑क्रा न॒वद्वारा॑॥¹¹⁵॥
 दे॒वानां॑ पू॒रयो॒ध्या। तस्या॑ हिर॒ण्मयः॑ को॒शः।
 स्व॒र्गो लो॒को ज्योति॑षाऽऽवृ॑तः। यो वै तां॑ ब्रह्म॑णो वे॒द।

अ॒मृते॑न्ऽऽवृ॒तां पु॑रीम्। तस्मै॑ ब्र॒ह्म च॑ ब्र॒ह्मा च॑।
आ॒युः की॑र्तिं प्र॒जां द॑दुः। वि॒भ्राज॑माना॒ हरि॑णीम्।
य॒शसा॑ सम्प॒रीवृ॑ताम्। पु॒रं हिर॑ण्मयीं ब्र॒ह्मा॥ ११६॥

वि॒वेशा॑ऽपराजि॑ता। परा॑डेत्य॑ज्याम॒यी।
परा॑डेत्य॑नाश॒की। इ॒ह चा॑मुत्र॑ चान्वेति॑।
वि॒द्वान्दे॑वासु॒रानु॑भ॒यान्। यत्कु॑मा॒री म॒न्द्रय॑ते।
य॒द्योषि॑द्यत्पति॑व्रता॑। अ॒रिष्टं॑ यत्किं च॑ क्रि॒यते॑।
अ॒ग्निस्त॑दनु॑वेधति॑। अ॒श्रुता॑सः श्रु॑तास॒श्च॥ ११७॥
य॒ज्वानो॒ येऽप्य॑य॒ज्वनः॑। स्व॑र्यन्तो॒ नापै॑क्षन्ते।
इ॒न्द्रम॑ग्निं च॑ ये वि॒दुः। सि॒कता॑ इ॒व सं॑यन्ति॑।
र॒श्मिभिः॑ स॒मुदी॑रिताः। अ॒स्मालो॒काद॑मुष्मा॒च्च।
ऋ॒षिभि॑रदात्पृ॒श्निभिः॑।

अपै॑त॒ वीत॒ वि च॑ सर्प॒तातः॑। येऽत्र॒ स्थ पु॑रा॒णा ये च॒ नूत॑नाः।
अ॒होभि॑र॒द्भिर॒क्तुभि॑र्व्य॒क्तम्॥ ११८॥

य॒मो द॑दा॒त्वव॒सान॑मस्मै। नृ मु॑णन्तु नृपा॒त्वर्यः॑।
अ॒कृष्टा॑ ये च॒ कृष्ट॑जाः। कु॒मारी॑षु क॒नीनी॑षु।
जा॒रिणी॑षु च॒ ये हि॒ताः। रेतः॑ पी॒ता आ॑ण्ड॒पीताः॑।
अ॒ङ्गारे॑षु च॒ ये हु॒ताः। उ॒भया॑न् पु॒त्रपौ॑त्र॒कान्।
यु॒वेऽहं॑ य॒मराज॑गान्। श॒तमि॑न्नु श॒रदः॑॥ ११९॥
अ॒दो य॒द्वह्म॑ विल॒बम्। पि॒तृणां॑ च॒ य॒मस्य॑ च।
वरु॑णस्या॒श्विनो॒रग्नेः॑। म॒रुता॑ च वि॒हाय॑साम्।
का॒मप्र॑यव॑णं मे अस्तु। स ह्ये॑वास्मि॑ स॒नात॑नः।

इति नाको ब्रह्मि॒श्रवो॑ रा॒यो ध॒नम्। पु॒त्रानापो॑ दे॒वीरि॒हऽऽहि॑त॥¹²⁰ ॥

[27]

वि॒शी॒र्ष्णीं॑ गृध्र॑शी॒र्ष्णीं॑ च। अ॒पेतो॑ नि॒रृ॒तिः॑ ह॒थः।
परि॒बाध॑ः श्वे॒तकु॑क्षम्। नि॒जङ्घ॑ः श॒बलो॑द॒रम्।
स॒ तान् वा॒च्याय॑या स॒ह। अ॒ग्ने नाश॑य स॒न्द॒शः॑।
ई॒र्ष्या॒सूये॑ बु॒भुक्षाम्। म॒न्युं कृ॒त्यां च॑ दी॒धिरे।
रथे॑न कि॒ःशु॒काव॑ता। अ॒ग्ने नाश॑य स॒न्द॒शः॑॥¹²¹ ॥

[28]

प॒र्जन्या॑य॒ प्रगा॑यत। दि॒वस्पु॑त्राय॒ मी॒ढुषै॑।
स नो॑ य॒वस॑मिच्छतु। इ॒दं वचः॑ प॒र्जन्या॑य॒ स्वरा॑जै।
हृ॒दो अ॒स्वन्त॑र॒न्तद्यु॑योत। म॒योभू॒र्वातो॑ वि॒श्वकृ॑ष्टयः स॒न्वस्मे।
सु॒पि॒प्प॒ला ओष॑धीर्दे॒वगो॑पाः। यो गर्भ॑मोष॑धीनाम्।
गवा॑ कृ॒णोत्य॑र्वताम्। प॒र्जन्यः॑ पु॒रुषी॑णाम्॥¹²² ॥

[29]

पुन॑र्मा॒मैबि॑न्द्रि॒यम्। पुन॑रायुः पुन॑र्भगः।
पुन॑र्ब्राह्म॑णमैतु मा। पुन॑र्द्रवि॑णमैतु मा।
यन्मे॒ऽद्य॒ रेतः॑ पृथि॒वीम॑स्कान्। यदोष॑धीर॒प्यस॑र॒द्यदा॑पः।
इ॒दं तत्पुन॑राददे। दी॒र्घायु॑त्वाय॒ वर्च॑से।
यन्मे॒ रेतः॑ प्रसि॑च्यते। यन्म॒ आज्ञा॑यते पुनः।
तेन॑ मा॒ममृ॑तं कुरु। तेन॑ सु॒प्रज॑सं कुरु॥¹²³ ॥

[30]

अ॒द्भ्यस्ति॑रोऽ॒धाऽजा॑यत। तव॑ वैश्र॒वणः॑ स॒दा।
ति॒रोऽधे॑हि स॒प॒त्नान्नः॑। ये अ॒पोऽश्न॑न्ति के॒चन।
त्वा॒ष्ट्रीं मा॒यां वैश्र॑वणः। रथः॑ स॒हस्र॑व॒न्धुर॑म्।

पु॒रु॒श्च॒क्रः॑ स॒ह॒स्रा॒श्वम्। आ॒स्था॒याया॑हि नो ब॒लिम्।
 यस्मै॑ भू॒तानि॑ ब॒लिमा॑व॒हन्ति॑। ध॒नं गा॒वो ह॒स्ति हि॑र॒ण्य॒म॒श्वान्॑॥¹²⁴॥
 अ॒साम॑ सु॒म॒तौ य॒ज्ञिय॑स्य। श्रि॒यं बि॒भ्रतोऽन्न॑मु॒खीं वि॒राज॑म्।
 सु॒दर्श॑ने च॑ क्रौ॒ञ्चे च॑। मै॒ना॒गे च॑ म॒हागि॑रौ।
 श॒त॒द्वा॒ट्वा॒र॒ग॒म॒न्ता। स॒ह्य॑र्यं न॒गरं॑ त॒व।
 इति॑ म॒न्त्राः। क॒ल्पो॑ऽत ऊ॒र्ध्वम्। य॒दि ब॒लिः॑ ह॒रेत्।
 हि॒र॒ण्य॒ना॒भये॑ वि॒तु॒दये॑ कौ॒बे॒रा॒या॒यं ब॑लिः॥¹²⁵॥
 स॒र्वभू॑ताधिप॒तये॑ न॒म इति॑। अथ॑ ब॒लिः॑ ह॒वोप॑ति॒ष्ठेत्।
 क्ष॒त्रं क्ष॒त्रं वै॑श्र॒वणः॑। ब्रा॒ह्म॒णा व॒यं॑ स्मः।
 नम॑स्ते अस्तु मा मां हि॒ंसीः। अ॒स्मात्प्र॑वि॒श्यान्न॑म॒द्धीति॑।
 अथ॑ तम॒ग्निमा॑दधी॒त। यस्मि॑न्ने॒तत्क॑र्म प्र॒यु॒ञ्जी॒त।
 ति॒रोऽ॒धा भूः। ति॒रोऽ॒धा भुवः॑॥¹²⁶॥
 ति॒रोऽ॒धाः स्वः॑। ति॒रोऽ॒धा भूर्भुवः॑ स्वः॑।
 स॒र्वेषां॑ लो॒काना॑माधिप॒त्ये सी॑दे॒ति। अथ॑ तम॒ग्निमि॑न्धी॒त।
 यस्मि॑न्ने॒तत्क॑र्म प्र॒यु॒ञ्जी॒त। ति॒रोऽ॒धा भूः स्वाहा॑।
 ति॒रोऽ॒धा भुवः॑ स्वाहा॑। ति॒रोऽ॒धाः स्वः॑ स्वाहा॑।
 ति॒रोऽ॒धा भूर्भुवः॑ स्वः॑ स्वाहा॑।
 यस्मि॑न्नस्य काले स॒र्वा आ॑हुती॒रु॒हता॑ भवे॒युः॥¹²⁷॥
 अ॒पि ब्रा॑ह्मण॑मु॒खीनाः॑। तस्मि॑न्न॒ह्नः काले॑ प्र॒यु॒ञ्जी॒त।
 प॒रः सु॒प्तज॑ना॒द्वेपि॑। मा॒स्म प्र॑मा॒द्यन्त॑मा॒ध्याप॑येत्।
 स॒र्वार्थाः॑ सि॒द्ध्यन्ते॑। य ए॒वं वे॒द।
 क्षु॒ध्यन्नि॑द॒मजा॑न॒ताम्। स॒र्वार्था न॑ सि॒द्ध्यन्ते॑।

यस्ते॑ वि॒घातु॑को भ्रा॒ता। म॒मान्तर॑हृदये॒ श्रितः॥¹²⁸॥

तस्मा॑ इ॒ममग्र॑पिण्डं जुहोमि। स मे॑ऽर्था॒न्मा वि॑व॒धीत्।

मयि॑ स्वाहा॑। रा॒जाधि॒राजाय॑ प्रसह्यसाहि॒नै।

नमो॑ व॒यं वैश्र॑व॒णाय॑ कुर्महे। स मे॒ कामा॒न्काम॒कामा॑य॒ मह्यम्॑।

का॒मे॒श्वरो॑ वैश्र॑व॒णो द॑दातु। कु॒बे॒राय॑ वैश्र॑व॒णाय॑।

म॒हा॒रा॒जाय॑ नमः॑। के॒तवो॑ अरु॒णास॑श्च।

ऋ॒षयो॑ वा॒तर॑श्नाः। प्र॒ति॒ष्ठाः श॒तधा॑ हि।

स॒माहि॑तासो सहस्र॒धाय॑सम्। शि॒वा नः॑ श॒न्त॑मा भवन्तु।

दि॒व्या आप॑ ओष॒धयः॑। सु॒मृ॒डी॒का सर॑स्वति।

मा ते॒ व्यो॑म स॒न्दृशि॑॥¹²⁹॥

[31]

संवत्सरमेतद्भ॒तं चरेत्॑। द्वौ वा मा॒सौ।

नियमः॑ स॒मासे॒न। तस्मि॑न्नियमविशेषाः।

त्रिष॑वणमुदकोपस्पर्शी। चतु॒र्थका॑लपानभक्तः स्यात्।

अ॒हर॒र्वा भैक्ष॑मश्नीयात्। औ॒दु॒म्बरी॑भिः समि॒द्धिर॑ग्निं परि॒चरेत्॑।

पुन॑र्मा॒मैत्ति॑न्द्रियमित्येतेन्ऽनु॒वाके॑न। उद्धृतपरिपू॒ताभि॑रद्भिः का॒र्यं कु॑र्वीत॥¹³⁰॥

अ॒स॒ध्वय॑वान्। अ॒ग्नये॑ वा॒यवे॑ सू॒र्याय॑।

ब्र॒ह्मणे॑ प्र॒जाप॑तये। च॒न्द्रम॑से नक्ष॒त्रेभ्यः॑।

ऋ॒तुभ्यः॑ सं॒वत्स॑राय। वरु॒णाय॑रु॒णाये॑ति व्र॒तहो॑माः।

प्र॒व॒र्ग्यव॑दादेशः। अरु॒णाः का॑ण्ड॒ऋषयः॑।

अ॒र॒ण्येऽधी॑यीरन्। भ॒द्रं क॑र्णेभिरिति द्वे ज॒पि॒त्वा॥¹³¹॥

म॒हा॒ना॒ग्नीभि॑रुदकं स॒ंस्पर्श॑। तमाचा॑र्यो द॒द्यात्।

शि॒वा नः॑ श॒न्तमे॒त्योष॑धी॒राल॑भते। सु॒मृ॒डी॒कैति॑ भूमिम्।

ए॒वम॑प॒वर्गे॑ । धे॒नुर्द॒क्षि॒णा । क॒सं वा॑स॒श्च क्षौ॒मम् ।
अ॒न्य॑द्वा शु॒क्लम् । य॑थाश॒क्ति॒ वा । ए॒व॒स्वा॒ध्याय॑ध॒र्मेण॑ ।
अ॒र॒ण्येऽधी॑यीत । त॒प॒स्वी पु॒ण्यो भ॑वति त॒प॒स्वी पु॒ण्यो भ॑वति ॥¹³² ॥

[32]

भ॒द्रं क॒र्णेभिः॑ शृ॒णु॒याम॑ दे॒वाः । भ॒द्रं प॑श्ये॒माक्ष॑भि॒र्यज॑त्राः ।
स्थि॒रेरङ्गै॑स्तुष्टु॒वाꣳ संस्त॑नूभिः । व्य॒शेम॑ दे॒वहि॑तं॒ यदायुः॑ ।
स्व॒स्ति न॒ इन्द्रो॑ वृ॒द्धश्र॑वाः । स्व॒स्ति नः॑ पू॒षा वि॒श्ववे॑दाः ।
स्व॒स्ति न॒स्ताक्ष्यो॑ अ॒रिष्ट॑नेमिः । स्व॒स्ति नो॒ बृह॑स्पति॑र्दधातु ॥
॥ ॐ शान्तिः॒ शान्तिः॒ शान्तिः॑ ॥

॥द्वितीयः प्रश्नः॥

ॐ नमो ब्रह्मणे नमो अस्त्वग्नये नमः पृथिव्यै नम ओषधीभ्यः। नमो वाचे नमो वाचस्पतये नमो विष्णवे बृहते करोमि॥

ॐ शान्तिः शान्तिः शान्तिः॥

सह वै देवानां चासुराणां च यज्ञौ प्रततावास्तां वयं स्वर्गं लोकमैष्यामो वयमैष्याम इति तेऽसुराः सन्नह्य सहसैवाचरन् ब्रह्मचर्येण तपसैव देवास्तेऽसुरा अमुह्युस्ते न प्राजानुस्ते पराऽभवन्ते न स्वर्गं लोकमायन् प्रसृतेन वै यज्ञेन देवाः स्वर्गं लोकमायन् प्रसृतेनासुरान् पराभावयन् प्रसृतो ह वै यज्ञोपवीतिनो यज्ञोऽप्रसृतोऽनुपवीतिनो यत्किं च ब्राह्मणो यज्ञोपवीत्यधीते यजत एव तत्तस्माद्यज्ञोपवीत्येवाधीयीत याजयेद्यजेत वा यज्ञस्य प्रसृत्या अजिनं वासो वा दक्षिणत उपवीय दक्षिणं बाहुमुद्धरतेऽव धत्ते सव्यमिति यज्ञोपवीतमेतदेव विपरीतं प्राचीनावीतं संवीतं मानुषम्॥¹॥

[1]

रक्षांसि ह वा पुरोऽनुवाके तपोग्रमतिष्ठन्त तान् प्रजापतिर्वरेणोपामन्त्रयत् तानि वरमवृणीत्ऽऽदित्यो नो योद्धा इति तान् प्रजापतिरब्रवीद्योधयध्वमिति तस्मादुत्तिष्ठन्तं ह वा तानि रक्षांस्यदित्यं योधयन्ति यावदस्तमन्वगात्तानि ह वा एतानि रक्षांसि गायत्रियाऽभिमन्त्रितेनाम्भसा शाम्यन्ति तद् ह वा एते ब्रह्मवादिनः पूर्वाभिमुखाः सन्ध्यायां गायत्रियाऽभिमन्त्रिता आप ऊर्ध्वं विक्षिपन्ति ता एता आपो वज्रीभूत्वा तानि रक्षांसि मन्देहारुणे द्वीपे प्रक्षिपन्ति यत्प्रदक्षिणं प्रक्रमन्ति तेन पाप्मानम् अवधून्वन्त्युद्यन्तमस्तं यन्तम् आदित्यमभिध्यायन् कुर्वन् ब्राह्मणो विद्वान्सकलं भद्रमश्नुतेऽसावादित्यो ब्रह्मेति ब्रह्मैव सन् ब्रह्माप्येति य एवं वेद॥²॥

[2]

यद्देवा देवहेळनं देवासश्चकृमा वयम्। आदित्यास्तस्मान्मा मुञ्चतर्तस्यर्तेन मामित। देवां जीवनकाम्या यद्वाचाऽनृतमूदिम। तस्मान्न इह मुञ्चत विश्वे देवाः सजोषसः।

ऋतेन॑ द्यावापृथिवी॑ ऋतेन॑ ब॒५ संर॑स्वति। कृतान्नः॑ पा॒ह्येन॑सो यत्किं॑ चानृतमूदिम।
इन्द्रा॒ग्नी मि॒त्रावरु॑णौ सोमो॑ धा॒ता बृ॒हस्पतिः॑। ते नो॑ मु॒ध्वन्वेन॑सो यदन्यकृतमारिम।
सजा॑तश॒५सादु॑त जा॒मिश॒५सा॒ञ्ज्याय॑सः श॒५सादु॑त वा कनी॑यसः। अना॑धृष्टं दे॒वकृतं॑
यदेन॑स्तस्मात् ब॒मस्मा॑ञ्जातवेदो मुमु॒ग्धि॥३॥

यद्वा॒चा यन्मन॑सा बा॒हुभ्या॑मू॒रुभ्या॑म॒ष्टीव॑द्वा॒५ शि॒श्रैर्यद॑नृतं चकृमा वयम्। अ॒ग्निर्मा
तस्मा॑देन॑सो गा॒र्हप॑त्यः प्रमु॒ध्वतु॑ चकृम या॒नि दु॒ष्कृता॑। येन॑ त्रि॒तो अ॑र्णवान्निर्ब॒भूव॑
येन॑ सूर्य॑ तम॑सो निर्मु॒मोच॑। येनेन्द्रो॑ वि॒श्वा अ॒जहा॑दरा॒तीस्तेना॑हं ज्योति॑षा
ज्योति॑रान॒शान आ॑क्षि। यत्कु॒सीद॑मप्रती॒त्तं मये॑ह येन॑ य॒मस्य॑ नि॒धिना॑ चरा॒मि।
ए॒तत्तद॑ग्रे अ॒नृणो॑ भ॒वामि॑ जी॒वन्ने॒व प्रति॑ तत्ते॑ दधामि। यन्मयि॑ मा॒ता यदा॑ पिपे॒ष
यद॒न्तरि॑क्षं यदा॒शसा॑ति॒क्रामा॑मि त्रि॒ते दे॒वा दि॒वि जा॑ता यदाप॑ इ॒मं मे॑ वरुण॒ तत्त्वा॑
या॒मि त्वं नो॑ अ॒ग्रे स त्वं नो॑ अ॒ग्रे त्वम॑ग्रे अ॒यासि॑॥४॥

[3]

यददी॑व्य॒वृण॑म॒हं ब॒भूवादि॑त्सन्वा स॒ञ्जगर॑ जने॑भ्यः। अ॒ग्निर्मा॑ तस्मादिन्द्र॑श्च संवि॒दानौ
प्रमु॑धताम्। यद्व॒स्ताभ्यां॑ च॒कर॑ कि॒त्विषा॑ण्य॒क्षाणां॑ व॒ग्नुमु॑प॒जिघ्र॑मानः। उ॒ग्रं प॒श्या च॑
राष्ट्र॑भृच्च॒ तान्य॑प्सरसा॒वनु॑दत्तामृ॒णानि॑। उ॒ग्रं प॒श्ये रा॑ष्ट्रभृ॒त्कि॒त्विषा॑णि
यदक्ष॑वृ॒त्तम॑नु॒दत्तमे॑तत्। ने॒न्न ऋ॑णानृणव॒ इत्स॑मानो य॒मस्य॑ लो॒के अधि॑र॒ज्जुरा॑य। अ॒व
ते हे॒ळ उ॒दुत्त॑ममि॒मं मे॑ वरुण॒ तत्त्वा॑ या॒मि त्वं नो॑ अ॒ग्रे स त्वं नो॑ अ॒ग्रे। सङ्कु॑सुको
वि॒कु॒सुको॑ निर्ऋ॒थो यश्च॑ नि॒स्त्वनः॑। तेऽ(१)स्मदक्ष॑म॒मना॑गसो दू॒रादूर॑म॒चीच॑तम्।
निर्य॑क्ष॒मम॑चीचते कृ॒त्यां निर्ऋ॑तिं च। तेन॑ योऽ(१)स्मत्समृ॑च्छा॒तै तम॑स्मै
प्रसु॑वामसि। दुःश॒५सानु॑श॒५साभ्यां॑ घ॒णेना॑नु॒घणेन॑ च। तेना॒न्योऽ(१)स्मत्समृ॑च्छा॒तै
तम॑स्मै प्रसु॑वामसि। सं वर्च॑सा॒ पय॑सा॒ सन्त॑नूभि॒रग॑न्महि॒ मन॑सा॒ स॒५ शि॒वेन॑।
ब॒ष्टा नो॑ अ॒त्र वि॑दधातु रा॒योऽनु॑मार्ष्टु॒ तन्वो॑(१) यद्वि॒लिष्ट॑म्॥५॥

[4]

आयु॑ष्टे वि॒श्वतो॑ दध॒दय॑म॒ग्निर्वि॑र॒ण्यः। पुन॑स्ते प्रा॒ण आ॑या॒ति परा॑यक्ष्म॒५ सु॒वामि॑ ते।
आ॒युर्दा॑ अ॒ग्रे ह॒विषो॑ जुषा॒णो घृ॒तप्र॑तीको घृ॒तयो॑निरेधि। घृ॒तं पी॒त्वा मधु॑ चा॒रु ग॒व्यं

पितेव पुत्रमभिरक्षतादिमम्। इममग्र आयुषे वर्चसे कृधि तिग्ममोजो वरुण
सशिशधि। मातेवास्मा अदिते शर्म यच्छ विश्वे देवा जरदष्टिर्यथाऽसत्। अग्र
आयूषि पवस आ सुवोर्जमिषं च नः। आरे बाधस्व दुच्छुनाम्। अग्ने पवस्व
स्वपा अस्मे वर्चः सुवीर्यम्। दधद्रयि मयि पोषम्॥६॥

अग्निर्ऋषिः पवमानः पाञ्चजन्यः पुरोहितः। तमीमहे महागयम्। अग्ने जातान्प्रणुदा
नः सपत्नान्प्रत्यजाताज्ञातवेदो नुदस्व। अस्मे दीदिहि सुमना अहैळ्ळर्मन्ते स्याम
त्रिवरूथ उद्भौ। सहसा जातान्प्रणुदा नः सपत्नान्प्रत्यजाताज्ञातवेदो नुदस्व। अधि
नो ब्रूहि सुमनस्यमानो वयं स्याम प्रणुदा नः सपत्नान्। अग्ने यो नोऽभितो जनो
वृको वारो जिघांसति। तांस्त्वं वृत्रहं जहि वस्वस्मभ्यमाभर। अग्ने यो
नोऽभिदासति समानो यश्च निष्ठः। तं वयं समिधं कृत्वा तुभ्यमग्नेऽपि दध्मसि॥७॥

यो नः शपादशपतो यश्च नः शपतः शपात्। उषाश्च तस्मै निमृक् सर्वं पापं
समूहताम्। यो नः सपत्नो यो रणो मर्तोऽभिदासति देवाः। इध्मस्यैव प्रक्षायतो मा
तस्योच्छेषि किं चन। यो मां द्वेष्टि जातवेदो यं चाहं द्वेष्मि यश्च माम्।
सर्वास्तान् अग्ने सन्देहं याश्चाहं द्वेष्मि ये च माम्। यो अस्मभ्यमरातीयाद्यश्च नो
द्वेष्टते जनः। निन्दादो अस्मान्दिप्सांश्च सर्वास्तान्मष्मषा कुरु। सशितं मे ब्रह्म
सशितं वीर्या(१)म्बलम्। सशितं क्षत्रं मे जिष्णु यस्याहमस्मि पुरोहितः। उदेषां
बाहू अतिरमुद्वर्चो अथो बलम्। क्षिणोमि ब्रह्मणाऽमित्रानुन्नयामि स्वा(१)म् अहम्।
पुनर्मनः पुनरायुर्म आगात्पुनश्चक्षुः पुनः श्रोत्रं म आगात्पुनः प्राणः पुनराकूतं म
आगात्पुनश्चित्तं पुनराधीतं म आगात्। वैश्वानरो मेऽदब्धस्तनूपा अवबाधतां
दुरितानि विश्वा॥८॥

[५]

वैश्वानराय प्रतिवेदयामो यदीनृणं सङ्गरो देवतासु। स एतान्पाशान् प्रमुचन् प्रवेद
स नो मुञ्चातु दुरितादवद्यात्। वैश्वानरः पवयान्नः पवित्रैर्यत्सङ्गरमभिधावाम्याशाम्।
अनाजानन्मनसा याचमानो यदत्रैनो अव तत्सुवामि। अमी ये सुभगे दिवि

विचृतौ नाम तारके। प्रेहामृतस्य यच्छतामेतद्वद्वकमोचनम्। विजिहीर्ष
लो॒कान्कृ॑धि ब॒न्धान्मु॑धासि बद्धकम्। योने॑रिव प्रच्यु॒तो गर्भः॑ सर्वा॑न् पथो अनु॒ष्व।
स प्र॑जा॒नन्प्रति॑गृ॒णीत वि॒द्वान्प्रजा॑पतिः प्रथम॒जा ऋ॒तस्य॑। अ॒स्माभिर्दत्तं॑ ज॒रसः॑
पर॒स्ताद॑च्छिन्नं तन्तु॑मनुस॒धरे॑म॥९॥

त॒तं त॒न्तुम॑न्वेके अनु स॒धर॑न्ति येषां दत्तं पि॒त्र्यमा॑यनवत्। अब॒न्ध्वेके द॑दतः
प्रय॒च्छादा॑तुं चेच्छ॒क्रवा॑सः स्वर्ग ए॒षाम्। आर॑भे॒थामनु॑ स॒र॒भे॒था॑ समा॒नं
प॒न्था॑मवथो घृ॒तेन॑। यद्वा पूर्तं परि॑विष्टं यदग्नौ तस्मै गोत्रा॑येह जाया॑पती
स॒र॒भे॒थाम्। यद॒न्तरि॑क्षं पृथि॒वीमु॑त द्वां यन्मा॑तरं पि॒तरं॑ वा जिहि॑सिम। अ॒ग्निर्मा
तस्मा॑दे॒नसो॑ गा॒र्हप॑त्य उ॒न्नो न॑ेषद्वि॒रता॑ या॒नि च॑कृम। भूमि॑र्मा॒ताऽदि॑तिर्नो ज॒नित्रं॑
भ्रा॒ताऽन्तरि॑क्षम॒भि॒शस्त॑ ए॒नः। द्यौर्नः॑ पि॒ता पि॑तृयाच्छं भ॒वासि॑ जा॒मि मि॒त्रा मा
वि॑वित्सि लो॒कात्। यत्र॑ सु॒हार्दः॑ सु॒कृतो॑ म॒दन्ते॑ वि॒हाय॑ रोगं त॒न्वा(१)॑ स्वाया॑म्।
अ॒श्लो॒णाङ्गैर॑हु॒ताः स्व॑र्गे तत्र॑ पश्येम पि॒तरं॑ च पु॒त्रम्। यद॒न्नम॑द्व्यनृ॒तेन॑ दे॒वा
दा॒स्यन्न॑दा॒स्यन्नु॑त वा॒ करि॑ष्यन्। यद्दे॒वानां॑ चक्षु॒ष्यागो॑ अ॒स्ति यदे॒व किं च॑
प्रति॑जग्रा॒हम॑ग्नि॒र्मा तस्मा॑दनृ॒णं कृ॑णोतु। यद॒न्नम॑द्वि बहु॒धा वि॑रू॒पं वा॒सो हि॑र॒ण्यमु॑त
गा॒मजा॑मवि॒म। यद्दे॒वानां॑ चक्षु॒ष्यागो॑ अ॒स्ति यदे॒व किं च॑ प्रति॑जग्रा॒हम॑ग्नि॒र्मा
तस्मा॑दनृ॒णं कृ॑णोतु। यन्मया॑ मन॑सा वा॒चा कृ॑तमे॒नः कदा॑चन।
सर्व॑स्मा॒त्तस्मा॑न्मेळि॒तो मो॒ग्धि॒ त्वं हि वे॒त्थ॑ यथा॒तथ॑म्॥१०॥

[६]

वा॒तर॑श॒ना ह॒ वा ऋ॑षयः श्रम॒णा ऊ॒र्ध्वम॑न्थिनो ब॒भूवु॑स्तानृष॑योऽर्थमा॑य॒स्ते
नि॒लाय॑मचर॒स्तेऽनु॑प्रवि॒शुः कू॒ष्माण्डा॑नि ता॒स्तेष्वन्वि॑न्द॒च्छ्रद्धया॑ च तप॑सा च
ता॒नृष॑योऽब्रुवन्क॒था नि॒लाय॑ चर॒थेति॑ त ऋ॒षी॒नब्रु॑वन्नमो॑ वोऽस्तु भगव॑न्तोऽस्मिन्धा॑मि
के॒न वः॑ सपर्या॑मेति॒ ता॒नृष॑योऽब्रुवन्पवि॒त्रं नो ब्रू॑त येना॑रेपसः स्या॒मेति॑ त ए॒तानि॑
सू॒क्तान्य॑पश्यन् यद्दे॒वा दे॒वहे॑ळ॒नं यददी॑व्यनृ॒णम॑हं ब॒भूवु॑ऽऽयु॒ष्टे वि॒श्वतो॑
दध॑दित्ये॒तैरा॒ज्यं जु॑हुत वैश्वान॒राय॑ प्रति॑वेदयाम॒ इत्यु॑पतिष्ठत॒ यद॑र्वा॒चीन॑मे॒नो
भ्रू॒णह॑त्याया॒स्तस्मा॑न्मोक्ष्यध्व॒ इति॑ त

एतैरजुहवुस्तेऽरेपसोऽभवन्कर्मदिष्वेतैर्जुहुयात्पूतो देवलोकान्त्समंश्नुते॥¹¹॥

[7]

कूश्माण्डैर्जुहुयाद्योऽपूत इव मन्येत यथा स्तेनो यथा भूणहैवमेष भवति योऽयोनौ
रेतः सिधति यदर्वाचीनमेनौ भूणहत्यायास्तस्मान्मुच्यते यावदेनो दीक्षामुपैति दीक्षित
एतैः संतति जुहोति संवत्सरं दीक्षितो भवति संवत्सरादेवऽऽत्मानं पुनीते मासं
दीक्षितो भवति यो मासः स संवत्सरः संवत्सरादेवऽऽत्मानं पुनीते चतुर्विंशतिः
रात्रीर्दीक्षितो भवति चतुर्विंशतिरर्धमासाः संवत्सरः संवत्सरादेवऽऽत्मानं पुनीते
द्वादश रात्रीर्दीक्षितो भवति द्वादश मासाः संवत्सरः संवत्सरादेवऽऽत्मानं पुनीते
षड्रात्रीर्दीक्षितो भवति षड्वा ऋतवः संवत्सरः संवत्सरादेवऽऽत्मानं पुनीते तिस्रो
रात्रीर्दीक्षितो भवति त्रिपदा गायत्री गायत्रिया एवऽऽत्मानं पुनीते न
मासमंश्नीयान्न स्त्रियमुपेयान्नोपर्यासीत् जुगुप्सेतानृतात्पयो ब्राह्मणस्य व्रतं यवागू
राजान्यस्यामिक्षा वैश्यस्याथो सौम्येष्वध्वर एतद्व्रतं ब्रूयाद्यदि मन्येतोपदस्यामीत्योदनं
धानाः सक्तू घृतमित्यनुव्रतयेदात्मनोऽनुपदासाय॥¹²॥

[8]

अजान् ह वै पृश्नींस्तपस्यमानान् ब्रह्म स्वयम्भ्वभ्यानर्षत्त
ऋषयोऽभवन्तदृषीणामृषिबं तां देवतामुपातिष्ठन्त यज्ञकामास्त एतं
ब्रह्मयज्ञमपश्यन्तमाहरन्तेनायजन्त यदृचोऽध्यगीषत् ताः पयआहुतयो देवानामभवन्
यद्यजूंषि घृताहुतयो यत्सामानि सोमाहुतयो यदथर्वाङ्गिरसो मध्वाहुतयो
यद्वाह्मणानीतिहासान् पुराणानि कल्पान्गाथा नाराशंसीर्मेदाहुतयो
देवानामभवन्ताभिः क्षुधं पाप्मानमपाघ्नन्नपहतपाप्मानो देवाः स्वर्गं लोकमायन्
ब्रह्मणः सायुज्यमृषयोऽगच्छन्॥¹³॥

[9]

पञ्च वा एते महायज्ञाः संतति प्रतायन्ते सतति सन्तिष्ठन्ते देवयज्ञः पितृयज्ञो
भूतयज्ञो मनुष्ययज्ञो ब्रह्मयज्ञ इति यदग्नौ जुहोत्यपि समिधं तद्देवयज्ञः सन्तिष्ठते
यत्पितृभ्यः स्वधा करोत्यप्यपस्तत्पितृयज्ञः सन्तिष्ठते यद्भूतेभ्यो बलिः हरति

तद्भूतयज्ञः सन्तिष्ठते यद्वाह्येभ्योऽन्नं ददाति तन्मनुष्ययज्ञः सन्तिष्ठते
यत्स्वाध्यायमधीयीतैकामप्यृचं यजुः सामं वा तद्ब्रह्मयज्ञः सन्तिष्ठते यदृचोऽधीते
पयंसः कूल्या अस्य पितृन्त्स्वधा अभिवहन्ति यदजूषि घृतस्य कूल्या यत्सामानि
सोमं एभ्यः पवते यदथर्वाङ्गिरसो मधोः कूल्या यद्वाह्येभ्योऽन्नातिहासान् पुराणानि
कल्पान्गाथा नाराशंसीर्मेदसः कूल्या अस्य पितृन्त्स्वधा अभिवहन्ति यदृचोऽधीते
पयआहुतिभिरेव तद्देवाः स्तर्पयति यदजूषि घृताहुतिभिर्यत्सामानि
सोमाहुतिभिर्यदथर्वाङ्गिरसो मध्वाहुतिभिर्यद्वाह्येभ्योऽन्नातिहासान् पुराणानि कल्पान्गाथा
नाराशंसीर्मेदाहुतिभिरेव तद्देवाः स्तर्पयति त एनं तृप्ता आयुषा तेजसा वर्चसा
श्रिया यशसा ब्रह्मवर्चसेनान्नाद्येन च तर्पयन्ति॥¹⁴॥

[10]

ब्रह्मयज्ञेन यक्ष्यमाणः प्राच्यां दिशि ग्रामादच्छदिदर्श उदीच्यां प्रागुदीच्यां वोदितं
आदित्ये दक्षिणत उपवीयोपविश्य हस्ताववनिज्य त्रिराचामेद्विः परिमृज्य
सकृदुपस्पृश्य शिरश्चक्षुषी नासिके श्रोत्रे हृदयमालभ्य यत्त्रिराचामिति तेन ऋचः
प्रीणाति यद्विः परिमृजति तेन यजूषि यत्सकृदुपस्पृशति तेन सामानि यत्सव्यं
पाणिं पादौ प्रोक्षति यच्छिरश्चक्षुषी नासिके श्रोत्रे हृदयमालभते तेनार्थर्वाङ्गिरसो
ब्राह्मणेभ्योऽन्नातिहासान् पुराणानि कल्पान्गाथा नाराशंसीः प्रीणाति दर्भाणां
महदुपस्तीर्योपस्थं कृत्वा प्राडासीनः स्वाध्यायमधीयीतापां वा एष ओषधीनां रसो
यद्दर्भाः सरसमेव ब्रह्म कुरुते दक्षिणोत्तरो पाणी पादौ कृत्वा सपवित्रावोमिति
प्रतिपद्यत एतद्वै यजुस्त्रयीं विद्यां प्रत्येषा वागेतत्परममक्षरं तदेतदृचाभ्युक्तमृचो
अक्षरे परमे व्योमन् यस्मिन्देवा अधि विश्वे निषेदुर्यस्तन्न वेद किमृचा करिष्यति य
इत्तद्विदुस्त इमे समासत इति त्रीनेव प्रायुङ्क्त भूर्भुवः स्वरित्याहैतद्वै वाचः सत्यं
यदेव वाचः सत्यं तत्प्रायुङ्क्तार्थं सावित्रीं गायत्रीं त्रिरन्वाह पच्छौऽर्धर्चशोऽनवानं
सविता श्रियः प्रसविता श्रियमेवऽऽप्नोत्यथौ प्रज्ञातयैव प्रतिपदा छन्दांसि
प्रतिपद्यते॥¹⁵॥

[11]

ग्रामे मनसा स्वाध्यायमधीयीत दिवा नक्तं वेति हं स्माऽऽह शौच आह्वेय
उतारण्येऽबलं उत वाचोत तिष्ठन्नुत व्रजन्नुताऽऽसीन उत शयानोऽधीयीतैव
स्वाध्यायं तपस्वी पुण्यो भवति य एवं विद्वान्स्वाध्यायमधीते नमो ब्रह्मणे नमो
अस्त्रग्नये नमः पृथिव्यै नमः ओषधीभ्यः। नमो वाचे नमो वाचस्पतये नमो विष्णवे
बृहते करोमि॥ 16॥

[12]

मध्यन्दिने प्रबलमधीयीतासौ खलु वावैष आदित्यो यद्ब्राह्मणस्तस्मात्तर्हि तेऽक्षिणं
तपति तदेषाऽभ्युक्ता। चित्रं देवानामुदगादनीकं चक्षुर्मित्रस्य वरुणस्याग्नेः। आऽप्रा
द्यावापृथिवी अन्तरिक्षं सूर्य आत्मा जगतस्तस्थुषश्चेति स वा एष यज्ञः सद्यः
प्रतायते सद्यः सन्तिष्ठते तस्य प्राक् सायमवभृथो नमो ब्रह्मण इति परिधानीयां
त्रिरन्वाहाप उपस्पृश्य गृहानेति ततो यत्किं च ददाति सा दक्षिणा॥ 17॥

[13]

तस्य वा एतस्य यज्ञस्य मेघो हविर्धानं विद्युदग्निर्वर्षः हविः स्तनयिर्बुर्वषट्कारो
यदवस्फूर्जति सोऽनुवषट्कारो वायुरात्माऽमावास्यां स्विष्टकृद्य एवं विद्वान्मेघे वर्षति
विद्योतमाने स्तनयत्यवस्फूर्जति पवमाने वायावमावास्यायाः स्वाध्यायमधीते तप
एव तत्तप्यते तपो हि स्वाध्याय इत्युत्तमं नाकः रोहत्युत्तमः समानानां भवति
यावन्तः ह वा इमां वित्तस्य पूर्णा ददत्स्वर्गं लोकं जयति तावन्तं लोकं जयति
भूयांसं चाक्षय्यं चाप पुनर्मृत्युं जयति ब्रह्मणः सायुज्यं गच्छति॥ 18॥

[14]

तस्य वा एतस्य यज्ञस्य द्वावनध्यायौ यदात्माऽशुचिर्यद्देशः समृद्धिर्देवतानि य एवं
विद्वान्महारात्र उषस्युदिते व्रजः स्तिष्ठन्नासीनः शयानोऽरण्ये ग्रामे वा यावत्तरसः
स्वाध्यायमधीते सर्वाल्लोकाञ्जयति सर्वाल्लोकाननृणोऽनुसञ्चरति तदेषाभ्युक्ता। अनृणा
अस्मिन्ननृणाः परस्मिन्स्तृतीये लोके अनृणाः स्याम। ये देवयाना उत पितृयाणाः
सर्वान्यथो अनृणा आक्षीयेमेत्यग्निं वै जातं पाप्मा जग्राह तं देवा आहुतीभिः
पाप्मानमपाघ्नन्नाहुतीनां यज्ञेन यज्ञस्य दक्षिणाभिर्दक्षिणानां ब्राह्मणेन ब्राह्मणस्य

छन्दोभिश्छन्दसाः स्वाध्यायेनापहतपाप्मा स्वाध्यायो देवपवित्रं वा एतत्तं
 योऽनूत्सृजत्यभागो वाचि भवत्यभागो नाके तदेषाऽभ्युक्ता। यस्तित्याजं सखिविदः
 सखायं न तस्य वाच्यपि भागो अस्ति। यदीः शृणोत्यलकः शृणोति न हि प्रवेदं
 सुकृतस्य पन्थामिति तस्मात्स्वाध्यायोऽध्येतव्यो यं यं क्रतुमधीते तेन तेनास्येष्टं
 भवत्यग्नेर्वायोरादित्यस्य सायुज्यं गच्छति तदेषाऽभ्युक्ता। ये अर्वाङ्मुत वा पुराणे
 वेदं विद्वांसमभितो वदन्त्यादित्यमेव ते परिवदन्ति सर्वे अग्निं द्वितीयं तृतीयं च
 हःसमिति यावतीर्वे देवतास्ताः सर्वा वेदविदिं ब्राह्मणे वसन्ति तस्माद्ब्राह्मणेभ्यो
 वेदविद्भ्यो दिवे दिवे नमस्कुर्यान्नाश्लीलं कीर्तयेदेता एव देवताः प्रीणाति॥¹⁹

[15]

रिच्यत इव वा एष प्रेव रिच्यते यो याजयति प्रति वा गृह्णाति याजयित्वा प्रतिगृह्य
 वाऽनश्नन्तिः स्वाध्यायं वेदमधीयीत त्रिरात्रं वा सावित्रीं गायत्रीमन्वातिरेचयति वरो
 दक्षिणा वरेणैव वरः स्पृणोत्यात्मा हि वरः॥²⁰

[16]

दुहे ह वा एष छन्दांसि यो याजयति स येन यज्ञक्रतुना याजयेत्सोऽरण्यं परेत्य
 शुचौ देशे स्वाध्यायमेवैनमधीयन्नासीत तस्यानशनं दीक्षा स्थानमुपसद आसनं
 सुत्या वायुहर्मन उपभृद्धतिर्ध्रुवा प्राणो हविः सामाध्वर्युः स वा एष यज्ञः
 प्राणदक्षिणोऽनन्तदक्षिणः समृद्धतरः॥²¹

[17]

कतिधावकीर्णी प्रविशति चतुर्थेत्याहुर्ब्रह्मवादिनो मरुतः प्राणैरिन्द्रं बलेन बृहस्पतिं
 ब्रह्मवर्चसेनाग्निमेवेतरेण सर्वेण तस्यैतां प्रायश्चित्तिं विदां चकार सुदेवः काश्यपो यो
 ब्रह्मचार्यवकिरेदमावास्यायाः रात्र्यामग्निं प्रणीयोपसमाधाय द्विराज्यस्योपघातं
 जुहोति कामावकीर्णीऽस्म्यवकीर्णीऽस्मि काम कामाय स्वाहा
 कामाभिर्द्रुग्धोऽस्म्यभिर्द्रुग्धोऽस्मि काम कामाय स्वाहेत्यमृतं वा
 आज्यममृतमेवऽऽत्मन्धत्ते हुत्वा प्रयताञ्जलिः कवातिर्यङ्मुग्निमभिमन्त्रयेत् सं
 माऽऽसिञ्चन्तु मरुतः समिन्द्रः सं बृहस्पतिः। सं माऽयमग्निः सिञ्चत्वायुषा च बलेन

च॒ऽऽयु॑ष्मन्तं करो॒त मे॒ति॒ प्रति॑ हा॒स्मै म॒रुतः॑ प्रा॒णान्द॑धति॒ प्रतीन्द्रो॑ ब॒लं प्रति॑
 बृह॒स्पति॑र्ब्रह्मवर्च॒सं प्रत्य॑ग्निरित॒रत्सर्व॑ः सर्व॑तनु॒र्भूत्वा सर्व॑मायुरेति॒ त्रिरभि॑मन्त्रयेत्
 त्रिष॑त्या हि दे॒वा योऽपू॑त इ॒व मन्ये॑त स इ॒त्थं जु॑हुयादित्थम॒भि॒मन्त्रये॑त् पुनी॑त
 ए॒व्ऽऽत्मान॑मायुरे॒व्ऽऽत्मन्ध॑त्ते वरो॒ दक्षि॑णा वरे॒णैव वर॑ः स्पृ॒णोत्या॒त्मा हि वरः॑॥ २२ ॥

[18]

भूः प्र॑पदे॒ भुवः॑ प्र॑पदे॒ स्वः॑ प्र॑पदे॒ भूर्भुवः॑ स्वः॑ प्र॑पदे॒ ब्रह्म॑ प्र॑पदे॒ ब्रह्म॑कोशं
 प्र॑पदे॒ऽमृतं॑ प्र॑पदे॒ऽमृत॑कोशं प्र॑पदे॒ चतु॑र्जालं ब्रह्म॑कोशं यं मृ॒त्युर्नाव॑पश्यति॒ तं प्र॑पदे॒
 दे॒वान् प्र॑पदे॒ देव॑पुरं प्र॑पदे॒ परी॑वृतो वरी॑वृतो ब्रह्म॑णा॒ वर्म॑णा॒ऽहं तेज॑सा॒ कश्य॑पस्य
 यस्मै॒ नम॑स्तच्छि॒रो धर्मो॑ मूर्धा॒नं ब्र॒ह्मोत्त॑रा॒ हनुर्य॑ज्ञोऽध॑रा॒ विष्णु॑रू॒हद॑यः॒ संवत्स॑रः
 प्र॒जन॑नम॒श्विनौ॑ पूर्॒वपा॑दा॒वत्रि॑र्मध्यं मि॒त्रावरु॑णाव॒पर॑पादा॒वग्निः॑ पु॒च्छस्य॑ प्रथ॒मं का॑ण्डं
 तत॒ इन्द्र॑स्ततः॒ प्रजा॑पतिरभयं चतु॒र्थः॑ स वा ए॒ष दि॒व्यः शा॑क्वरः॒ शिशु॑मार॒स्तः॑ ह॒ य
 ए॒वं वेदा॑प॒ पुन॑र्मृ॒त्युं ज॑यति॒ जय॑ति॒ स्वर्गं॑ लो॒कं ना॒ध्वनि॑ प्रमी॒यते॒ नाप्सु॑ प्रमी॒यते॒
 ना॒ग्नौ प्रमी॑यते॒ नान॑प॒त्यः प्रमी॑यते॒ ल॒घ्वान्नो॑ भवति॒ ध्रुव॑स्त्वम॒सि ध्रुव॑स्य क्षि॒तम॑सि॒ त्वं
 भू॒ताना॑मधि॒पति॑रसि॒ त्वं भू॒ताना॑ः॒ श्रेष्ठो॑ऽसि॒ त्वां भू॒तान्युप॑ प॒र्याव॑र्तन्ते॒ नम॑स्ते॒ नमः॑
 सर्वं॑ ते॒ नमो॑ नमः॑ शिशु॒कुमारा॑य॒ नमः॑॥ २३ ॥

[19]

नमः॑ प्रा॒च्यै दि॒शे या॒श्च दे॒वता॑ ए॒तस्यां॑ प्रति॒वस॑न्त्येताभ्यश्च॒ नमो॑ नमो॑ दक्षि॑णायै दि॒शे
 या॒श्च दे॒वता॑ ए॒तस्यां॑ प्रति॒वस॑न्त्येताभ्यश्च॒ नमो॑ नमः॑ प्रती॒च्यै दि॒शे या॒श्च दे॒वता॑
 ए॒तस्यां॑ प्रति॒वस॑न्त्येताभ्यश्च॒ नमो॑ नमः॑ उदी॒च्यै दि॒शे या॒श्च दे॒वता॑ ए॒तस्यां॑
 प्रति॒वस॑न्त्येताभ्यश्च॒ नमो॑ नमः॑ ऊ॒र्ध्वायै॑ दि॒शे या॒श्च दे॒वता॑ ए॒तस्यां॑ प्रति॒वस॑न्त्येताभ्यश्च॒
 नमो॑ नमो॑ऽध॑रायै दि॒शे या॒श्च दे॒वता॑ ए॒तस्यां॑ प्रति॒वस॑न्त्येताभ्यश्च॒ नमो॑
 नमो॑ऽवा॒न्तरा॑यै दि॒शे या॒श्च दे॒वता॑ ए॒तस्यां॑ प्रति॒वस॑न्त्येताभ्यश्च॒ नमो॑ नमो॑
 गङ्गा॑यमु॒नयो॑र्मध्ये ये॒ वस॑न्ति॒ ते मे॒ प्रस॑न्नात्मानश्चिरं जी॒वितं॑ व॒र्धय॑न्ति॒ नमो॑
 गङ्गा॑यमु॒नयो॑र्मुनिभ्यश्च॒ नमो॑ नमो॑ गङ्गा॑यमु॒नयो॑र्मुनिभ्यश्च॒ नमः॑॥ २४ ॥

[20]

ॐ नमो ब्रह्मणे नमो अस्त्रग्नये नमः पृथिव्यै नम ओषधीभ्यः। नमो वाचे नमो
वाचस्पतये नमो विष्णवे बृहते कुरुमि॥
॥ ॐ शान्तिः शान्तिः शान्तिः॥

॥तृतीयः प्रश्नः॥

ॐ तच्छं योरावृणीमहे। गातुं यज्ञाय। गातुं यज्ञपतये।

दैवीः स्वस्तिरस्तु नः। स्वस्तिर्मानुषेभ्यः। ऊर्ध्वं जिगातु भेषजम्।

शं नो अस्तु द्विपदैः। शं चतुष्पदे। ॐ शान्तिः शान्तिः शान्तिः॥

चित्तिः सुक्। चित्तमाज्यम्। वाग्वेदिः। आधीतं बर्हिः। केतो अग्निः। विज्ञातमग्निः।
वाक्पतिर्होता। मन उपवक्ता। प्राणो हविः। सामाध्वर्युः। वाचस्पते विधे नामन्।
विधेम ते नाम। विधेस्त्वमस्माकं नाम। वाचस्पतिः सोमं पिबतु। आऽस्मासु
नृमणन्धात्स्वाहा॥¹॥

अध्वर्युः पञ्च च॥

[1]

पृथिवी होता। द्यौरध्वर्युः। रुद्रोऽग्नीत्। बृहस्पतिरुपवक्ता। वाचस्पते वाचो वीर्येण।
सम्भृततमेनायक्ष्यसे। यजमानाय वार्यम्। आसुवस्करस्मै। वाचस्पतिः सोमं
पिबतु। जजनदिन्द्रमिन्द्रियाय स्वाहा॥²॥

पृथिवी होता दश॥

[2]

अग्निर्होता। अश्विनाऽध्वर्यूः। ब्रष्टाऽग्नीत्। मित्र उपवक्ता। सोमः सोमस्य पुरोगाः।
शुक्रः शुक्रस्य पुरोगाः। श्रतास्त इन्द्र सोमाः। वातापेर्हवनश्रुतः स्वाहा॥³॥

अग्निर्होताऽष्टौ॥

[3]

सूर्य ते चक्षुः। वातं प्राणः। द्यां पृष्ठम्। अन्तरिक्षमात्मा। अङ्गैर्यज्ञम्। पृथिवी
शरीरैः। वाचस्पतेऽच्छिद्रया वाचा। अच्छिद्रया जुहो। दिवि देवावृधः होत्रा
मेरयस्व स्वाहा॥⁴॥

सूर्य ते नव॥

[4]

महाहविरहोता। सत्यहविरध्वर्युः। अच्युतपाजा अग्नीत्। अच्युतमना उपवक्ता।
अनाधृष्यश्चाप्रतिधृष्यश्च यज्ञस्याभिगरो। अयास्य उद्गाता। वाचस्पते हृद्विधे नामन्।
विधेम ते नाम। विधेस्त्वमस्माकं नाम। वाचस्पतिः सोममपात्। मा दैव्यस्तन्तुश्छेदि

मा म॑नुष्यः॑। नमो॑ दि॒वे। नमः॑ पृथि॒व्यै स्वाहा॑॥⁵॥

अ॒पा॒त्नी॒णि च॑॥

[5]

वाग्घो॑ता॒। दी॒क्षा प॑त्नी॒। वातो॑ऽध्व॒र्युः। आपो॑ऽभि॒गरः। मनो॑ ह॒विः। तप॑सि जुहोमि।
भूर्भुवः॑ सु॒वः। ब्रह्म॑ स्वय॒म्भु। ब्रह्म॑णे स्वय॒म्भुवे स्वाहा॑॥⁶॥

वाग्घो॑ता॒ नव॑॥

[6]

ब्रा॒ह्म॒ण एक॑होता। स य॒ज्ञः। स मे॑ ददातु प्र॒जां प॒शून्पु॒ष्टिं यशः॑। य॒ज्ञश्च॑ मे भूयात्।
अ॒ग्नि॒र्द्वि॒हो॑ता। स भ॒र्ता। स मे॑ ददातु प्र॒जां प॒शून्पु॒ष्टिं यशः॑। भ॒र्ता च॑ मे भूयात्।
पृथि॒वी त्रि॑होता। स प्र॑ति॒ष्ठा॥⁷॥

स मे॑ ददातु प्र॒जां प॒शून्पु॒ष्टिं यशः॑। प्र॑ति॒ष्ठा च॑ मे भूयात्। अ॒न्तरि॑क्षं चतु॒र्हो॑ता। स
वि॒ष्ठाः। स मे॑ ददातु प्र॒जां प॒शून्पु॒ष्टिं यशः॑। वि॒ष्ठाश्च॑ मे भूयात्। वा॒युः पञ्च॑होता। स
प्रा॒णः। स मे॑ ददातु प्र॒जां प॒शून्पु॒ष्टिं यशः॑। प्रा॒णश्च॑ मे भूयात्॥⁸॥

च॒न्द्र॒मा ष॑ड्ढोता। स ऋ॒तून्क॑ल्पयाति। स मे॑ ददातु प्र॒जां प॒शून्पु॒ष्टिं यशः॑। ऋ॒तव॑श्च
मे कल्प॑न्ताम्। अ॒न्नः सप्त॑होता। स प्रा॒णस्य॑ प्रा॒णः। स मे॑ ददातु प्र॒जां प॒शून्पु॒ष्टिं
यशः॑। प्रा॒णस्य॑ च मे प्रा॒णो भू॑यात्। द्यौ॒र॒ष्ट॒हो॑ता। सो॑ऽनाधृ॒ष्यः॥⁹॥

स मे॑ ददातु प्र॒जां प॒शून्पु॒ष्टिं यशः॑। अ॒नाधृ॑ष्यश्च भूयासम्। आ॒दि॒त्यो नव॑होता। स
ते॒ज॒स्वी। स मे॑ ददातु प्र॒जां प॒शून्पु॒ष्टिं यशः॑। ते॒ज॒स्वी च॑ भूयासम्।
प्र॒जाप॑तिर्द॒श॒हो॑ता। स इ॒दः स॑र्वम्। स मे॑ ददातु प्र॒जां प॒शून्पु॒ष्टिं यशः॑। स॑र्वं च मे
भूयात्॥¹⁰॥

प्र॑ति॒ष्ठा प्रा॒णश्च॑ मे भूयादनाधृ॒ष्यः स॑र्वं च मे भूयात्॥

[7]

अ॒ग्नि॒र्य॒जुर्भिः॑। स॒वि॒ता स्तो॑मैः। इन्द्र॑ उक्थाम॒दैः। मि॒त्रावरु॑णावाशिषा॑। अ॒ङ्गिर॑सो
धि॒ष्णि॒यैर॒ग्निभिः॑। मरु॑तः स॒दोह॑वि॒र्धाना॑भ्याम्। आपः॑ प्रोक्ष॑णीभिः। ओष॑धयो ब॒र्हिषा॑।
अ॒दि॒तिर्वे॒द्या। सोमो॑ दी॒क्षया॑॥¹¹॥

वृ॒ष्टे॒ध्मेन॑। विष्णु॑र्य॒ज्ञेन॑। वस॑व आ॒ज्येन॑। आ॒दि॒त्या दक्षि॑णाभिः। वि॒श्वे दे॒वा ऊ॒र्जा।
पू॒षा स्व॑गाक॒रेण॑। बृह॑स्पतिः पुरो॒धया॑। प्र॒जाप॑तिरु॒द्गी॒धेन॑। अ॒न्तरि॑क्षं प॒वित्रे॑ण। वा॒युः

पात्रैः। अह॑ ऽ श्रद्धया॑॥¹²॥

दीक्षया पात्रैरेकं च॥

[8]

सेनेन्द्र॑स्य। धेना॑ बृह॒स्पतेः॑। प॒त्न्या॑ पू॒ष्णः। वाग्वा॒योः। दी॒क्षा सोम॑स्य। पृ॒थिव्य॑ग्नेः।
वसू॑नां गाय॒त्री। रु॒द्राणां॑ त्रि॒ष्टुक्। आ॒दि॒त्यानां॑ जग॑ती। वि॒ष्णो॑रनु॒ष्टुक्॥¹³॥

वरु॑णस्य वि॒राट्। य॒ज्ञस्य॑ प॒ङ्क्तिः। प्र॒जाप॑तेरनु॒मतिः। मि॒त्रस्य॑ श्रद्धा। स॒वि॒तुः प्रसू॑तिः।
सूर्य॑स्य मरी॑चिः। च॒न्द्रम॑सो रोहि॑णी। ऋ॒षी॑णामरु॒न्धती॑। पर्जन्य॑स्य वि॒द्युत्। चत॑स्रो
दि॒शः। चत॑स्रोऽवा॒न्तर॑दि॒शाः। अह॑श्च रा॒त्रिश्च। कृ॒षिश्च॑ वृ॒ष्टिश्च। बि॒षिश्चाप॑चितिश्च।
आप॑श्चौष॑धयश्च। ऊ॒र्क् सूनृ॑ता च दे॒वानां॑ प॒त्नयः॥¹⁴॥

अनुष्टुप्दिशः षट्॥

[9]

दे॒वस्य॑ त्वा स॒वि॒तुः प्र॑स॒वे। अ॒श्विनो॑र्बा॒हुभ्या॑म्। पू॒ष्णो ह॑स्ता॒भ्यां प्र॑तिगृह्णामि। राजा॑
त्वा वरु॑णो नयतु दे॒वि दक्षि॑णेऽग्नये॒ हिर॑ण्यम्। तेना॑मृत॒त्वम॑श्याम्। वयो॑ दा॒त्रे। मयो॑
मह्य॑मस्तु प्र॒तिग्र॑ही॒त्रे। क इ॒दं कस्मा॑ अ॒दात्। कामः॑ कामा॑य। कामो॑ दा॒ता॥¹⁵॥

कामः॑ प्र॒तिग्र॑ही॒ता। कामः॑ स॒मुद्र॑मावि॒श। कामे॑न त्वा प्र॒तिगृ॑ह्णामि। कामे॑तत्तै॒। ए॒षा
तै॑ काम॒ दक्षि॑णा। उ॒त्ता॒न॒स्त्वाङ्गी॑र॒सः प्र॑तिगृह्णातु। सोमा॑य॒ वासः॑। रु॒द्राय॑ गा॒म्।
वरु॑णायाश्चम॑। प्र॒जाप॑तये॒ पुरु॑षम्॥¹⁶॥

मन॑वे॒ तल्प॑म्। त्वष्ट्रे॑ऽजाम्। पू॒ष्णेऽवि॑म्। निर्ऋ॑त्या अ॒श्वतर॑गर्दभौ। हि॒मव॑तो
ह॒स्तिन॑म्। ग॒न्ध॒र्वाप्स॒राभ्यः॑ स्र॒गलं॑ क॒रणे॑। वि॒श्वेभ्यो॑ दे॒वेभ्यो॑ धा॒न्यम्। वा॒चेऽन्न॑म्।
ब्र॒ह्म॒ण ओ॒दन॑म्। स॒मुद्रा॑यापः॥¹⁷॥

उ॒त्ता॒नाया॑ङ्गी॒रसा॑यानः। वै॒श्वान॑राय॒ रथ॑म्। वै॒श्वान॑रः प्र॒ब॒था ना॒कमा॑रु॒हत्। दि॒वः पृ॑ष्ठं
भ॒न्द॒मानः॑ सु॒मन्म॑भिः। स पू॒र्वव॑ज्ज॒नय॑ज्ज॒न्तवे॑ ध॒नम्। स॒मा॒नम॑ज्ज॒मा परि॑याति
जागृ॑विः। राजा॑ त्वा वरु॑णो नयतु दे॒वि दक्षि॑णे वै॒श्वान॑राय॒ रथ॑म्।
तेना॑मृत॒त्वम॑श्याम्। वयो॑ दा॒त्रे। मयो॑ मह्य॑मस्तु प्र॒तिग्र॑ही॒त्रे॥¹⁸॥

क इ॒दं कस्मा॑ अ॒दात्। कामः॑ कामा॑य। कामो॑ दा॒ता। कामः॑ प्र॒तिग्र॑ही॒ता। कामः॑
स॒मुद्र॑मा वि॒श। कामे॑न त्वा प्र॒तिगृ॑ह्णामि। कामे॑तत्तै॒। ए॒षा तै॑ काम॒ दक्षि॑णा।

उत्तानस्त्वाङ्गीरसः प्रतिगृह्णातु॥¹⁹॥

दाता पुरुषमपः प्रतिग्रहीत्रे नव च॥

[10]

सुवर्णं घर्मं परिवेद वेनम्। इन्द्रस्यात्मानं दशधा चरन्तम्। अन्तः समुद्रे मनसा
चरन्तम्। ब्रह्मान्विन्दद्दशहोतारमणैः। अन्तः प्रविष्टः शास्ता जनानाम्। एकः
सन्बहुधा विचारः। शतं शुक्राणि यत्रैकं भवन्ति। सर्वे वेदा यत्रैकं भवन्ति। सर्वे
होतारो यत्रैकं भवन्ति। समानसीन आत्मा जनानाम्॥²⁰॥

अन्तः प्रविष्टः शास्ता जनानां सर्वात्मा। सर्वाः प्रजा यत्रैकं भवन्ति। चतुर्होतारो
यत्र सम्पदं गच्छन्ति देवैः। समानसीन आत्मा जनानाम्। ब्रह्मेन्द्रमग्निं जगतः
प्रतिष्ठाम्। दिव आत्मानं सवितारं बृहस्पतिम्। चतुर्होतारं प्रदिशोऽनु क्लृप्तम्।
वाचो वीर्यं तपसाऽन्विन्दत्। अन्तः प्रविष्टं कर्तारमेतम्। ऋष्टारं रूपाणि विकुर्वन्तं
विपश्चिम्॥²¹॥

अमृतस्य प्राणं यज्ञमेतम्। चतुर्होतृणामात्मानं कवयो निचिक्युः। अन्तः प्रविष्टं
कर्तारमेतम्। देवानां बन्धु निहितं गुहासु। अमृतेन क्लृप्तं यज्ञमेतम्।
चतुर्होतृणामात्मानं कवयो निचिक्युः। शतं नियुतः परिवेद विश्वा विश्ववारः।
विश्वमिदं वृणाति। इन्द्रस्यात्मा निहितः पञ्चहोता। अमृतं देवानामायुः प्रजानाम्॥²²॥

इन्द्रं राजानं सवितारमेतम्। वायोरात्मानं कवयो निचिक्युः। रश्मिं रश्मीनां
मध्ये तपन्तम्। ऋतस्य पदे कवयो निपान्ति। य आण्डकोशे भुवनं बिभर्ति।
अनिर्भिण्णः सन्नर्थं लोकान् विचष्टै। यस्याण्डकोशं शुष्ममाहुः प्राणमुत्तमम्। तेन
क्लृप्तोऽमृतेनाहमस्मि। सुवर्णं कोशं रजसा परीवृतम्। देवानां वसुधानीं
विराजम्॥²³॥

अमृतस्य पूर्णान्तामु कलां विचक्षते। पादं षड्भूतुर्न किलाविवित्से। येनर्तवः
पञ्चधोत क्लृप्ताः। उत वा षड्धा मनसोत क्लृप्ताः। तं षड्भूतारमृतुभिः कल्पमानम्।
ऋतस्य पदे कवयो निपान्ति। अन्तः प्रविष्टं कर्तारमेतम्। अन्तश्चन्द्रमसि मनसा
चरन्तम्। सहैव सन्तं न विजानन्ति देवाः। इन्द्रस्यात्मानं शतधा चरन्तम्॥²⁴॥

इन्द्रो राजा जगतो य ईशैः। सप्तहोता सप्तधा विक्लृप्तः। परेण तन्तुं
परिषिच्यमानम्। अन्तरादित्ये मनसा चरन्तम्। देवानां हृदयं ब्रह्मान्विन्दत्।
ब्रह्मेतद्ब्रह्मण उज्जभार। अर्कः श्रोतन्तः सरिरस्य मध्ये। आ यस्मिन्सप्त परेव।
मेहन्ति बहुलाः श्रियम्। बह्वश्वामिन्द्र गोमतीम्॥²⁵॥

अच्युतां बहुलाः श्रियम्। स हरिर्वसुवित्तमः। पेरुरिन्द्राय पिन्वते। बह्वश्वामिन्द्र
गोमतीम्। अच्युतां बहुलाः श्रियम्। मह्यमिन्द्रो नियच्छतु। शतः शता अस्य
युक्ता हरीणाम्। अर्वाडा यातु वसुभी रश्मिरिन्द्रः। प्रमहमाणो बहुलाः श्रियम्।
रश्मिरिन्द्रः सविता मे नियच्छतु॥²⁶॥

घृतं तेजो मधुमदिन्द्रियम्। मय्ययमग्निर्दधातु। हरिः पतङ्गः पटरी सुपर्णः। दिविक्षयो
नभसा य एति। स न इन्द्रः कामवरं ददातु। पञ्चारं चक्रं परिवर्तते पृथु।
हिरण्यज्योतिः सरिरस्य मध्ये। अजस्रं ज्योतिर्नभसा सर्पदेति। स न इन्द्रः
कामवरं ददातु। सप्त युञ्जन्ति रथमेकचक्रम्॥²⁷॥

एको अश्वो वहति सप्तनामा। त्रिनाभिं चक्रमजरमनर्वम्। येनेमा विश्वा भुवनानि
तस्थुः। भद्रं पश्यन्त उपसेदुरग्रे। तपो दीक्षामृषयः सुवर्विदः। ततः क्षत्रं बलमोजश्च
जातम्। तदस्मै देवा अभि सन्नमन्तु। श्वेतः रश्मिं बोभुज्यमानम्। अपां नेतारं
भुवनस्य गोपाम्। इन्द्रं निचिक्युः परमे व्योमन्॥²⁸॥

रोहिणीः पिङ्गला एकरूपाः। क्षरन्तीः पिङ्गला एकरूपाः। शतः सहस्राणि प्रयुतानि
नाव्यानाम्। अयं यः श्वेतो रश्मिः। परि सर्वमिदं जगत्। प्रजां पशून्धनानि।
अस्माकं ददातु। श्वेतो रश्मिः परि सर्वं बभूव। सुवन्मह्यं पशून् विश्वरूपान्।
पतङ्गमक्तमसुरस्य मायया॥²⁹॥

हृदा पश्यन्ति मनसा मनीषिणः। समुद्रे अन्तः कवयो विचक्षते। मरीचीनां
पदमिच्छन्ति वेधसः। पतङ्गो वाचं मनसा बिभर्ति। तां गन्धर्वोऽवदद्गर्भे अन्तः। तां
द्योतमानाः स्वर्यं मनीषाम्। ऋतस्य पदे कवयो निपान्ति। ये ग्राम्याः पशवो
विश्वरूपाः। विरूपाः सन्तो बहुधैकरूपाः। अग्निस्ताः अग्रे प्रमुमुक्तु देवः॥³⁰॥

प्रजापतिः प्रजयां संविदानः। वीतः स्तुकेस्तुके। युवमस्मासु नियच्छतम्। प्र प्र
यज्ञपतिन्तिर। ये ग्राम्याः पशवो विश्वरूपाः। विरूपाः सन्तो बहुधैकरूपाः। तेषां
सप्तानामिह रन्तिरस्तु। रायस्पोषाय सुप्रजास्त्राय सुवीर्याय। य आरण्याः पशवो
विश्वरूपाः। विरूपाः सन्तो बहुधैकरूपाः। वायुस्तां अग्रे प्रमुमोक्तु देवः। प्रजापतिः
प्रजयां संविदानः। इडाये सृष्टं घृतवच्चराचरम्। देवा अन्वविन्दन्गुहां हितम्। य
आरण्याः पशवो विश्वरूपाः। विरूपाः सन्तो बहुधैकरूपाः। तेषां सप्तानामिह
रन्तिरस्तु। रायस्पोषाय सुप्रजास्त्राय सुवीर्याय॥ 31 ॥

आत्मा जनानां विकुर्वन्तं विपश्चिं प्रजानां वसुधानीं विराजं चरन्तं गोमतीं मे नियच्छन्नेकचक्रं व्योमन्मायया देव एकरूपा अष्टौ च॥ [11]

सहस्रशीर्षा पुरुषः। सहस्राक्षः सहस्रपात्। स भूमिं विश्वतो वृत्वा।
अत्यतिष्ठदृशाङ्गुलम्। पुरुष एवेदः सर्वम्। यद्भूतं यच्च भव्यम्। उतामृतबस्येशानः।
यदन्नेनातिरोहति। एतावानस्य महिमा। अतो ज्यायाश्च पूरुषः॥ 32 ॥

पादोऽस्य विश्वा भूतानि। त्रिपादस्यामृतं दिवि। त्रिपादूर्ध्व उदैत्पुरुषः।
पादोऽस्येहाभवात्पुनः। ततो विष्वङ्मक्रामत्। साशनानशने अभि।
तस्माद्विराडजायत। विराजो अधि पूरुषः। स जातो अत्यरिच्यत। पश्चाद्भूमिमथो
पुरः॥ 33 ॥

यत्पुरुषेण हविषा। देवा यज्ञमतन्वत। वसन्तो अस्यासीदाज्यम्। ग्रीष्म इध्मः
शरद्धविः। सप्तास्यासन्परिधयः। त्रिः सप्त समिधः कृताः। देवा यद्यज्ञं तन्वानाः।
अबध्नन्पुरुषं पशुम्। तं यज्ञं बर्हिषि प्रौक्षन्। पुरुषं जातमेग्रतः॥ 34 ॥

तेन देवा अयजन्त। साध्या ऋषयश्च ये। तस्माद्यज्ञात्सर्वहुतः। सम्भृतं पृषदाज्यम्।
पशून्स्तांश्चक्रे वायव्यान्। आरण्यान्ग्राम्याश्च ये। तस्माद्यज्ञात्सर्वहुतः। ऋचः
सामानि जज्ञिरे। छन्दांसि जज्ञिरे तस्मात्। यजुस्तस्मादजायत॥ 35 ॥

तस्मादश्वा अजायन्त। ये के चोभयादतः। गावो ह जज्ञिरे तस्मात्। तस्माज्जाता
अजावयः। यत्पुरुषं व्यदधुः। कतिधा व्यकल्पयन्। मुखं किमस्य कौ बाहू।
कावूरू पादावुच्येते। ब्राह्मणोऽस्य मुखमासीत्। बाहू राजन्यः कृतः॥ 36 ॥

ऊरू तदस्य यद्वैश्यः। पद्भ्यां शूद्रो अजायत। चन्द्रमा मनसो जातः। चक्षोः सूर्यो
अजायत। मुखादिन्द्रश्चाग्निश्च। प्राणाद्वायुरजायत। नाभ्यां आसीदन्तरिक्षम्। शीर्ष्णो
द्यौः समवर्तत। पद्भ्यां भूमिर्दिशः श्रोत्रात्। तथा लोकाः अकल्पयन्॥³⁷॥

वेदाहमेतं पुरुषं महान्तम्। आदित्यवर्णं तमसस्तु पारे। सर्वाणि रूपाणि विचित्य
धीरः। नामानि कृत्वाऽभिवदन् यदास्तैः। धाता पुरस्ताद्यमुदाजहार। शक्रः
प्रविद्वान्प्रदिशश्चतस्रः। तमेवं विद्वानमृतं इह भवति। नान्यः पन्था अयनाय विद्यते।
यज्ञेन यज्ञमयजन्त देवाः। तानि धर्माणि प्रथमान्यासन्। ते ह नाकं महिमानः
सचन्ते। यत्र पूर्वे साध्याः सन्ति देवाः॥³⁸॥

पुरुषः पुरोऽग्रतोऽजायत कृतोऽकल्पयन्नासं द्वे च (ज्यायानधि पुरुषः। अन्यत्र पुरुषः॥)॥ [12]

अद्भ्यः सम्भूतः पृथिव्यै रसाच्च। विश्वकर्मणः समवर्तताधि। तस्य ब्रष्टा
विदधद्रूपमेति। तत्पुरुषस्य विश्वमाजानमग्रैः। वेदाहमेतं पुरुषं महान्तम्।
आदित्यवर्णं तमसः परस्तात्। तमेवं विद्वानमृतं इह भवति। नान्यः पन्था
विद्यतेऽयनाय। प्रजापतिश्चरति गर्भे अन्तः। अजायमानो बहुधा विजायते॥³⁹॥

तस्य धीराः परिजानन्ति योनिम्। मरीचीनां पदमिच्छन्ति वेधसः। यो देवेभ्य
आतपति। यो देवानां पुरोहितः। पूर्वी यो देवेभ्यो जातः। नमो रुचाय ब्राह्मये।
रुचं ब्राह्मं जनयन्तः। देवा अग्रे तदब्रुवन्। यस्त्वैवं ब्राह्मणो विद्यात्। तस्य देवा
असन्वशैः। ह्रीश्च ते लक्ष्मीश्च पत्न्यौ। अहोरात्रे पार्श्वे। नक्षत्राणि रूपम्। अश्विनौ
व्यात्तम्। इष्टं मनिषाण। अमुं मनिषाण। सर्वं मनिषाण॥⁴⁰॥

जायते वशे सप्त च॥ [13]

भर्ता सन्ध्रियमाणो बिभर्ति। एको देवो बहुधा निविष्टः। यदा भारं तन्द्रयते स
भर्तुम्। निधाय भारं पुनरस्तमेति। तमेव मृत्युममृतं तमाहुः। तं भर्तारं तमुं
गोप्तारमाहुः। स भृतो भ्रियमाणो बिभर्ति। य एनं वेद सत्येन भर्तुम्। सद्यो
जातमुत जहात्येषः। उतो जरन्तं न जहात्येकम्॥⁴¹॥

उतो बहूनेकमहर्जहार। अतन्द्रो देवः सदमेव प्रार्थः। यस्तद्वेद यत आबभूव।

सन्धां च या॑ स॒न्दधे॑ ब्रह्म॑णेषः। रम॑न्ते तस्मि॑न्नु॒त जी॑र्णे श॒याने॑। नैनं॑ जहा॒त्यहः॑ सु॒पूर्वेषु॑। त्वामापो॑ अनु॒ सर्वा॑श्चरन्ति जा॒नतीः॑। वत्सं॑ प॒यसा॑ पुना॒नाः। त्वमग्नि॑
हव्य॒वाहः॑ समि॑न्त्से। त्वं भ॒र्ता मा॑तरि॒श्वो प्र॒जाना॑म्॥⁴²॥

त्वं य॒ज्ञस्त्वमु॑वेवासि सोमः॑। तव॑ दे॒वा हव॑माय॑न्ति स॒र्वे। त्वमेको॑ऽसि ब॒हून्नु॑प्रविष्टः। नम॑स्ते अस्तु सु॒हवो॑ म ए॒धि। नमो॑ वामस्तु शृ॒णुतः॑ हव॑ मे। प्राणा॑पानावजि॒रः स॒धर॑न्तौ। ह्वया॑मि वां ब्रह्म॑णा तूर्तमेतम्। यो मां द्वेष्टि॑ तं ज॒हितं॑ युवाना। प्राणा॑पानौ संविदा॒नौ ज॒हितम्। अ॒मुष्या॑सुना॒मा सङ्ग॑साधाम्॥⁴³॥

तं मे॑ दे॒वा ब्रह्म॑णा संविदा॒नौ। व॒धाय॑ दत्तं तम॒हः ह॑नामि। असं॑ज्जजान स॒त आब॑भूव। यं यं ज॒जान॑ स उ॒ गोपो॑ अ॒स्य। यदा॑ भा॒रं तन्द्र॑यते स भ॒र्तुम्। प॒रास्य॑ भा॒रं पुन॑रस्तमेति। तद्वै त्वं प्रा॒णो अ॑भवः। म॒हान्भोगः॑ प्र॒जाप॑तेः। भुजः॑ क॒रिष्य॑माणः। यद्दे॒वान्प्रा॑णयो॒ नव॑॥⁴⁴॥

एकं प्र॒जाना॑ङ्गसा॒थां नव॑॥ [14]

हरि॑ः हर॑न्तमनु॑यन्ति दे॒वाः। वि॒श्वस्ये॑शानं वृष॒भं म॑तीनाम्। ब्रह्म॑ स॒रूप॑मनु॑मेदमागा॑त्। अ॒यनं॑ मा वि॒व॒धीर्वि॒क्रम॑स्त्व। मा छि॑दो मृ॒त्यो मा व॑धीः। मा मे ब॒लं वि॒वृ॒हो मा प्र॑मोषीः। प्र॒जां मा मे॑ री॒रिष॑ आ॒युरु॑ग्र। नृच॑क्ष॒सं त्वा ह॒विषा॑ वि॒धेम। स॒द्यश्च॑कमा॒नाय॑। प्र॒वे॒पा॒नाय॑ मृ॒त्यवै॑॥⁴⁵॥

प्रा॒स्मा आ॒शा अ॑शृण्वन्। का॒मे॒नाज॑नयन्पुनः॑। का॒मे॒न मे॑ का॒म आ॑गात्। हृद॑याद्धृद॑यं मृ॒त्योः। यद॑मीषा॒मदः॑ प्रि॒यम्। तदै॒तूप॑मा॒मभि॑। परं॑ मृ॒त्यो अनु॑ परे॒हि प॒न्था॑म्। यस्ते॒ स्व इ॒तरो॑ दे॒वया॑नात्। चक्षु॑ष्मते शृण्व॒ते ते॑ ब्रवी॑मि। मा नः॑ प्र॒जाः री॑रिषो॒ मोत॑ वी॒रान्। प्र पू॒र्व्यं मन॑सा॒ वन्द॑मानः। नाध॑मानो वृष॒भं च॑र्षणी॒नाम्। यः प्र॒जाना॑मे॒करा॑ण्मानु॑षीणाम्। मृ॒त्युं य॑जे प्रथ॒मजामृ॑तस्य॥⁴⁶॥

मृ॒त्यवै॑ वी॒राःश्च॒त्वारि॑ च॥ [15]

त॒रणि॑र्वि॒श्वदर्श॑तो ज्योतिष्कृद॑सि सूर्य॑। वि॒श्वमा॑ भा॒सि रो॒चन॑म्। उ॒प॒या॒मगृ॑हीतोऽसि सूर्या॑य त्वा॒ भ्राज॑स्वत ए॒ष ते॒ योनिः॑ सूर्या॑य त्वा॒ भ्राज॑स्वते॥⁴⁷॥

[16]

आ॒ प्या॑य॒स्व म॑दि॒न्त॒म॒ सोम॑ वि॒श्वा॑भि॒रू॒तिभिः॑। भ॒वा॑ नः स॒प्रथ॑स्त॒मः॥⁴⁸॥

[17]

ई॒यु॒ष्टे ये॑ पू॒र्वत॑रा॒मप॑श्यन् व्यु॒च्छन्ती॑मु॒षसं॑ म॒र्त्या॑सः। अ॒स्माभि॑रू॒ नु प्र॑ति॒चक्ष्या॑ऽभू॒दो॒ ते य॑न्ति॒ ये अ॑प॒रीषु॑ प॒श्यान्॥⁴⁹॥

[18]

ज्योति॑ष्मतीं॒ त्वा सा॑दयामि ज्योति॑ष्कृतं॒ त्वा सा॑दयामि ज्योति॑र्विदं॒ त्वा सा॑दयामि
भा॒स्वतीं॒ त्वा सा॑दयामि ज्वल॑न्तीं॒ त्वा सा॑दयामि म॒ल्मला॑भवन्तीं॒ त्वा सा॑दयामि
दी॒प्यमा॑नां॒ त्वा सा॑दयामि रोच॑मानां॒ त्वा सा॑दयाम्यज॑सां॒ त्वा सा॑दयामि बृ॒हज्यो॑तिषं
त्वा सा॑दयामि बो॒धय॑न्तीं॒ त्वा सा॑दयामि जाग्र॑तीं॒ त्वा सा॑दयामि॥⁵⁰॥

[19]

प्र॒या॒साय॒ स्वाहा॑ऽऽया॒साय॒ स्वाहा॑ वि॒या॒साय॒ स्वाहा॑ सं॒या॒साय॒ स्वाहो॑द्या॒साय॒
स्वाहा॑ऽव॒या॒साय॒ स्वाहा॑ शु॒चे स्वाहा॑ शो॒काय॒ स्वाहा॑ तप्य॒त्रै स्वाहा॑ तप॑ते॒ स्वाहा॑
ब्र॒ह्मह॑त्यायै॒ स्वाहा॑ सर्व॑स्मै॒ स्वाहा॑॥⁵¹॥

[20]

चित्त॑ः सं॒न्ताने॑न॒ भवं॑ य॒क्रा रु॒द्रन्त॑नि॒म्ना प॑शुपति॑ः स्थूल॑हृदये॒नाग्नि॑ः हृद॑येन रु॒द्रं
लोहि॑तेन श॒र्व म॑त॒स्नाभ्यां॑ म॒हादे॒वम॒न्तः पा॑र्श्वे॒नौषि॑ष्ठ॒हनः॑ शि॒ङ्गीनि॑को॒श्याभ्या॑म्॥⁵²॥

[21]

तच्छं॒ योरा॑वृ॒णीम॑हे। गा॒तुं य॒ज्ञाय॑। गा॒तुं य॒ज्ञप॑तये।
दैवीः॑ स्व॒स्तिर॑स्तु नः। स्व॒स्तिर्मा॑नु॒षेभ्यः॑। ऊ॒र्ध्वं जि॑गातु भेष॒जम्।
शं नो॑ अस्तु द्वि॒पदै॑। शं चतु॑ष्पदे। ॐ शान्तिः॒ शान्तिः॒ शान्तिः॑॥

॥चतुर्थः प्रश्नः॥

नमो वाचे या चोदिता या चानुदिता तस्यै वाचे नमो नमो वाचे नमो वाचस्पतये
नम ऋषिभ्यो मन्त्रकृद्भ्यो मन्त्रपतिभ्यो मा मामृषयो मन्त्रकृतो मन्त्रपतयः
परोदुर्माहमृषीन्मन्त्रकृतो मन्त्रपतीन्परोदां वैश्वदेवीं वाचमुदासः शिवामदस्तां जुष्टां
देवेभ्यः शर्म मे द्यौः शर्म पृथिवी शर्म विश्वमिदं जगत्। शर्म चन्द्रश्च सूर्यश्च शर्म
ब्रह्मप्रजापती। भूतं वदिष्ये भुवनं वदिष्ये तेजो वदिष्ये यशो वदिष्ये तपो वदिष्ये
ब्रह्म वदिष्ये सत्यं वदिष्ये तस्मा अहमिदमुपस्तरणमुपेस्तृण उपस्तरणं मे प्रजायै
पशूनां भूयादुपस्तरणमहं प्रजायै पशूनां भूयासं प्राणापानौ मृत्योर्मा पातं
प्राणापानौ मा मा हासिष्टं मधु मनिष्ये मधु जनिष्ये मधु वक्ष्यामि मधु वदिष्यामि
मधुमतीं देवेभ्यो वाचमुदासः शुश्रूषेण्यां मनुष्येभ्यस्तं मा देवा अवन्तु शोभायै
पितरोऽनुमदन्तु। ॐ शान्तिः शान्तिः शान्तिः॥

नमो वाचे या चोदिता या चानुदिता तस्यै वाचे नमो नमो वाचे नमो वाचस्पतये
नम ऋषिभ्यो मन्त्रकृद्भ्यो मन्त्रपतिभ्यो मा मामृषयो मन्त्रकृतो मन्त्रपतयः
परोदुर्माहमृषीन्मन्त्रकृतो मन्त्रपतीन्परोदां वैश्वदेवीं वाचमुदासः शिवामदस्तां जुष्टां
देवेभ्यः शर्म मे द्यौः शर्म पृथिवी शर्म विश्वमिदं जगत्। शर्म चन्द्रश्च सूर्यश्च शर्म
ब्रह्मप्रजापती। भूतं वदिष्ये भुवनं वदिष्ये तेजो वदिष्ये यशो वदिष्ये तपो वदिष्ये
ब्रह्म वदिष्ये सत्यं वदिष्ये तस्मा अहमिदमुपस्तरणमुपेस्तृण उपस्तरणं मे प्रजायै
पशूनां भूयादुपस्तरणमहं प्रजायै पशूनां भूयासं प्राणापानौ मृत्योर्मा पातं
प्राणापानौ मा मा हासिष्टं मधु मनिष्ये मधु जनिष्ये मधु वक्ष्यामि मधु वदिष्यामि
मधुमतीं देवेभ्यो वाचमुदासः शुश्रूषेण्यां मनुष्येभ्यस्तं मा देवा अवन्तु शोभायै
पितरोऽनुमदन्तु॥¹॥

[1]

युञ्जते मन उत युञ्जते धियः। विप्रा विप्रस्य बृहतो विपश्चितः। वि होत्रा दधे

वयुना॒विदेक॑ इत्। म॒ही दे॒वस्य॑ सवि॒तुः परि॑ष्टुतिः। दे॒वस्य॑ त्वा सवि॒तुः प्र॑सवे।
अ॒श्विनो॑र्बा॒हुभ्या॑म्। पू॒ष्णो ह॑स्ता॒भ्यामा॑ददे। अ॒ग्नि॒रसि॑ ना॒रि॒रसि॑। अ॒ध्व॒र॒कृ॒द्दे॒वेभ्यः॑।
उत्ति॑ष्ठ ब्रह्मणस्पते॥₂॥

दे॒वय॑न्तस्त्वेमहे। उप॒ प्रय॑न्तु म॒रुतः॑ सु॒दान॑वः। इन्द्र॑ प्रा॒शू॒र्भवा॑ सचा॑। प्रैतु
ब्रह्म॑णस्पतिः। प्र दे॒व्येतु॑ सू॒नृता॑। अ॒च्छा वी॑रं नर्यं प॒ङ्क्ति॑राधसम्। दे॒वा य॑ज्ञं न॑यन्तु
नः। दे॒वी द्या॑वापृथि॒वी अनु॑ मे म॒सा॒थाम्। ऋ॒द्ध्यास॑म॒द्य। म॒खस्य॑ शि॒रः॥₃॥

म॒खाय॑ त्वा। म॒खस्य॑ त्वा शी॒र्ष्णे। इ॒यत्य॑ग्रं आसीः। ऋ॒द्ध्यास॑म॒द्य। म॒खस्य॑ शि॒रः।
म॒खाय॑ त्वा। म॒खस्य॑ त्वा शी॒र्ष्णे। दे॒वीर्व॑मी॒रस्य॑ भू॒तस्य॑ प्रथम॒जा ऋ॒ताव॑रीः।
ऋ॒द्ध्यास॑म॒द्य। म॒खस्य॑ शि॒रः॥₄॥

म॒खाय॑ त्वा। म॒खस्य॑ त्वा शी॒र्ष्णे। इन्द्र॑स्यो॒जोऽसि॑। ऋ॒द्ध्यास॑म॒द्य। म॒खस्य॑ शि॒रः।
म॒खाय॑ त्वा। म॒खस्य॑ त्वा शी॒र्ष्णे। अ॒ग्नि॒जा अ॑सि प्र॒जाप॑ते॒ रेतः॑। ऋ॒द्ध्यास॑म॒द्य।
म॒खस्य॑ शि॒रः॥₅॥

म॒खाय॑ त्वा। म॒खस्य॑ त्वा शी॒र्ष्णे। आ॒यु॒र्धेहि॑ प्रा॒णं धे॑हि। अ॒पा॒नं धे॑हि व्वा॒नं धे॑हि।
चक्षु॑र्धेहि श्रो॒त्रं धे॑हि। म॒नो धे॑हि वाचं धेहि। आ॒त्मानं॑ धेहि प्र॒तिष्ठां॑ धेहि। मां धे॑हि
मयि॑ धेहि। मधु॑ त्वा मधु॒ला करो॑तु। म॒खस्य॑ शि॒रोऽसि॑॥₆॥

य॒ज्ञस्य॑ प॒दे स्थः॑। गा॒य॒त्रेण॑ त्वा छन्द॑सा करोमि। त्रैष्टु॑भेन त्वा छन्द॑सा करोमि।
जाग॑तेन त्वा छन्द॑सा करोमि। म॒खस्य॑ रा॒स्नाऽसि॑। अदि॑तिस्ते॒ बिलं॑ गृह्णातु। पा॒ङ्केन॑
छन्द॑सा। सू॒र्यस्य॑ ह॒रसा॑ श्राय। म॒खोऽसि॑॥₇॥

प॒ते शि॒रं ऋ॒ताव॑रीर्ऋ॒द्ध्यास॑म॒द्य म॒खस्य॑ शि॒रः शि॒रः शि॒रोऽसि॑ नवं च॥ [2]

वृ॒ष्णो अ॒श्वस्य॑ नि॒ष्पद॑सि। वरु॑णस्त्वा धृ॒तव्र॑त आधू॑पयतु। मि॒त्रावरु॑णयोर्ध्रु॒वेण॑ धर्म॒णा।
अ॒र्चिषे॑ त्वा। शोचि॑षे त्वा। ज्योति॑षे त्वा। तप॑से त्वा। अ॒भीमं॑ म॒हिना॑ दि॒वम्। मि॒त्रो
ब॒भूव॑ स॒प्रथाः॑। उ॒त श्रव॑सा पृथि॒वीम्॥₈॥

मि॒त्रस्य॑ च॒र्षणी॑धृ॒तः। श्रवो॑ दे॒वस्य॑ सा॒न॒सिम्। दु॒ग्धं चि॒त्रश्र॑वस्तमम्। सि॒ध्यै त्वा।
दे॒वस्त्वा सवि॑तोद्व॒पतु॑। सु॒पा॒णिः स्व॑ङ्गुरिः। सु॒बा॒हुरु॑त श॒क्त्या॑। अप॑द्यमानः पृथि॒व्याम्।

आशा दिश आ पृण। उत्तिष्ठ बृहन्भव॥९॥

ऊर्ध्वस्तिष्ठद्बुवस्त्वम्। सूर्यस्य त्वा चक्षुषाऽन्वीक्षे। ऋजवे त्वा। साधवे त्वा। सुक्षित्ये
त्वा भूत्यै त्वा। इदमहममुमामुष्यायणं विशा पशुभिर्ब्रह्मवर्चसेन पर्यूहामि। गायत्रेण
त्वा छन्दसाऽऽच्छृण्वि। त्रैष्टुभेन त्वा छन्दसाऽऽच्छृण्वि। जागेतेन त्वा
छन्दसाऽऽच्छृण्वि। छृणत्तु त्वा वाक्। छृणत्तु बोक्। छृणत्तु त्वा हविः। छृन्धि
वाचम्। छृन्ध्यूर्जम्। छृन्धि हविः। देव पुरश्चर सगध्यासं त्वा॥१०॥

पृथिवीं भव वाख्यद्व॥

[3]

ब्रह्मन् प्रवर्ग्येण प्रचरिष्यामः। होतर्धर्ममभिष्टुहि। अग्नीद्रौहिणौ पुरोडाशावधिश्चय।
प्रतिप्रस्थातर्विहर। प्रस्तोतः सामानि गाय। यजुर्युक्तं सामभिराक्तं खन्त्वा।
विश्वैर्देवैरनुमतं मरुद्भिः। दक्षिणाभिः प्रततं पारयिष्णुम्। स्तुभो वहन्तु
सुमनस्यमानम्। स नो रुचं धेह्यहणीयमानः। भूर्भुवः सुवः। ओमिन्द्रवन्तः
प्रचरत॥११॥

अह्णीयमानो द्वे च॥

[4]

ब्रह्मन्प्रचरिष्यामः। होतर्धर्ममभिष्टुहि। यमाय त्वा मखाय त्वा। सूर्यस्य हरसे त्वा।
प्राणाय स्वाहा व्यानाय स्वाहाऽपानाय स्वाहा। चक्षुषे स्वाहा श्रोत्राय स्वाहा। मनसे
स्वाहा वाचे सरस्वत्यै स्वाहा। दक्षाय स्वाहा क्रतवे स्वाहा। ओजसे स्वाहा बलाय
स्वाहा। देवस्त्वा सविता मध्वाऽनक्तु॥१२॥

पृथिवीं तपसस्त्रायस्व। अर्चिरसि शोचिरसि ज्योतिरसि तपोऽसि। सःसीदस्व
महाः असि। शोचस्व देववीतमः। विधूममग्ने अरुषं मियेध्य। सृज
प्रशस्तदर्शतम्। अञ्जन्ति यं प्रथयन्तो न विप्राः। वपावन्तं नाग्निना तपन्तः। पितुर्न
पुत्र उपसि प्रेष्ठः। आ घर्मो अग्निमृतयन्नसादीत्॥१३॥

अनाधृष्या पुरस्तात्। अग्नेराधिपत्ये। आयुर्मे दाः। पुत्रवती दक्षिणतः।
इन्द्रस्याधिपत्ये। प्रजां मे दाः। सुषदा पश्चात्। देवस्य सवितुराधिपत्ये। प्राणं मे
दाः। आश्रुतिरुत्तरतः॥१४॥

मित्रावरुणयोराधिपत्ये। श्रोत्रं मे दाः। विधृतिरुपरिष्ठात्। बृहस्पतेराधिपत्ये। ब्रह्म मे दाः। क्षत्रं मे दाः। तेजो मे धा वर्चो मे धाः। यशो मे धास्तपो मे धाः। मनो मे धाः। मनोरश्वाऽसि भूरिपुत्रा। विश्वाभ्यो मा नाष्ट्राभ्यः पाहि॥¹⁵॥

सूपसदा मे भूया मा मां हिंसीः। तपोष्वग्ने अन्तरा२ अमित्रान्। तपाश२समररुषः परस्य। तपावसो चिकितानो अचित्तान्। वि ते तिष्ठन्तामजरा अयासः। चितः स्थ परिचितः। स्वाहा मरुद्भिः परिश्रयस्व। मा असि। प्रमा असि। प्रतिमा असि॥¹⁶॥

सम्मा असि। विमा असि। उन्मा असि। अन्तरिक्षस्यान्तर्द्धिरसि। दिवं तपसस्त्रायस्व। आभिर्गीर्भिर्यदतो न ऊनम्। आप्यायय हरिवो वर्धमानः। यदा स्तोतृभ्यो महि गोत्रा रुजासि। भूयिष्ठभाजो अध ते स्याम। शुक्रं ते अन्यद्यजत ते अन्यत्॥¹⁷॥

विषुरूपे अहनी द्यौरिवासि। विश्वा हि माया अवसि स्वधावः। भद्रा ते पूषन्निह रातिरस्तु। अर्हन्विभर्षि सायकानि धन्व। अर्हं निष्कं यजतं विश्वरूपम्। अर्हं निदन्दयसे विश्वमभुवम्। न वा ओजीयो रुद्र त्वदस्ति। गायत्रमसि। त्रैष्टुभमसि। जागतमसि। मधु मधु मधु॥¹⁸॥

अनृक्सादीदुत्तरतः पाहि प्रतिमा असि यजतन्ते अन्यज्जागतमस्येकं च॥ [5]

दश प्राचीर्दश भासि दक्षिणा। दश प्रतीचीर्दश भास्युदीचीः। दशोर्ध्वा भासि सुमनस्यमानः। स नो रुचं धेह्यहणीयमानः। अग्निष्टा वसुभिः पुरस्ताद्रोचयतु गायत्रेण छन्दसा। स मां रुचितो रोचय। इन्द्रस्त्वा रुद्रैर्दक्षिणतो रोचयतु त्रैष्टुभेन छन्दसा। स मां रुचितो रोचय। वरुणस्त्वादित्यैः पश्चाद्रोचयतु जागतेन छन्दसा। स मां रुचितो रोचय॥¹⁹॥

द्युतानस्त्वा मारुतो मरुद्भिरुत्तरतो रोचयत्वानुष्टुभेन छन्दसा। स मां रुचितो रोचय। बृहस्पतिस्त्वा विश्वैर्देवैरुपरिष्ठाद्रोचयतु पाङ्केन छन्दसा। स मां रुचितो रोचय। रोचितस्त्वं देव घर्म देवेष्वसि। रोचिषीयाहं मनुष्येषु। सम्राड्घर्म रुचितस्त्वं देवेष्वायुष्मास्तेजस्वी ब्रह्मवर्चस्यसि। रुचितोऽहं मनुष्येष्वायुष्मास्तेजस्वी

ब्रह्मवर्चसी भूयासम्। रुगसि। रुचं मयि धेहि॥²⁰॥

मयि रुक्। दशं पुरस्ताद्रोचसे। दशं दक्षिणा। दशं प्रत्यङ्गु। दशोदङ्गु। दशोर्ध्वो
भासि सुमनस्यमानः। स नः सम्राडिषमूर्जं धेहि। वाजी वाजिने पवस्व। रोचितो
घर्मो रुचीय॥²¹॥

रोचय धेहि नवं च॥

[6]

अपश्यं गोपामनिपद्यमानम्। आ च परां च पथिभिश्चरन्तम्। स सध्रीचीः स
विषूचीर्वसानः। आ वरीवर्ति भुवनेष्वन्तः। अत्र प्रावीः। मधु माध्वीभ्यां मधु
माधूचीभ्याम्। अनु वां देववीतये। समग्निरग्निना गत। सं देवेन सवित्रा। स
सूर्येण रोचते॥²²॥

स्वाहा समग्निस्तपसा गत। सं देवेन सवित्रा। सः सूर्येणारोचिष्ट। धर्ता दिवो
विभासि रजसः। पृथिव्या धर्ता। उरोरन्तरिक्षस्य धर्ता। धर्ता देवो देवानाम्।
अमर्त्यस्तपोजाः। हृदे त्वा मनसे त्वा। दिवे त्वा सूर्याय त्वा॥²³॥

ऊर्ध्वमिममध्वरं कृधि। दिवि देवेषु होत्रा यच्छ। विश्वासां भुवां पते। विश्वस्य
भुवनस्पते। विश्वस्य मनसस्पते। विश्वस्य वचसस्पते। विश्वस्य तपसस्पते। विश्वस्य
ब्रह्मणस्पते। देवश्रूस्त्वं देव घर्म देवान्पाहि। तपोजां वाचमस्मे नियच्छ
देवायुवम्॥²⁴॥

गर्भो देवानाम्। पिता मतीनाम्। पतिः प्रजानाम्। मतिः कवीनाम्। सं देवो देवेन
सवित्रा यतिष्ट। सः सूर्येणारुक्त। आयुर्दास्त्वमस्मभ्यं घर्म वर्चोदा असि। पिता
नोऽसि पिता नो बोध। आयुर्द्धास्तनूधाः पयोधाः। वर्चोदा वरिवोदा द्रविणोदाः॥²⁵॥

अन्तरिक्षप्र उरोर्वरीयान्। अशीमहि त्वा मा मा हिंसीः। त्वमग्ने गृहपतिर्विशामसि।
विश्वासां मानुषीणाम्। शतं पूर्भिर्यविष्ठ पाह्यहंसः। समेद्धारं शतं हिमाः।
तन्द्राविणं हार्दिवानम्। इहैव रातयः सन्तु। त्वष्टीमती ते सपेय। सुरेता रेतो
दधाना। वीरं विदेय तवं सन्दृशि। माऽहं रायस्पोषेण वि योषम्॥²⁶॥

रोचते सूर्याय त्वा देवायुवं द्रविणोदा दधाना द्वे च॥

[7]

देवस्य॑ त्वा सवि॑तुः प्र॑सवे। अ॒श्विनो॑र्बा॒हुभ्या॑म्। पू॒ष्णो ह॑स्ता॒भ्यामा॑ददे। अ॒दित्यै॑
रा॒स्नासि॑। इ॒ड ए॒हि। अ॒दित॒ ए॒हि। सर॑स्वत्ये॒हि। अ॒सावे॒हि। अ॒सावे॒हि।
अ॒सावे॒हि॥ २७ ॥

अ॒दित्या॑ उ॒ष्णीष॑मसि। वा॒युर॑स्यै॒डः। पू॒षा त्वा॒पाव॑सृजतु। अ॒श्विभ्या॑ं प्र॒दाप॑य। यस्ते॒
स्तनः॑ श॒शयो॑ यो म॑यो॒भूः। येन॑ वि॒श्वा पु॒ष्यसि॑ वा॒र्याणि॑। यो र॑त्न॒धा व॑सुवि॒द्यः
सु॒दत्रः॑। सर॑स्वति॒ तमि॒ह धा॑त॒वेकः॑। उ॒स्रं घ॒र्मं शि॑ष्प। उ॒स्रं घ॒र्मं पा॑हि॥ २८ ॥

घ॒र्माय॑ शि॑ष्प। बृ॒हस्प॑तिस्त्वोप॑सीदतु। दान॑वः स्थ पे॒रवः॑। वि॒ष्वग्वृ॑तो लो॒हिते॑न।
अ॒श्विभ्या॑ं पि॒न्वस्व। सर॑स्वत्ये॒ पिन्व॑स्व। पू॒ष्णे पि॒न्वस्व। बृ॒हस्प॑तये॒ पिन्व॑स्व। इन्द्रा॑य
पि॒न्वस्व। इन्द्रा॑य पि॒न्वस्व॥ २९ ॥

गा॒यत्रो॑ऽसि। त्रै॒ष्टुभो॑ऽसि। जा॒ग॒तम॑सि। स॒होर्जो॑ भा॒गेनो॑पमे॒हि। इन्द्रा॑श्विना॒ मधु॑नः
सा॒रघ॑स्य॑। घ॒र्मं पा॑त वस॒वो यज॑ता॒ वट्। स्वाहा॑ त्वा सूर्य॑स्य र॒श्मये॑ वृ॒ष्टि॒वन॑ये
जु॒होमि॑। मधु॑ ह॒विर॑सि। सूर्य॑स्य तप॑स्तप। द्यावा॑पृ॒थिवी॒भ्यां त्वा॒ परि॑गृह्णामि॥ ३० ॥

अ॒न्तरि॑क्षेण त्वाप॑यच्छामि। दे॒वानां॑ त्वा पि॒तॄणा॑मनु॒मतो॑ भर्तु॑ः श॒केय॑म्। तेजो॑ऽसि।
तेजो॑ऽनु प्रे॒हि। दि॒विस्पृ॑ङ्गा मा॑ हि॒सीः। अ॒न्तरि॑क्षस्पृ॒ङ्गा मा॑ हि॒सीः। पृ॒थि॒विस्पृ॑ङ्गा
मा॑ हि॒सीः। सु॒व॒रसि॑ सु॒व॒र्मे य॑च्छ। दि॒वं य॑च्छ दि॒वो मा॑ पाहि॥ ३१ ॥

एहिं पाहि पिन्वस्व गृह्णामि नवं च॥

[८]

स॒मु॒द्राय॑ त्वा वा॒ताय॑ स्वाहा॑। स॒लि॒लाय॑ त्वा वा॒ताय॑ स्वाहा॑। अ॒ना॒धृष्या॑य त्वा
वा॒ताय॑ स्वाहा॑। अ॒प्र॒ति॒धृष्या॑य त्वा वा॒ताय॑ स्वाहा॑। अ॒व॒स्य॒वै त्वा वा॒ताय॑ स्वाहा॑।
दु॒व॒स्वते॑ त्वा वा॒ताय॑ स्वाहा॑। शि॒मि॒द्वते॑ त्वा वा॒ताय॑ स्वाहा॑। अ॒ग्नये॑ त्वा व॒सु॒मते॑
स्वाहा॑। सो॒माय॑ त्वा रु॒द्रव॑ते स्वाहा॑। वरु॑णाय त्वाऽऽदि॒त्यव॑ते स्वाहा॑॥ ३२ ॥

बृ॒हस्प॑तये त्वा वि॒श्वदे॑व्याव॒ते स्वाहा॑। स॒वि॒त्रे त्व॑र्भु॒मते॑ वि॒भु॒मते॑ प्र॒भु॒मते॑ वाज॑व॒ते
स्वाहा॑। य॒माय॑ त्वाऽङ्गि॑रस्व॒ते पि॒तृ॒मते॑ स्वाहा॑। वि॒श्वा आ॑शा दक्षि॒णस॑त्। वि॒श्वा
दे॒वान॑याडि॒ह। स्वाहा॑कृतस्य घ॒र्मस्य॑। मधोः॑ पि॒बत॑मश्विना। स्वाहा॑ऽग्नये॑ य॒ज्ञिया॑य।
शं यजु॑र्भिः। अ॒श्विना॑ घ॒र्मं पा॑त॒ ह॒र्दि॒वान॑म्॥ ३३ ॥

अहर्दि॒वाभि॑रू॒तिभिः॑। अनु॑ वां दा॒वापृ॑थि॒वी म॑सा॒ताम्। स्वाहे॑न्द्रा॒य। स्वाहे॑न्द्राव॒ट्।
घ॒र्मम॑पा॒तम॑श्चि॒ना हा॑र्दि॒वान॑म्। अहर्दि॒वाभि॑रू॒तिभिः॑। अनु॑ वां दा॒वापृ॑थि॒वी
अ॑म॒साता॑म्। तं प्रा॒व्य यथा॑ व॒ट्। नमो॑ दि॒वे। नमः॑ पृथि॒व्यै॥³⁴॥

दि॒वि धा॑ इ॒मं य॒ज्ञम्। य॒ज्ञमि॑मं दि॒वि धाः॑। दि॒वं ग॑च्छ। अ॒न्तरि॑क्षं ग॑च्छ। पृ॒थि॒वीं
ग॑च्छ। प॒थं प्र॑दि॒शो ग॑च्छ। दे॒वान्घ॑र्म॒पान्ग॑च्छ। पि॒तृन्घ॑र्म॒पान्ग॑च्छ॥³⁵॥

आ॒दि॒त्यव॑न्ते स्वाहा॑ हा॒र्दि॒वानं॑ पृथि॒व्या अ॒ष्टौ च॑॥ [९]

इ॒षे पी॑पिहि। ऊ॒र्जे पी॑पिहि। ब्र॒ह्म॑णे पी॒पिहि। क्ष॒त्राय॑ पी॒पिहि। अ॒द्भ्यः पी॑पिहि।
ओ॒षधी॑भ्यः पी॒पिहि। व॒नस्प॑ति॒भ्यः पी॑पिहि। दा॒वापृ॑थि॒वीभ्या॑ पी॒पिहि। सु॒भूता॑य
पी॒पिहि। ब्र॒ह्मव॑र्च॒साय॑ पी॒पिहि॥³⁶॥

य॒ज्ञमा॑नाय पी॒पिहि। म॒ह्यं ज्यै॑ष्ठ्या॒य पी॑पिहि। त्वि॒ष्यै त्वा॑। दु॒म्नाय॑ त्वा। इ॒न्द्रि॒याय॑
त्वा भू॒त्यै त्वा॑। ध॒र्मा॑ऽसि सु॒धर्मा॑ मे॒ न्यस्मे॑। ब्र॒ह्मा॑णि धा॒रय॑। क्ष॒त्राणि॑ धा॒रय॑। वि॒शं
धा॒रय॑। ने॒त्वा वा॒तः स्क॑न्द॒यात्॥³⁷॥

अ॒मुष्य॑ त्वा प्रा॒णे सा॑द॒यामि॑। अ॒मुना॑ सह नि॒रर्थं॑ ग॑च्छ। यो॑ऽस्मान्दे॒ष्टि। यं च॑ व॒यं
द्वि॒ष्मः। पू॒ष्णे श॑र॒से स्वा॑हा॑। ग्रा॒व॑भ्यः स्वा॑हा॑। प्र॒तिरे॑भ्यः स्वा॑हा॑। दा॒वापृ॑थि॒वीभ्या॑
स्वा॑हा॑। पि॒तृभ्यो॑ घ॒र्मपे॑भ्यः स्वा॑हा॑। रु॒द्राय॑ रु॒द्रहो॑त्रे स्वा॑हा॑॥³⁸॥

अ॒ह॒ज्योतिः॑ के॒तुना॑ जुष॒ताम्। सु॒ज्योति॑ज्योति॒षाः स्वा॑हा॑। रा॒त्रिज्योतिः॑ के॒तुना॑
जुष॒ताम्। सु॒ज्योति॑ज्योति॒षाः स्वा॑हा॑। अ॒पी॒परो॑ मा॒ऽहो रा॒त्रियै॑ मा पा॒हि। ए॒षा ते॑
अ॒ग्ने स॒मित्। तया॑ स॒मि॒ध्यस्व॑। आ॒यु॒र्मे दाः॑। व॒र्चसा॑ मा॒ञ्जीः। अ॒पी॒परो॑ मा॒ रा॒त्रिया॑
अ॒हो मा पा॒हि॥³⁹॥

ए॒षा ते॑ अ॒ग्ने स॒मित्। तया॑ स॒मि॒ध्यस्व॑। आ॒यु॒र्मे दाः॑। व॒र्चसा॑ मा॒ञ्जीः।
अ॒ग्निज्योति॑ज्योति॒र॒ग्निः स्वा॑हा॑। सू॒र्यो ज्योति॑ज्योतिः॒ सूर्यः॑ स्वा॑हा॑। भूः स्वा॑हा॑। हु॒तः
ह॒विः। म॒धु ह॒विः। इ॒न्द्रत॑मे॒ऽग्नौ॥⁴⁰॥

पि॒ता नो॑ऽसि मा मा॑ हि॒सीः। अ॒श्याम॑ ते दे॒वघ॑र्म। म॒धुम॑तो॒ वाज॑वतः पि॒तुम॑तः।
अ॒ङ्गिर॑स्वतः स्व॒धावि॑नः। अ॒शीम॑हि त्वा मा मा॑ हि॒सीः। स्वा॑हा॑ त्वा सू॒र्यस्य॑

रश्मिभ्यः। स्वाहा त्वा नक्षत्रेभ्यः॥⁴¹॥

ब्रह्मवर्चसाय पीपिहि स्कन्दयाद्रुद्राय रुद्रहोत्रे स्वाहाऽहो मा पाह्यशौ सप्त च॥ [10]

घर्म या ते दिवि शुक्। या गायत्रे छन्दसि। या ब्राह्मणे। या हविर्दाने। तान्त एतेनाव यजे स्वाहा। घर्म या तेऽन्तरिक्षे शुक्। या त्रैष्टुभे छन्दसि। या राजन्ये। याऽऽग्नीध्रे। तान्त एतेनाव यजे स्वाहा॥⁴²॥

घर्म या ते पृथिव्याः शुक्। या जागते छन्दसि। या वैश्वे। या सदसि। तान्त एतेनाव यजे स्वाहा। अनुनोऽद्यानुमतिः। अन्विदनुमते त्वम्। दिवस्त्वा परस्पायाः। अन्तरिक्षस्य तनुवः पाहि। पृथिव्यास्त्वा धर्मणा॥⁴³॥

वयमनुक्रामाम सुविताय नव्यसे। ब्रह्मणस्त्वा परस्पायाः। क्षत्रस्य तनुवः पाहि। विशस्त्वा धर्मणा। वयमनुक्रामाम सुविताय नव्यसे। प्राणस्य त्वा परस्पायै। चक्षुषस्तनुवः पाहि। श्रोत्रस्य त्वा धर्मणा। वयमनुक्रामाम सुविताय नव्यसे। वल्गुरसि शं युधायाः॥⁴⁴॥

शिशुर्जनधायाः। शं च वक्षि परि च वक्षि। चतुः सक्तिर्नाभिर्ऋतस्य। सदो विश्वायुः शर्म सप्रथाः। अप द्वेषो अपह्वरः। अन्यद्वतस्य सश्चिम। घर्मेतत्तेऽन्नमेतत्पुरीषम्। तेन वर्धस्व चाऽऽ च प्यायस्व। वर्धिषीमहि च वयम्। आ च प्यासिषीमहि॥⁴⁵॥ रन्तिर्नामासि दिव्यो गन्धर्वः। तस्य ते पद्वद्विर्दानम्। अग्निरध्यक्षाः। रुद्रोऽधिपतिः। समहमायुषा। सं प्राणेन। सं वर्चसा। सं पयसा। सं गौपत्येन। सः रायस्पोषेण॥⁴⁶॥

व्यसौ। योऽस्मान्द्वेष्टि। यं च वयं द्विष्मः। अचिंक्रदद्वेषा हरिः। महान्मित्रो न दर्शतः। सः सूर्येण रोचते। चिदसि समुद्रयोनिः। इन्दुर्दक्षः श्येन ऋतावा। हिरण्यपक्षः शकुनो भुरण्युः। महान्सधस्थे ध्रुव आनिषत्तः॥⁴⁷॥

नमस्ते अस्तु मा मा हिंसीः। विश्वावसुः सोम गन्धर्वम्। आपो ददृशुषीः। तदृतेनाव्यायन्। तदन्ववैत्। इन्द्रो रारहाण आसाम्। परि सूर्यस्य परिधीः। रपश्यत्। विश्वावसुरभि तन्नो गृणातु। दिव्यो गन्धर्वो रजसो विमानः। यद्वा घा

सत्यमुत यन्न विद्म॥⁴⁷॥

धियो॑ हिन्वा॒नो धिय॑ इ॒न्नो अ॒व्यात्। सस्नि॑मवि॒न्दच्च॑रणे न॒दीना॑म्। अ॒पावृ॑णो॒द्गुरो॑
अ॒श्वम॑व्रजानाम्। प्रा॒सा॒न्गन्ध॑र्वो अ॒मृता॑नि वोचत्। इन्द्रो॑ दक्षं परि॑जानाद॒हीनम्॑।
ए॒तच्च॑ दे॒व घ॑र्म दे॒वो दे॒वानु॑पा॒गाः। इ॒दम॒हं म॑नुष्यो म॒नुष्या॑न्। सोम॑पी॒थानु॑मेहि।
स॒ह प्र॒जया॑ स॒ह रा॒यस्पोषे॑ण। सु॒मित्रा॑ न आप॒ ओष॑धयः सन्तु॥⁴⁹॥

दुर्मि॑त्रास्तस्मै॑ भूयासुः। योऽस्मा॑न्देष्टि। यं च॑ व॒यं द्वि॒ष्मः। उ॒द्वयं॑ तम॑स॒स्परि॑। उ॒दुत्यं॑
चि॒त्रम्। इ॒ममू॑षुत्यम॒स्मभ्य॑ꣳ स॒निम्। गा॒य॒त्रं न॑वीयाꣳसम्। अ॒ग्रे दे॒वेषु॑ प्रवोचः॥⁵⁰॥

याऽऽग्नी॑ध्रे तान्तं ए॒तेना॑व॒ यजे॑ स्वाहा॒ धर्म॑णा शं यु॒धायाः॑ प्यासि॒षीम॑हि पोषे॑ण निष॑न्तो वि॒द्म स॑न्व॒ष्टौ॥ [11]

म॒हीनां॑ पयो॑ऽसि वि॒हितं॑ दे॒वत्रा॑। ज्यो॒तिर्भा॑ अ॒सि व॒न॒स्पती॑ना॒मोष॑धीनाꣳ रसः।
वा॒जिनं॑ त्वा वा॒जिनो॑ऽव॒ नयामः॑। ऊ॒र्ध्वं मनः॑ सु॒वर्गम्॥⁵¹॥

[12]

अ॒स्का॒न्द्योः पृ॑थि॒वीम्। अ॒स्का॑नृष॒भो यु॒वागाः॑। स्क्॒न्नेमा॑ वि॒श्वा भु॑व॒ना। स्क्॒न्नो य॒ज्ञः
प्र॒ज॑नयतु। अ॒स्का॑न॒जनि॑ प्रा॒जनि॑। आ स्क्॒न्नाञ्जा॑यते वृषा॑। स्क्॒न्नात्
प्र॒ज॑निषीमहि॥⁵²॥

[13]

या पु॒रस्ता॑द्वि॒द्युदा॑प॒तत्। तान्तं॑ ए॒तेना॑व॒ यजे॑ स्वाहा॑। या दक्षि॑णतः। या प॒श्चात्।
योत्त॑रतः। योप॑रि॒ष्टाद्वि॒द्युदा॑प॒तत्। तान्तं॑ ए॒तेना॑व॒ यजे॑ स्वाहा॑॥⁵³॥

[14]

प्रा॒णाय॑ स्वाहा॑ व्या॒नाय॑ स्वाहा॑ऽपा॒नाय॑ स्वाहा॑। चक्षु॑षे स्वाहा॑ श्रो॒त्राय॑ स्वाहा॑। मन॑से
स्वाहा॑ वा॒चे सर॑स्वत्ये॒ स्वाहा॑॥⁵⁴॥

[15]

पू॒ष्णे स्वाहा॑ पू॒ष्णे श॑र॒से स्वाहा॑। पू॒ष्णे प्र॑प॒थ्याय॑ स्वाहा॑ पू॒ष्णे न॑रन्धि॒षाय॑ स्वाहा॑।
पू॒ष्णेऽङ्घ्रि॑णये॒ स्वाहा॑ पू॒ष्णे न॑रु॒णाय॑ स्वाहा॑। पू॒ष्णे सा॑के॒ताय॑ स्वाहा॑॥⁵⁵॥

[16]

उ॒दस्य॑ शु॒ष्मा॑द्वा॒नुर्ना॑र्त बिभ॑र्ति। भा॒रं पृ॑थि॒वी न भू॑मः। प्र शु॒क्रैतु॑ दे॒वी म॑नी॒षा।
अ॒स्मत्सु॑त॒ष्टो रथो॑ न वा॒जी। अ॒र्चन्त॑ ए॒के म॑हि सा॒मम॑न्वत। तेन॑ सू॒र्यम॑धारयन्।

तेन सूर्यमरोचयन्। घर्मः शिरस्तदयमग्निः। पुरीषमसि सं प्रियं प्रजया
पशुभिर्भुवत्। प्रजापतिस्त्वा सादयतु। तया देवतयाऽङ्गिरस्वद्भुवा सीद॥⁵⁶॥

[17]

यास्ते अग्र आर्द्रा योनयो याः कुलायिनीः। ये ते अग्र इन्द्रवो या उ नाभयः।
यास्ते अग्रे तनुव ऊर्जो नाम। ताभिस्त्वमुभयीभिः संविदानः। प्रजाभिरग्रे द्रविणेह
सीद। प्रजापतिस्त्वा सादयतु। तया देवतयाऽङ्गिरस्वद्भुवा सीद॥⁵⁷॥

[18]

अग्निरसि वैश्वानरोऽसि। संवत्सरोऽसि परिवत्सरोऽसि।
इदावत्सरोऽसीदुवत्सरोऽसि। इद्वत्सरोऽसि वत्सरोऽसि। तस्य ते वसन्तः शिरः।
ग्रीष्मो दक्षिणः पक्षः। वर्षाः पुच्छम्। शरदुत्तरः पक्षः। हेमन्तो मध्यम्।
पूर्वपक्षाश्चितयः। अपरपक्षाः पुरीषम्। अहोरात्राणीष्टकाः। तस्य ते
मासाश्चार्द्धमासाश्च कल्पन्ताम्। ऋतवस्ते कल्पन्ताम्। संवत्सरस्ते कल्पताम्।
अहोरात्राणि ते कल्पन्ताम्। एति प्रेति वीति समित्युदिति। प्रजापतिस्त्वा सादयतु।
तया देवतयाऽङ्गिरस्वद्भुवः सीद॥⁵⁸॥

चितयो नव च॥

[19]

भूर्भुवः सुवः। ऊर्ध्व ऊषुण ऊतयै। ऊर्ध्वो नः पाह्यहंसः। विधुन्दद्राणः समने
बहूनाम्। युवानः सन्त पलितो जंगार। देवस्य पश्य काव्यं महिबाद्या ममार।
सह्यः समान। यदृते चिदभिश्चिषः। पुरा जर्तृभ्य आतृदः। सन्धाता सन्धिं मघवा
पुरोवसुः॥⁵⁹॥

निष्कर्ता विहृतं पुनः। पुनरूर्जा सह रय्या। मा नो घर्म व्यथितो विव्यथो नः। मा
नः परमधरं मा रजोऽनैः। मोष्वस्माः स्तमस्यन्तरा धाः। मा रुद्रियासो
अभिगुर्वृधानः। मा नः क्रतुभिर्हीडितेभिरस्मान्। द्विषासुनीते मा परा दाः। मा नो
रुद्रो निर्ऋतिर्मा नो अस्ता। मा दावापृथिवी हीडिषाताम्॥⁶⁰॥

उप नो मित्रावरुणाविहावतम्। अन्वादीध्याथामिह नः सखाया। आदित्यानां
प्रसितिर्हेतिः। उग्रा शतापांश्च घविषा परि णो वृणक्तु। इमं मे वरुण तत्त्वा यामि।

त्वं नो॑ अग्ने॒ स त्वं नो॑ अग्ने॒। त्वम॑ग्ने अ॒यासि॑। उ॒द्वयं॑ तम॑स॒स्पृशि॑। उ॒दुत्यं॑ चि॒त्रम्।
वयः॑ सु॒पर्णाः॥⁶¹॥

पुरो॒वसु॑र्हीडि॒पाता॑ सु॒पर्णाः॥

[20]

भूर्भुवः॑ सु॒वः। मयि॑ त्यदिन्द्रि॒यं म॒हत्। मयि॑ दक्षो॒ मयि॑ ऋतुः॑। मयि॑ धायि
सु॒वीर्य॑म्। त्रि॒शु॒ग्ध॒र्मो वि॒भा॒तु मे॑। आकू॑त्या॒ मन॑सा॒ सह॑। वि॒राजा॒ ज्योति॑षा॒ सह॑।
य॒ज्ञेन॒ पय॑सा॒ सह॑। ब्र॒ह्म॒णा तेज॑सा॒ सह॑। क्ष॒त्रेण॒ यश॑सा॒ सह॑। स॒त्येन॒ तप॑सा॒
सह॑। तस्य॑ दोह॑मशीमहि। तस्य॑ सु॒म्नम॑शीमहि। तस्य॑ भ॒क्षम॑शीमहि। तस्य॑ त
इ॒न्द्रेण॑ पी॒तस्य॒ मधु॑मतः। उ॒प॒हूत॑स्यो॒प॒हूतो॑ भक्षयामि॥⁶²॥

यश॑सा॒ सह॑ षट्॥

[21]

यास्ते॑ अग्ने॒ घो॒रास्त॒नुवः॑। क्षु॒च्च॒ तृ॒ष्णा च॑। अ॒सु॒क्काना॑हुतिश्च। अ॒श्नया॑ च॒ पिपा॑सा
च॑। से॒दि॒श्चाम॑तिश्च। ए॒तास्ते॑ अग्ने॒ घो॒रास्त॒नुवः॑। ताभि॑र॒मुं ग॑च्छ। यौ॑ऽस्मान्द्वेष्टि॑। यं
च॑ व॒यं द्वि॒ष्मः॥⁶³॥

[22]

स्नि॒क्क॒ स्नीहि॑तिश्च॒ स्निहि॑तिश्च। उ॒ष्णा च॑ शी॒ता च॑। उ॒ग्रा च॑ भी॒मा च॑। स॒दाम्नी॑
से॒दि॒रनि॑रा। ए॒तास्ते॑ अग्ने॒ घो॒रास्त॒नुवः॑। ताभि॑र॒मुं ग॑च्छ। यौ॑ऽस्मान्द्वेष्टि॑। यं च॑ व॒यं
द्वि॒ष्मः॥⁶⁴॥

[23]

धु॒निश्च॑ ध्वा॒न्तश्च॑ ध्व॒नश्च॑ ध्व॒नय॑ञ्श्च। नि॒लि॒म्पश्च॑ वि॒लि॒म्पश्च॑ वि॒क्षिपः॑॥⁶⁵॥

[24]

उ॒ग्रश्च॑ धु॒निश्च॑ ध्वा॒न्तश्च॑ ध्व॒नश्च॑ ध्व॒नय॑ञ्श्च। स॒ह॒स॒ह्राञ्श्च॑ स॒ह॒मा॒नश्च॑ स॒ह॒स्वाञ्श्च॑
स॒ही॒याञ्श्च॑। ए॒त्य॒ प्रे॒त्य॑ वि॒क्षिपः॑॥⁶⁶॥

[25]

अ॒हो॒रा॒त्रे बो॑दी॒रय॑ताम्। अ॒र्ध॒मा॒सास्बो॑दी॒ जय॑न्तु। मा॒सा॒स्त्वा श्र॑पयन्तु। ऋ॒तव॑स्त्वा
प॒चन्तु॑। स॒व॒त्स॒रस्त्वा॑ ह॒न्त्वसौ॑॥⁶⁷॥

[26]

खट् फट् ज॒हि। छि॒न्धी भि॒न्धी ह॒न्धी कट्। इति॑ वाचः॑ ऋ॒रा॒णि॥⁶⁸॥

[27]

विगा इन्द्र विचरन्त्स्पाशयस्व। स्वपन्तमिन्द्र पशुमन्तमिच्छ। वज्रेणामुं बोधय
दुर्विदत्रम्। स्वपतोऽस्य प्रहर भोजनेभ्यः। अग्ने अग्निना संवदस्व। मृत्यो मृत्युना
संवदस्व। नमस्ते अस्तु भगवः। सकृत्ते अग्ने नमः। द्विस्ते नमः। त्रिस्ते नमः।
चतुस्ते नमः। पञ्चकृत्वस्ते नमः। दशकृत्वस्ते नमः। शतकृत्वस्ते नमः।
आसहस्रकृत्वस्ते नमः। अपरिमितकृत्वस्ते नमः। नमस्ते अस्तु मा मा हिंसीः॥ 69 ॥

त्रिस्ते नमः सप्त च॥ [28]

असृन्मुखो रुधिरेणाव्यक्तः। यमस्य दूतः श्वपाद्विधावसि। गृध्रः सुपर्णः कुणपं
निषेवसे। यमस्य दूतः प्रहितो भवस्य चोभयोः॥ 70 ॥

[29]

यदेतद्वृकसो भूत्वा। वाग्दैव्यभिरायसि। द्विषन्तं मेऽभिराय। तं मृत्यो मृत्यवे नय।
स आर्त्यार्तिमाच्छतु॥ 71 ॥

[30]

यदीषितो यदि वा स्वकामी। भयेडंको वदति वाचमेताम्। तामिन्द्राग्नी ब्रह्मणा
संविदानौ। शिवामस्मभ्यं कृणुतं गृहेषु॥ 72 ॥

[31]

दीर्घमुखि दुर्हणु। मा स्म दक्षिणतो वदः। यदि दक्षिणतो वदाद्विषन्तं मेऽव
बाधासै॥ 73 ॥

[32]

इत्थादुलूक आपतत्। हिरण्याक्षो अयोमुखः। रक्षसां दूत आगतः। तमितो
नाशयाग्ने॥ 74 ॥

[33]

यदेतद्भूतान्यन्वाविश्य। दैवीं वाचं वदसि। द्विषतो नः परावद। तान्मृत्यो मृत्यवे
नय। त आर्त्याऽऽर्तिमाच्छन्तु। अग्निनाऽग्निः संवदताम्॥ 75 ॥

[34]

प्रसार्य सक्थ्यौ पतसि। सव्यमक्षि निपेपि च। मेहकस्य चनाममत्॥ 76 ॥

[35]

अत्रिणा त्वा क्रिमे हन्मि। कण्वेन जमदग्निना। विश्वावसोर्ब्रह्मणा हतः। क्रिमीणां
राजा। अप्येषां स्थपतिर्हतः। अथो माताऽथो पिता। अथो स्थूरा अथो क्षुद्राः।
अथो कृष्णा अथो श्वेताः। अथो आशतिका हताः। श्वेताभिः सह सर्वे हताः॥⁷⁷॥

[36]

आहूरावद्य। शृतस्य हविषो यथा। तत्सत्यम्। यदमुं यमस्य जम्भयोः। आदधामि
तथा हि तत्। खण्णमसि॥⁷⁸॥

[37]

ब्रह्मणा त्वा शपामि। ब्रह्मणस्त्वा शपथेन शपामि। घोरेण त्वा भृगूणां चक्षुषा प्रेक्षे।
रौद्रेण त्वाङ्गिरसां मनसा ध्यायामि। अघस्य त्वा धारया विद्धामि। अधरो
मत्पदस्त्वाऽसौ॥⁷⁹॥

[38]

उत्तुद शिमिजावरि। तल्पेजे तल्प उत्तुद। गिरीं रनु प्रवेशय। मरीचीरुप सन्नुद।
यावदितः पुरस्तादुदयाति सूर्यः। तावदितोऽमुं नाशय। योऽस्मान्देष्टि। यं च वयं
द्विष्मः॥⁸⁰॥

[39]

भूर्भुवः सुवो भूर्भुवः सुवो भूर्भुवः सुवः। भुवोऽद्वायि भुवोऽद्वायि भुवोऽद्वायि।
नृम्णायि नृम्णं नृम्णायि नृम्णं नृम्णायि नृम्णम्। निधाय्यो वायि निधाय्यो वायि
निधाय्यो वायि। ए अस्मे अस्मे। सुवर्न ज्योतीः॥⁸¹॥

[40]

पृथिवी समित्। तामग्निः समिन्धे। साऽग्निः समिन्धे। तामहः समिन्धे। सा मा
समिद्धा। आयुषा तेजसा। वर्चसा श्रिया। यशसा ब्रह्मवर्चसेन। अन्नादेन
समिन्ताः स्वाहा। अन्तरिक्षः समित्॥⁸²॥

तां वायुः समिन्धे। सा वायुः समिन्धे। तामहः समिन्धे। सा मा समिद्धा।
आयुषा तेजसा। वर्चसा श्रिया। यशसा ब्रह्मवर्चसेन। अन्नादेन समिन्ताः स्वाहा।
द्यौः समित्। तामादित्यः समिन्धे॥⁸³॥

साऽऽदित्यः समिन्धे। तामहः समिन्धे। सा मा समिद्धा। आयुषा तेजसा।

वर्चसा श्रिया। यशसा ब्रह्मवर्चसेन। अन्नाद्येन समिन्ताः स्वाहा। प्राजापत्या मे समिदसि सपत्नक्षयणी। भ्रातृव्यहा मेऽसि स्वाहा। अग्नै व्रतपते व्रतं चरिष्यामि॥⁸⁴॥

तच्छकेयं तन्मे राध्यताम्। वायौ व्रतपत आदित्य व्रतपते। व्रतानां व्रतपते व्रतं चरिष्यामि। तच्छकेयं तन्मे राध्यताम्। द्यौः समित्। तामादित्यः समिन्धे। साऽऽदित्यः समिन्धे। तामहः समिन्धे। सा मा समिद्धा। आयुषा तेजसा॥⁸⁵॥

वर्चसा श्रिया। यशसा ब्रह्मवर्चसेन। अन्नाद्येन समिन्ताः स्वाहा। अन्तरिक्षः समित्। तां वायुः समिन्धे। सा वायुः समिन्धे। तामहः समिन्धे। सा मा समिद्धा। आयुषा तेजसा। वर्चसा श्रिया॥⁸⁶॥

यशसा ब्रह्मवर्चसेन। अन्नाद्येन समिन्ताः स्वाहा। पृथिवी समित्। तामग्निः समिन्धे। साऽग्निः समिन्धे। तामहः समिन्धे। सा मा समिद्धा। आयुषा तेजसा। वर्चसा श्रिया। यशसा ब्रह्मवर्चसेन॥⁸⁷॥

अन्नाद्येन समिन्ताः स्वाहा। प्राजापत्या मे समिदसि सपत्नक्षयणी। भ्रातृव्यहा मेऽसि स्वाहा। आदित्य व्रतपते व्रतमचारिषम्। तदशकं तन्मेऽराधि। वायौ व्रतपतेऽग्नै व्रतपते। व्रतानां व्रतपते व्रतमचारिषम्। तदशकं तन्मेऽराधि॥⁸⁸॥

समित्समिन्धे व्रतं चरिष्याम्यायुषा तेजसा वर्चसा श्रिया यशसा ब्रह्मवर्चसेनाष्टौ च॥ [41]

शं नो वातः पवतां मातरिश्वा शं नस्तपतु सूर्यः। अहानिशं भवन्तु नः शः रात्रिः प्रतिधीयताम्। शमुषा नो व्युच्छतु शमादित्य उदैतु नः। शिवा नः शन्तमा भव सुमृडीका सरस्वति। मा ते व्योम सन्दृशि। इडाये वास्वसि वास्तुमद्वास्तुमन्तो भूयास्म मा वास्तोश्छित्स्मह्यवास्तुः स भूयाद्योऽस्मान्देष्टि यं च वयं द्विष्मः। प्रतिष्ठसि प्रतिष्ठावन्तो भूयास्म मा प्रतिष्ठायोश्छित्स्मह्यप्रतिष्ठः स भूयाद्योऽस्मान्देष्टि यं च वयं द्विष्मः। आ वात वाहि भेषजं वि वात वाहि यद्रपः। त्वं हि विश्वभेषजो देवानां दूत ईयसे। द्वाविमौ वातौ वात आ सिन्धोरा परावतः॥⁸⁹॥

दक्षं मे अन्य आवातु परान्यो वातु यद्रपः। यददो वातते गृहेऽमृतस्य निधिर्हितः। ततो नो देहि जीवसे ततो नो धेहि भेषजम्। ततो नो मह आवह वात आवातु

भेषजम्। शम्भूर्मयोभूर्नो हृदे प्र ण आयूषि तारिषत्। इन्द्रस्य गृहोऽसि तं त्वा
 प्रपदे सगुः साश्वः। सह यन्मे अस्ति तेन। भूः प्रपदे भुवः प्रपदे सुवः प्रपदे
 भूर्भुवः सुवः प्रपदे वायुं प्रपदेऽनार्ता देवतां प्रपदेऽश्मानमाखणं प्रपदे
 प्रजापतेर्ब्रह्मकोशं ब्रह्म प्रपद्य ॐ प्रपदे। अन्तरिक्षं म उर्वन्तरं बृहदग्नयः पर्वताश्च
 यया वातः स्वस्त्या स्वस्तिमान्तया स्वस्त्या स्वस्तिमानसानि। प्राणापानौ मृत्योर्मा
 पातं प्राणापानौ मा मा हासिष्टं मयि मेधां मयि प्रजां मय्यग्निस्तेजो दधातु मयि
 मेधां मयि प्रजां मयीन्द्र इन्द्रियं दधातु मयि मेधां मयि प्रजां मयि सूर्यो भ्राजो
 दधातु॥⁹⁰॥

द्युभिरक्तुभिः परिपातमस्मानरिष्टेभिरश्विना सौभगेभिः। तन्नो मित्रो वरुणो
 मामहन्तामदितिः सिन्धुः पृथिवी उत द्यौः। कया नश्चित्र आ भुवदूती सदावृधः
 सखा। कया शचिष्ठया वृता। कस्त्वा सत्यो मदानां महिष्ठो मत्सदन्धसः।
 दृढाचिदारुजे वसु। अभी षु णः सखीनामविता जरितृणाम्। शतं भवास्यूतिभिः।
 वयः सुपर्णा उपसेदुरिन्द्र प्रियमेधा ऋषयो नाधमानाः। अप ध्वान्तमूर्णुहि पूर्धि
 चक्षुर्मुमुग्ध्यस्मान्निधयेव बद्धान्॥⁹¹॥

शं नो देवीरभिष्टय आपो भवन्तु पीतयै। शं योरभिस्रवन्तु नः। ईशाना वार्याणां
 क्षयन्तीश्चर्षणीनाम्। अपो याचामि भेषजम्। सुमित्रा न आप ओषधयः सन्तु
 दुर्मित्रास्तस्मै भूयासुर्योऽस्मान्द्वेष्टि यं च वयं द्विष्मः। आपो हि ष्ठा मयोभुवस्ता न
 ऊर्जे दधातन। महे रणाय चक्षसे। यो वः शिवतमो रसस्तस्य भाजयतेह नः।
 उशतीरिव मातरः। तस्मा अरं गमाम वो यस्य क्षयाय जिन्वथ॥⁹²॥

आपो जनयथा च नः। पृथिवी शान्ता साऽग्निना शान्ता सा मे शान्ता शुचः
 शमयतु। अन्तरिक्षं शान्तं तद्वायुना शान्तं तन्मे शान्तं शुचः शमयतु। द्यौः
 शान्ता साऽऽदित्येन शान्ता सा मे शान्ता शुचः शमयतु। पृथिवी शान्तिरन्तरिक्षं
 शान्तिर्द्यौः शान्तिर्दिशः शान्तिरवान्तरदिशाः शान्तिरग्निः शान्तिर्वायुः शान्तिरादित्यः
 शान्तिश्चन्द्रमाः शान्तिर्नक्षत्राणि शान्तिरापः शान्तिरोषधयः शान्तिर्वनस्पतयः शान्तिर्गोः

शान्तिरजा शान्तिरश्वः शान्तिः पुरुषः शान्तिर्ब्रह्म शान्तिर्ब्राह्मणः शान्तिः शान्तिरेव
 शान्तिः शान्तिर्मे अस्तु शान्तिः। तयाहः शान्त्या सर्वशान्त्या मह्यं द्विपदे चतुष्पदे च
 शान्तिं करोमि शान्तिर्मे अस्तु शान्तिः। एह श्रीश्च ह्रीश्च धृतिश्च तपो मेधा प्रतिष्ठा
 श्रद्धा सत्यं धर्मश्चैतानि मोत्तिष्ठन्तमनूत्तिष्ठन्तु मा माः श्रीश्च ह्रीश्च धृतिश्च तपो मेधा
 प्रतिष्ठा श्रद्धा सत्यं धर्मश्चैतानि मा मा हासिषुः। उदायुषा स्वायुषोदोषधीनाः
 रसेनोत्पर्जन्यस्य शुष्मेणोदस्थाममृताः अनु। तच्चक्षुर्देवहितं पुरस्ताच्छुक्रमुच्चरेत्।
 पथ्येम शरदः शतं जीवेम शरदः शतं नन्दाम शरदः शतं मोदाम शरदः शतं
 भवाम शरदः शतः शृण्वाम शरदः शतं प्रब्रवाम शरदः शतमजीताः स्याम शरदः
 शतं ज्योक्व सूर्यं दृशे। य उदगान्महतोऽर्णवाद्भिभ्राजमानः सरिरस्य मध्यात्स मा
 वृषभो लोहिताक्षः सूर्यो विपश्चिन्मनसा पुनातु। ब्रह्मणश्चोतन्यसि ब्रह्मण आणी स्थो
 ब्रह्मण आवपनमसि धारितेयं पृथिवी ब्रह्मणा मही धारितमेनेन महदन्तरिक्षं दिवं
 दाधार पृथिवीः सदेवां यदहं वेद तदहं धारयाणि मा मद्देदोऽधिविस्त्रसत्।
 मेधामनीषे माविशताः समीचीं भूतस्य भव्यस्यावरुध्यै सर्वमायुरयाणि
 सर्वमायुरयाणि। आभिर्गीर्भिर्यदतो न ऊनमाप्यायय हरिवो वर्धमानः। यदा
 स्तोतृभ्यो महि गोत्रा रुजासि भूयिष्ठभाजो अध ते स्याम। ब्रह्म प्रावादिष्म तन्नो
 मा हासीत्। ॐ शान्तिः शान्तिः शान्तिः॥ 93 ॥ परावर्तो दधातु बद्धां जिन्वथ दृशे सप्त च॥ [42]

नमो वाचे या चोदिता या चानुदिता तस्यै वाचे नमो नमो वाचे नमो वाचस्पतये
 नम ऋषिभ्यो मन्त्रकृद्भ्यो मन्त्रपतिभ्यो मा मामृषयो मन्त्रकृतो मन्त्रपतयः
 परादुर्माहमृषीन्मन्त्रकृतो मन्त्रपतीन्परादां वैश्वदेवीं वाचमुदासः शिवामदस्तां जुष्टां
 देवेभ्यः शर्म मे द्यौः शर्म पृथिवी शर्म विश्वमिदं जगत्। शर्म चन्द्रश्च सूर्यश्च शर्म
 ब्रह्मप्रजापती। भूतं वदिष्ये भुवनं वदिष्ये तेजो वदिष्ये यशो वदिष्ये तपो वदिष्ये
 ब्रह्म वदिष्ये सत्यं वदिष्ये तस्मा अहमिदमुपस्तरणमुपेस्तृण उपस्तरणं मे प्रजायै
 पशूनां भूयादुपस्तरणमहं प्रजायै पशूनां भूयासं प्राणापानौ मृत्योर्मा पातं
 प्राणापानौ मा मा हासिष्टं मधु मनिष्ये मधु जनिष्ये मधु वक्ष्यामि मधु वदिष्यामि

मधु॑म॒तीं दे॒वेभ्यो॒ वाच॑मु॒दासः॑ शु॒श्रूषे॑ण्या॒ मनु॑ष्यै॒भ्यस्तं॑ मा॒ दे॒वा अ॑वन्तु शो॒भायै॑
पि॒तरोऽनु॑मदन्तु। ॐ शान्तिः॒ शान्तिः॒ शान्तिः॑॥

॥पञ्चमः प्रश्नः॥

ॐ शं नस्तन्नो मा हासीत्॥ ॐ शान्तिः शान्तिः शान्तिः॥

देवा वै सत्रमासत। ऋद्धिपरिमितं यशस्कामाः। तैऽब्रुवन्। यन्नः प्रथमं यशं
ऋच्छात्। सर्वेषां नस्तत्सहासदिति। तेषां कुरुक्षेत्रं वेदिरासीत्। तस्यै खाण्डवो
दक्षिणार्द्ध आसीत्। तूर्घ्मुत्तरार्द्धः। परीणञ्जघनार्द्धः। मरुवं उत्करः॥₁॥

तेषां मरुवं वैष्णवं यशं आर्च्छत्। तन्न्यकामयत। तेनापाक्रामत्। तं देवा अन्वायन्।
यशोऽवरुरुत्समानाः। तस्यान्वागतस्य। सव्याद्धनुरजायत। दक्षिणादिषेवः।
तस्मादिषुधन्वं पुण्यजन्म। यज्ञजन्मा हि॥₂॥

तमेकं सन्तम्। बहवो नाभ्यधृष्णुवन्। तस्मादेकमिषुधन्विनम्। बहवोऽनिषुधन्वा
नाभिधृष्णुवन्ति। सोऽस्मयत। एकं मा सन्तं बहवो नाभ्यधर्षिषुरिति। तस्य
सिष्मियाणस्य तेजोऽपाक्रामत्। तद्देवा ओषधीषु न्यमृजुः। ते श्यामाका अभवन्।
स्मयाका वै नामैते॥₃॥

तत्स्मयाकानां स्मयाकबम्। तस्माद्दीक्षितेनापिगृह्यं स्मेतव्यम्। तेजसो धृत्यै। स
धनुः प्रतिष्कभ्यातिष्ठत्। ता उपदीका अब्रुवन्वरं वृणामहे। अथ व इमं रन्धयाम।
यत्र क्व च खनाम। तदपोऽभितृणदामेति। तस्मादुपदीका यत्र क्व च खनन्ति।
तदपोऽभितृन्दन्ति॥₄॥

वारेवृतं ह्यासाम्। तस्य ज्यामप्यादन्। तस्य धनुर्विप्रवमाणं शिर उदवर्तयत्।
तद्वावापृथिवी अनुप्रावर्तत। यत् प्रावर्तत। तत्प्रवर्ग्यस्य प्रवर्ग्यबम्।
यद्धाँ(4)इत्यपतत्। तद्घर्मस्य घर्मबम्। महतो वीर्यमपप्तदिति। तन्महावीरस्य
महावीरबम्॥₅॥

यदस्याः समभरन्। तत्सम्राज्ञः सम्राट्त्वम्। तं स्तुतं देवतांस्तेधा व्यगृह्णत। अग्निः
प्रातः सवनम्। इन्द्रो माध्यं दिनं सवनम्। विश्वेदेवास्तृतीयसवनम्। तेनापशीर्ष्णा
यज्ञेन यजमानाः। नाशिषोऽवारुन्धत। न सुवर्गं लोकमभ्यजयन्। ते देवा

अ॒श्विना॑वब्रुवन्॥६॥

भि॒षजो॑ वै स्थः॑। इ॒दं य॒ज्ञस्य॑ शि॒रः प्र॑ति॒धत्त॑मि॒ति। ता॑व॒ब्रूतां॑ वरं वृ॒णाव॑है। ग्र॒ह ए॒व
ना॒वत्रा॑पि गृ॒ह्यता॑मि॒ति। ता॒भ्यामे॒तमा॑श्वि॒नम॑गृ॒ह्णन्। ता॑वे॒तद्य॒ज्ञस्य॑ शि॒रः प्र॑त्य॒धत्ता॑म्।
यत्प्र॑व॒र्ग्यः। तेन॑ स॒शीर्ष्णा॑ य॒ज्ञेन॑ यज॑मानः। अ॒वाशि॑षोऽरु॒न्धत॑। अ॒भि सु॑व॒र्गं
लो॒कम॑जयन्। यत्प्र॑व॒र्ग्यं प्र॑वृ॒णक्ति॑। य॒ज्ञस्ये॒व तच्छि॑रः प्र॑ति॒दधा॑ति। तेन॑ स॒शीर्ष्णा॑
य॒ज्ञेन॑ यज॑मानः। अ॒वाशि॑षो रु॒न्धे। अ॒भि सु॑व॒र्गं लो॒कं ज॑यति। तस्मा॑दे॒ष
आ॑श्वि॒नप्र॑वया इ॒व। यत्प्र॑व॒र्ग्यः॥७॥

उ॒त्क॒रो ह्ये॑ते तृ॒न्दन्ति॑ म॒हावी॒र॒ब्र॒म॒ब्रु॒वन्न॑जयन्त्स॒प्त च॑॥

[1]

सा॒वि॒त्रं जु॑होति प्र॒सू॒त्यै। च॒तु॒र्गृ॒ही॒तेन॑ जु॑होति। च॒तु॒ष्पा॒दः प॒शवः॑। प॒शूने॒वाव॑रु॒न्धे।
च॒त॒स्रो दि॑शः। दि॒क्ष्वे॒व प्र॑ति॒तिष्ठ॑ति। छ॒न्दा॑सि दे॒वेभ्यो॑ऽपा॑क्रामन्। न वो॑ऽभा॒गानि॑
ह॒व्यं व॑क्ष्याम॒ इति॑। तेभ्य॑ ए॒तच्च॑तु॒र्गृ॒ही॒तम॑धारयन्। पु॒रोनु॒वाक्या॑यै या॒ज्यायै॑॥८॥

दे॒वता॑यै वष॒ट्कारा॑य। यच्च॑तु॒र्गृ॒ही॒तं जु॑होति। छ॒न्दा॑स्ये॒व तत् प्री॑णाति। ता॒न्यस्य॑
प्री॒तानि॑ दे॒वेभ्यो॑ ह॒व्यं व॑हन्ति। ब्र॒ह्म॒वा॒दिनो॑ वदन्ति। हो॒तव्यं॑ दी॒क्षित॑स्य गृ॒हा(३)इ॒ न
हो॒तव्या॑(३)मि॒ति। ह॒वि॒र्वै दी॑क्षितः। य॒ज्जु॑हुयात्। ह॒विष्कृ॑तं यज॑मानम॒ग्नौ प्र॑द॒ध्यात्।
यन्न॑ जु॑हुयात्॥९॥

य॒ज्ञप॑रु॒रन्तरि॑यात्। य॒जु॒रे॒व व॑देत्। न ह॒विष्कृ॑तं यज॑मानम॒ग्नौ प्र॑द॒धाति॑। न
य॒ज्ञप॑रु॒रन्तरे॑ति। गा॒य॒त्री छ॒न्दा॑स्यत्य॑मन्यत। तस्यै॑ वष॒ट्कारो॑ऽभ्य॒य्य शि॒रोऽच्छि॑नत्।
तस्यै॑ द्वे॒धा र॑सः प॒राप॑तत्। पृ॒थि॒वीम॒र्द्धः प्रा॑वि॒शत्। प॒शून्म॑र्द्धः। यः पृ॒थि॒वीं
प्रा॑वि॒शत्॥१०॥

स ख॑दि॒रोऽभ॑वत्। यः प॒शून्। सो॑ऽजा॒म्। यत्खा॑दि॒र्यभि॑र्भवति। छ॒न्द॑सा॒मे॒व र॑सेन
य॒ज्ञस्य॑ शि॒रः स॑म्भ॒रति॑। यदौ॒दु॒म्बरी॑। ऊ॒र्ग्वो उ॑दु॒म्बराः॑। ऊ॒र्जे॒व य॒ज्ञस्य॑ शि॒रः
स॑म्भ॒रति॑। यद्वै॒णवी॑। ते॒जो वै वे॑णुः॥११॥

ते॒ज॒सै॒व य॒ज्ञस्य॑ शि॒रः स॑म्भ॒रति॑। यद्वै॒क॒ङ्क॒ती। भा॑ ए॒वाव॑रु॒न्धे। दे॒वस्य॑ त्वा स॒वितुः॑
प्र॑स॒व इ॒त्यभि॑माद॑त्ते प्र॒सू॒त्यै। अ॒श्विनो॑र्बा॒हुभ्या॑मित्या॒ह। अ॒श्विनो॑ हि दे॒वाना॑म॒ध्वर्यु॑

आस्ताम्। पूष्णो हस्ताभ्यामित्याह यत्यै। वज्रं इव वा एषा। यदग्निः। अग्निरसि
नारिरसीत्याह शान्त्यै॥¹²॥

अध्वरकृद्देवेभ्य इत्याह। यज्ञो वा अध्वरः। यज्ञकृद्देवेभ्य इति वावैतदाह। उत्तिष्ठ
ब्रह्मणस्पत इत्याह। ब्रह्मणैव यज्ञस्य शिरोऽर्च्येति। प्रेतु ब्रह्मणस्पतिरित्याह। प्रेत्यैव
यज्ञस्य शिरोऽर्च्येति। प्र देव्येतु सूनृतेत्याह। यज्ञो वै सूनृता। अच्छा वीरं नर्यं
पङ्क्तिराधसमित्याह॥¹³॥

पाङ्क्तो हि यज्ञः। देवा यज्ञं नयन्तु न इत्याह। देवानेव यज्ञनियः कुरुते। देवीं
द्यावापृथिवी अनु मे मसाधामित्याह। आभ्यामेवानुमतो यज्ञस्य शिरः सम्भरति।
ऋद्धासमद्य मखस्य शिर इत्याह। यज्ञो वै मखः। ऋद्धासमद्य यज्ञस्य शिर इति
वावैतदाह। मखाय त्वा मखस्य त्वा शीर्ष्ण इत्याह। निर्दिश्यैवेनद्धरति॥¹⁴॥

त्रिर्हरति। त्रयं इमे लोकाः। एभ्य एव लोकेभ्यो यज्ञस्य शिरः सम्भरति। तूष्णीं
चतुर्थं हरति। अपरिमितादेव यज्ञस्य शिरः सम्भरति। मृत्खनादग्रे हरति।
तस्मान्मृत्वनः करुण्यतरः। इयत्यग्रं आसीरित्याह। अस्यामेवाच्छम्बद्वारं यज्ञस्य
शिरः सम्भरति। ऊर्जं वा एतं रसं पृथिव्या उपदीका उद्दिहन्ति॥¹⁵॥

यद्वल्मीकम्। यद्वल्मीकवपा सम्भारो भवति। ऊर्जमेव रसं पृथिव्या अवरुन्धे।
अथो श्रोत्रमेव। श्रोत्रं ह्येतत्पृथिव्याः। यद्वल्मीकः। अबधिरो भवति। य एवं वेद।
इन्द्रो वृत्राय वज्रमुदयच्छत्। स यत्र यत्र पराक्रमत॥¹⁶॥

तन्नाद्धियत। स पूतीकस्तम्बे पराक्रमत। सौऽद्धियत। सौऽब्रवीत्। ऊतिं वै मे धा
इति। तदूतीकानामूतीकत्वम्। यदूतीका भवन्ति। यज्ञायैवोतिं दधति। अग्निजा
अंसि प्रजापते रेत इत्याह। य एव रसः पशून्प्राविशत्॥¹⁷॥

तमेवावरुन्धे। पश्चैते सम्भारा भवन्ति। पाङ्क्तो यज्ञः। यावानेव यज्ञः। तस्य शिरः
सम्भरति। यद्गाम्याणां पशूनां चर्मणा सम्भरेत्। ग्राम्यान्पशूञ्छुचाऽर्पयेत्।
कृष्णाजिनेन सम्भरति। आरण्यानेव पशूञ्छुचार्पयति। तस्मात्समावत्पशूनां
प्रजायमानानाम्॥¹⁸॥

आ॒र॒ण्यः प॒शवः क॒र्नीया॑सः। शु॒चा ह्य॑ताः। लो॒मतः स॒म्भ॑रति। अतो ह्य॑स्य
मे॒ध्यम्। परि॑गृह्या य॑न्ति। रक्ष॑साम॒प॒ह॒त्यै। ब॒हवो॑ हर॑न्ति। अ॒प॒चि॒ति॒मे॒वास्मि॑न्दधति।
उद्ध॑ते सि॒क॒तोपो॒प्ते परि॑श्रिते नि॒द॒धति॑ शान्त्यै। म॒द॒न्तीभि॒रुप॑ सृजति॥¹⁹॥

तेज॑ ए॒वास्मि॑न्दधाति। मधु॑ ब॒वा मधु॑ला क॒रो॒बि॒त्याह॑। ब्र॒ह्म॒णै॒वास्मि॑न्तेजो॑ दधाति।
यद्वा॒म्याणां॑ पा॒त्राणां॑ क॒पालैः॑ स॒सृ॒जेत्। ग्रा॒म्याणि॑ पा॒त्राणि॑ शु॒चाऽर्प॑येत्।
अ॒र्म॒क॒पालैः॑ स॒सृ॒जति॑। ए॒तानि॑ वा अ॒नु॒प॒जीव॑नी॒यानि॑। ता॒न्ये॒व शु॒चा॒र्प॑यति।
श॒र्करा॑भिः स॒सृ॒जति॑ धृत्यै। अथो॑ श॒न्वाय॑। अ॒ज॒लो॒मैः स॒सृ॒जति॑। ए॒षा वा अ॒ग्नेः
प्रि॒या त॒नूः। यद॑जा। प्रि॒यै॒वैनं॑ त॒नु॒वा स॒सृ॒जति॑। अथो॑ तेज॑सा। कृ॒ष्णा॒जि॒नस्य॑
लो॒म॒भिः स॒सृ॒जति॑। य॒ज्ञो वै कृ॑ष्णाजि॒नम्। य॒ज्ञे॒नै॒व य॒ज्ञः स॒सृ॒जति॑॥²⁰॥

याज्याये न जुहुयादविशद्रेणुः शान्त्यै पङ्क्तिराधसमित्याह हरति दिहन्ति पराक्रमताविशत् प्रजायमानानां सृजति शन्वायाष्टौ च॥ [2]

परि॑श्रिते करोति। ब्र॒ह्म॒व॒र्च॒सस्य॑ परि॑गृहीत्यै। न कु॒र्वन्न॒भि प्रा॑ण्यात्। यत्कु॒र्वन्न॒भि
प्रा॑ण्यात्। प्रा॒णाञ्छु॒चा॒र्प॑येत्। अ॒प॒हाय॑ प्राणि॑ति। प्रा॒णानां॑ गोपी॒थाय॑। न प्र॑व॒र्ग्यं
चा॒दित्यं॑ चा॒न्तरे॑यात्। यद॑न्तरे॒यात्। दु॒श्च॒र्मा स्यात्॥²¹॥

तस्मान्नान्तरा॒य्यम्। आ॒त्मनो॑ गोपी॒थाय॑। वे॒णुना॑ करोति। तेजो॑ वै वे॒णुः। तेजः॑
प्र॒व॒र्ग्यः। तेज॑सै॒व तेजः॑ स॒म॒र्द्ध॑यति। म॒खस्य॑ शिरो॒ऽसी॒त्याह॑। य॒ज्ञो वै म॒खः।
तस्यै॒तच्छि॑रः। यत्प्र॑व॒र्ग्यः॥²²॥

तस्मा॑दे॒वमा॑ह। य॒ज्ञस्य॑ प॒दे स्थ॑ इत्या॑ह। य॒ज्ञस्य॑ ह्ये॒ते प॒दे। अथो॑ प्र॒ति॒ष्ठि॒त्यै।
गा॒य॒त्रेण॑ ब॒वा छन्द॑सा क॒रोमी॑त्या॑ह। छन्दो॑भिरे॒वैनं॑ करोति। त्र्यु॒द्धिं करोति॑। त्रयं॑
इ॒मे लो॒काः। ए॒षां लो॒काना॑मा॒प्त्यै। छन्दो॑भिः करोति॥²³॥

वी॒र्यं॑ वै छन्दा॑सि। वी॒र्ये॑णै॒वैनं॑ करोति। य॒जुषा॑ बि॒लं करोति॑ व्यावृ॑त्यै। इ॒यं तं॑
करोति। प्र॒जाप॑तिना य॒ज्ञमु॒खेन॑ स॒मि॒तम्। इ॒यं तं॑ करोति। य॒ज्ञप॑रुषा स॒मि॒तम्।
इ॒यं तं॑ करोति। ए॒ताव॑द्वै पु॒रुषे॑ वी॒र्यम्। वी॒र्य॑स॒मि॒तम्॥²⁴॥

अ॒प॒रि॒मितं॑ करोति। अ॒प॒रि॒मित॑स्याव॒रुद्धौ॑। परि॑ग्री॒वं क॑रोति धृत्यै। सूर्य॑स्य ह॒रसा॑
श्रा॒येत्या॑ह। य॒था॒य॒जुरे॒वैतत्। अ॒श्वश॑केन॑ धू॒पय॑ति। प्रा॒जाप॑त्यो वा अ॒श्वः

सयोनि॒त्वाय॑। वृ॒ष्णो अ॒श्वस्य॑ नि॒ष्पद॒सीत्या॑ह। अ॒सौ वा आ॒दित्यो॑ वृ॒षाऽश्वः॑। तस्य॒
छन्दा॑ंसि नि॒ष्पत्॥²⁵॥

छन्दा॑भिरे॒वेन॑ धू॒पय॑ति। अ॒र्चिषे॑ त्वा शोचि॒षे त्वे॒त्याह॑। तेज॑ ए॒वास्मि॑न्दधाति।
वा॒रु॒णोऽभी॑द्धः। मै॒त्रियो॑पैति॒ शान्त्यै॑। सि॒द्धौ त्वे॒त्याह॑। यथा॒यजु॑रे॒वैतत्॑। दे॒वस्त्वा॑
स॒वि॒तो॒द्वप॑बि॒त्याह॑। स॒वि॒तृ॒प्र॒सू॒त ए॒वेन॑ ब्र॒ह्म॑णा दे॒वता॑भि॒रु॒द्वप॑ति। अ॒प॒द्य॒मानः॑
पृ॒थि॒व्यामा॑शा दि॒श आ॒पृ॒णे॒त्याह॑॥²⁶॥

तस्मा॑द॒ग्निः सर्वा॑ दि॒शोऽनु॑ विभा॑ति। उ॒त्तिष्ठ॑ बृ॒हन्म॑वो॒र्ध्वस्तिष्ठ॑ ध्रु॒वस्त्वमि॒त्याह॑
प्रति॑ष्ठित्यै। ई॒श्वरो॑ वा ए॒षोऽन्धो॑ भवि॑तोः। यः प्र॑व॒र्ग्यम॒न्वीक्ष॑ते। सूर्य॑स्य त्वा
चक्षु॑षाऽन्वी॒क्ष इ॒त्याह॑। चक्षु॑षो गोपी॒थाय॑। ऋ॒जवे॑ त्वा सा॒धवे॑ त्वा सु॒क्षित्यै॑ त्वा भू॒त्यै
त्व॑त्याह। इ॒यं वा ऋ॒जुः। अ॒न्तरि॑क्षं सा॒धु। अ॒सौ सु॒क्षितिः॑॥²⁷॥

दि॒शो भू॑तिः। इ॒माने॒वास्मै॑ लो॒कान्क॑ल्पयति। अथो॒ प्रति॑ष्ठित्यै।
इ॒दम॒हम॒मुमा॑मु॒ष्याय॑णं वि॒शा प॒शुभि॑र्ब्र॒ह्मव॑र्च॒सेन॑ पर्यू॒हामी॒त्याह॑। वि॒शैवेन॑
प॒शुभि॑र्ब्र॒ह्मव॑र्च॒सेन॑ पर्यू॒हति॑। वि॒शेति॑ रा॒ज॒न्यस्य॑ ब्रूयात्। वि॒शैवेन॑ पर्यू॒हति॑।
प॒शुभि॑रिति॒ वैश्व॑स्य। प॒शुभि॑रे॒वेन॑ पर्यू॒हति॑। अ॒सुर्य॑ पा॒त्रम॒नाच्छृ॑ण्णम्॥²⁸॥

आच्छृ॑ण॒त्ति। दे॒व॒त्राकः॑। अ॒ज॒क्षी॑रेणाऽऽच्छृ॑ण॒त्ति। प॒रमं॑ वा ए॒तत्प॑यः। यद॑ज॒क्षी॒रम्।
प॒रमे॑णै॒वेन॑ प॒यसा॑ऽऽच्छृ॑ण॒त्ति। यजु॑षा व्यावृ॑त्यै। छन्दा॑भिराच्छृ॑ण॒त्ति। छन्दा॑भिर्वा
ए॒ष क्रि॑यते। छन्दा॑भिरे॒व छन्दा॑स्य॒च्छृ॑ण॒त्ति। छृ॒न्धि वाच॑मि॒त्याह॑। वाच॑मे॒वावरु॑न्धे।
छृ॒न्ध्यूर्ज॑मि॒त्याह॑। ऊ॒र्जमे॒वावरु॑न्धे। छृ॒न्धि ह॒विरि॒त्याह॑। ह॒विरे॒वाकः॑। दे॒व पुर॑श्चर
स॒ध्यास॑न्वे॒त्याह॑। यथा॒यजु॑रे॒वैतत्॑॥²⁹॥

स्याद्यत् प्रवर्ग्यश्छन्दाभिः करोति वीर्यसम्मितं छन्दांसि निष्पत्पृणेत्याह सुक्षितिरनाच्छृण्वन्दास्यच्छृणत्यष्टौ च॥ [3]

ब्र॒ह्मन्प्र॑चरि॒ष्यामो॑ होत॑र्ध॒र्मम॒भिष्टु॑ही॒त्याह॑। ए॒ष वा ए॒तर्हि॑ बृ॒हस्प॑तिः। यद्ब्र॒ह्मा। तस्मा॑
ए॒व प्र॑ति॒प्रोच्य॑ प्रच॑रति। आ॒त्मनो॑ऽना॒त्यै। य॒माय॑ त्वा म॒खाय॑ त्वे॒त्याह॑। ए॒ता वा
ए॒तस्य॑ दे॒वताः॑। ताभि॑रे॒वेन॑ सम॑र्द्धयति। म॒द॒न्तीभिः॑ प्रोक्ष॑ति। तेज॑
ए॒वास्मि॑न्दधाति॥³⁰॥

अभिपूर्वं प्रोक्षति। अभिपूर्वमेवास्मिन्तेजो दधाति। त्रिः प्रोक्षति। त्र्यावृद्धि यज्ञः।
अथो मेध्यत्वाय। होताऽन्वाह। रक्षसामपहत्यै। अनवानम्। प्राणानां सन्तत्यै।
त्रिष्टुभः सतीर्गायत्रीरिवान्वाह॥³¹॥

गायत्रो हि प्राणः। प्राणमेव यजमाने दधाति। सन्ततमन्वाह। प्राणानामन्नाद्यस्य
सन्तत्यै। अथो रक्षसामपहत्यै। यत्परिमिता अनुब्रूयात्। परिमितमवरुन्धीत।
अपरिमिता अन्वाह। अपरिमितस्यावरुद्धौ। शिरो वा एतद्यज्ञस्य॥³²॥

यत्प्रवर्ग्यः। ऊर्ध्वञ्जः। यन्मौञ्जो वेदो भवति। ऊर्जैव यज्ञस्य शिरः समर्द्धयति।
प्राणाहुतीर्जुहोति। प्राणानेव यजमाने दधाति। सप्त जुहोति। सप्त वै शीर्षण्याः
प्राणाः। प्राणानेवास्मिन्दधाति। देवस्त्वा सविता मध्वाऽनक्तित्याह॥³³॥

तेजसैवैनमनक्ति। पृथिवीं तपसस्त्रायस्वेति हिरण्यमुपास्यति। अस्या अनतिदाहाय।
शिरो वा एतद्यज्ञस्य। यत्प्रवर्ग्यः। अग्निः सर्वा देवताः। प्रलवानादीप्योपास्यति।
देवतास्त्रेव यज्ञस्य शिरः प्रतिदधाति। अप्रतिशीर्णाग्रं भवति। एतद्धर्हिर्ह्येषः॥³⁴॥

अर्चिरसि शोचिरसीत्याह। तेज एवास्मिन्ब्रह्मवर्चसं दधाति। सःसीदस्व महाः
असीत्याह। महान् ह्येषः। ब्रह्मवादिनो वदन्ति। एते वाव त ऋत्विजः। ये
दर्शपूर्णमासयोः। अथ कथा होता यजमानायाऽऽशिषो नाशास्त इति।
पुरस्तादाशीः खलु वा अन्यो यज्ञः। उपरिष्ठादाशीरन्यः॥³⁵॥

अनाधृष्या पुरस्तादिति यदेतानि यजूंष्याह। शीर्षत एव यज्ञस्य यजमान
आशिषोऽवरुन्धे। आयुः पुरस्तादाह। प्रजां दक्षिणतः। प्राणं पश्चात्। श्रोत्रमुत्तरतः।
विधृतिमुपरिष्ठात्। प्राणानेवास्मै समीचो दधाति। ईश्वरो वा एष दिशोऽनून्मदितोः।
यं दिशोऽनु व्यास्थापयन्ति॥³⁶॥

मनोरश्वासि भूरिपुत्रेतीमामभिमृशति। इयं वै मनोरश्वा भूरिपुत्रा। अस्यामेव
प्रतिष्ठित्यनुन्मादाय। सूपसदा मे भूया मा मा हिःसीरित्याहाहिःसायै। चितः स्थ
परिचित इत्याह। अपचितिमेवास्मिन्दधाति। शिरो वा एतद्यज्ञस्य। यत्प्रवर्ग्यः।
असौ खलु वा आदित्यः प्रवर्ग्यः। तस्य मरुतो रश्मयः॥³⁷॥

स्वाहा मरुद्भिः परिश्रयस्वेत्याह। अमुमेवादित्यं रश्मिभिः पर्यूहति।
तस्मादसावादित्योऽमुष्मिल्लोके रश्मिभिः पर्यूढः। तस्माद्राजा विशा पर्यूढः।
तस्माद्भामणीः संजातैः पर्यूढः। अग्नेः सृष्टस्य यतः। विकङ्कतं भा आर्च्छत्।
यद्वैकङ्कताः परिधयो भवन्ति। भा एवावरुन्धे। द्वादश भवन्ति॥³⁸॥

द्वादश मासाः संवत्सरः। संवत्सरमेवावरुन्धे। अस्ति त्रयोदशो मास इत्याहुः।
यत्त्रयोदशः परिधिर्भवति। तेनैव त्रयोदशं मासमवरुन्धे। अन्तरिक्षस्यान्तर्द्विरसीत्याहुः
व्यावृत्त्यै। दिवं तपसस्त्रायस्वेत्युपरिष्ठाद्विरण्यमधि निदधाति। अमुष्या अनतिदाहाय।
अथो आभ्यामेवैनमुभयतः परिगृह्णाति। अर्हन् बिभर्षि सायकानि धन्वेत्याह॥³⁹॥

स्तौत्येवैनमेतत्। गायत्रमसि त्रैष्टुभमसि जागतमसीति धवित्राण्यादत्ते।
छन्दोभिरेवैनान्यादत्ते। मधु मध्विति धूनोति। प्राणो वै मधु। प्राणमेव यजमाने
दधाति। त्रिः परियन्ति। त्रिवृद्धि प्राणः। त्रिः परियन्ति। त्र्यावृद्धि यज्ञः॥⁴⁰॥

अथो रक्षसामपहत्यै। त्रिः पुनः परियन्ति। षट्त्सम्पद्यन्ते। षड्वा ऋतवः। ऋतुष्वेव
प्रतितिष्ठन्ति। यो वै घर्मस्य प्रियां तनुवमाक्रामति। दुश्चर्मा वै स भवति। एष ह
वा अस्य प्रियां तनुवमाक्रामति। यत् त्रिः परीत्य चतुर्थं पर्येति। एतां ह वा
अस्योग्रदेवो राजनिराचक्राम॥⁴¹॥

ततो वै स दुश्चर्माऽभवत्। तस्मान्निः परीत्य न चतुर्थं परीयात्। आत्मनो
गोपीथाय। प्राणा वै धवित्राणि। अव्यतिषङ्गं धून्वन्ति। प्राणानामव्यतिषङ्गाय क्लृप्त्यै।
विनिषद्य धून्वन्ति। दिक्ष्वेव प्रतितिष्ठन्ति। ऊर्ध्वं धून्वन्ति। सुवर्गस्य लोकस्य समष्टौ।
सर्वतो धून्वन्ति। तस्मादयं सर्वतः पवते॥⁴²॥

दधातीवान्वाह यज्ञस्याहेप उपरिष्ठादाशीरन्यो व्यास्थापयन्ति रश्मयो भवन्ति धन्वेत्याह यज्ञश्चक्राम समष्टौ द्वे च॥ [4]

अग्निष्ट्वा वसुभिः पुरस्ताद्रोचयतु गायत्रेण छन्दसेत्याह। अग्निरेवैनं वसुभिः
पुरस्ताद्रोचयति गायत्रेण छन्दसा। समारुचितो रोचयेत्याह। आशिषमेवैतामाशास्ते।
इन्द्रस्त्वा रुद्रैर्दक्षिणतो रोचयतु त्रैष्टुभेन छन्दसेत्याह। इन्द्र एवैनं रुद्रैर्दक्षिणतो
रोचयति त्रैष्टुभेन छन्दसा। समारुचितो रोचयेत्याह। आशिषमेवैतामाशास्ते।

वरुणस्त्वाऽऽदित्यैः पश्चाद्रोचयतु जागतेन छन्दसेत्याह। वरुण एवैनमादित्यैः
पश्चाद्रोचयति जागतेन छन्दसा॥⁴³॥

समारुचितो रोचयेत्याह। आशिषमेवैतामाशास्ते। द्युतानस्त्वा मारुतो मरुद्भिरुत्तरतो
रोचयत्वानुष्टुभेन छन्दसेत्याह। द्युतान एवैनं मारुतो मरुद्भिरुत्तरतो रोचयत्वानुष्टुभेन
छन्दसा। समारुचितो रोचयेत्याह। आशिषमेवैतामाशास्ते। बृहस्पतिस्त्वा
विश्वैर्देवरुपरिष्ठाद्रोचयतु पाङ्केन छन्दसेत्याह। बृहस्पतिरेवैनं विश्वैर्देवरुपरिष्ठाद्रोचयति
पाङ्केन छन्दसा। समारुचितो रोचयेत्याह। आशिषमेवैतामाशास्ते॥⁴⁴॥

रोचितस्त्वं देव घर्म देवेष्वसीत्याह। रोचितो ह्येष देवेषु। रोचिषीयाहं
मनुष्यैष्वित्याह। रोचत एवेष मनुष्येषु। सम्राड्वर्म रुचितस्त्वं देवेष्वायुष्मास्तेजस्वी
ब्रह्मवर्चस्यसीत्याह। रुचितो ह्येष देवेष्वायुष्मास्तेजस्वी ब्रह्मवर्चसी। रुचितोऽहं
मनुष्यैष्वायुष्मास्तेजस्वी ब्रह्मवर्चसी भूयासमित्याह। रुचित एवेष
मनुष्यैष्वायुष्मास्तेजस्वी ब्रह्मवर्चसी भवति। रुगसि रुचं मयि धेहि मयि
रुगित्याह। आशिषमेवैतामाशास्ते। तं यदेतैर्यजुर्भिररोचयित्वा। रुचितो घर्म इति
प्रब्रूयात्। अरोचुकोऽध्वर्युः स्यात्। अरोचुको यजमानः। अथ यदेनमेतैर्यजुर्भी
रोचयित्वा। रुचितो घर्म इति प्राह। रोचुकोऽध्वर्युर्भवति। रोचुको यजमानः॥⁴⁵॥

पश्चाद्रोचयति जागतेन छन्दसा पाङ्केन छन्दसा समारुचितो रोचयेत्याह। आशिषमेवैतामाशास्ते शास्तेऽष्टौ च॥ [5]

शिरो वा एतद्यज्ञस्य। यत् प्रवर्ग्यः। ग्रीवा उपसदः। पुरस्तादुपसदा प्रवर्ग्यं
प्रवृणक्ति। ग्रीवास्त्वेव यज्ञस्य शिरः प्रतिदधाति। त्रिः प्रवृणक्ति। त्रयं द्विमे लोकाः।
एभ्य एव लोकेभ्यो यज्ञस्य शिरोऽवरुन्धे। षट्थसम्पदन्ते। षड्वा ऋतवः॥⁴⁶॥

ऋतुभ्य एव यज्ञस्य शिरोऽवरुन्धे। द्वादशकृत्वः प्रवृणक्ति। द्वादश मासाः संवत्सरः।
संवत्सरादेव यज्ञस्य शिरोऽवरुन्धे। चतुर्विंशतिः सम्पदन्ते। चतुर्विंशतिरर्द्धमासाः।
अर्द्धमासेभ्य एव यज्ञस्य शिरोऽवरुन्धे। अथो खलु। सकृदेव प्रवृज्यः। एकं हि
शिरः॥⁴⁷॥

अग्निष्टोमे प्रवृणक्ति। एतावान् वै यज्ञः। यावानग्निष्टोमः। यावानेव यज्ञः। तस्य शिरः
प्रतिदधाति। नोक्थ्यै प्रवृज्यात्। प्रजा वै पशवं उक्थानि। यदुक्थ्यै प्रवृज्यात्। प्रजां

प॒शूना॑स्य॒ निर्द॑हेत्। वि॒श्वजि॑ति॒ सर्व॑पृ॒ष्ठे प्रवृ॑णक्ति॥⁴⁸॥

पृ॒ष्ठानि॒ वा अ॒च्युतं॑ च्यावयन्ति। पृ॒ष्ठेरे॒वास्मा॒ अच्यु॑तं च्यावयि॒त्वाऽव॑रुन्धे। अप॑श्यं
गो॒पा॒मि॒त्याह॑। प्रा॒णो वै गो॒पाः। प्रा॒णमे॒व प्र॒जासु॑ वि॒यात॑यति। अप॑श्यं
गो॒पा॒मि॒त्याह॑। अ॒सौ वा आ॑दि॒त्यो गो॒पाः। स ही॑माः प्र॒जा गो॑पा॒यति॑। तमे॒व
प्र॒जाना॑ गो॒प्तारं॑ कुरुते। अ॒नि॒पद्य॑मान॒मि॒त्याह॑॥⁴⁹॥

न ह्ये॑ष नि॒पद्य॑ते। आ च॒ परा॑ च प॒थिभि॑श्चरन्त॒मि॒त्याह॑। आ च॒ ह्ये॑ष परा॑ च
प॒थिभि॑श्चरति। स स॒ध्रीचीः॒ स वि॒षूची॑र्वसान् इ॒त्याह॑। स॒ध्रीची॑श्च ह्ये॑ष वि॒षूची॑श्च
वसानः॑ प्र॒जा अ॒भि वि॒पश्य॑ति। आ॒व॒रीव॑र्ति भुव॑नेष्वन्तरि॒त्याह॑। आ ह्ये॑ष व॒रीव॑र्ति
भुव॑नेष्वन्तः। अत्र॑ प्रा॒वीर्मधु॑ मा॒ध्वीभ्या॑ मधु॒ माधू॑चीभ्या॒मि॒त्याह॑। वास॑न्तिकावे॒वास्मा॑
ऋ॒तू क॑ल्पयति। स॒म॒ग्नि॒र॒ग्निना॑ ग॒ते॒त्याह॑॥⁵⁰॥

ग्रेष्मा॑वे॒वास्मा॑ ऋ॒तू क॑ल्पयति। स॒म॒ग्नि॒र॒ग्निना॑ ग॒ते॒त्याह॑। अ॒ग्नि॒र्ह्ये॒वैषो॑ऽग्निना॑
स॒ङ्गच्छ॑ते। स्वाहा॒ स॒म॒ग्नि॒स्तप॑सा ग॒ते॒त्याह॑। पूर्॒वमे॒वो॒दित॑म्। उ॒त्तरे॑णा॒भिगृ॑णाति। ध॒र्ता
दि॒वो वि॒भा॒सि रज॑सः पृ॒थि॒व्या इ॒त्याह॑। शा॒र॒दावे॒वास्मा॑ ऋ॒तू क॑ल्पयति॥⁵¹॥

दि॒वि दे॒वेषु॑ हो॒त्रा य॒च्छे॒त्याह॑। हो॒त्राभि॑रे॒वेमाँल्लो॒कान्त्स॑न्दधाति। वि॒श्वासां॑ भुवां प॒त
इ॒त्याह॑। हैम॑न्तिकावे॒वास्मा॑ ऋ॒तू क॑ल्पयति। दे॒वश्चू॒स्त्वं दे॒व घ॑र्म दे॒वान्पा॒ही॒त्याह॑।
शै॒शि॒रावे॒वास्मा॑ ऋ॒तू क॑ल्पयति। तपो॒जां वाच॑म॒स्मे नि॒यच्छ॑ दे॒वायु॑व॒मि॒त्याह॑। या वै
मे॒ध्या वाक्। सा तपो॒जाः। ता॒मे॒वाव॑रुन्धे॥⁵²॥

ग॒र्भो दे॒वाना॑मि॒त्याह॑। ग॒र्भो ह्ये॑ष दे॒वाना॑म्। पि॒ता म॑ती॒नामि॒त्याह॑। प्र॒जा वै म॑तयः।
तासा॑मेष ए॒व पि॒ता। यत् प्र॑व॒र्ग्यः। तस्मा॑दे॒वमा॑ह। प॒तिः प्र॒जाना॑मि॒त्याह॑। प॒तिर्ह्ये॑ष
प्र॒जाना॑म्। म॒तिः क॑वी॒नामि॒त्याह॑॥⁵³॥

म॒तिर्ह्ये॑ष क॑वी॒नाम्। सं दे॒वो दे॒वेन॑ स॒वि॒त्रा य॑तिष्ठ स॒ सूर्ये॑णारु॒क्ते॒त्याह॑। अ॒मुं
चै॒वादि॒त्यं प्र॑व॒र्ग्यं च स॒शास्ति॑। आ॒यु॒र्दा॒स्त्वम॒स्मभ्यं॑ घ॒र्म व॑र्चो॒दा अ॒सी॒त्याह॑।
आ॒शि॒षमे॒वैता॑माशास्ते। पि॒ता नो॑ऽसि पि॒ता नो॑ बो॒धे॒त्याह॑। बो॒धय॑त्ये॒वैन॑म्। न वै
तेऽव॑का॒शा भ॑वन्ति। प॒त्न्यै द॑श॒मः। न॒व वै पु॑रु॒षे प्रा॒णाः॥⁵⁴॥

नाभिर्दशमी। प्राणानेव यजमाने दधाति। अथो दशाक्षरा विराट्। अन्नं विराट्।
विराजैवान्नाद्यमवरुन्धे। यज्ञस्य शिरौऽच्छिद्यत। तद्देवा होत्राभिः प्रत्यदधुः।
ऋत्विजोऽवैक्षन्ते। एता वै होत्राः। होत्राभिरेव यज्ञस्य शिरः प्रतिदधाति॥⁵⁵

रुचितमवैक्षन्ते। रुचिताद्वै प्रजापतिः प्रजा असृजत। प्रजानां सृष्ट्यै।
रुचितमवैक्षन्ते। रुचिताद्वै पर्जन्यो वर्षति। वर्षुकः पर्जन्यो भवति। सं प्रजा
एधन्ते। रुचितमवैक्षन्ते। रुचितं वै ब्रह्मवर्चसम्। ब्रह्मवर्चसिनो भवन्ति॥⁵⁶

अधीयन्तोऽवैक्षन्ते। सर्वमायुर्यन्ति। न पत्यवैक्षेत। यत्पत्यवेक्षेत। प्रजायेत। प्रजां
त्वस्यै निर्दहेत्। यन्नावेक्षेत। न प्रजायेत। नास्यै प्रजां निर्दहेत्। तिरस्कृत्य
यजुर्वाचयति। प्रजायते। नास्यै प्रजां निर्दहति। त्वष्टीमती ते सपेयेत्याह। सपाद्धि
प्रजाः प्रजायन्ते॥⁵⁷

ऋतवो हि शिरः सर्वपृष्ठे प्रवृणक्त्यनिपद्यमानमित्याह गतेत्याह शारदावेवास्मां ऋतू कल्पयति रुन्धे कवीनामित्याह प्राणाः प्रतिदधाति भवन्ति वाचयति चत्वारि
च॥

[6]

देवस्य त्वा सवितुः प्रसव इति रशनामादत्ते प्रसूत्यै। अश्विनौर्बाहुभ्यामित्याह।
अश्विनौ हि देवानामध्वर्यू आस्ताम्। पूष्णो हस्ताभ्यामित्याह यत्यै। आददेऽदित्यै
रास्नाऽसीत्याह यजुष्कृत्यै। इड एह्यदित एहि सरस्वत्येहीत्याह। एतानि वा अस्यै
देवनामानि। देवनामैरेवेनामाह्वयति। असावेह्यसावेह्यसावेहीत्याह। एतानि वा
अस्यै मनुष्यनामानि॥⁵⁸

मनुष्यनामैरेवेनामाह्वयति। षट्थ्सम्पद्यन्ते। षड्वा ऋतवः। ऋतुभिरेवेनामाह्वयति।
अदित्या उष्णीषमसीत्याह। यथायजुरेवेतत्। वायुरस्यैड इत्याह। वायुदेवत्यो वै
वत्सः। पूषा त्र्योपावसृजत्बित्याह। पौष्णा वै देवतया पशवः॥⁵⁹

स्वयैवैनं देवतयोपावसृजति। अश्विभ्यां प्रदापयेत्याह। अश्विनौ वै देवानां भिषजौ।
ताभ्यामेवास्मै भेषजं करोति। यस्ते स्तनः शशय इत्याह। स्तौत्येवेनाम्। उस्म
घर्मः शिःषोस्म घर्म पाहि घर्माय शिःषेत्याह। यथा ब्रूयादमुष्मै देहीति। तादृगेव
तत्। बृहस्पतिस्त्र्योप सीदत्बित्याह॥⁶⁰

ब्रह्म वै देवानां बृहस्पतिः। ब्रह्मणैवैनामुपसीदति। दानवः स्थ पेरेव इत्याह।
मेध्यानेवैनां करोति। विष्वग्वृतो लोहितेनेत्याह व्यावृत्त्यै। अश्विभ्यां पिन्वस्व
सरस्वत्यै पिन्वस्व पूष्णे पिन्वस्व बृहस्पतये पिन्वस्वेत्याह। एताभ्यो ह्येषा देवताभ्यः
पिन्वते। इन्द्राय पिन्वस्वेन्द्राय पिन्वस्वेत्याह। इन्द्रमेव भागधेयेन समर्द्धयति।
द्विरिन्द्रायेत्याह॥⁶¹॥

तस्मादिन्द्रो देवतानां भूयिष्ठभाक्तमः। गायत्रोऽसि त्रैष्टुभोऽसि जागंतमसीति
शफोपयमानादत्ते। छन्दोभिरेवैनानादत्ते। सहोर्जो भागेनोपमेहीत्याह। ऊर्ज एवैनं
भागमकः। अश्विनौ वा एतद्यज्ञस्य शिरः प्रतिदधतावब्रूताम्। आवाभ्यामेव पूर्वाभ्यां
वषट्क्रियाता इति। इन्द्राश्विना मधुनः सारघस्येत्याह। अश्विभ्यामेव पूर्वाभ्यां
वषट्करोति। अथो अश्विनावेव भागधेयेन समर्द्धयति॥⁶²॥

घर्मं पात वसवो यजता वडित्याह। वसूनेव भागधेयेन समर्द्धयति। यद्वषट्कुर्यात्।
यातयामाऽस्य वषट्कारः स्यात्। यन्न वषट्कुर्यात्। रक्षांसि यज्ञं हन्युः। वडित्याह।
परोक्षमेव वषट्करोति। नास्य यातयामा वषट्कारो भवति। न यज्ञं रक्षांसि
घ्नन्ति॥⁶³॥

स्वाहा त्वा सूर्यस्य रश्मये वृष्टिवनये जुहोमीत्याह। यो वा अस्य पुण्यो रश्मिः। स
वृष्टिवनिः। तस्मा एवैनं जुहोति। मधुं हविरसीत्याह। स्वदयत्येवैनम्। सूर्यस्य
तपस्तपेत्याह। यथायजुरेवैतत्। द्यावापृथिवीभ्यां त्वा परिगृह्णामीत्याह।
द्यावापृथिवीभ्यामेवैनं परिगृह्णाति॥⁶⁴॥

अन्तरिक्षेण त्वोपयच्छामीत्याह। अन्तरिक्षेणैवैनमुपयच्छति। न वा एतं मनुष्यो
भर्तुमर्हति। देवानां त्वा पितृणामनुमतो भर्तुः शकेयमित्याह। देवैरेवैनं
पितृभिरनुमत आदत्ते। वि वा एनमेतदर्द्धयन्ति। यत्पश्चात्प्रवृज्यं पुरो जुह्वति।
तेजोऽसि तेजोऽनु प्रेहीत्याह। तेज एवास्मिन्दधाति। दिविस्पृङ्गा मां
हिंसीरन्तरिक्षस्पृङ्गा मां हिंसीः पृथिविस्पृङ्गा मां हिंसीरित्याहाहिंसायै॥⁶⁵॥

सुवंगसि सुवर्मे यच्छ दिवं यच्छ दिवो मां पाहीत्याह। आशिषमेवैतामाशांस्ते।

शिरो वा एतद्यज्ञस्य। यत्प्रवर्ग्यः। आत्मा वायुः। उद्यत्य वातनामान्याह। आत्मन्नेव यज्ञस्य शिरः प्रतिदधाति। अनवानम्। प्राणानां सन्तत्यै। पश्चाह॥⁶⁶॥

पाङ्क्तो यज्ञः। यावानेव यज्ञः। तस्य शिरः प्रतिदधाति। अग्नये वा वसुमते स्वाहेत्याह। असौ वा आदित्योऽग्निर्वसुमान्। तस्मा एवैनं जुहोति। सोमाय वा रुद्रवते स्वाहेत्याह। चन्द्रमा वै सोमो रुद्रवान्। तस्मा एवैनं जुहोति। वरुणाय वाऽऽदित्यवते स्वाहेत्याह॥⁶⁷॥

अप्सु वै वरुण आदित्यवान्। तस्मा एवैनं जुहोति। बृहस्पतये वा विश्वदेव्यावते स्वाहेत्याह। ब्रह्म वै देवानां बृहस्पतिः। ब्रह्मणैवैनं जुहोति। सवित्रे बभ्रुमते विभुमते प्रभुमते वाजवते स्वाहेत्याह। संवत्सरो वै सवितर्भुमान् विभुमान्प्रभुमान् वाजवान्। तस्मा एवैनं जुहोति। यमाय वाऽङ्गिरस्वते पितृमते स्वाहेत्याह। प्राणो वै यमोऽङ्गिरस्वान्पितृमान्॥⁶⁸॥

तस्मा एवैनं जुहोति। एताभ्य एवैनं देवताभ्यो जुहोति। दश सम्पद्यन्ते। दशाक्षरा विराट्। अन्नं विराट्। विराजैवान्नाद्यमवरुन्धे। रौहिणाभ्यां वै देवाः सुवर्गं लोकमायन्। तद्रौहिण्यो रौहिणत्वम्। यद्रौहिणौ भवतः। रौहिणाभ्यामेव तद्यजमानः सुवर्गं लोकमेति। अहर्ज्योतिः केतुना जुषतां सुज्योतिर्ज्योतिषां स्वाहा रात्रिर्ज्योतिः केतुना जुषतां सुज्योतिर्ज्योतिषां स्वाहेत्याह। आदित्यमेव तदमुष्मिल्लोकेऽह्ना परस्ताद्वाधार। रात्रिया अवस्तात्। तस्मादसावादित्योऽमुष्मिल्लोकेऽहोरात्राभ्यां धृतः॥⁶⁹॥

मनुष्यनामानि पशवः सीदन्वित्याहेन्द्रायेत्याहार्द्धयति घन्ति गृह्णात्यहिंसाये पश्चाऽहदित्यवते स्वाहेत्याह पितृमानेति चत्वारि च॥ [7]

विश्वा आशा दक्षिणसदित्याह। विश्वानेव देवान्प्रीणाति। अथो दुरिष्या एवैनं पाति। विश्वा देवानयाडिहेत्याह। विश्वानेव देवान्भागधेयेन समर्द्धयति। स्वाहाकृतस्य घर्मस्य मधोः पिबतमश्विनेत्याह। अश्विनावेव भागधेयेन समर्द्धयति। स्वाहाऽग्नये यज्ञियाय शं यजुर्भिरित्याह। अभ्येवैनं घारयति। अथो हविरेवाकः॥⁷⁰॥
अश्विना घर्म पातं हार्दिवानमहर्दिवाभिरूतिभिरित्याह। अश्विनावेव भागधेयेन

समर्द्धयति। अनु वां द्वावापृथिवी मःसातामित्याहानुमत्यै। स्वाहेन्द्राय
स्वाहेन्द्रावडित्याह। इन्द्राय हि पुरो हूयते। आश्राव्याह घर्मस्य यजेति। वषट्कृते
जुहोति। रक्षसामपहत्यै। अनुयजति स्वगाकृत्यै। घर्ममपातमश्विनेत्याह॥⁷¹॥

पूर्वमेवोदितम्। उत्तरेणाभिगृणाति। अनु वां द्वावापृथिवी
अमःसातामित्याहानुमत्यै। तं प्राव्यं यथावण्णमो दिवे नमः पृथिव्या इत्याह।
यथायजुरेवैतत्। दिविधा इमं यज्ञं यज्ञमिमं दिविधा इत्याह। सुवर्गमेवेनं लोकं
गमयति। दिवं गच्छान्तरिक्षं गच्छ पृथिवीं गच्छेत्याह। एष्वेवेनं लोकेषु
प्रतिष्ठापयति। पञ्च प्रदिशो गच्छेत्याह॥⁷²॥

दिक्ष्वेवेनं प्रतिष्ठापयति। देवान्घर्मपान्गच्छ पितृन्घर्मपान्गच्छेत्याह। उभयेष्वेवेनं
प्रतिष्ठापयति। यत्पिन्वते। वर्षुकः पर्जन्यो भवति। तस्मात्पिन्वमानः पुण्यः।
यत्प्राङ्पिन्वते। तद्देवानाम्। यद्दक्षिणा। तत्पितॄणाम्॥⁷³॥

यत्प्रत्यक्। तन्मनुष्याणाम्। यदुदङ्। तद्द्रुवाणाम्। प्राश्चमुदञ्चं पिन्वयति। देवत्राकः।
अथो खलु। सर्वा अनु दिशः पिन्वयति। सर्वा दिशः समेधन्ते। अन्तःपरिधि
पिन्वयति॥⁷⁴॥

तेजसोऽस्कन्दाय। इषे पीपिहूर्जे पीपिहीत्याह। इषमेवोर्जं यजमाने दधाति।
यजमानाय पीपिहीत्याह। यजमानायैवैतामाशिषमाशास्ते। मह्यं ज्यैष्ठ्याय
पीपिहीत्याह। आत्मन एवैतामाशिषमाशास्ते। बिष्यै त्वा दुग्माय त्वेन्द्रियाय त्वा भूत्यै
त्वेत्याह। यथायजुरेवैतत्। धर्मासि सुधर्मा मै न्यस्मे ब्रह्माणि धारयेत्याह॥⁷⁵॥

ब्रह्मन्नेवेनं प्रतिष्ठापयति। नेत्वा वातः स्कन्दयादिति यद्यभिचरेत्। अमुष्य त्वा प्राणे
सादयाम्यमुना सह निरर्थं गच्छेति ब्रूयाद्यं द्विष्यात्। यमेव द्वेष्टि। तेनैनं सह
निरर्थं गमयति। पूष्णे शरसे स्वाहेत्याह। या एव देवता हुतभागाः। ताभ्य एवेनं
जुहोति। ग्रावभ्यः स्वाहेत्याह। या एवान्तरिक्षे वाचः॥⁷⁶॥

ताभ्य एवेनं जुहोति। प्रतिरेभ्यः स्वाहेत्याह। प्राणा वै देवाः प्रतिराः। तेभ्य एवेनं
जुहोति। द्वावापृथिवीभ्यां स्वाहेत्याह। द्वावापृथिवीभ्यामेवेनं जुहोति। पितृभ्यो

घर्मपेभ्यः स्वाहेत्याह। ये वै यज्वानः। ते पितरो घर्मपाः। तेभ्य एवैनं जुहोति॥⁷⁷॥

रुद्राय रुद्रहोत्रे स्वाहेत्याह। रुद्रमेव भागधेयेन समर्द्धयति। सर्वतः समनक्ति।
सर्वत एव रुद्रं निरवदयते। उदञ्चं निरस्यति। एषा वै रुद्रस्य दिक्। स्वायामेव
दिशि रुद्रं निरवदयते। अप उपस्पृशति मेध्यत्वाय। नान्वीक्षेत। यदन्वीक्षेत॥⁷⁸॥

चक्षुरस्य प्रमायुकः स्यात्। तस्मान्नान्वीक्ष्य। अपीपरो माऽहो रात्रियै मा पाह्येषा
ते अग्ने समित्तया समिध्यस्वायुर्मे दा वर्चसा माऽऽञ्जीरित्याह। आयुरेवास्मिन्वर्चो
दधाति। अपीपरो मा रात्रिया अहो मा पाह्येषा ते अग्ने समित्तया
समिध्यस्वाऽऽयुर्मे दा वर्चसा माऽऽञ्जीरित्याह। आयुरेवास्मिन्वर्चो दधाति।
अग्निर्ज्योतिर्ज्योतिरग्निः स्वाहा सूर्यो ज्योतिर्ज्योतिः सूर्यः स्वाहेत्याह।
यथायजुरेवैतत्। ब्रह्मवादिनो वदन्ति। होतव्यमग्निहोत्रा(3)न्न होतव्या(3)मिति॥⁷⁹॥

यद्यजुषा जुहुयात्। अयथापूर्वमाहुती जुहुयात्। यन्न जुहुयात्। अग्निः पराभवेत्।
भूः स्वाहेत्येव होतव्यम्। यथापूर्वमाहुती जुहोति। नाग्निः पराभवति। हुतः हविर्मधु
हविरित्याह। स्वदयत्येवैनम्। इन्द्रतमेऽग्नावित्याह॥⁸⁰॥

प्राणो वा इन्द्रतमोऽग्निः। प्राण एवैनमिन्द्रतमेऽग्नौ जुहोति। पिता नोऽसि मा मा
हिःसीरित्याहाहिःसाये। अश्याम ते देव घर्म मधुमतो वाजवतः पितुमत इत्याह।
आशिषमेवैतामाशास्ते। स्वधाविनोऽशीमहिं वा मा मा हिःसीरित्याहाहिःसाये।
तेजसा वा एते व्यृध्यन्ते। ये प्रवर्ग्येण चरन्ति। प्राश्नन्ति। तेज एवात्मन्दधते॥⁸¹॥

संवत्सरं न माः समश्नीयात्। न रामामुपेयात्। न मृन्मयेन पिबेत्। नास्य राम
उच्छिष्टं पिबेत्। तेज एव तत्संश्रयति। देवासुराः संयत्ता आसन्। ते देवा
विजयमुपयन्तः। विभ्राजि सौर्ये ब्रह्मसन्त्यदधत। यत्किं च दिवाकीर्त्यम्। तदेतेनैव
व्रतेनाङ्गोपायत्। तस्मादेतद्धतं चार्यम्। तेजसो गोपीथाय। तस्मादेतानि यजूंषि
विभ्राजः सौर्यस्येत्याहुः। स्वाहा वा सूर्यस्य रश्मिभ्य इति प्रातः सःसादयति। स्वाहा
वा नक्षत्रेभ्य इति सायम्। एता वा एतस्य देवताः। तभिरेवैनः समर्द्धयति॥⁸²॥

अकरश्चिनेत्याह प्रदिशो गच्छेत्याह पितृणामन्तःपरिधिं पिन्वयति धारयेत्याह वाचो घर्मपास्तेभ्य एवैनं जुहोत्यन्वीक्षेत होतव्या(3)मित्यग्नावित्याह

घर्म॑ या ते॑ दि॒वि शु॒गिति॑ ति॒स्र आहु॑तीर्जुहोति। छन्दो॑भिरे॒वास्यै॒भ्यो लो॒केभ्यः॑
शुच॑मव॑ यजते। इ॒यत्य॑ग्रे जुहोति। अथे॒यत्यथे॑यति। त्रय॑ इ॒मे लो॒काः। अनु॑
नोऽद्यानु॑मतिरित्या॒हानु॑मत्यै। दि॒वस्त्वा॑ पर॒स्पाया॒ इत्या॑ह। दि॒व ए॒वेमाँल्लो॒कान्दा॑धार।
ब्रह्म॑णस्त्वा पर॒स्पाया॒ इत्या॑ह॥⁸³

ए॒ष्वेव॑ लो॒केषु॑ प्र॒जा दा॑धार। प्रा॒णस्य॑ त्वा पर॒स्पाया॒ इत्या॑ह। प्र॒जास्त्रे॒व
प्रा॒णान्दा॑धार। शिरो॑ वा ए॒तद्य॒ज्ञस्य॑। यत्प्र॑वर्ग्यः। अ॒सौ खलु॑ वा आ॒दित्यः॑ प्र॑वर्ग्यः।
तं यद॑क्षिणा प्र॒त्यश्च॑मुद॒श्चमु॒द्वास॑यैत्। जि॒ह्वं य॒ज्ञस्य॑ शिरो॑ हरेत्। प्रा॒श्चमु॒द्वास॑यति।
पु॒रस्ता॑दे॒व य॒ज्ञस्य॑ शि॒रः प्र॑ति॒दधा॑ति॥⁸⁴

प्रा॒श्चमु॒द्वास॑यति। तस्मा॑द॒सावा॑दि॒त्यः पु॒रस्ता॑दुदेति। श॒फोप॑य॒मान्ध॒वित्रा॑णि धृ॒ष्टी
इत्य॑न्वव॑हरन्ति। सा॒त्मा॒नमे॒वैन॑ स॒तनुं॑ करोति। सा॒त्माऽमु॒ष्मिँल्लो॒के भ॑वति। य ए॒वं
वेद॑। औदु॑म्बराणि भवन्ति। ऊ॒र्वा उ॑दुम्ब॒रः। ऊ॒र्जमे॒वावरु॑न्धे। वर्त्म॑ना वा
अ॒न्वित्य॑॥⁸⁵

य॒ज्ञः रक्षा॑सि जिघा॑सन्ति। साम्ना॑ प्र॒स्तोता॑ऽन्ववैति। साम॑ वै र॒क्षोहा॑।
रक्ष॑सामप॑हत्यै। त्रि॒र्निध॑नमुपैति। त्रय॑ इ॒मे लो॒काः। ए॒भ्य ए॒व लो॒केभ्यो॑
रक्षा॑स्यप॑हन्ति। पु॒रुषः॑ पु॒रुषो॑ नि॒धन॑मुपैति। पु॒रुषः॑ पु॒रुषो॑ हि र॒क्षस्त्री॑।
रक्ष॑सामप॑हत्यै॥⁸⁶

यत्पृ॑थि॒व्यामु॒द्वास॑यैत्। पृ॒थि॒वीः शु॒चाऽर्प॑येत्। यद॑प्सु। अ॒पः शु॒चा॒र्पये॑त्। यदोष॑धीषु।
ओष॑धीः शु॒चाऽर्प॑येत्। यद्व॒नस्प॑तिषु। व॒नस्प॑तीञ्छु॒चा॒र्पये॑त्। हि॒रण्यं॑ नि॒धायो॒द्वास॑यति।
अ॒मृतं॑ वै हि॒रण्य॑म्॥⁸⁷

अ॒मृतं॑ ए॒वैनं॑ प्र॒तिष्ठा॑पयति। व॒ल्गुर॑सि शं॒ युधा॑या॒ इति॑ त्रिः प॑रिषि॒ञ्चन्य॑र्येति। त्रि॒वृद्वा
अ॒ग्निः। यावा॑ने॒वाग्निः॑। तस्य॑ शुच॑श्च॒ शम॑यति। त्रिः पुनः॑ प॒र्येति॑। षट्॒थ्सम्प॑दन्ते। षड्वा
ऋ॒तवः॑। ऋ॒तुभि॑रे॒वास्य॑ शुच॑श्च॒ शम॑यति। चतुः॑ स॒क्तिर्नाभि॑र्ऋ॒तस्ये॑त्या॒ह॥⁸⁸

इ॒यं वा ऋ॒तम्। तस्या॑ ए॒ष ए॒व नाभिः॑। यत् प्र॑वर्ग्यः। तस्मा॑दे॒वमा॑ह। स॒दो

वि॒श्वायु॑रि॒त्याह॑ । स॒दो ही॑यम् । अ॒प द्वे॑षो अ॒प ह॒र इ॒त्याह॑ भ्रातृ॑व्यापनु॒त्यै ।
घ॒र्मैत॑त्तेऽन्न॑मे॒तत्पु॑री॒षमि॑ति॒ द॒ध्ना म॑धुमि॒श्रेण॑ पू॒रय॑ति । ऊ॒र्ग्व अ॒न्नाद्यं॑ द॒धि ।
ऊ॒र्जैवैन॑म॒न्नाद्ये॑न॒ सम॑र्द्धयति ॥ ८९ ॥

अ॒न॑श्नायु॒को भ॑वति । य ए॒वं वे॑द । र॒न्तिर्ना॑मा॒सि दि॒व्यो ग॑न्ध॒र्व इ॒त्याह॑ ।
रू॒पमे॒वास्यै॑त॒न्महि॑मान॒ः र॒न्ति ब॑न्धुतां॒ व्याच॑ष्टे । स॒म॒हमा॑यु॒षा सं प्रा॑णेने॒त्याह॑ ।
आ॒शिष॑मे॒वैता॑माशा॒स्ते । व्य॑सौ योऽस्मा॒न्देष्टि॑ यं च॒ वयं॑ द्वि॒ष्म इ॒त्याह॑ । अ॒भि॒चा॒र
ए॒वास्यै॑षः । अ॒चि॒क्रद॑दृ॒षा ह॑रि॒रि॒त्याह॑ । वृ॒षा ह्ये॑षः ॥ ९० ॥

वृ॒षा ह॑रिः । म॒हान्मि॒त्रो न द॑र्श॒त इ॒त्याह॑ । स्तौ॒त्येवैन॑मे॒तत् । चि॒द॑सि
स॒मु॒द्रयो॑नि॒रि॒त्याह॑ । स्वा॒मेवैनं॑ योनिं॒ गम॑यति । नम॑स्ते अस्तु॒ मा मां
हि॒ःसी॑रि॒त्याहा॒हिःसा॑यै । वि॒श्वाव॑सु॒ः सोम॑ गन्ध॒र्वमि॒त्याह॑ । य॒दे॒वास्य॑
क्रि॒यमा॑णस्यान्त॒र्यन्ति॑ । त॒दे॒वास्यै॑तेना॒ प्या॑ययति । वि॒श्वाव॑सु॒रभि॑ तन्नो॒ गृ॒णा॒बि॒त्याह॑ ॥ ९१ ॥

पूर्व॑मे॒वोदि॑तम् । उ॒त्त॑रेणा॒भि गृ॑णाति । धि॒यो हि॒न्वा॒नो धि॒य इ॒न्नो अ॒व्या॒दि॒त्याह॑ ।
ऋ॒तूने॒वास्मै॑ क॒ल्प॑यति । प्रा॒ऽऽसां॑ गन्ध॒र्वो अ॒मृता॑नि वोच॒दि॒त्याह॑ । प्रा॒णा वा
अ॒मृताः॑ । प्रा॒णाने॒वास्मै॑ क॒ल्प॑यति । ए॒तच्च॑ दे॒व घ॑र्म दे॒वो दे॒वानु॑पा॒गा इ॒त्याह॑ । दे॒वो
ह्ये॑ष सं दे॒वानु॑पैति । इ॒दम॑हं म॒नु॒ष्यो म॒नु॒ष्या॒नि॒त्याह॑ ॥ ९२ ॥

म॒नु॒ष्यो हि॑ । ए॒ष स॒न्म॑नु॒ष्या॒नुपै॑ति । ई॒श्वरो॑ वै प्र॒व॒र्ग्यमु॒द्वास॑यन् । प्र॒जां
प॒शून्त्सो॑मपी॒थम॑नु॒द्वासः॑ सोमं पी॒थानु॑मेहि । स॒ह प्र॒जया॑ स॒ह रा॒यस्पो॑षेने॒त्याह॑ ।
प्र॒जामे॒व प॒शून्त्सो॑मपी॒थमा॑त्मन्ध॒त्ते । सु॒मि॒त्रा न आप॑ ओष॒धयः॑ स॒न्बि॒त्याह॑ ।
आ॒शिष॑मे॒वैता॑माशा॒स्ते । दु॒र्मि॒त्रास्त॑स्मै भू॒यासु॑र्योऽस्मा॒न्देष्टि॑ यं च॒ वयं॑ द्वि॒ष्म इ॒त्याह॑ ।
अ॒भि॒चा॒र ए॒वास्यै॑षः । प्र॒ वा ए॒षोऽस्मा॑ल्लो॒काच्च॑वते । यः प्र॒व॒र्ग्यमु॒द्वास॑यति । उ॒दु॒त्यं
चि॒त्रमि॑ति॒ सौरी॑भ्या॒मृग्भ्यां॑ पु॒नरे॒त्य गार्ह॑प॒त्ये जु॒होति॑ । अ॒यं वै लो॒को गार्ह॑प॒त्यः ।
अ॒स्मिन्ने॒व लो॒के प्र॑ति॒तिष्ठ॑ति । अ॒सौ खलु॑ वा आ॒दित्यः॑ सु॒व॒र्गो लो॒कः । यत्सौरी॑
भ॒वतः॑ । तेनै॒व सु॒व॒र्गालो॒कान्नै॑ति ॥ ९३ ॥

ब्रह्मणस्त्वा पर॒स्याया॑ इ॒त्याह॑ दधात्य॒न्वित्यं॑ रक्ष॒स्त्री रक्ष॑सा॒मप॑हत्ये॒ वै हि॑र॒ण्यमा॑हा॒र्द्धय॑ति ह्ये॒ष गृ॑णा॒बि॒त्याह॑ म॒नु॒ष्या॒नि॒त्याहा॑स्ये॒षोऽष्टौ॑ च॑ ॥ [९]

प्रजापतिं वै देवाः शुक्रं पयोऽदुहन्। तदेभ्यो न व्यभवत्। तदग्निर्व्यकरोत्। तानि शुक्रियाणि सामान्यभवन्। तेषां यो रसोऽत्यक्षरत्। तानि शुक्रयजूष्यभवन्। शुक्रियाणां वा एतानि शुक्रियाणि। सामपयसं वा एतयोरन्यत्। देवानामन्यत्पयः। यद्गोः पयः॥ ९४ ॥

तत्सामः पयः। यदजायै पयः। तद्देवानां पयः। तस्माद्यत्रैतैर्यजुर्भिश्चरन्ति। तत्पयसा चरन्ति। प्रजापतिमेव तत्पयसाऽन्नाद्येन समर्द्धयन्ति। एष ह द्वे साक्षात्प्रवर्ग्य भक्षयति। यस्यैवं विदुषः प्रवर्ग्यः प्रवृज्यते। उत्तरवेद्यामुद्वासयेत्तेजस्कामस्य। तेजो वा उत्तरवेदिः॥ ९५ ॥

तेजः प्रवर्ग्यः। तेजसैव तेजः समर्द्धयति। उत्तरवेद्यामुद्वासयेदन्नकामस्य। शिरो वा एतद्यज्ञस्य। यत्प्रवर्ग्यः। मुखमुत्तरवेदिः। शीर्ष्णैव मुखं सन्ध्यात्यन्नादाय। अन्नाद एव भवति। यत्र खलु वा एतमुद्वासितं वयांसि पर्यासते। परि वै तां समा प्रजा वयांस्यसते॥ ९६ ॥

तस्मादुत्तरवेद्यामेवोद्वासयेत्। प्रजानां गोपीथाय। पुरो वा पश्चाद्वोद्वासयेत्। पुरस्ताद्वा एतज्ज्योतिरुदेति। तत्पश्चान्निम्रोचति। स्वामेवैनं योनिमनूद्वासयति। अपां मध्य उद्वासयेत्। अपां वा एतन्मध्याज्ज्योतिरजायत। ज्योतिः प्रवर्ग्यः। स्वयैवैनं योनौ प्रतिष्ठापयति॥ ९७ ॥

यं द्विष्यात्। यत्र स स्यात्। तस्यां दिश्युद्वासयेत्। एष वा अग्निर्वैश्वानरः। यत्प्रवर्ग्यः। अग्निनैवैनं वैश्वानरेणाभि प्रवर्तयति। औदुम्बर्यां शाखायामुद्वासयेत्। ऊर्वा उदुम्बरः। अन्नं प्राणः। शुग्धर्मः॥ ९८ ॥

इदमहममुष्यामुष्यायणस्य शुचा प्राणमपि दहामीत्याह। शुचैवास्य प्राणमपि दहति। ताजगार्तिमाच्छति। यत्र दर्भा उपदीकसन्तताः स्युः। तदुद्वासयेद्वृष्टिकामस्य। एता वा अपामनूज्झावर्यो नाम। यद्दर्भाः। असौ खलु वा आदित्य इतो वृष्टिमुदीरयति। असावेवास्मा आदित्यो वृष्टिं नियच्छति। ता आपो नियता धन्वना यन्ति॥ ९९ ॥

प्रजापतिः सम्प्रियमाणः। सम्राट्सम्भृतः। घर्मः प्रवृक्तः। महावीर उद्भासितः। असौ खलु वावैष आदित्यः। यत्प्रवर्ग्यः। स एतानि नामान्यकुरुत। य एवं वेद। विदुरेन नाम्ना। ब्रह्मवादिनो वदन्ति॥¹⁰⁰॥

यो वै वसीयाःसं यथानाममुपचरति। पुण्यातिं वै स तस्मै कामयते। पुण्यातिमस्मै कामयन्ते। य एवं वेद। तस्मादेवं विद्वान्। घर्म इति दिवाऽऽचक्षीत। सम्राडिति नक्तम्। एते वा एतस्य प्रिये तनुवौ। एते अस्य प्रिये नामनी। प्रियैवेन तनुवा॥¹⁰¹॥

प्रियेण नाम्ना समर्द्धयति। कीर्तिरस्य पूर्वागच्छति जनतामायतः। गायत्री देवेभ्योऽपाक्रामत्। तां देवाः प्रवर्ग्येणैवानु व्यभवन्। प्रवर्ग्येणाप्नुवन्। यच्चतुर्विंशतिकृत्बः प्रवर्ग्यं प्रवृणक्ति। गायत्रीमेव तदनु विभवति। गायत्रीमाप्नोति। पूर्वाऽस्य जनं यतः कीर्तिर्गच्छति। वैश्वदेवः सःसन्नः॥¹⁰²॥

वसंवः प्रवृक्तः। सोमोऽभिकीर्यमाणः। आश्विनः पयस्यानीयमाने। मारुतः क्वथन्। पौष्ण उदन्तः। सारस्वतो विष्यन्दमानः। मैत्रः शरो गृहीतः। तेज उद्यतः। वायुर्हियमाणः। प्रजापतिर्हूयमानो वाग्धुतः॥¹⁰³॥

असौ खलु वावैष आदित्यः। यत्प्रवर्ग्यः। स एतानि नामान्यकुरुत। य एवं वेद। विदुरेन नाम्ना। ब्रह्मवादिनो वदन्ति। यन्मृन्मयमाहुतिं नाश्नुतेऽथ। कस्मादेषोऽश्नुत इति। वागेष इति ब्रूयात्। वाच्यैव वाचं दधाति॥¹⁰⁴॥

तस्मादश्नुते। प्रजापतिर्वा एष द्वादशधा विहितः। यत्प्रवर्ग्यः। यत्प्रागवकाशेभ्यः। तेन प्रजा असृजत। अवकाशैर्देवासुरानसृजत। यदूर्ध्वमवकाशेभ्यः। तेनान्नमसृजत। अन्नं प्रजापतिः। प्रजापतिर्वावैषः॥¹⁰⁵॥

वदन्ति तनुवा सःसन्नो हूयमानो वाग्धुतो दधात्येषः॥

[11]

सविता भूत्वा प्रथमेऽहन्मवृज्यते। तेन कामा एति। यद्वितीयेऽहन्मवृज्यते। अग्निर्भूत्वा देवानेति। यत्तृतीयेऽहन्मवृज्यते। वायुर्भूत्वा प्राणानेति। यच्चतुर्थेऽहन्मवृज्यते। आदित्यो भूत्वा रश्मीनेति। यत्पञ्चमेऽहन्मवृज्यते। चन्द्रमा

भू॒त्वा नक्ष॑त्राण्येति॥¹⁰⁶॥

यत्ष॑ष्ठेऽह॑न्प्रवृ॒ज्यते॑। ऋ॒तुर्भू॒त्वा सं॑वत्स॒रमे॑ति। यत्स॑प्तमेऽह॑न्प्रवृ॒ज्यते॑। धा॒ता भू॒त्वा
श॒क्व॑रीमेति। यद॑ष्टमेऽह॑न्प्रवृ॒ज्यते॑। बृ॒ह॒स्पति॑र्भू॒त्वा गा॑य॒त्रीमे॑ति। यन्न॑वमेऽह॑न्प्रवृ॒ज्यते॑।
मि॒त्रो भू॒त्वा त्रि॒वृते॑ इ॒माँल्लो॒काने॑ति। यद॑शमेऽह॑न्प्रवृ॒ज्यते॑। वरु॑णो भू॒त्वा
वि॒राज॑मेति॥¹⁰⁷॥

यदे॑काद॒शेऽह॑न्प्रवृ॒ज्यते॑। इन्द्रो॑ भू॒त्वा त्रि॒ष्टुभ॑मेति। यद्वा॑द॒शेऽह॑न्प्रवृ॒ज्यते॑। सोमो॑ भू॒त्वा
सु॒त्यामे॑ति। यत्पु॒रस्ता॑दुप॒सदा॑ प्रवृ॒ज्यते॑। तस्मा॑दितः परा॑ङ्मूँल्लो॒काऽस्तप॑न्नेति।
यदु॒परि॑ष्टादुप॒सदा॑ प्रवृ॒ज्यते॑। तस्मा॑द॒मुतो॒र्वाङ्मि॑माँल्लो॒काऽस्तप॑न्नेति। य ए॒वं वेद॑।
ऐ॒व त॑पति॥¹⁰⁸॥

नक्षत्राण्येति विराजमेति तपति॥

[12]

ॐ शं न॒स्तन्नो॒ मा हा॑सीत्॥ ॐ शान्तिः॒ शान्तिः॒ शान्तिः॑॥

॥षष्ठः प्रश्नः॥

ॐ सन्त्वा सिद्धामि यजुषां प्रजामायुर्धनं च॥ ॐ शान्तिः शान्तिः शान्तिः॥

परेयुवांसं प्रवतो महीरनु बहुभ्यः पन्थामनपस्पशानम्। वैवस्वतः सङ्गमनं
जनानां यमः राजानः हविषा दुवस्यत। इदं त्वा वस्त्रं प्रथमन्वागन्नपैतदूह
यदिहाविभः पुरा। इष्टापूर्तमनु सम्पश्य दक्षिणां यथा ते दत्तं बहुधा विबन्धुषु। इमौ
युनज्मि ते वही अस्मनीथाय वोढवै। याभ्यां यमस्य सादनः सुकृतां चापि
गच्छतात्। पूषा त्वेतश्चावयतु प्रविद्वाननष्टपशुर्भुवनस्य गोपाः। स त्वैतेभ्यः
परिददात्पितृभ्योऽग्निर्देवेभ्यः सुविदत्रैभ्यः। पूषेमा आशा अनुवेद सर्वाः सो अस्माः
अभयतमेन नेषत्। स्वस्तिदा अघृणिः सर्ववीरोऽप्रयुच्छन्पुर एतु प्रविद्वान्॥₁॥

आयुर्विश्वायुः परिपासति त्वा पूषा त्वा पातु प्रपथे पुरस्तात्। यत्रासते सुकृतो यत्र
ते ययुस्तत्र त्वा देवः सविता दधातु। भुवनस्य पत इदः हविः। अग्नये रयिमते
स्वाहा। पुरुषस्य सयावर्यपेदधानि मृज्महे। यथा नो अत्र नापरः पुरा जरस
आयति। पुरुषस्य सयावरि वि तै प्राणमसि स्रसम्। शरीरेण महीमिहि स्वधयेहि
पितृनुपं प्रजयाऽस्मानिहावह। मैवं माः स्ता प्रियेऽहं देवी सती पितृलोकं यदैषि।
विश्ववारा नभसा संव्ययन्त्युभौ नो लोकौ पयसाऽभ्याववृत्स्व॥₂॥

इयं नारी पतिलोकं वृणाना निपद्यत उप त्वा मर्त्यं प्रेतम्। विश्वं पुराणमनु
पालयन्ती तस्यै प्रजां द्रविणं चेह धेहि। उदीर्ष्व नार्यभि
जीवलोकमितासुमेतमुपशेष एहि। हस्तग्राभस्य दिधिषोस्त्वमेतत्पत्युर्जनिब्रमभि
सम्बभूव। सुवर्णः हस्तादाददाना मृतस्य श्रिये ब्रह्मणे तेजसे बलाय। अत्रैव
ब्रमिह वयः सुशेवा विश्वाः स्पृधो अभिमातीर्जयेम। धनुरहस्तादाददाना मृतस्य
श्रिये क्षत्रायौजसे बलाय। अत्रैव ब्रमिह वयः सुशेवा विश्वाः स्पृधो
अभिमातीर्जयेम। मणिः हस्तादाददाना मृतस्य श्रिये विशे पुष्ट्यै बलाय। अत्रैव
ब्रमिह वयः सुशेवा विश्वाः स्पृधो अभिमातीर्जयेम॥₃॥

इ॒मम॑ग्ने च॒मसं॑ मा वि॒र्जी॑ह्वरः प्रि॒यो दे॒वाना॑मु॒त सो॒म्याना॑म्। ए॒ष यश्च॑म॒सो
 दे॒वपा॑नस्तस्मि॑न्दे॒वा अ॒मृता॑ मा॒दय॑न्ताम्। अ॒ग्नेर्व॑र्म परि गोभि॑र्व्ययस्व सं प्रो॑र्णुष्व
 मे॒देसा॑ पी॒वसा॑ च। ने॒त्वा धृ॑ष्णु॒रहर॑सा ज॒र्ह॑षाणो दध॑द्विध॒क्ष्यन्प॑र्य॒ङ्क्ष्या॑तै। मै॒नम॑ग्ने
 वि॒द॒हो माऽभि॑शो॒चो माऽस्य॑ ब॒चं चि॑क्षिपो मा शरी॑रम्। यदा श्रु॑तं करवो
 जा॒तवे॒दोऽथे॑मे॒नं प्र॑हिणु॒तात्पि॑तृभ्यः। श्रु॑तं यदा क॒रसि॑ जा॒तवे॒दोऽथे॑मे॒नं
 परि॑दत्तात्पि॒तृभ्यः। यदा ग॑च्छा॒त्यसु॑नीतिमे॒ताम॑था दे॒वाना॑ व॒शनी॑र्भवाति। सूर्य॑ ते
 चक्षु॑र्गच्छतु वा॒तमा॑त्मा द्वां च गच्छ॑ पृथि॒वीं च ध॑र्मणा। अपो वा गच्छ॑ यदि तत्र
 ते हि॒तमोष॑धीषु प्र॒ति॒ति॒ष्ठा शरी॑रैः। अ॒जो भा॒गस्त॑पसा तं त॑पस्व तं ते शो॒चिस्त॑पतु
 तं ते अ॒र्चिः। यास्ते॑ शि॒वास्त॑नुवो जा॒तवे॒दस्ता॑भिर्वहे॒म॒ सु॒कृता॑ यत्र लो॒काः। अयं
 वै ब॒मस्मा॑दधि ब॒मेत॑दयं वै तद॑स्य यो॒नि॒रसि॑। वैश्वा॒नरः पु॒त्रः पि॒त्रे लो॒ककृ॑ञ्जा॒तवे॒दो
 वहे॑म॒ सु॒कृता॑ यत्र लो॒काः॥४॥

विद्वानभ्याववृत्त्वाभिमांतीर्जयेम शरीरैश्चत्वारि च॥

[1]

य ए॒तस्य॑ पथो गो॒प्तार॑स्तेभ्यः स्वाहा॒ य ए॒तस्य॑ पथो र॒क्षितार॑स्तेभ्यः स्वाहा॒ य
 ए॒तस्य॑ पथोभि॒र॒क्षितार॑स्तेभ्यः स्वाहा॑ऽऽख्या॒त्रे स्वाहा॑ऽपा॒ख्या॒त्रे स्वाहा॑ऽभिला॒लप॑ते
 स्वाहा॑ऽप॒लाल॑पते स्वाहा॑ऽग्नये॒ कर्म॑कृ॒ते स्वाहा॑ यमत्र नाधी॒मस्त॑स्मै स्वाहा॑। यस्तं
 इ॒ध्मं ज॒भर॑त्सिष्वि॒दानो मूर्धा॑नं वा॒त त॑पते ब्रा॒या। दि॒वो वि॒श्वस्मा॑त्सीम॒घाय॑त
 उ॒रुष्यः। अ॒स्मात्त्व॑मधि जा॒तोऽसि॑ ब॒दयं॑ जा॒यता॑ पुनः। अ॒ग्नये॑ वैश्वा॒नरा॑य सु॒वर्गा॑य
 लो॒काय॑ स्वाहा॑॥५॥

य ए॒तस्य॑ ब॒त्पथं॥

[2]

प्र के॒तुना॑ बृ॒हता॑ भा॒त्यग्नि॑रा॒विर्वि॑श्वानि वृष॒भो रो॑रवीति। दि॒वश्चि॑दन्ता॒दुप॑
 मा॒मु॒दान॑ड॒पामु॑प॒स्थे म॑हिषो व॒वर्ध॑। इ॒दं त॒ एकं॑ प॒र ऊ॑त॒ एकं॑ तृतीये॒न ज्योति॑षा
 संवि॑शस्व। सं॒वेश॑नस्त॒नुवै चा॑रु॒रेधि॑ प्रि॒यो दे॒वाना॑ प॒रमे॑ स॒धस्थे॑। नाके॑ सु॒पर्ण॑मु॒प॒
 यत्प॑त॒न्त॒ हृ॒दा वे॑न॒न्तो अ॒भ्यच॑क्षत ब्रा। हि॒र॒ण्य॑पक्षं वरु॒णस्य॑ दू॒तं य॑मस्य॒ योनौ॑
 शकु॑नं भु॒र॒ण्यु॒म्। अ॒ति॒द्रव॑ सार॒मेयो॑ श्वानौ चतु॒रक्षौ॑ श॒बलौ॑ सा॒धुना॑ पथा। अथा॑
 पि॒तृन्सु॑वि॒दत्रा॑ अ॒पी॒हि य॒मेन॑ ये स॒धमा॑दं म॒दन्ति॑। यो ते श्वानौ॑ यम॒रक्षि॑तारौ

चतुरक्षौ पथिरक्षौ नृचक्षसा। ताभ्यां राजन्यरि देहो नः स्वस्ति चास्मा अनमीवं च धेहि॥६॥

उरुणसावसुतृपावुलुम्बलौ यमस्य दूतौ चरतो वशां अनु। तावस्मभ्यं दृशये सूर्याय पुनर्दत्ता वसुमदोह भद्रम्। सोम एकेभ्यः पवते घृतमेक उपासते। येभ्यो मधु प्रधावति तांश्चिदेवापि गच्छतात्। ये युध्यन्ते प्रधनेषु शूरांसो ये तनुत्यजः। ये वा सहस्रदक्षिणास्तांश्चिदेवापि गच्छतात्। तपसा ये अनाधृष्यास्तपसा ये सुवर्गताः। तपो ये चक्रिरे महत्तांश्चिदेवापि गच्छतात्। अश्वमन्वती रेवतीः सः रभध्वमुत्तिष्ठत प्रतरता सखायः। अत्रा जहाम ये असन्नशेवाः शिवान् वयमभि वाजानुत्तरेम॥७॥

यद्वै देवस्य सवितुः पवित्रं सहस्रधारं विततमन्तरिक्षे। येनापुनादिन्द्रमनार्तमात्यै तेनाहं मां सर्वतनुं पुनामि। या राष्ट्रात्यन्नादप यन्ति शाखा अभिमृता नृपतिमिच्छमानाः। धातुस्ताः सर्वाः पवनेन पूताः प्रजयास्मान्नय्या वर्चसा सः सृजाथ। उद्वयं तमसस्परि पश्यन्तो ज्योतिरुत्तरम्। देवं देवत्रा सूर्यमगन्म ज्योतिरुत्तमम्। धाता पुनातु सविता पुनातु। अग्नेस्तेजसा सूर्यस्य वर्चसा॥८॥

धेह्युत्तरेमाष्टौ च॥

[३]

यन्ते अग्निममन्थाम वृषभायेव पक्तवे। इमन्तं शमयामसि क्षीरेण चोदकेन च। यन्त्वमग्ने समदहस्त्वमु निर्वापया पुनः। क्याम्बूरत्र जायतां पाकदूर्वा व्यल्कशा। शीतिके शीतिकावति ह्लादुके ह्लादुकावति। मण्डूक्या सुसङ्गमयेमः स्वग्निः शमय। शं ते धन्वन्या आपः शमु ते सन्वनूक्याः। शं ते समुद्रिया आपः शमु ते सन्तु वर्ष्याः। शं ते स्रवन्तीस्तनुवे शमु ते सन्तु कूप्याः। शन्ते नीहारो वर्षतु शमु पृष्ठाऽवशीयताम्॥९॥

अवं सृज पुनरग्ने पितृभ्यो यस्त आहुतश्चरति स्वधाभिः। आयुर्वसान् उप यातु शेषः सङ्गच्छतां तनुवा जातवेदः। सङ्गच्छस्व पितृभिः सः स्वधाभिः समिष्टापूर्तेन परमे व्योमन्। यत्र भूम्यै वृणसे तत्र गच्छ तत्र त्वा देवः सविता दधातु। यत्ते कृष्णः शकुन आतुतोद पिपीलः सर्प उत वा श्वापदः। अग्निष्टद्विश्वादनृणं कृणोतु

सोमंश्च यो ब्राह्मणमाविवेश। उत्तिष्ठतस्तनुव॑ सम्भर॑स्व मेह गात्रमव॑हा मा
 शरीर॑म्। यत्र भूम्यै॑ वृणसे॒ तत्र गच्छ॑ तत्र त्वा देवः स॒विता द॑धातु। इदं॑ त॒ एकं
 पर॑ ऊ॒त एकं॑ तृतीये॒न ज्योति॑षा संवि॒शस्व। संवेश॑नस्तनुवे॒ चारु॑रेधि प्रियो देवानां
 पर॑मे स॒धस्थे॑। उत्तिष्ठ॑ प्रेहि प्र॒द्रवौकः॑ कृणुष्व॒ पर॑मे व्योम॑न्। यमे॒न त्वं य॑म्या
 संवि॒दानो॒त्तमं॑ नाकम॒धि रो॒हेम॑म्। अ॒श्मन्व॑ती रेवतीर्य॒द्वे देव॑स्य॒ सवि॑तुः प॒वित्रं॑ या
 रा॒ष्ट्रात्प॒न्नादु॒द्वयं॑ तमे॒सस्परि॑ धा॒ता पु॑नातु। अ॒स्मात्त्वम॑धि जा॒तोऽस्य॑यं
 त्वद॑धिजायताम्। अ॒ग्नये॑ वैश्वान॒राय॑ सुव॒र्गाय॑ लो॒काय॑ स्वाहा॑॥¹⁰॥

अवशीयता॑ स॒धस्थे॑ प॒ञ्च च॑॥

[4]

आया॑तु देवः सुमना॑भिरू॒तिभि॑र्यमो ह॒वेह॑ प्रय॑ताभिर॒क्ता। आसी॑दता॑ सुप्र॒यते॑ह
 ब॒र्हिष्यू॒र्जाय॑ जा॒त्यै मम॑ शत्रु॒हत्यै॑। यमे॒ इव॑ यत॑माने यदै॒तं प्रवा॑म्भर॒न्मानु॑षा
 देव॑यन्तः। आसी॑दत॒ः स्व॑मु॒ लोकं॑ वि॒दाने॑ स्वा॒स॒स्थे भ॑वतमि॒न्द॒वे नः॑। यमा॑य सोमः॑
 सु॒नुत॑ यमा॑य जुहु॒ता ह॒विः। यमः॑ ह॒ यज्ञो॑ गच्छ॒त्यग्नि॑दू॒तो अ॑र॒ङ्कतः॑। यमा॑य
 घृ॒तव॑द्ध॒विर्जु॑होत॒ प्र च॑ तिष्ठत। स नो॑ दे॒वेष्वाय॑मदी॒र्घमा॑युः प्र जी॒वसे॑। यमा॑य
 मधु॑म॒त्तमः॑ रा॒ज्ञे ह॒व्यं जु॑होतन। इदं॑ नम॒ ऋषि॑भ्यः पूर्॒वजे॑भ्यः पूर्॒वैभ्यः॑
 प॒थिकृ॑द्भ्यः॥¹¹॥

योऽस्य॑ कौ॒ष्ठ्य जग॑तः पार्थि॒वस्यै॑कं इ॒द्वशी॑। यमं॑ भ॒ङ्ग्यश्र॑वो गा॒य यो
 राजा॑न॒परो॒ध्यः। यम॑ङ्गाय॒ भङ्ग्यश्र॑वो यो राजा॑न॒परो॒ध्यः। येना॒पो न॒दो ध॑न्वा॒नि येन॑
 द्यौः पृ॒थि॒वी दृ॒ढा। हि॒र॒ण्यक॑क्ष्यान् सु॒धुरान्॑ हि॒र॒ण्य॒क्षान॑यः श॒फान्। अ॒श्वान॑न॒श्यतो॑
 दा॒नं य॒मो रा॑जाभि॒ तिष्ठ॑ति। य॒मो दा॑धार पृथि॒वीं य॒मो वि॒श्वमि॑दं जग॑त्। यमा॑य
 स॒र्वमि॑त्र॒स्थे यत् प्रा॑ण॒द्वायु॑रक्षि॒तम्। यथा॑ प॒ञ्च यथा॑ षड॒था प॒ञ्च द॒शर्ष॑यः। यमं॑ यो
 वि॒द्यात्स ब्रू॑याद्यथै॒क ऋषि॑र्विजान॒ते॥¹²॥

त्रि॒क॒द्रुके॑भिः प॒त॒ति षडु॑र्वी॒रक॑मिद्ध॒हत्। गा॒यत्री त्रि॑ष्टु॒प्छन्दा॑सि सर्वा॒ ता य॒म
 आ॑हि॒ता। अ॒हर॑ह॒र्नय॑मानो॒ गाम॑श्च॒ पुरु॑षं जग॑त्। वैव॑स्वतो॒ न तृ॑प्यति
 प॒ञ्चभि॑र्मान॒वैर्य॑मः। वैव॑स्वते वि॒विच्य॑न्ते यमे॒ राज॑नि ते ज॒नाः। ये चे॒ह स॒त्येने॑च्छन्ते
 य उ॒ चानृ॑तवादि॒नः। ते रा॑ज॒न्निह॑ वि॒विच्य॑न्तेऽथा य॑न्ति त्वा॒मुपा॑। दे॒वाश्च॑ ये

नमस्यन्ति ब्राह्मणाःश्चापचित्यति। यस्मिन्वृक्षे सुपलाशे देवैः सम्पिबते यमः। अत्रा
नो विश्वपतिः पिता पुराणा अनुवेनति॥¹³॥

पृथिव्यां विजानतेऽनु वेनति॥

[5]

वैश्वानरे हविरिदं जुहोमि साहस्रमुत्सं शतधारमेतम्। तस्मिन्नेष पितरं पितामहं
प्रपितामहं बिभरत्पिन्वमाने। द्रप्सश्चस्कन्द पृथिवीमनु द्यामिमं च योनिमनु यश्च
पूर्वः। तृतीयं योनिमनु सध्वरन्तं द्रप्सं जुहोम्यनु सप्त होत्राः। इमं समुद्रं
शतधारमुत्संव्यच्यमानं भुवनस्य मध्ये। घृतं दुहानामदितिं जनायाग्रे मा हिंसीः
परमे व्योमन्। अपेत वीत वि च सर्पतातो येऽत्र स्थ पुराणा ये च नूतनाः।
अहोभिरद्भिरक्तुभिर्व्यक्तं यमो ददात्ववसानमस्मै। सवितैतानि शरीराणि पृथिव्यै
मातुरुपस्थ आदधे। तेभिर्युज्यन्तामघ्नियाः॥¹⁴॥

शुनं वाहाः शुनं नाराः शुनं कृषतु लाङ्गलम्। शुनं वरत्रा बध्यन्तां
शुनमष्टामुदिङ्गय शुनासीरा शुनमस्मासु धत्तम्। शुनासीराविमां वाचं यद्विवि
चक्रथुः पयः। तेनेमामुप सिध्वतम्। सीते वन्दामहे त्वाऽर्वाची सुभगे भव। यथा नः
सुभगा संसि यथा नः सुफला संसि। सवितैतानि शरीराणि पृथिव्यै मातुरुपस्थ
आदधे। तेभिरदिते शं भव। विमुच्यध्वमघ्निया देवयाना अतारिष्म तमसस्पा रमस्य।
ज्योतिरापाम सुवरगन्म॥¹⁵॥

प्र वाता वान्ति पतयन्ति विद्युत् उदोषधीर्जिहते पिन्वते सुवः। इरा विश्वस्मै भुवनाय
जायते यत्पर्जन्यः पृथिवीं रेतसाऽवति। यथा यमाय हार्म्यमवपन्ध्व मानवाः।
एवं वपामि हार्म्यं यथासाम जीवलोके भूरयः। चितः स्थ परिचित ऊर्ध्वचितः
श्रयध्वं पितरो देवता। प्रजापतिर्वः सादयतु तया देवतया। आप्यायस्व सन्तैः॥¹⁶॥

अघ्निया अंगन्म सप्त च॥

[6]

उत्तै तन्नोमि पृथिवीं त्वत्परीमं लोकं निदधन्मो अहं रिषम्। एतां स्थूणां पितरो
धारयन्तु तेऽत्रा यमः सादनात्ते मिनोतु। उपसर्प मातरं भूमिमेतामुरुव्यचंसं
पृथिवीं सुशेवाम्। ऊर्णम्रदा युवतिर्दक्षिणावत्येषा त्वा पातु निर्ऋत्या उपस्थै।
उद्धाश्चस्व पृथिवि मा विबाधिथाः सूपायनास्मै भव सूपवध्वना। माता पुत्रं

यथासिचाभ्येनं भूमि वृणु। उद्ध्वमाना पृथिवी हि तिष्ठसि सहस्रं मित उप हि
 श्रयन्ताम्। ते गृहासो मधुश्रुतो विश्वाहास्मे शरणाः सन्वत्रा। एणीर्धाना हरिणीरर्जुनीः
 सन्तु धेनवः। तिलवत्सा ऊर्जमस्मे दुहाना विश्वाहा सन्वनपस्फुरन्तीः॥¹⁷॥

एषा ते यमसादने स्वधा निधीयते गृहे। अक्षितिर्नाम ते असौ। इदं पितृभ्यः
 प्रभरेम बर्हिर्देवेभ्यो जीवन्त उत्तरं भरेम। तत्त्वमारोहासो मेघ्यो भवं यमेन त्वं
 यम्यां संविदानः। मा त्वा वृक्षौ सम्बाधिष्टां मा माता पृथिवि त्वम्। पितृन् हि यत्र
 गच्छास्येधांसं यमराज्ये। मा त्वा वृक्षौ सम्बाधेथां मा माता पृथिवी मही।
 वैवस्वतः हि गच्छासि यमराज्ये विराजसि। नळं प्लवमारोहैतं नळेन
 पथोऽन्विहि। स त्वं नळप्लवो भूत्वा सन्तर प्रतरोत्तर॥¹⁸॥

सवितैतानि शरीराणि पृथिव्यै मातुरुपस्थ आदधे। तेभ्यः पृथिवि शं भव। षड्रौता
 सूर्यं ते चक्षुर्गच्छतु वातमात्मा द्वां च गच्छ पृथिवीं च धर्मणा। अपो वां गच्छ यदि
 तत्र ते हितमोषधीषु प्रतितिष्ठा शरीरैः। परं मृत्यो अनुपरेहि पन्थां यस्ते स्व इतरो
 देवयानात्। चक्षुष्मते शृण्वते ते ब्रवीमि मा नः प्रजाः रीरिषो मोत वीरान्। शं
 वातः शः हि ते घृणिः शम्भु ते सन्वोषधीः। कल्पन्तां मे दिशः शग्माः। पृथिव्यास्त्वा
 लोके सादयाम्यमुष्य शर्मासि पितरो देवता। प्रजापतिस्त्वा सादयतु तया देवतया।
 अन्तरिक्षस्य त्वा दिवस्त्वा दिशां त्वा नाकस्य त्वा पृष्ठे ब्रध्नस्य त्वा विष्टपे
 सादयाम्यमुष्य शर्मासि पितरो देवता। प्रजापतिस्त्वा सादयतु तया देवतया॥¹⁹॥

अपूपवाञ्छृतवाञ्छरुरेह सीदतूत्तभ्रुवन् पृथिवीं द्यामुतोपरि। योनिःकृतः पथिकृतः
 सपर्यत ये देवानां घृतभागा इह स्थ। एषा ते यमसादने स्वधा निधीयते
 गृहेऽसौ। दशाक्षरा तां रक्षस्व तां गोपायस्व तां ते परिददामि तस्यां त्वा मा
 दभन्पितरो देवता। प्रजापतिस्त्वा सादयतु तया देवतया। अपूपवाञ्छृतवान्
 क्षीरवान्दधिवान्मधुमाञ्छरुरेह सीदतूत्तभ्रुवन् पृथिवीं द्यामुतोपरि। योनिःकृतः
 पथिकृतः सपर्यत ये देवानां शृतभागाः क्षीरभागा दधिभागा मधुभागा इह स्थ।
 एषा ते यमसादने स्वधा निधीयते गृहेऽसौ। शताक्षरा

सहस्राक्षरायुताक्षराऽच्युताक्षरा तां रक्षस्व तां गोपायस्व तां ते परिददामि तस्यां
त्वा मा दभन्पितरो देवता। प्रजापतिस्त्वा सादयतु तया देवतया॥²⁰

अनपस्फुरन्तीरुत्तर देवतया द्वे च॥

[7]

एतास्ते स्वधा अमृताः करोमि यास्ते धानाः परिकिराम्यत्र। तास्ते यमः पितृभिः
संविदानोऽत्र धेनूः कामदुघाः करोतु। त्वामर्जुनौषधीनां पयो ब्रह्माण इद्विदुः। तासां
त्वा मध्यादादे चरुभ्यो अपिधातवे। दूर्वाणां स्तम्बमाहरतां प्रियतमां मम। इमां
दिशं मनुष्याणां भूयिष्ठानु वि रोहतु। काशानां स्तम्बमाहर रक्षसामपहत्ये। य
एतस्यै दिशः पराभवन्नघायवो यथा तेनाभवान्पुनः। दर्भाणां स्तम्बमाहर
पितृणामौषधीं प्रियाम्। अन्वस्ये मूलं जीवादनु काण्डमथो फलम्॥²¹

लोकं पृण ता अस्य सूददोहसः। शं वातः शं हि ते घृणिः शमु ते सन्त्रोषधीः।
कल्पन्तां ते दिशः सर्वाः। इदमेव मेतोऽपरामार्तिमाराम काश्चन। तथा तदश्विभ्यां
कृतं मित्रेण वरुणेन च। वरणो वारयादिदं देवो वनस्पतिः। आर्त्ये निर्ऋत्ये द्वेषाच्च
वनस्पतिः। विधृतिरसि विधारयास्मदघा द्वेषांसि शमि शमयास्मदघा द्वेषांसि यव
यवयास्मदघा द्वेषांसि। पृथिवीं गच्छान्तरिक्षं गच्छ दिवं गच्छ दिशो गच्छ
सुवर्गच्छ सुवर्गच्छ दिशो गच्छ दिवं गच्छान्तरिक्षं गच्छ पृथिवीं गच्छाऽऽपो वा
गच्छ यदि तत्र ते हितमौषधीषु प्रतितिष्ठा शरीरैः। अश्वन्वती रेवतीर्यद्वे देवस्य
सवितुः पवित्रं या राष्ट्रात्पन्नादुद्वयं तमसस्परि धाता पुनातु॥²²

फलं पुनातु॥

[8]

आ रोहताऽऽयुर्जरसं गृणाना अनुपूर्वं यतमाना यतिष्ट। इह त्वष्टां सुजनिमा
सुरत्नो दीर्घमायुः करतु जीवसे वः। यथाऽहान्यनुपूर्वं भवन्ति यथर्तव ऋतुभिर्यन्ति
क्लृप्ताः। यथा न पूर्वमपरो जहात्येवा धातरायूषि कल्पयैषाम्। न हि ते अग्ने
तनुवै क्रूरं चकार मर्त्यः। कपिर्बभस्ति तेजनं पुनर्जरायु गौरिव। अपं नः
शोशुचदधमग्ने शुशुध्या रयिम्। अपं नः शोशुचदधं मृत्यवे स्वाहा।
अनङ्वाहमन्वारभामहे स्वस्त्यै। स न इन्द्र इव देवेभ्यो वह्निः सम्पारणो भव॥²³

इ॒मे जी॒वा वि॑ मृ॒तैराव॑वर्ति॒न्नभू॒द्भद्रा॑ दे॒वहू॑तिं नो अ॒द्या। प्रा॒ञ्जो॒गामा॑नृ॒तये॑ ह॒साय॑
 द्रा॒घीय॑ आ॒युः प्र॒तरां॑ द॒धानाः॑। मृ॒त्योः प॒दं यो॒पय॑न्तो॒ यदै॑म॒ द्रा॒घीय॑ आ॒युः प्र॒तरां॑
 द॒धानाः॑। आ॒प्याय॑मानाः प्र॒जया॑ ध॒नेन॑ शु॒द्धाः पू॒ता भ॑वथ य॒ज्ञिया॑सः। इ॒मं जी॒वेभ्यः॑
 परि॒धिं द॑धामि॒ मा नोऽनु॑गा॒दप॑रो अ॒र्धमे॒तम्। श॒तं जी॑वन्तु श॒रदः॑ पु॒रूची॑स्ति॒रो
 मृ॒त्युं द॑द्महे प॒र्वते॑न। इ॒मा ना॒रीर॑वि॒धवाः॑ सु॒पत्नी॑रा॒ञ्जने॑न स॒र्पिषा॑ स॒मृश॑न्ताम्।
 अ॒नश्र॑वो॒ अन॑मी॒वाः सु॒शेवा॑ आ॒रोह॑न्तु॒ जन॑यो॒ योनि॑म॒ग्रैः। यदा॑ञ्जनं त्रै॒ककु॑दं जा॒तः
 हि॒मव॑त॒स्परि॑। तेना॒मृत॑स्य॒ मूले॒नारा॑ती॒र्जम्भ॑याम॒सि। यथा॑ ब्र॒ह्मु॒द्भि॒नत्स्यो॑ष॒धे पृ॑थि॒व्या
 अ॒धि। ए॒वमि॒म उ॒द्भि॒न्दन्तु॑ की॒र्त्या यश॑सा ब्र॒ह्मव॑र्च॒सेन॑। अ॒जोऽस्य॑जा॒स्मद॒घा
 द्वे॒षाःसि॑ य॒वोऽसि॑ य॒वया॑स्मद॒घा द्वे॒षाःसि॑॥ 24 ॥

भव जम्भयामसि त्रीणि च॥

[9]

अ॒पं नः॑ शो॒शुच॑द॒घम॒ग्रे शु॒शु॒ध्या र॒यिम्। अ॒पं नः॑ शो॒शुच॑द॒घम्। सु॒क्षेत्रि॑या सु॒गातु॑या
 व॒सूया॑ च॒ यजा॑महे। अ॒पं नः॑ शो॒शुच॑द॒घम्। प्र॒यद्भि॑ष्ट ए॒षां प्रा॑स्मा॒कांस॑श्च॒ सूर॑यः।
 अ॒पं नः॑ शो॒शुच॑द॒घम्। प्र॒यद॒ग्रेः स॒हस्र॑तो वि॒श्वतो॑ य॒न्ति सूर॑यः। अ॒पं नः॑
 शो॒शुच॑द॒घम्। प्र॒यत्ते॑ अ॒ग्रे सूर॑यो जा॒येम॒हि प्र॑ ते॒ वय॑म्। अ॒पं नः॑ शो॒शुच॑द॒घम्॥ 25 ॥

ब्र॒ह्म हि॑ वि॒श्वतो॑मुख॒ विश्व॑तः॒ परि॑भूर॒सि। अ॒पं नः॑ शो॒शुच॑द॒घम्। द्वि॒षो नो॑
 वि॒श्वतो॑मु॒खाऽति॑ ना॒वेव॑ पा॒रया॑। अ॒पं नः॑ शो॒शुच॑द॒घम्। स॒ नः॑ सि॒न्धुमि॑व ना॒वया॑ति
 पर्षा॑ स्व॒स्तये॑। अ॒पं नः॑ शो॒शुच॑द॒घम्। आ॒पः प्र॑व॒णादि॑व॒ यती॑रपा॒स्मत्स्य॑न्दता॒मघ॑म्।
 अ॒पं नः॑ शो॒शुच॑द॒घम्। उ॒द्वना॑दु॒दका॑नी॒वापा॑स्मत्स्य॑न्दता॒मघ॑म्। अ॒पं नः॑ शो॒शुच॑द॒घम्।
 आ॒नन्दा॑य॒ प्रमो॑दाय॒ पुन॑रागा॒ः स्वान्मृ॑हान्। अ॒पं नः॑ शो॒शुच॑द॒घम्। न॒ वै तत्र॑
 प्र॒मीय॑ते॒ गौर॑श्च॒ पुरु॑षः प॒शुः। यत्रे॒दं ब्र॒ह्म क्रि॑यते॒ परि॑धि॒र्जीव॑नाय॒कम॑पं नः॑
 शो॒शुच॑द॒घम्॥ 26 ॥

अघमघं चत्वारि च॥

[10]

अ॒पंश्या॑म॒ युव॑तिमा॒चर॑न्तीं मृ॒ताय॑ जी॒वां परि॑णी॒यमा॑नाम्। अ॒न्धेन॑ या तम॑सा
 प्रावृ॑ताऽसि प्रा॒चीम॑वा॒चीम॑वयन्नरि॒ष्टैः। म॒येतां॑ मा॒ःस्तां॑ भ्रि॒यमा॑णा दे॒वी सती॑
 पि॒तृलो॒कं यदै॑षि। वि॒श्ववा॑रा॒ नभ॑सा॒ संव्य॑यन्त्यु॒भौ नो॑ लो॒कौ प॒यसा॑ऽऽवृणीहि।

रयि॑ष्ठाम॒ग्निं मधु॑मन्त॒मूर्मि॑ण॒मूर्जः॑ सन्तं त्वा॒ पय॑सोप॒ सꣳस॑देम। सꣳ र॒य्या समु॑
वर्च॑सा सच॑स्वा नः स्व॒स्तये॑। ये जी॒वा ये च॑ मृ॒ता ये जा॒ता ये च॑ जन्त्याः॑। तेभ्यो॑
घृ॒तस्य॑ धारयितुं मधु॑धारा व्यु॒न्दती॑। मा॒ता रु॒द्राणां॑ दुहि॒ता वसू॑नाꣳ
स्वसा॑दित्याना॒ममृ॑तस्य॒ नाभिः॑। प्रणु॑वोचं चि॒कितु॑षे जना॑य॒ मागाम॑ना॒गाम॑दितिं
वधि॑ष्ट। पिब॑तूदकं तृणा॑न्यत्तु। ओमु॑त्सृजत॥²⁷॥

वधिष्ट द्वे च॥

[11]

सन्त्वा॑ सि॒धामि॒ यजु॑षां प्र॒जामा॑यु॒र्धनं॑ च॥ ॐ शान्तिः॒ शान्तिः॒ शान्तिः॑॥
सु॒मङ्ग॑लीरि॒यं व॒धूरि॑माꣳ स॒मेत॒ पश्य॑त। सौभा॑ग्यम॒स्यै द॒त्त्वाया॑थास्तं वि॒ परे॑तन।
इ॒मां त्वमि॑न्द्र मी॒ढ्वः सु॑पु॒त्राꣳ सु॒भगा॑ कुरु। दशा॑स्यां पु॒त्राणा॑ धेहि॒ पति॑मेकाद॒शं
कृ॒धि॥ आव॑हन्ती वि॒तन्वा॑ना। कु॒र्वाणा॑ ची॒रमा॑त्मनः। वासा॑ꣳसि म॒म गा॑वश्च।
अ॒न्नपा॑ने च॑ सर्व॒दा। ततो॑ मे॒ श्रिय॑माव॑ह।
ॐ शान्तिः॒ शान्तिः॒ शान्तिः॑॥

॥सप्तमः प्रश्नः --- शीक्षावली॥

शं नो मि॒त्रः शं वरु॑णः। शं नो भव॑त्वर्य॒मा। शं न इन्द्रो॑ बृ॒हस्प॑तिः। शं नो
विष्णु॑रुरु॒क्रमः। नमो॑ ब्रह्म॑णे। नम॑स्ते वा॒यो। त्वमे॒व प्र॒त्यक्षं॑ ब्रह्मा॑सि। त्वमे॒व प्र॒त्यक्षं॑
ब्रह्म॑ वदिष्यामि। ऋ॒तं वदि॑ष्यामि। स॒त्यं वदि॑ष्यामि। तन्माम॑वतु। तद्व॒क्तार॑मवतु।
अव॑तु माम्। अव॑तु व॒क्तारम्। ॐ शान्तिः॒ शान्तिः॒ शान्तिः॑॥₁॥

सत्यं वदिष्यामि पञ्च च॥ [1]

शीक्षां व्याख्यास्यामः। वर्णः स्वरः। मात्रा बलम्। सामं सन्तानः। इत्युक्तः
शीक्षाध्यायः॥₂॥

शीक्षां पञ्च॥ [2]

स॒ह नो॑ यशः। स॒ह नो॑ ब्रह्म॑वर्चसम्। अथातः स॒ंहिता॑या उपनिषदं
व्याख्यास्यामः। पञ्च॑स्व॒धिक॑रणेषु।
अधि॑लोकमधि॒ज्यौतिष॑मधि॒विद्य॑मधि॒प्रज॑मध्यात्मम्। ता महास॒ंहिता॑ इत्याचक्षते।
अथा॑धि॒लोक॑म्। पृथि॒वी पूर्वरूप॑म्। द्यौरु॒त्तर॑रूपम्। आका॑शः स॒न्धिः॥₃॥
वायुः॑ स॒न्धान॑म्। इत्य॑धि॒लोक॑म्। अथा॑धि॒ज्यौतिष॑म्। अग्निः॑ पूर्वरूपम्। आदित्य॑
उत्तर॑रूपम्। आपः॑ स॒न्धिः। वैद्युतः॑ स॒न्धान॑म्। इत्य॑धि॒ज्यौतिष॑म्। अथा॑धि॒विद्य॑म्।
आचार्यः॑ पूर्वरूपम्॥₄॥

अन्ते॑वास्युत्तर॑रूपम्। वि॒द्या स॒न्धिः। प्रव॑चनं स॒न्धान॑म्। इत्य॑धि॒विद्य॑म्।
अथा॑धि॒प्रज॑म्। मा॒ता पूर्वरूप॑म्। पि॒तोत्तर॑रूपम्। प्र॒जा स॒न्धिः। प्र॒जन॑नं
स॒न्धान॑म्। इत्य॑धि॒प्रज॑म्॥₅॥

अथा॑ध्या॒त्मम्। अध॑राहनुः पूर्वरूपम्। उत्तरा॑हनु॒त्तर॑रूपम्। वाक् स॒न्धिः। जिह्वा॑
स॒न्धान॑म्। इत्य॑ध्या॒त्मम्। इती॒मा म॑हास॒ंहिताः। य ए॒वमे॒ता म॑हास॒ंहिता
व्याख्या॑ता वेद। स॒न्धीय॑ते प्र॒जया॑ प॒शुभिः॑। ब्रह्म॑वर्चसे॒नान्ना॑देन सुव॒र्ग्येण॑ लोकेन॥₆॥

सन्धिराचार्यः पूर्वरूपमित्यधिप्रजं लोकेन॥ [3]

यश्छन्द॑सामृष॒भो वि॒श्वरूपः॑। छन्दो॒भ्योऽध्य॑मृता॑त्सम्ब॒भूव॑। स मेन्द्रो॑ मे॒धया॑ स्पृणोतु।

अमृतस्य देव धारणो भूयासम्। शरीरं मे विचर्षणम्। जिह्वा मे मधुमत्तमा।
कर्णाभ्यां भूरि विश्रुवम्। ब्रह्मणः कोशोऽसि मेधयापिहितः। श्रुतं मे गोपाय।
आवहन्ती वितन्वाना॥७॥

कुर्वाणा चीरमात्मनः। वासांसि मम गावश्च। अन्नपाने च सर्वदा। ततो मे
श्रियमावह। लोमशां पशुभिः सह स्वाहा। आ मा यन्तु ब्रह्मचारिणः स्वाहा। वि
माऽऽयन्तु ब्रह्मचारिणः स्वाहा। प्र माऽऽयन्तु ब्रह्मचारिणः स्वाहा। दमायन्तु
ब्रह्मचारिणः स्वाहा। शमायन्तु ब्रह्मचारिणः स्वाहा॥८॥

यशो जनेऽसानि स्वाहा। श्रेयान् वस्यसोऽसानि स्वाहा। तं त्वा भग प्रविशानि
स्वाहा। स मा भग प्रविश स्वाहा। तस्मिन्सहस्रशाखे। निभंगाहं त्वयि मृजे
स्वाहा। यथाऽऽपः प्रवता यन्ति। यथा मासा अहर्जरम्। एवं मां ब्रह्मचारिणः।
धातरायन्तु सर्वतः स्वाहा। प्रतिवेशोऽसि प्र मा भाहि प्र मा पदस्व॥९॥

[4]

भूर्भुवः सुवरिति वा एतास्तिस्रो व्याहृतयः। तासामुहस्मै तां चतुर्थीम्। माहाचमस्यः
प्रवेदयते। मह इति। तद्ब्रह्म। स आत्मा। अङ्गान्यन्या देवताः। भूरिति वा अयं
लोकः। भुव इत्यन्तरिक्षम्। सुवरित्यसौ लोकः॥१०॥

मह इत्यादित्यः। आदित्येन वाव सर्वे लोका महीयन्ते। भूरिति वा अग्निः। भुव
इति वायुः। सुवरित्यादित्यः। मह इति चन्द्रमाः। चन्द्रमसा वाव सर्वाणि
ज्योतींषि महीयन्ते। भूरिति वा ऋचः। भुव इति सामानि। सुवरिति यजूंषि॥११॥

मह इति ब्रह्म। ब्रह्मणा वाव सर्वे वेदा महीयन्ते। भूरिति वै प्राणः। भुव
इत्यपानः। सुवरिति व्यानः। मह इत्यन्नम्। अन्नेन वाव सर्वे प्राणा महीयन्ते। ता
वा एताश्चतस्रश्चतुर्धा। चतस्रश्चतस्रो व्याहृतयः। ता यो वेद। स वेद ब्रह्म। सर्वेऽस्मै
देवा बलिमावहन्ति॥१२॥

असौ लोको यजूंषि वेद द्वे च॥

[5]

स य एषोऽन्तरहृदय आकाशः। तस्मिन्नयं पुरुषो मनोमयः। अमृतो हिरण्मयः।
अन्तरेण तालुके। य एष स्तनं इवावलम्बते। सैन्द्रयोनिः। यत्रासौ केशान्तो

विवर्तते। व्यपोह्यं शीर्षकपाले। भूरित्यग्नौ प्रतितिष्ठति। भुव इति वायौ॥¹³॥

सुवरित्यादित्ये। मह इति ब्रह्मणि। आप्रोति स्वारोज्यम्। आप्रोति मनसस्पतिम्।
वाक्पतिश्चक्षुष्पतिः। श्रोत्रपतिर्विज्ञानपतिः। एतत्ततो भवति। आकाशशरीरं ब्रह्म।
सत्यात्मप्राणारामं मन आनन्दम्। शान्तिसमृद्धममृतम्। इति प्राचीनयोग्योपास्व॥¹⁴॥

वायावमृतमेकं च॥

[6]

पृथिव्यन्तरिक्षं द्यौर्दिशोऽवान्तरदिशाः। अग्निर्वायुरादित्यश्चन्द्रमा नक्षत्राणि। आप
ओषधयो वनस्पतय आकाश आत्मा। इत्यधिभूतम्। अथाध्यात्मम्। प्राणो
व्यानोऽपान उदानः समानः। चक्षुः श्रोत्रं मनो वाक्कक्। चर्म मांसं स्नावास्थि
मज्जा। एतदधि विधायर्षिरवोचत्। पाङ्क्तुं वा इदं सर्वम्। पाङ्क्तुं नैव पाङ्क्तुं
स्पृणोतीति॥¹⁵॥

सर्वमेकं च॥

[7]

ओमिति ब्रह्म। ओमितीदं सर्वम्। ओमित्येतदनुकृति ह स्म वा
अप्योश्चावयेत्याश्चावयन्ति। ओमिति सामानि गायन्ति। ओंशोमिति शस्त्राणि
शंसन्ति। ओमित्यध्वर्युः प्रतिगरं प्रतिगृणाति। ओमिति ब्रह्मा प्रसौति।
ओमित्यग्निहोत्रमनुजानाति। ओमिति ब्राह्मणः प्रवक्ष्यन्नाह ब्रह्मोपाप्रवानीति।
ब्रह्मैवोपाप्नोति॥¹⁶॥

ओन्दशं॥

[8]

ऋतं च स्वाध्यायप्रवचने च। सत्यं च स्वाध्यायप्रवचने च। तपश्च स्वाध्यायप्रवचने
च। दमश्च स्वाध्यायप्रवचने च। शमश्च स्वाध्यायप्रवचने च। अग्नयश्च
स्वाध्यायप्रवचने च। अग्निहोत्रं च स्वाध्यायप्रवचने च। अतिथयश्च स्वाध्यायप्रवचने
च। मानुषं च स्वाध्यायप्रवचने च। प्रजा च स्वाध्यायप्रवचने च। प्रजनश्च
स्वाध्यायप्रवचने च। प्रजातिश्च स्वाध्यायप्रवचने च। सत्यमिति सत्यवचा राधीतरः।
तप इति तपोनित्यः पौरुशिष्टिः। स्वाध्यायप्रवचने एवेति नाको मौद्गल्यः। तद्धि
तपस्तद्धि तपः॥¹⁷॥

प्रजा च स्वाध्यायप्रवचने च पदं॥

[9]

अहं वृक्षस्य रेरिवा। कीर्तिः पृष्ठं गिरेरिवा। ऊर्ध्वपवित्रो वाजिनीव स्वमृतमस्मि।
द्रविणं॑ सर्वर्चसम्। सुमेधा अमृतोक्षितः। इति त्रिशङ्कोर्वेदानुवचनम्॥¹⁸॥

अहं पद॥

[10]

वेदमनूच्याचार्योऽन्तेवासिनमनुशास्ति। सत्यं वद। धर्मं चर। स्वाध्यायान्मा प्रमदः।
आचार्याय प्रियं धनमाहृत्य प्रजातन्तुं मा व्यवच्छेत्सीः। सत्यान्न प्रमदितव्यम्।
धर्मान्न प्रमदितव्यम्। कुशलान्न प्रमदितव्यम्। भूत्यै न प्रमदितव्यम्।
स्वाध्यायप्रवचनाभ्यां न प्रमदितव्यम्॥¹⁹॥

देवपितृकार्याभ्यां न प्रमदितव्यम्। मातृदेवो भव। पितृदेवो भव। आचार्यदेवो भव।
अतिथिदेवो भव। यान्यनवद्यानि कर्माणि। तानि सेवितव्यानि। नो इतराणि।
यान्यस्माकं॑ सुचरितानि। तानि त्वयोपास्यानि॥²⁰॥

नो इतराणि। ये के चास्मच्छ्रेयांसो ब्राह्मणाः। तेषां त्वयाऽऽसनेन प्रश्वसितव्यम्।
श्रद्धया देयम्। अश्रद्धयाऽदेयम्। श्रिया देयम्। हिया देयम्। भिया देयम्। संविदा
देयम्। अथ यदि ते कर्मविचिकित्सा वा वृत्तविचिकित्सा वा स्यात्॥²¹॥

ये तत्र ब्राह्मणाः सम्मर्शिनः। युक्ता आयुक्ताः। अलूक्षा धर्मकामाः स्युः। यथा ते
तत्र वर्तेरन्। तथा तत्र वर्तेथाः। अथाभ्याख्यातेषु। ये तत्र ब्राह्मणाः सम्मर्शिनः।
युक्ता आयुक्ताः। अलूक्षा धर्मकामाः स्युः। यथा ते तेषु वर्तेरन्। तथा तेषु वर्तेथाः।
एष आदेशः। एष उपदेशः। एषा वेदोपनिषत्। एतदनुशासनम्। एवमुपासितव्यम्।
एवमु चैतदुपास्यम्॥²²॥

स्वाध्यायप्रवचनाभ्यान्न प्रमदितव्यं तानि त्वयोपास्यानि स्यात्तेषु वर्तेरन्त्स च॥

[11]

शं नो मित्रः शं वरुणः। शं नो भवत्वर्यमा। शं न इन्द्रो बृहस्पतिः। शं नो
विष्णुरुक्रमः। नमो ब्रह्मणे। नमस्ते वायो। त्वमेव प्रत्यक्षं ब्रह्मासि। त्वामेव प्रत्यक्षं
ब्रह्मावादिषम्। ऋतमवादिषम्। सत्यमवादिषम्। तन्मामावीत्। तद्वक्तारमावीत्।
आवीन्माम्। आवीद्वक्तारम्। ॐ शान्तिः शान्तिः शान्तिः॥²³॥

सत्यमवादिषं पञ्च च॥

[12]

॥अष्टमः प्रश्नः --- ब्रह्मानन्दवल्ली॥

ॐ सह ना॑ववतु। सह नौ॑ भुनक्तु। सह वी॒र्यं॑ करवावहे। तेज॒स्वि ना॒वधी॑तमस्तु
मा वि॒द्विषा॑वहे। ॐ शान्तिः॒ शान्तिः॒ शान्तिः॑॥

ब्रह्म॒विदा॑प्नोति पर॒म्। तदेषा॑भ्यु॒क्ता। स॒त्यं ज्ञा॒नम॑न॒न्तं ब्रह्म॑। यो वेद॒ निहि॑तं गुहा॑यां
पर॒मे व्यो॑मन्। सौ॒ऽश्रुते॒ सर्वा॑न्कामा॑न्त्सह। ब्रह्म॑णा विप॒श्चितेति॑। तस्मा॒द्वा
एत॒स्मादा॑त्मन॒ आका॑शः सम्भू॒तः। आका॑शाद्वायुः। वा॒यो र॒ग्निः। अ॒ग्ने रा॒पः। अ॒द्भ्यः
पृ॒थि॒वी। पृ॒थि॒व्या ओष॑धयः। ओष॑धी॒भ्योऽन्न॑म्। अन्ना॒त्पुरु॑षः। स वा एष
पुरु॑षोऽन्न॒रस॑मयः। तस्येद॑मेव शि॒रः। अयं दक्षि॑णः प॒क्षः। अयमुत्त॑रः प॒क्षः।
अयमा॑त्मा। इदं पुच्छं॑ प्रति॒ष्ठा। तदप्येष॑ श्लो॒को भ॒वति॑॥१॥

अन्ना॒द्वै प्र॒जाः प्र॒जाय॑न्ते। याः काश्च॑ पृथि॒वीऽश्रिताः॑। अथो अन्नै॑नैव जी॒वन्ति॑।
अथै॒नदपि॑ यन्त्यन्त॒तः। अन्न॑ हि भू॒तानां॑ ज्येष्ठ॑म्। तस्मा॑त्सर्वो॒षध॑मुच्यते। सर्व॒ वै
तेऽन्न॑माप्नुवन्ति। येऽन्नं॑ ब्रह्मोपा॑सन्ते। अन्न॑ हि भू॒तानां॑ ज्येष्ठ॑म्।
तस्मा॑त्सर्वो॒षध॑मुच्यते। अन्ना॑द्भू॒तानि॑ जाय॑न्ते। जा॒ता न्य॒न्नेन॑ वर्ध॑न्ते। अद्य॑तेऽ॒त्ति च॑
भू॒तानि॑। तस्मा॒दन्नं॑ तदुच्य॑त इति। तस्मा॒द्वा एत॒स्मादन्न॑रस॑मयात्। अन्योऽन्तर॑
आ॒त्मा प्रा॑णमयः। तेनै॑ष पूर्णः। स वा एष पुरु॑षवि॒ध ए॒व। तस्य॑ पुरु॑षवि॒धता॑म्।
अन्व॑यं पुरु॑षवि॒धः। तस्य॑ प्रा॒ण ए॒व शि॒रः। व्या॒नो दक्षि॑णः प॒क्षः। अ॒पान॑ उत्त॑रः
प॒क्षः। आका॑श आ॒त्मा। पृथि॒वी पुच्छं॑ प्रति॒ष्ठा। तदप्येष॑ श्लो॒को भ॒वति॑॥२॥

प्रा॒णं दे॒वा अनु॑ प्राण॑न्ति। म॒नुष्याः॑ प॒शव॑श्च॒ ये। प्रा॒णो हि भू॒ताना॑मायुः।
तस्मा॑त्सर्वा॒युष॑मुच्यते। सर्व॑मे॒व त आ॑यु॒र्यन्ति॑। ये प्रा॒णं ब्रह्मो॑पा॑सन्ते। प्रा॒णो हि
भू॒ता॒नामा॑युः। तस्मा॑त्सर्वा॒युष॑मुच्य॑त इति। तस्यै॑ष ए॒व शा॒रीर॑ आ॒त्मा। यः पूर्॒वस्य॑।
तस्मा॒द्वा एत॒स्मात् प्रा॑णमयात्। अन्योऽन्तर॑ आ॒त्मा म॒नोम॑यः। तेनै॑ष पूर्णः। स वा
एष पुरु॑षवि॒ध ए॒व। तस्य॑ पुरु॑षवि॒धता॑म्। अन्व॑यं पुरु॑षवि॒धः। तस्य॑ यजु॑रे॒व शि॒रः।
ऋ॒ग्दक्षि॑णः प॒क्षः। सा॒मोत्त॑रः प॒क्षः। आ॒देश॑ आ॒त्मा। अथ॑र्वाङ्गि॒रसः॑ पुच्छं॑ प्रति॒ष्ठा।

तदप्येष श्लोको भवति॥३॥

यतो वाचो निर्वर्तन्ते। अप्राप्य मनसा सह। आनन्दं ब्रह्मणो विद्वान्। न बिभेति
कदाचनेति। तस्यैष एव शरीर आत्मा। यः पूर्वस्य। तस्माद्वा एतस्मान्मनोमयात्।
अन्योऽन्तर आत्मा विज्ञानमयः। तेनैष पूर्णः। स वा एष पुरुषविध एव। तस्य
पुरुषविधताम्। अन्वयं पुरुषविधः। तस्य श्रद्धैव शिरः। ऋतं दक्षिणः पक्षः।
सत्यमुत्तरः पक्षः। योग आत्मा। महः पुच्छं प्रतिष्ठा। तदप्येष श्लोको भवति॥४॥

विज्ञानं यज्ञं तनुते। कर्माणि तनुतेऽपि च। विज्ञानं देवाः सर्वे। ब्रह्म ज्येष्ठमुपासते।
विज्ञानं ब्रह्म चेद्वेदं। तस्माच्चेन्न प्रमादति। शरीरे पाप्मनो हिवा।
सर्वान्कामान्त्समश्नुत इति। तस्यैष एव शरीर आत्मा। यः पूर्वस्य। तस्माद्वा
एतस्माद्विज्ञानमयात्। अन्योऽन्तर आत्माऽऽनन्दमयः। तेनैष पूर्णः। स वा एष
पुरुषविध एव। तस्य पुरुषविधताम्। अन्वयं पुरुषविधः। तस्य प्रियमेव शिरः।
मोदो दक्षिणः पक्षः। प्रमोद उत्तरः पक्षः। आनन्द आत्मा। ब्रह्म पुच्छं प्रतिष्ठा।
तदप्येष श्लोको भवति॥५॥

असन्नेव स भवति। असद्ब्रह्मेति वेद चेत्। अस्ति ब्रह्मेति चेद्वेद। सन्तमेनं ततो
विदुरिति। तस्यैष एव शरीर आत्मा। यः पूर्वस्य। अथातोऽनुप्रश्नाः। उता विद्वानमुं
लोकं प्रेत्य। कश्चन गच्छती(३)॥ आहो विद्वानमुंलोकं प्रेत्य। कश्चित्समश्नुता(३)
उ। सोऽकामयत। बहु स्यां प्रजायेयेति। स तपोऽतप्यत। स तपस्तप्त्वा। इदं
सर्वमसृजत। यदिदं किं च। तत्सृष्ट्वा। तदेवानु प्राविशत्। तदनुप्रविश्य। सच्च
त्यच्चाभवत्। निरुक्तं चानिरुक्तं च। निलयनं चानिलयनं च। विज्ञानं चाविज्ञानं च।
सत्यं चानृतं च सत्यमभवत्। यदिदं किं च। तत्सत्यमित्याचक्षते। तदप्येष श्लोको
भवति॥६॥

असद्वा इदमग्र आसीत्। ततो वै सदजायत। तदात्मानं स्वयमकुरुत।
तस्मात्तत्सुकृतमुच्यत इति। यद्वै तत्सुकृतम्। रसो वै सः। रसं ह्येवायं
लब्ध्वाऽऽनन्दी भवति। को ह्येवान्यात्कः प्राण्यात्। यदेष आकाश आनन्दो न

स्यात्। एष ह्येवानन्दयाति। यदा ह्येवैष एतस्मिन्नदृश्येऽनात्म्येऽनिरुक्तेऽनिलयनेऽभयं प्रतिष्ठां विन्दते। अथ सोऽभयं गतो भवति। यदा ह्येवैष एतस्मिन्नुदरमन्तरं कुरुते। अथ तस्य भयं भवति। तच्चेव भयं विदुषोऽमन्वानस्य। तदप्येष श्लोको भवति॥७॥

भीषाऽस्माद्वातः पवते। भीषोदैति सूर्यः। भीषाऽस्मादग्निश्चेन्द्रश्च। मृत्युर्धावति पञ्चम इति। सैषाऽऽनन्दस्य मीमांसा भवति। युवा स्यात्साधु युवाऽध्यायकः। आशिष्ठो दृढिष्ठो बलिष्ठः। तस्येयं पृथिवी सर्वा वित्तस्य पूर्णा स्यात्। स एको मानुष आनन्दः। ते ये शतं मानुषा आनन्दाः। स एको मनुष्यगन्धर्वाणामानन्दः। श्रोत्रियस्य चाकामहतस्य। ते ये शतं मनुष्यगन्धर्वाणामानन्दाः। स एको देवगन्धर्वाणामानन्दः। श्रोत्रियस्य चाकामहतस्य। ते ये शतं देवगन्धर्वाणामानन्दाः। स एकः पितॄणां चिरलोकलोकानामानन्दः। श्रोत्रियस्य चाकामहतस्य। ते ये शतं पितॄणां चिरलोकलोकानामानन्दाः। स एक आजानजानां देवानामानन्दः। श्रोत्रियस्य चाकामहतस्य। ते ये शतमाजानजानां देवानामानन्दाः। स एकः कर्मदेवानां देवानामानन्दः। ये कर्मणा देवानपियन्ति। श्रोत्रियस्य चाकामहतस्य। ते ये शतं कर्मदेवानां देवानामानन्दाः। स एको देवानामानन्दः। श्रोत्रियस्य चाकामहतस्य। ते ये शतं देवानामानन्दाः। स एक इन्द्रस्यानन्दः। श्रोत्रियस्य चाकामहतस्य। ते ये शतमिन्द्रस्यानन्दाः। स एको बृहस्पतेरानन्दः। श्रोत्रियस्य चाकामहतस्य। ते ये शतं बृहस्पतेरानन्दाः। स एकः प्रजापतेरानन्दः। श्रोत्रियस्य चाकामहतस्य। ते ये शतं प्रजापतेरानन्दाः। स एको ब्रह्मण आनन्दः। श्रोत्रियस्य चाकामहतस्य। स यश्चायं पुरुषे। यश्चासावादित्ये। स एकः। स य एवंवित्। अस्माल्लोकात्प्रेत्या। एतमन्नमयमात्मानमुपसङ्गामति। एतं प्राणमयमात्मानमुपसङ्गामति। एतं मनोमयमात्मानमुपसङ्गामति। एतं विज्ञानमयमात्मानमुपसङ्गामति। एतमानन्दमयमात्मानमुपसङ्गामति। तदप्येष श्लोको भवति॥८॥

यतो वाचो निर्वर्तन्ते। अप्राप्य मनसा सह। आनन्दं ब्रह्मणो विद्वान्। न बिभेति कुतश्चनेति। एतं ह वाचं न तपति। किमहं साधु नाकरवम्। किमहं पापमकरवमिति। स य एवं विद्वानेते आत्मानं स्पृणुते। उभे ह्येवैष एते

आत्मानं॑ स्पृ॒णुते। य ए॒वं वेद॑। इत्यु॑पनिषत्॥९॥

स॒ह ना॑ववतु। स॒ह नो॑ भुनक्तु। स॒ह वी॒र्यं॑ करवावहे। ते॒ज॒स्वि ना॒वधी॑तमस्तु मा
वि॒द्विषा॒वहे॑। ॐ शान्तिः॒ शान्तिः॒ शान्तिः॑॥

॥नवमः प्रश्नः --- भृगुवल्ली॥

ॐ सह ना॑ववतु। सह नौ॑ भुनक्तु। सह वी॒र्यं॑ करवावहे। तेज॒स्वि ना॒वधी॑तमस्तु
मा वि॒द्विषा॑वहे। ॐ शान्तिः॒ शान्तिः॒ शान्तिः॑॥

भृगुर्वै वा॑रुणिः। वरु॑णं पि॒तर॒मुप॑ससार। अधी॑हि भगवो ब्रह्मेति॑। तस्मा॑
ए॒तत्प्रो॑वाच। अन्नं॑ प्रा॒णं चक्षुः॑ श्रो॒त्रं मनो॑ वाचमिति॑। त॒५ हो॑वाच। यतो॒ वा इ॒मानि॑
भू॒तानि॑ जायन्ते। येन॒ जा॒तानि॑ जी॒वन्ति॑। यत्प्र॑यन्त्य॒भि संवि॑शन्ति। तद्विजि॑ज्ञासस्व।
तद्ब्र॑ह्मेति॑। स तपो॑ऽतप्यत। स तप॑स्तप्त्वा॥₁॥

अन्नं॑ ब्रह्मेति॑ व्य॒जाना॑त्। अन्ना॑द्धे॒व खल्वि॑मानि भू॒तानि॑ जायन्ते। अन्ने॑न जा॒तानि॑
जी॒वन्ति॑। अन्नं॑ प्र॒यन्त्य॒भि संवि॑शन्तीति॑। तद्वि॒ज्ञाय॑। पुनरे॒व वरु॑णं पि॒तर॒मुप॑ससार।
अधी॑हि भगवो ब्रह्मेति॑। त॒५ हो॑वाच। तप॑सा ब्रह्म विजि॑ज्ञासस्व। तपो॑ ब्रह्मेति॑। स
तपो॑ऽतप्यत। स तप॑स्तप्त्वा॥₂॥

प्रा॒णो ब्रह्मेति॑ व्य॒जाना॑त्। प्रा॒णाद्धे॒व खल्वि॑मानि भू॒तानि॑ जायन्ते। प्रा॒णेन॑ जा॒तानि॑
जी॒वन्ति॑। प्रा॒णं प्र॒यन्त्य॒भि संवि॑शन्तीति॑। तद्वि॒ज्ञाय॑। पुनरे॒व वरु॑णं पि॒तर॒मुप॑ससार।
अधी॑हि भगवो ब्रह्मेति॑। त॒५ हो॑वाच। तप॑सा ब्रह्म विजि॑ज्ञासस्व। तपो॑ ब्रह्मेति॑। स
तपो॑ऽतप्यत। स तप॑स्तप्त्वा॥₃॥

मनो॑ ब्रह्मेति॑ व्य॒जाना॑त्। मन॑सो ह्ये॒व खल्वि॑मानि भू॒तानि॑ जायन्ते। मन॑सा जा॒तानि॑
जी॒वन्ति॑। मनः॑ प्र॒यन्त्य॒भि संवि॑शन्तीति॑। तद्वि॒ज्ञाय॑। पुनरे॒व वरु॑णं पि॒तर॒मुप॑ससार।
अधी॑हि भगवो ब्रह्मेति॑। त॒५ हो॑वाच। तप॑सा ब्रह्म विजि॑ज्ञासस्व। तपो॑ ब्रह्मेति॑। स
तपो॑ऽतप्यत। स तप॑स्तप्त्वा॥₄॥

वि॒ज्ञानं॑ ब्रह्मेति॑ व्य॒जाना॑त्। वि॒ज्ञाना॑द्धे॒व खल्वि॑मानि भू॒तानि॑ जायन्ते। वि॒ज्ञाने॑न
जा॒तानि॑ जी॒वन्ति॑। वि॒ज्ञानं॑ प्र॒यन्त्य॒भि संवि॑शन्तीति॑। तद्वि॒ज्ञाय॑। पुनरे॒व वरु॑णं
पि॒तर॒मुप॑ससार। अधी॑हि भगवो ब्रह्मेति॑। त॒५ हो॑वाच। तप॑सा ब्रह्म विजि॑ज्ञासस्व।
तपो॑ ब्रह्मेति॑। स तपो॑ऽतप्यत। स तप॑स्तप्त्वा॥₅॥

आनन्दो ब्रह्मेति व्यजानात्। आनन्दाद्धेव खल्विमानि भूतानि जायन्ते। आनन्देन जातानि जीवन्ति। आनन्दं प्रयन्त्यभि संविशन्तीति। सैषा भार्गवी वारुणी विद्या। परमे व्योमन् प्रतिष्ठिता। य एवं वेद प्रतितिष्ठति। अन्नवानन्नादो भवति। महान्भवति प्रजयां पशुभिर्ब्रह्मवर्चसेन। महान्कीर्त्या॥६॥

अन्नं न निन्द्यात्। तद्व्रतम्। प्राणो वा अन्नम्। शरीरमन्नादम्। प्राणे शरीरं प्रतिष्ठितम्। शरीरे प्राणः प्रतिष्ठितः। तदेतदन्नमन्ने प्रतिष्ठितम्। स य एतदन्नमन्ने प्रतिष्ठितं वेद प्रतितिष्ठति। अन्नवानन्नादो भवति। महान्भवति प्रजयां पशुभिर्ब्रह्मवर्चसेन। महान्कीर्त्या॥७॥

अन्नं न परिचक्षीत। तद्व्रतम्। आपो वा अन्नम्। ज्योतिरन्नादम्। अप्सु ज्योतिः प्रतिष्ठितम्। ज्योतिष्यापः प्रतिष्ठिताः। तदेतदन्नमन्ने प्रतिष्ठितम्। स य एतदन्नमन्ने प्रतिष्ठितं वेद प्रतितिष्ठति। अन्नवानन्नादो भवति। महान्भवति प्रजयां पशुभिर्ब्रह्मवर्चसेन। महान्कीर्त्या॥८॥

अन्नं बहु कुर्वीत। तद्व्रतम्। पृथिवी वा अन्नम्। आकाशोऽन्नादः। पृथिव्यामाकाशः प्रतिष्ठितः। आकाशे पृथिवी प्रतिष्ठिता। तदेतदन्नमन्ने प्रतिष्ठितम्। स य एतदन्नमन्ने प्रतिष्ठितं वेद प्रतितिष्ठति। अन्नवानन्नादो भवति। महान्भवति प्रजयां पशुभिर्ब्रह्मवर्चसेन। महान्कीर्त्या॥९॥

न कञ्चन वसतौ प्रत्याचक्षीत। तद्व्रतम्। तस्माद्यथा कथा च विधया बह्वन्नं प्राप्नुयात्। अराध्यस्मा अन्नमित्याचक्षते। एतद्वै मुखतोऽन्नं राद्धम्। मुखतोऽस्मा अन्नं राध्यते। एतद्वै मध्यतोऽन्नं राद्धम्। मध्यतोऽस्मा अन्नं राध्यते। एतद्वा अन्ततोऽन्नं राद्धम्। अन्ततोऽस्मा अन्नं राध्यते। य एवं वेद। क्षेम इति वाचि। योगक्षेम इति प्राणापानयोः। कर्मेति हस्तयोः। गतिरिति पादयोः। विमुक्तिरिति पायौ। इति मानुषीः समाज्ञाः। अथ दैवीः। तृप्तिरिति वृष्टौ। बलमिति विद्युति। यश इति पशुषु। ज्योतिरिति नक्षत्रेषु। प्रजातिरमृतमानन्द इत्युपस्थे। सर्वमित्याकाशे। तत्प्रतिष्ठेत्युपासीत। प्रतिष्ठावान्भवति। तन्मह इत्युपासीत। महान्भवति। तन्मन इत्युपासीत। मानवान्भवति। तन्नम इत्युपासीत। नम्यन्तैः स्मै कामाः।

तद्ब्रह्मेत्युपासीत। ब्रह्मवान्भवति। तद्ब्रह्मणः परिमर इत्युपासीत। पर्येणं म्रियन्ते
 द्विषन्तः सपत्नाः। परि येऽप्रिया भ्रातृव्याः। स यश्चायं पुरुषे। यश्चासावादित्ये। स
 एकः। स ये एवंवित्। अस्माल्लोकात्प्रेत्य। एतमन्नमयमात्मानमुपसङ्क्रम्य। एतं
 प्राणमयमात्मानमुपसङ्क्रम्य। एतं मनोमयमात्मानमुपसङ्क्रम्य। एतं
 विज्ञानमयमात्मानमुपसङ्क्रम्य। एतमानन्दमयमात्मानमुपसङ्क्रम्य।
 इमाँल्लोकान्कामात्री कामरूप्यनुसधरन्। एतत्साम गायन्नास्ते। हा(3) वु हा(3)
 वु हा(3) वु। अहमन्नमहमन्नमहमन्नम्। अहमन्नादो(2)ऽहमन्नादो(2)ऽहमन्नादः।
 अहः श्लोककृदहः श्लोककृदहः श्लोककृत्। अहमस्मि प्रथमजा ऋता(3) स्य।
 पूर्वं देवेभ्यो अमृतस्य ना(3) भाइ। यो मा ददाति स इदेव मा(3) वाः।
 अहमन्नमन्नमदन्तमा(3) द्वि। अहं विश्वं भुवनमभ्यभवाम्। सुवर्न ज्योतीः। य एवं
 वेद। इत्युपनिषत्॥¹⁰॥

सह नाववतु। सह नौ भुनक्तु। सह वीर्यं करवावहे। तेजस्वि नावधीतमस्तु मा
 विद्विषावहे। ॐ शान्तिः शान्तिः शान्तिः॥

॥दशमः प्रश्नः --- महानारायणोपनिषत्॥

ॐ सह ना॑ववतु। सह नौ॑ भुनक्तु। सह वी॒र्यं॑ करवावहे। तेज॒स्वि ना॒वधी॑तमस्तु
मा वि॒द्विषा॑वहे। ॐ शान्तिः॒ शान्तिः॒ शान्तिः॑॥

॥अम्भस्य पारे॥

अम्भ॑स्य पा॒रे भुव॑नस्य मध्ये नाक॑स्य पृ॒ष्ठे म॑हतो मही॑यान्। शु॒क्रेण॒ ज्योती॑षि
समनु॑प्रविष्टः प्रजाप॑तिश्चरति गर्भे॑ अ॒न्तः॥ यस्मि॑न्निदं॒ सं च॒ विचै॑ति सर्वं यस्मि॑न्दे॒वा
अधि॑ विश्वे निषे॑दुः। तदे॒व भू॑तं तदु॒ भव्य॑मा इ॒दं तद॑क्षरे पर॒मे व्यो॑मन्॥
येना॑ऽऽवृ॒तं खं च॒ दिवं॑ म॒हीं च॒ येना॑ऽऽदित्यस्तप॑ति तेज॑सा भ्राज॑सा च। यम॑न्तः
संमु॑द्रे क॒वयो॑ वय॑न्ति यद॑क्षरे पर॒मे प्रजाः॑॥ यतः॑ प्रसू॒ता ज॒गतः॑ प्रसू॒ती तोये॑न
जी॒वान् व्यस॑सर्ज भू॒म्या॑म्। यदोष॑धीभिः पुरुषा॑न्प॒शूञ्च॒ विवेश॑ भू॒तानि॑ चराचराणि॥
अतः॑ परं॒ नान्य॑दणीयसं॒ हि परा॑त्परं॒ यन्म॑हतो म॒हान्त॑म्। यदे॒कम॒व्यक्त॒मन॑न्तरूपं
विश्वं॑ पु॒राणं॑ तम॑सः पर॑स्तात्॥_१॥

तदे॒वर्तं तदु॑ स॒त्यमा॑हुस्तदे॒व ब्र॑ह्म पर॒मं क॑वीनाम्। इ॒ष्टापूर्तं॑ बहु॒धा जा॑तं जाय॑मानं
वि॒श्वं बि॑भर्ति भुव॑नस्य नाभिः॑॥ तदे॒वाग्नि॑स्तद्वा॒युस्तत्सूर्य॑स्तदु॒ चन्द्र॑माः। तदे॒व
शु॒क्रम॒मृतं॑ तद्ब्र॑ह्म तदापः॒ स प्रजा॑पतिः॥ सर्वे॑ निमेषा ज॒ज्ञिरे॑ वि॒द्युतः॒ पुरु॑षा॒दधि॑।
क॒ला मु॑हूर्ताः का॒ष्ठाश्चा॑होरा॒त्राश्च॑ सर्व॒शः॥ अ॒र्द्धमा॑सा मा॒सा ऋ॑तवः॒ संवत्स॑रश्च
कल्प॑न्ताम्। स आपः॑ प्रदु॒घे उ॒भे इ॒मे अ॒न्तरि॑क्षमथो सु॒वः॥ नैन॑मूर्ध्वं न ति॒र्यश्च॒ न
मध्ये॑ परि॑जग्रभत्। न तस्ये॑शे कश्च॒न तस्य॑ नाम म॒हद्य॑शः॥_२॥

न स॒न्दृशे॑ तिष्ठति रूप॑मस्य न चक्षु॑षा पश्यति कश्च॒नैन॑म्। हृ॒दा म॑नीषा
मन॑साऽभिक्लृ॑प्तो य ए॒नं वि॒दुर॑मृतास्ते भ॑वन्ति॥ अ॒द्भ्यः सम्भू॑तो हि॒रण्य॑गर्भ
इत्य॑ष्टौ॥ ए॒ष हि दे॒वः प्र॒दिशो॑ऽनु सर्वाः॒ पूर्वा॑ हि जा॒तः स उ॒ गर्भे॑ अ॒न्तः। स

विजायमानः स जनिष्यमाणः प्रत्यङ्मुखोऽस्तिष्ठति विश्वतोमुखः॥ विश्वतश्चक्षुरुत
विश्वतोमुखो विश्वतोहस्त उत विश्वतस्पात्। सं बाहुभ्यां नमति सं पतत्रैर्द्वावापृथिवी
जनयन्देव एकः॥ वेनस्तत्पश्यन्विश्वा भुवनानि विद्वान् यत्र विश्वं भवत्येकनीलम्।
यस्मिन्निदं सं च विचैकं स ओतः प्रोतश्च विभुः प्रजासु। प्र तद्वोचे अमृतं नु
विद्वान्गन्धर्वो नाम निहितं गुहासु॥३॥

त्रीणि पदा निहिता गुहासु यस्तद्वेदं सवितुः पिताऽसत्। स नो बन्धुर्जनिता स
विधाता धामानि वेद भुवनानि विश्वा। यत्र देवा अमृतमानशानास्तृतीये
धामान्यभ्यैरयन्त। परि द्वावापृथिवी यन्ति सद्यः परि लोकान् परि दिशः परि
सुवः। ऋतस्य तन्तुं विततं विचृत्य तदपश्यत्तदभवत् प्रजासु। परीत्य लोकान्परीत्य
भूतानि परीत्य सर्वाः प्रदिशो दिशश्च। प्रजापतिः प्रथमजा
ऋतस्यऽऽत्मनऽऽत्मानमभिसम्बभूव। सदसस्पतिमद्भुतं प्रियमिन्द्रस्य काम्यम्।
सनि मेधामयासिषम्। उद्दीप्यस्व जातवेदोऽपघ्नन्निर्ऋतिं मम॥४॥

पशूँश्च मह्यमावह जीवंतं च दिशो दिश। मा नो हिंसीज्जातवेदो गामश्च पुरुषं
जगत्। अबिभ्रदग्न आगहि श्रिया मा परिपातय।

॥ गायत्रीमन्त्रः ॥

पुरुषस्य विद्म सहस्राक्षस्य महादेवस्य धीमहि। तन्नो रुद्रः प्रचोदयात्। तत्पुरुषाय
विद्महे महादेवाय धीमहि। तन्नो रुद्रः प्रचोदयात्। तत्पुरुषाय विद्महे वक्रतुण्डाय
धीमहि। तन्नो दन्तिः प्रचोदयात्। तत्पुरुषाय विद्महे चक्रतुण्डाय धीमहि॥५॥

तन्नो नन्दिः प्रचोदयात्। तत्पुरुषाय विद्महे महासेनाय धीमहि। तन्नः षण्मुखः
प्रचोदयात्। तत्पुरुषाय विद्महे सुवर्णपक्षाय धीमहि। तन्नो गरुडः प्रचोदयात्।
वेदात्मनाय विद्महे हिरण्यगर्भाय धीमहि। तन्नो ब्रह्म प्रचोदयात्। नारायणाय विद्महे
वासुदेवाय धीमहि। तन्नो विष्णुः प्रचोदयात्। वज्रनखाय विद्महे तीक्ष्णदृष्टाय
धीमहि॥६॥

तन्नो नारसिंहः प्रचोदयात्। भास्कराय विद्महे महद्युतिकराय धीमहि। तन्नो
आदित्यः प्रचोदयात्। वैश्वानराय विद्महे लालीलाय धीमहि। तन्नो अग्निः
प्रचोदयात्। कात्यायनाय विद्महे कन्यकुमारि धीमहि। तन्नो दुर्गिः प्रचोदयात्।

॥दूर्वासूक्तम्॥

सहस्रपरमा देवी शतमूला शताङ्गुरा। सर्वं हरतु मे पापं दूर्वा दुःस्वप्ननाशनी।
काण्डात्काण्डात् प्ररोहन्ती परुषः परुषः परि॥७॥

एवानो दूर्वे प्रतनु सहस्रेण शतेन च। या शतेन प्रतनोषि सहस्रेण विरोहसि।
तस्यास्ते देवीष्टके विधेम हविषा वयम्। अश्वक्रान्ते रथक्रान्ते विष्णुक्रान्ते वसुन्धरा।
शिरसा धारयिष्यामि रक्षस्व मां पदे पदे।

॥मृत्तिकासूक्तम्॥

भूमिर्धेनुर्धरणी लोकधारिणी। उद्धृताऽसि वराहेण कृष्णेन शतबाहुना। मृत्तिके हन
मे पापं यन्मया दुष्कृतं कृतम्। मृत्तिके ब्रह्मदत्ताऽसि काश्यपेनाभिमन्त्रिता।
मृत्तिके देहि मे पुष्टिं त्वयि सर्वं प्रतिष्ठितम्॥८॥

मृत्तिके प्रतिष्ठिते सर्वं तन्मे निर्णुद मृत्तिके। तया हतेन पापेन गच्छामि परमां
गतिम्।

॥शत्रुजयमन्त्रः॥

यत इन्द्र भयामहे ततो नो अभयं कृधि। मघवन्छग्धि तव तन्न ऊतये विद्विषो
विमृधो जहि। स्वस्तिदा विशस्पतिर्वृत्रहा विमृधो वशी। वृषेन्द्रः पुर एतु नः
स्वस्तिदा अभयङ्करः। स्वस्ति न इन्द्रो वृद्धश्रवाः स्वस्ति नः पूषा विश्ववेदाः। स्वस्ति
नस्तार्क्ष्यो अरिष्टनेमिः स्वस्ति नो बृहस्पतिर्दधातु। आपान्तमन्युस्तृपलप्रभर्मा धुनिः

शिमीवाञ्छरुमाः ऋजीषी। सोमो विश्वान्यतसावनानि नार्वाग्निन्द्रं
प्रतिमानानिदेभुः॥९॥

ब्रह्मजज्ञानं प्रथमं पुरस्ताद्विसीमतः सुरुचो वेन आवः। सबुधिया उपमा अस्य
विष्ठाः सतश्च योनिमसतश्च विवः। स्योना पृथिवि भवाऽनृक्षरा निवेशनी। यच्छानः
शर्म सप्रथाः। गन्धद्वारां दुराधर्षां नित्यपुष्टां करीषिणीम्। ईश्वरीः सर्वभूतानां
तामिहोपह्वये श्रियम्। श्रीर्मे भजतु। अलक्ष्मीर्मे नश्यतु। विष्णुमुखा वै
देवाश्छन्दोभिरिमाँल्लोकाननपज्यमभ्यजयन्। महाः इन्द्रो वज्रबाहुः षोडशी शर्म
येच्छतु॥१०॥

स्वस्ति नो मघवा करोतु हन्तु पाप्मानं योऽस्मान् द्वेष्टि। सोमान् स्वरेण कृणुहि
ब्रह्मणस्पते। कक्षीवन्तं य औशिजम्। शरीरं यज्ञशमलं कुसीदं तस्मिन्त्सीदतु
योऽस्मान् द्वेष्टि। चरणं पवित्रं विततं पुराणं येन पूतस्तरति दुष्कृतानि। तेन
पवित्रेण शुद्धेन पूता अति पाप्मानमरातिं तरेम। सजोषा इन्द्र सगणो मरुद्भिः
सोमं पिब वृत्रहञ्छूर विद्वान्। जहि शत्रूँ रप मृधो नुदस्वाथाभयं कृणुहि विश्वतो
नः। सुमित्रा न आप ओषधयः सन्तु दुर्मित्रास्तस्मै भूयासुर्योऽस्मान् द्वेष्टि यं च
वयं द्विष्मः। आपो हि ष्ठा मयो भुवस्ता न ऊर्जे दधातन॥११॥

महेरणाय चक्षसे। यो वः शिवतमो रसस्तस्य भाजयते ह नः। उशतीरिव मातरः।
तस्मा अरङ्ग मामवो यस्य क्षयाय जिन्वथ। आपो जनयथा च नः।

॥अघमर्षणसूक्तम्॥

हिरण्यशृङ्गं वरुणं प्रपद्ये तीर्थं मे देहि याचितः। यन्मया भुक्तमसाधूनां पापेभ्यश्च
प्रतिग्रहः। यन्मे मनसा वाचा कर्मणा वा दुष्कृतं कृतम्। तन्न इन्द्रो वरुणो
बृहस्पतिः सविता च पुनन्तु पुनः पुनः। नमोऽग्नयेऽप्सुमते नम इन्द्राय नमो
वरुणाय नमो वारुण्यै नमोऽद्भ्यः॥१२॥

यदपां क्रूरं यदमेध्यं यदशान्तं तदपंगच्छतात्। अत्याशनादतीपानाद्यच्च उग्रात्

प्रतिग्रहात्। तन्नो वरुणो राजा पाणिना हवमर्शतु। सोऽहमपापो विरजो निर्मुक्तो
मुक्तकिल्बिषः। नाकस्य पृष्ठमारुह्य गच्छेद्ब्रह्मसलोकताम्। यश्चाप्सु वरुणः स
पुनाबधमर्षणः। इमं मे गङ्गे यमुने सरस्वति शुतुद्रि स्तोमं सचता परुष्ण्या।
असिक्रिया मरुद्वृधे वितस्तयाऽऽर्जीकीये शृणुह्या सुषोमया। ऋतं च सत्यं
चाभीद्धात्तपसोऽध्यजायत। ततो रात्रिरजायत ततः समुद्रो अर्णवः॥¹³॥

समुद्रादर्णवादधि संवत्सरो अजायत। अहोरात्राणि विदधद्विश्वस्य मिषतो वशी।
सूर्याचन्द्रमसौ धाता यथापूर्वमकल्पयत्। दिवं च पृथिवीं चान्तरिक्षमथो सुवः।
यत्पृथिव्या रजः स्वमान्तरिक्षे विरोदसी। इमास्तदापो वरुणः पुनाबधमर्षणः।
पुनन्तु वसवः पुनातु वरुणः पुनाबधमर्षणः। एष भूतस्य मध्ये भुवनस्य गोप्ता।
एष पुण्यकृतां लोकानेष मृत्योर्हिरण्मयम्। दावापृथिव्योर्हिरण्मयं सञ्श्रितं
सुवः॥¹⁴॥

स नः सुवः सञ्शिशधि। आर्द्रं ज्वलति ज्योतिरहमस्मि। ज्योतिर्ज्वलति
ब्रह्माहमस्मि। योऽहमस्मि ब्रह्माहमस्मि। अहमस्मि ब्रह्माहमस्मि। अहमेवाहं मां
जुहोमि स्वाहा। अकार्यकार्यवकीर्णी स्तेनो भ्रूणहा गुरुतल्पगः।
वरुणोऽपामधमर्षणस्तस्मात्पापात् प्रमुच्यते। रजो भूमिस्त्वमा रोदयस्व प्रवदन्ति
धीराः। आक्रान्त्समुद्रः प्रथमे विधर्मं जनयन्प्रजा भुवनस्य राजा। वृषा पवित्रे अधि
सानो अव्ये बृहत्सोमो वावृधे सुवान इन्दुः॥¹⁵॥

[1]

॥दुर्गासूक्तम्॥

जातवेदसे सुनवाम सोममरातीयतो निजहाति वेदः। स नः पर्षदति दुर्गाणि
विश्वा नावेव सिन्धुं दुरिताऽत्यग्निः। तामग्निवर्णां तपसा ज्वलन्तीं वैरोचनीं
कर्मफलेषु जुष्टाम्। दुर्गा देवी शरणमहं प्रपद्ये सुतरसि तरसे नमः। अग्ने त्वं
पारया नव्यो अस्मान्स्वस्तिभिरति दुर्गाणि विश्वा। पूश्च पृथ्वी बहुला न उर्वी भवा

तो॒काय॒ तन॑याय॒ शं योः। वि॒श्वानि॑ नो दु॒र्गहा॑ जा॒तवे॑दः सि॒न्धुं न ना॒वा दु॑रि॒ताति॑
 पर्षि। अ॒ग्ने अ॒त्रिव॒न्मन॑सा गृ॒णानो॑ऽस्माकं बो॒ध्यवि॑ता त॒नूना॑म्। पृ॒तना॒जित॑ः
 सह॑मानम॒ग्निमु॒ग्रं हु॑वेम पर॒मात्स॑धस्थात्। स नः॑ पर्ष॒दति॑ दु॒र्गाणि॑ वि॒श्वा क्षा॑म॒द्देवो॑
 अति॑ दु॒रिता॑ऽत्य॒ग्निः। प्र॒बोषि॑ क॒मीड्यो॑ अध्व॒रेषु॑ स॒नाच्च॑ होता न॒व्यश्च॑ स॒त्सि।
 स्वा॒ध्याग्ने॑ त॒नुवं पि॒प्रय॑स्वा॒स्मभ्य॑ च सौ॒भग॑माय॒जस्व। गो॒भिर्जु॑ष्ट॒मयु॑जो निषि॑क्तं तवै॒न्द्र
 वि॒ष्णोरनु॑स॒धरे॑म। नाक॑स्य पृ॒ष्ठम॒भि सं॒वसानो॑ वैष्ण॑वीं लो॒क इ॒ह मा॑दयन्ताम्॥¹⁶॥

[2]

॥व्याहृतिहोमन्त्राः॥

भूर॑न्न॒म॒ग्नये॑ पृ॒थिव्यै॑ स्वाहा॒ भुवो॑ऽन्नं वा॒यवे॑ऽन्तरि॑क्षाय॒ स्वाहा॒ सुव॑र॒न्नमा॑दि॒त्याय॑ दि॒वे
 स्वाहा॒ भूर्भुवः॑ सुव॑र॒न्नं च॒न्द्रम॑से दि॒ग्भ्यः॑ स्वाहा॒ नमो॑ दे॒वेभ्यः॑ स्व॒धा पि॒तृभ्यो॑ भूर्भुवः॑
 सुव॑र॒न्नमो॑म्॥¹⁷॥

[3]

भूर॑ग्नये॑ पृ॒थिव्यै॑ स्वाहा॒ भुवो॑ वा॒यवे॑ऽन्तरि॑क्षाय॒ स्वाहा॒ सुव॑रादि॒त्याय॑ दि॒वे स्वाहा॒
 भूर्भुवः॑ सुव॑श्च॒न्द्रम॑से दि॒ग्भ्यः॑ स्वाहा॒ नमो॑ दे॒वेभ्यः॑ स्व॒धा पि॒तृभ्यो॑ भूर्भुवः॑ सुव॑र॒ग्न
 ॐ॥¹⁸॥

[4]

भूर॑ग्नये॑ च पृ॒थिव्यै॑ च॒ मह॑ते च॒ स्वाहा॒ भुवो॑ वा॒यवे॑ चान्तरि॑क्षाय च॒ मह॑ते च॒ स्वाहा॒
 सुव॑रादि॒त्याय॑ च दि॒वे च॒ मह॑ते च॒ स्वाहा॒ भूर्भुवः॑ सुव॑श्च॒न्द्रम॑से च॒ नक्ष॑त्रेभ्यश्च
 दि॒ग्भ्यश्च॑ मह॑ते च॒ स्वाहा॒ नमो॑ दे॒वेभ्यः॑ स्व॒धा पि॒तृभ्यो॑ भूर्भुवः॑ सुव॑र्म॒हरो॑म्॥¹⁹॥

[5]

॥ज्ञानप्राप्त्यर्थहोममन्त्राः॥

पा॒हि नो॑ अ॒ग्न ए॒नसे॑ स्वाहा। पा॒हि नो॑ वि॒श्ववे॑द॒से स्वाहा॑। य॒ज्ञं पा॒हि वि॒भाव॑सो
 स्वाहा। सर्वं॑ पा॒हि श॑त॒क्रतो॑ स्वाहा॥²⁰॥

[6]

पा॒हि नो॑ अ॒ग्न ए॒क॒या। पा॒ह्यु॒त द्वि॒तीय॑या। पा॒ह्यूर्जं॑ तृ॒तीय॑या। पा॒हि गी॒र्भिश्च॑
त॒सृभिर्व॑सो॒ स्वाहा॑॥²¹॥

[7]

॥वेदविस्मरणाय जपमन्त्राः॥

यश्छन्द॑सामृष॒भो वि॒श्वरू॑पश्छन्दो॑भ्यश्छन्दा॑ऽस्याविवेश॑। सता॑ः शि॒क्यः
पुरो॑वाचो॑पनिषदिन्द्रो॑ ज्येष्ठ॑ इन्द्रि॒याय॑ ऋषि॑भ्यो नमो॑ दे॒वेभ्यः॑ स्व॒धा पि॒तृभ्यो॑ भूर्भुवः॒
सुव॑श्छन्द॒ ॐ॥²²॥

[8]

नमो॑ ब्रह्म॑णे धार॑णं मे अ॒स्त्वनि॑राकरणं धा॒रयि॑ता भूयासं॒ कर्ण॑योः श्रु॒तं मा च्यौ॑द्वं
ममो॑मुष्य॒ ॐ॥²³॥

[9]

॥तपः प्रशंसा॥

ऋ॒तं तपः॑ स॒त्यं तपः॑ श्रु॒तं तपः॑ शान्तं॑ तपो॒ दम॑स्तपः॒ शम॑स्तपो॒ दानं॑ तपो॒ यज्ञं॑ तपो॒
भूर्भुवः॒ सुव॑र्ब्रह्मै॒तदुपा॑स्यै॒तत्तपः॑॥²⁴॥

[10]

॥विहिताचरणप्रशंसा निषिद्धाचरणनिन्दा च॥

यथा॑ वृक्षस्य॑ स॒म्पुष्पि॑तस्य दू॒राद्गन्धो॑ वा॒त्ये॒वं पु॒ण्यस्य॑ कर्म॒णो दू॒राद्गन्धो॑ वा॒ति
यथा॑ऽसि॒धारां॑ क॒र्तेऽव॑हितामव॒क्रामे॑ यद्यु॒वे यु॒वे ह वा॑ वि॒ह्वयि॑ष्यामि क॒र्त॒
प॑तिष्यामीत्ये॒वम॒नृता॑दा॒त्मानं॑ जुगुप्सै॑त्॥²⁵॥

[11]

॥दहरविद्या॥

अ॒णो॒रणी॒यान्म॒हतो॒ मही॒याना॒त्मा गु॒हायां॒ निहि॑तोऽस्य ज॒न्तोः। तम॑क्रतुं पश्यति
वी॒तशो॒को धा॒तुः प्र॒सादा॑न्महि॒मान॑मी॒शम्। स॒प्त प्रा॒णाः प्र॒भव॑न्ति तस्मा॑त्सप्तार्चिषः
स॒मिधो॑ स॒प्त जि॒ह्वाः। स॒प्त इ॒मे लो॒का येषु॑ चर॑न्ति प्रा॒णा गु॒हाश॑यां निहि॑ताः स॒प्त
स॒प्त। अतः॑ स॒मुद्रा गिर॑यश्च॒ सर्वे॑ऽस्मात्स्यन्द॑न्ते सिन्ध॑वः सर्व॑रूपाः। अत॑श्च वि॒श्वा
ओष॑धयो रसा॑च्च येनैष भू॒तस्ति॑ष्ठत्यन्तरा॒त्मा। ब्र॒ह्मा दे॒वानां॑ पद॒वीः
क॑वी॒नामृषि॑र्विप्रा॒णां महि॑षो मृ॒गाणा॑म्। श्ये॒नो गृ॒ध्राणा॑ः स्व॒धिति॑र्वनाना॑ः सोमः
प॒वित्र॑मत्यैति रेभन्। अ॒जामे॑कां लोहि॑तशुक्ल॒कृष्णां ब॒र्हीं प्र॒जां ज॒नय॑न्तीः
स॒रूपा॑म्। अ॒जो ह्ये॒को जुष॑माणोऽनु॒शेते॒ जहा॑त्येनां भु॒क्तभो॑गाम॒जौऽन्यः॥ २६ ॥

ह॒सः शु॒चिष॑द्वसु॒रन्तरि॑क्षस॒द्धोता॑ वेदि॒षदति॑थिर्दु॒रोण॑सत्। नृष॑द्वर॒सद॑तस॒द्धोम॑सद॒ब्जा
गो॒जा ऋ॒तजा॑ अ॒द्रिजा॑ ऋ॒तं बृ॒हत्। घृ॒तं मि॑मिक्षिरे घृ॒तम॑स्य योनि॑र्घृ॒ते श्रि॒तो
घृ॒तमु॑वस्य॒ धाम॑। अ॒नुष्व॑धमाव॒ह मा॒दय॑स्व स्वाहा॑कृतं वृष॒भ वक्षि॑ ह॒व्यम्।
स॒मुद्रा॑दूर्मिर्मधु॑माः उ॒दार॑दुपाः शु॒ना स॒ममृ॑तब॒मान॑ट्। घृ॒तस्य॑ नाम गु॒ह्यं यदस्ति॑
जि॒ह्वा दे॒वाना॑ममृ॒तस्य॑ नाभिः। व॒यं नाम॑ प्रब्र॑वामा घृ॒तेना॑स्मिन् य॒ज्ञे धा॑रयामा
नमो॑भिः। उप॑ ब्र॒ह्मा शृ॑णवच्छस्य॒मानं॑ चतुः शृ॒ङ्गोऽव॑मीद्वोर ए॒तत्। च॒त्वारि॑ शृ॒ङ्गा त्रयो॑
अस्य॑ पादा द्वे शी॒र्षे स॒प्त ह॑स्ता॒सो अ॒स्य। त्रिधा॑ ब॒द्धो वृ॑ष॒भो रो॑रवीति म॒हो दे॒वो
मर्त्या॑ः आ॒वि॒वेश॥ २७ ॥

त्रिधा॑ हि॒तं प॒णिभि॑र्गुह्य॒मानं॑ गवि॑ दे॒वासो॑ घृ॒तम॑न्वविन्दन्। इन्द्र॑ एकः॒ सूर्य॑ एकं
ज॒जान॑ वे॒नादे॑कः स्व॒धया॑ नि॒ष्टत॑क्षुः। यो दे॒वानां॑ प्रथ॒मं पु॒रस्ता॑द्वि॒श्वाधि॑यो रु॒द्रो
म॒हर्षिः। हि॒र॒ण्यग॑र्भं पश्य॒त जा॑यमानः स नो॑ दे॒वः शु॒भया॑ स्मृ॒त्या संयु॑नक्तु।
यस्मा॑त्प॒रं ना॑प॒रम॑स्ति किञ्चि॒द्यस्मान्ना॑णी॒यो न ज्या॑योऽस्ति कश्चित्। वृ॒क्ष इ॒व
स्तब्धो॑ दि॒वि ति॑ष्ठत्येक॒स्तेने॑दं पूर्णं पुरु॑षेण॒ सर्व॑म्। न कर्म॑णा न प्र॒जया॑ धने॒न
त्यागे॑नैके अमृ॒तब॒मान॑शुः। परे॑ण नाकं निहि॑तं गु॒हायां॒ विभ्रा॑जते यद्य॒तयो॑ वि॒शन्ति॑।
वे॒दान्त॑वि॒ज्ञान॑सुनि॒श्चिता॑र्थाः स॒न्यास॑योगाद्य॒तयः॑ शुद्ध॒सत्त्वाः। ते ब्र॑ह्मलो॒के तु
परा॑न्त॒काले॒ परा॑मृ॒तात्प॑रिमुच्यन्ति॒ सर्वे॑। द॒हं वि॑पापं प॒रमै॑श्व॒भूतं॑ यत्पु॑ण्ड॒रीकं
पु॒रम॑ध्यस॒स्थम्। तत्रा॑पि द॒हं ग॒गनं॑ वि॒शोक॑स्तस्मिन् यद॒न्तस्तदु॑पा॒सित॑व्यम्। यो

वेदादौ स्वरः प्रोक्तो वेदान्ते च प्रतिष्ठितः। तस्य प्रकृतिलीनस्य यः परः स
महेश्वरः॥²⁸॥

[12]

॥नारायणसूक्तम्॥

सहस्रशीर्षं देवं विश्वाक्षं विश्वशम्भुवम्। विश्वं नारायणं देवमक्षरं परमं पदम्।
विश्वतः परमान्नित्यं विश्वं नारायणं हरिम्। विश्वमेवेदं पुरुषस्तद्विश्वमुपजीवति।
पतिं विश्वस्यऽऽत्मेऽश्वरं शाश्वतं शिवमच्युतम्। नारायणं महाज्ञेयं विश्वात्मानं
परायणम्। नारायणपरो ज्योतिरात्मा नारायणः परः। नारायण परं ब्रह्म तत्त्वं
नारायणः परः। नारायणपरो ध्याता ध्यानं नारायणः परः। यच्च किञ्चिज्जगत्सर्वं
दृश्यते श्रूयतेऽपि वा॥ अन्तर्बहिश्च तत्सर्वं व्याप्य नारायणः स्थितः॥²⁹॥

अनन्तमव्ययं कविं समुद्रेऽन्तं विश्वशम्भुवम्। पद्मकोश प्रतीकाशं हृदयं
चाप्यधोमुखम्। अधो निष्ठा वितस्त्यान्ते नाभ्यामुपरि तिष्ठति। ज्वालमालाकुलं
भाती विश्वस्यऽऽयतनं महत्। सन्ततं शिलाभिस्तुलम्बत्याकोशसन्निभम्। तस्यान्ते
सुषिरं सूक्ष्मं तस्मिन्सर्वं प्रतिष्ठितम्। तस्य मध्ये महानग्निर्विश्वार्चिर्विश्वतोमुखः।
सोऽग्रभुग्विभजन्तिष्ठन्नाहारमजरः कविः। तिर्यगूर्ध्वमधः शायी रश्मयस्तस्य सन्तता।
सन्तापयति स्वं देहमापादतलमस्तकः। तस्य मध्ये वह्निशिखा अणीयौर्ध्वा
व्यवस्थितः। नीलतोयदमध्यस्थाद्विदुल्लेखेव भास्वरा। नीवारशूकवत्तन्वी पीता
भास्वत्यणूपमा। तस्याः शिखाया मध्ये परमात्मा व्यवस्थितः। स ब्रह्म स शिवः स
हरिः सेन्द्रः सोऽक्षरः परमः स्वरः॥³⁰॥ नारायणः स्थितो व्यवस्थितश्च द्वारि च॥

[13]

॥आदित्यमण्डले परब्रह्मोपासनम्॥

आदित्यो वा एष एतन्मण्डलं तपति तत्र ता ऋचस्तदृचा मण्डलं स ऋचां
लोकोऽथ य एष एतस्मिन्मण्डलेऽर्चिर्दीप्यते तानि सामानि स साम्नां मण्डलं स

साम्नां लोकोऽथ य एष एतस्मिन्मण्डलेऽर्चिषि पुरुषस्तानि यजूंषि स यजुषा
मण्डलं स यजुषां लोकः सैषा त्रय्येव विद्या तपति य एषोऽन्तरादित्ये हिरण्मयः
पुरुषः ॥ ३१ ॥

[14]

॥ आदित्यपुरुषस्य सर्वात्मकत्वप्रदर्शनम् ॥

आदित्यो वै तेज ओजो बलं यशश्चक्षुः श्रोत्रमात्मा मनो मन्युर्मनुर्मृत्युः सत्यो
मित्रो वायुराकाशः प्राणो लोकपालः कः किं कं तत्सत्यमन्नमृतो जीवो विश्वः
कतमः स्वयम्भु ब्रह्मतदमृत एष पुरुष एष भूतानामधिपतिर्ब्रह्मणः सायुज्यं
सलोकतामाप्नोत्येतासामेव देवतानां सायुज्यं सार्ष्टितां समानलोकतामाप्नोति
य एवं वेदैत्युपनिषत् ॥ ३२ ॥

[15]

॥ शिवोपासनमन्त्राः ॥

निधनपतये नमः। निधनपतान्तिकाय नमः। ऊर्ध्वाय नमः। ऊर्ध्वलिङ्गाय नमः।
हिरण्याय नमः। हिरण्यलिङ्गाय नमः। सुवर्णाय नमः। सुवर्णलिङ्गाय नमः। दिव्याय
नमः। दिव्यलिङ्गाय नमः। भवाय नमः। भवलिङ्गाय नमः। शर्वाय नमः।
शर्वलिङ्गाय नमः। शिवाय नमः। शिवलिङ्गाय नमः। ज्वलाय नमः। ज्वललिङ्गाय
नमः। आत्माय नमः। आत्मलिङ्गाय नमः। परमाय नमः। परमलिङ्गाय नमः।
एतत्सोमस्य सूर्यस्य सर्वलिङ्गं स्थापयति पाणिमन्त्रं पवित्रम् ॥ ३३ ॥

[16]

॥ पश्चिमवक्त्र-प्रतिपादक-मन्त्रः ॥

सद्योजातं प्रपद्यामि सद्योजाताय वै नमो नमः। भवे भवे नाति भवे भवस्व
माम्। भवोद्भवाय नमः ॥ ३४ ॥

॥उत्तरवक्त-प्रतिपादक-मन्त्रः॥

वामदेवाय नमो ज्येष्ठाय नमः श्रेष्ठाय नमो रुद्राय नमः कालाय नमः
कलविकरणाय नमो बलविकरणाय नमो बलाय नमो बलप्रमथनाय नमः
सर्वभूतदमनाय नमो मनोन्मनाय नमः॥³⁵॥

॥दक्षिणवक्त-प्रतिपादक-मन्त्रः॥

अघोरेभ्योऽथ घोरेभ्यो घोरघोरतरेभ्यः। सर्वेभ्यः सर्वशर्वेभ्यो नमस्ते अस्तु
रुद्ररूपेभ्यः॥³⁶॥

॥प्राग्वक्त-प्रतिपादक-मन्त्रः॥

तत्पुरुषाय विद्महे महादेवाय धीमहि। तन्नो रुद्रः प्रचोदयात्॥³⁷॥

॥ऊर्ध्ववक्त-प्रतिपादक-मन्त्रः॥

ईशानः सर्वविद्यानामीश्वरः सर्वभूतानां ब्रह्माधिपतिर्ब्रह्मणोऽधिपतिर्ब्रह्मा शिवो मे
अस्तु सदाशिवोम्॥³⁸॥

॥नमस्कारमन्त्रः॥

नमो हिरण्यबाहवे हिरण्यवर्णाय हिरण्यरूपाय हिरण्यपतयेऽम्बिकापतये उमापतये
पशुपतये नमो नमः॥³⁹॥

[22]

ऋतं सत्यं परं ब्रह्म पुरुषं कृष्णपिङ्गलम्। ऊर्ध्वरेतं विरूपाक्षं विश्वरूपाय वै
नमो नमः॥⁴⁰॥

[23]

सर्वो वै रुद्रस्तस्मै रुद्राय नमो अस्तु। पुरुषो वै रुद्रः सन्महो नमो नमः। विश्वं
भूतं भुवनं चित्रं बहुधा जातं जायमानं च यत्। सर्वो ह्येष रुद्रस्तस्मै रुद्राय नमो
अस्तु॥⁴¹॥

[24]

कद्रुद्राय प्रचेतसे मीढुष्टमाय तव्यसे। वो चेम शन्तमं हृदे। सर्वो ह्येष रुद्रस्तस्मै
रुद्राय नमो अस्तु॥⁴²॥

[25]

॥अग्निहोत्रहवण्याः उपयुक्तस्य वृक्षविशेषस्याभिधानम्॥

यस्य वैकङ्कत्यग्निहोत्रहवणी भवति प्रत्येवास्याहुतयस्तिष्ठन्त्यथो प्रतिष्ठित्यै॥⁴³॥

[26]

कृणुष्व पाजु इति पञ्च॥⁴⁴॥

[27]

॥भूदेवताकमन्त्रः॥

अदितिर्देवा गन्धर्वा मनुष्याः पितरोऽसुरास्तेषां सर्वभूतानां माता मेदिनी महता
मही सावित्री गायत्री जगत्पुर्वी पृथ्वी बहुला विश्वा भूता कतमा का या सा
सत्येत्यमृतेति वसिष्ठः॥⁴⁵॥

[28]

॥सर्वदेवता आपः॥

आपो वा इदं सर्वं विश्वा भूतान्यापः प्राणा वा आपः पशव
आपोऽन्नमापोऽमृतमापः सम्राडापो विराडापः स्वराडापश्छन्दाः स्यापो
ज्योतीः ष्यापो यजूः ष्यापः सत्यमापः सर्वा देवता आपो भूर्भुवः सुवराप ॐ ॥⁴⁶

[29]

॥सन्ध्यावन्दनमन्त्राः॥

आपः पुनन्तु पृथिवीं पृथिवी पूता पुनातु माम्। पुनन्तु ब्रह्मणस्पतिर्ब्रह्मपूता पुनातु
माम्। यदुच्छिष्टमभोज्यं यद्वा दुश्चरितं मम। सर्वं पुनन्तु मामापोऽसतां च
प्रतिग्रहः स्वाहा ॥⁴⁷

[30]

अग्निश्च मा मन्युश्च मन्युपतयश्च मन्युकृतेभ्यः। पापेभ्यो रक्षन्ताम्। यदह्ना
पापमकारिषम्। मनसा वाचा हस्ताभ्याम्। पद्भ्यामुदरेण शिश्ना। अहस्तदेवलुम्पतु।
यत्किं च दुरितं मयि। इदमहं माममृतयोनौ। सत्ये ज्योतिषि जुहोमि स्वाहा ॥⁴⁸

[31]

सूर्यश्च मा मन्युश्च मन्युपतयश्च मन्युकृतेभ्यः। पापेभ्यो रक्षन्ताम्। यद्रात्रिया
पापमकारिषम्। मनसा वाचा हस्ताभ्याम्। पद्भ्यामुदरेण शिश्ना। रात्रिस्तदेवलुम्पतु।
यत्किं च दुरितं मयि। इदमहं माममृतयोनौ। सूर्ये ज्योतिषि जुहोमि स्वाहा ॥⁴⁹

[32]

॥प्रणवस्य ऋष्यादिविवरणम्॥

ओमित्येकाक्षरं ब्रह्म। अग्निर्देवता ब्रह्म इत्यार्षम्। गायत्रं छन्दं परमात्मं सरूपम्।
सायुज्यं विनियोगम् ॥⁵⁰

[33]

॥गायत्र्यावाहनमन्त्रः॥

आया॑तु वर॑दा दे॒वी अ॒क्षरं॑ ब्रह्म॒सम्मि॑तम्। गाय॒त्री छन्द॑सां मा॒तेदं ब्र॑ह्म जुष॒स्व मे।
यद॑ह्नात्कुरु॑ते पा॒पं तद॑ह्नात्प्रति॒मुच्य॑ते। यद्रात्रिया॑त्कुरु॑ते पा॒पं तद्रात्रिया॑त्प्रति॒मुच्य॑ते।
सर्व॑ वर्णे॒ महा॑देवि स॒न्ध्यावि॑द्ये स॒रस्व॑ति॥⁵¹ ॥

[34]

ओजो॑ऽसि स॒होऽसि॑ बल॑मसि॒ भ्राजो॑ऽसि दे॒वानां॑ धाम॒ नामा॑सि॒ विश्व॑मसि॒
वि॒श्वायुः॑ सर्व॑मसि॒ सर्वा॑युरभिभू॒रो गाय॑त्रीमावा॑हयामि॒ सावि॑त्रीमावा॑हयामि॒
सर॑स्वतीमावा॑हयामि॒ छन्द॑ऋषी॒नावा॑हयामि॒ श्रिय॑मावा॑हयामि॒ गाय॑त्रिया
गाय॑त्रीच्छन्दो वि॒श्वा मि॒त्र ऋषिः॑ स॒विता॑ दे॒वता॑ऽग्नि॒मुखं॑ ब्रह्मा॒ शिरो॑ विष्णु॒र्हृदय॑
रुद्रः॑ शिखा॒ पृथि॑वी योनिः॒ प्राणा॑पानव्या॒नोदान॑समा॒ना स॒प्राणा॑ श्वेतवर्णा
सा॒ङ्ख्याय॑नसगोत्रा॒ गाय॑त्री चतुर्विं॒शत्य॑क्षरा॒ त्रिपदा॑ षड्भु॒क्षिः पञ्च॑शीर्षोपनयने
वि॑नियोग॒ ॐ भूः। ॐ भुवः। ओ॒ सुवः। ॐ महः। ॐ जनः। ॐ तपः। ओ॒
सत्य॑म्। ॐ तत्स॑वितुर्वरे॒ण्यं भर्गो॑ देवस्य॑ धीमहि। धियो॒ यो नः॑ प्रचोदया॑त्।
ओमा॑पो॒ ज्योती॑रसो॒ऽमृतं॑ ब्रह्म॒ भूर्भुवः॑ सुव॒रोम्॥⁵² ॥

[35]

॥गायत्री उपस्थानमन्त्रः॥

उ॒त्तमे॑ शिखरे जा॒ते भू॒म्यां प॑र्वत॒मूर्ध॑नि। ब्रा॒ह्मणै॑भ्योऽभ्य॑नुज्ञा॒ता ग॒च्छ दे॑वि
य॒थासु॑खम्। स्तु॒तो मया॑ वरदा वे॒दमा॑ता॒ प्रचो॑दयन्ती पवने॑ द्विजा॒ता। आयुः॑
पृथि॑व्यां द्रविणं ब्रह्मव॒र्चसं॑ मह्यं दत्त्वा प्रजा॑तुं ब्रह्मलो॒कम्॥⁵³ ॥

[36]

॥आदित्यदेवतामन्त्रः॥

घृणिः सूर्य आदित्यो न प्रभा वात्यक्षरम्। मधु क्षरन्ति तद्रसम्। सत्यं वै
तद्रसमापो ज्योतीरसोऽमृतं ब्रह्म भूर्भुवः सुवरोम्॥⁵⁴

[37]

॥त्रिसुपर्णमन्त्रः॥

ब्रह्ममेतु माम्। मधुमेतु माम्। ब्रह्ममेव मधुमेतु माम्। यास्ते सोम प्रजावत्सोभि
सो अहम्। दुःस्वप्नहन्दुरुष्यह। यास्ते सोम प्राणांस्तान् जुहोमि। त्रिसुपर्णमयाचितं
ब्राह्मणाय दद्यात्। ब्रह्महत्यां वा एते घ्नन्ति। ये ब्राह्मणास्त्रिसुपर्णं पठन्ति। ते सोमं
प्राप्नुवन्ति। आसहस्रात्पङ्क्तिं पुनन्ति। ॐ॥⁵⁵

[38]

ब्रह्म मेधया। मधु मेधया। ब्रह्ममेव मधु मेधया। अद्या नो देव सवितः
प्रजावत्सावीः सौभगम्। परा दुष्वप्रियः सुव। विश्वानि देव सवितर्दुरितानि परा
सुव। यद्भद्रं तन्म आ सुव। मधु वाता ऋतायते मधु क्षरन्ति सिन्धवः। माध्वीर्नः
सन्त्वोषधीः। मधु नक्तमुतोषसि मधुमत्पार्थिवः रजः। मधु द्यौरस्तु नः पिता।
मधुमान्नो वनस्पतिर्मधुमाः अस्तु सूर्यः। माध्वीर्गावो भवन्तु नः। य इमं
त्रिसुपर्णमयाचितं ब्राह्मणाय दद्यात्। भूणहत्यां वा एते घ्नन्ति। ये ब्राह्मणास्त्रिसुपर्णं
पठन्ति। ते सोमं प्राप्नुवन्ति। आसहस्रात्पङ्क्तिं पुनन्ति। ॐ॥⁵⁶

[39]

ब्रह्म मेधवा। मधु मेधवा। ब्रह्ममेव मधु मेधवा। ब्रह्मा देवानां पदवीः
कवीनामृषिर्विप्राणां महिषो मृगाणाम्। श्येनो गृध्राणां स्वधितिर्वनानां सोमः
पवित्रमत्येति रेभन्। हंसः शुचिषद्वसुरन्तरिक्षसद्भोता वेदिषदतिथिर्दुरोणसत्।
नृषद्वरसदृतसद्योमसदब्जा गोजा ऋतजा अद्रिजा ऋतं बृहत्। ऋचे त्वा रुचे त्वा
समित्स्रवन्ति सरितो न धेनाः। अन्तरहृदा मनसा पूयमानाः। घृतस्य धारा
अभिचाकशीमि। हिरण्ययो वेतसो मध्य आसाम्। तस्मिन्सुपर्णो मधुकृत्कुलायी
भजन्नास्ते मधुदेवताभ्यः। तस्यासते हरयः सप्ततीरे स्वधां दुहाना अमृतस्य धाराम्।

य इ॒दं त्रि॒सु॒पर्ण॑म॒याचि॑तं ब्रा॒ह्म॒णाय॑ द॒द्यात्। वी॒र॒ह॒त्यां वा ए॒ते घ्न॑न्ति। ये
ब्रा॒ह्म॒णास्त्रि॒सु॒पर्णं॑ पठ॑न्ति। ते सो॒मं प्राप्नु॑वन्ति। आ॒स॒ह॒स्रात्प॒ङ्क्तिं पुन॑न्ति। ॐ॥⁵⁷॥

[40]

॥मेधासूक्तम्॥

मे॒धा दे॒वी जु॒षमा॑णा न॒ आगा॑द्वि॒श्वार्ची॑ भ॒द्रा सु॑मन॒स्यमा॑ना। त्वया॒ जुष्टां॑ जु॒षमा॑णा
दु॒रुक्ता॑न्बृ॒हद्वे॑दे॒म वि॒दथे॑ सु॒वीराः॑॥ त्वया॒ जुष्टं॑ ऋ॒षिर्भव॑ति दे॒वि त्वया॒
ब्रह्मा॑ऽऽग॒तश्ची॑रु॒त त्वया॑॥ त्वया॒ जुष्टं॑श्चि॒त्रं वि॑न्दते वसु॒ सा नो॑ जु॒षस्व॒ द्रवि॑णो न
मे॒धे॥⁵⁸॥

[41]

मे॒धां म॒ इन्द्रो॑ द॒दातु॑ मे॒धां दे॒वी सर॑स्वती। मे॒धां मे॑ अ॒श्विना॑वु॒भावाध॑त्तां
पुष्क॑र॒स्रजा॑। अ॒प्सरा॑सु॒ च या॑ मे॒धा ग॑न्ध॒र्वेषु॑ च॒ यन्मनः॑। दे॒वी मे॒धा सर॑स्वती॒ सा
मा॑ मे॒धा सु॒रभि॑र्जुषता॒ऽस्वहा॑॥⁵⁹॥

[42]

आ मा॑ मे॒धा सु॒रभि॑र्वि॒श्वरू॑पा॒ हिर॑ण्यवर्णा॒ जग॑ती जग॒म्या। ऊ॒र्जस्व॑ती॒ पय॑सा॒
पिन्व॑माना॒ सा मा॑ मे॒धा सु॒प्रती॑का जुषन्ताम्॥⁶⁰॥

[43]

मयि॑ मे॒धां मयि॑ प्र॒जां मय्य॑ग्निस्तेजो॑ द॒धातु॑ मयि॑ मे॒धां मयि॑ प्र॒जां मयीन्द्र॑ इन्द्रि॒यं
द॑धातु॒ मयि॑ मे॒धां मयि॑ प्र॒जां मयि॑ सूर्यो॒ भ्राजो॑ द॒धातु॑॥⁶¹॥

[44]

॥मृत्युनिवारणमन्त्राः॥

अपै॑तु मृ॒त्युर॒मृतं॑ न॒ आग॑न्वैवस्व॒तो नो॒ अभ॑यं कृ॒णोतु॑। प॒र्णं वन॑स्पते॒रिवा॒भिनः॑
शी॒यता॑ र॒यिः स च॑ तान्नः॒ शची॑पतिः॥⁶²॥

परं॑ मृ॒त्यो अनु॑ परे॒हि प॒न्थां यस्ते॑ स्व इत॑रो दे॒व्याना॑त्। चक्षु॑ष्मते शृ॒ण्वते॑ ते

ब्रवीमि मा नः प्रजां रीरिषो मोत वीरान्॥⁶³॥

[45]

वातं प्राणं मनसाऽन्वा रभामहे प्रजापतिं यो भुवनस्य गोपाः। स नो मृत्योस्तायतां पात्रहंसो ज्योतीवा जरामशीमहि॥⁶⁴॥

[46]

अमुत्र भूयादध यद्यमस्य बृहस्पते अभिशस्तेरमुंश्चः। प्रत्यौहतामश्विना मृत्युमस्माद्देवानामग्रे भिषजा शर्चीभिः॥⁶⁵॥

[47]

हरिं हरन्तमनुयन्ति देवा विश्वस्येशानं वृषभं मतीनाम्। ब्रह्म सरूपमनुमेदमागादयनं मा विवंधीर्विक्रमस्व॥⁶⁶॥

[48]

शल्लैरग्निमिन्धान उभौ लोकौ सनेमहम्। उभयौलोकयोर्ऋध्वाऽति मृत्युं तराम्यहम्॥⁶⁷॥

[49]

मा छिंदो मृत्यो मा वंधीर्मा मे बलं विवृहो मा प्रमोषीः। प्रजां मा मे रीरिष आयुरुग्र नृचक्षसं त्वा हविषा विधेम॥⁶⁸॥

[50]

मा नो महान्तमुत मा नो अर्भकं मा न उक्षन्तमुत मा न उक्षितम्। मा नोऽवधीः पितरं मोत मातरं प्रिया मा नस्तनुवो रुद्र रीरिषः॥⁶⁹॥

[51]

मा नस्तोके तनये मा न आयुषि मा नो गोषु मा नो अश्वेषु रीरिषः। वीरान्मा नो रुद्र भामितोऽवंधीर्हविष्मन्तो नमसा विधेम ते॥⁷⁰॥

[52]

॥प्रजापतिप्रार्थनामन्त्रः॥

प्रजापते न बदेतान्यन्यो विश्वा जातानि परिता बभूव। यत्कांमास्ते जुहुमस्तन्नो अस्तु वयं स्याम पतयो रयीणाम्॥⁷¹॥

॥ इन्द्रप्रार्थनामन्त्रः ॥

स्व॒स्ति॒दा वि॒शस्प॑तिर्वृ॒त्रहा वि॒मृ॒धो व॒शी। वृ॒षेन्द्रः॑ पु॒र ए॑तु नः स्व॒स्ति॒दा
अ॒भय॑ङ्करः॥ 72 ॥

॥ मृत्युञ्जयमन्त्रः ॥

त्र्य॑म्बकं य॒जामहे॑ सु॒गन्धिं॑ पु॒ष्टि॒वर्ध॑नम्। उ॒र्वारु॒कमि॑व बन्ध॑नान्मृ॒त्योर्मु॑क्षी॒य
माऽमृ॑ता॒त्॥ 73 ॥

ये ते॑ स॒हस्र॑म॒युतं॑ पाशा॒ मृ॒त्यो म॑र्त्या॒य ह॑त्त॒वे। तान् य॒ज्ञस्य॑ मा॒यया॒ सर्वा॑न॒व
य॒जामहे॑॥ 74 ॥

मृ॒त्यवे॒ स्वाहा॑ मृ॒त्यवे॒ स्वाहा॑॥ 75 ॥

॥ पापनिवारक-मन्त्रः ॥

दे॒वकृ॑त॒स्यै॒न॒सोऽव॑य॒जन॑म॒सि स्वाहा॑। म॒नुष्य॑कृ॒त॒स्यै॒न॒सोऽव॑य॒जन॑म॒सि स्वाहा॑।
पि॒तृकृ॑त॒स्यै॒न॒सोऽव॑य॒जन॑म॒सि स्वाहा॑। आ॒त्मकृ॑त॒स्यै॒न॒सोऽव॑य॒जन॑म॒सि स्वाहा॑।
अ॒न्यकृ॑त॒स्यै॒न॒सोऽव॑य॒जन॑म॒सि स्वाहा॑। अ॒स्मत्कृ॑त॒स्यै॒न॒सोऽव॑य॒जन॑म॒सि स्वाहा॑।
यद्वि॒वा च॑ न॒क्तं चै॑न॒श्चकृ॑म तस्या॑व॒य॒जन॑म॒सि स्वाहा॑। यत्स्व॒प॒न्तश्च॑ जाग्र॑त॒श्चै॑न॒श्चकृ॑म
तस्या॑व॒य॒जन॑म॒सि स्वाहा॑।
यत्सु॒षु॒प्तश्च॑ जाग्र॑त॒श्चै॑न॒श्चकृ॑म तस्या॑व॒य॒जन॑म॒सि स्वाहा॑।
यद्वि॒द्वाꣳसश्च॑वि॒द्वाꣳसश्चै॑न॒श्चकृ॑म तस्या॑व॒य॒जन॑म॒सि स्वाहा॑। ए॒नस॑

॥वसुप्रार्थनामन्त्रः॥

यद्वा देवाश्चकृम जिह्वा गुरुमनसो वा प्रयुती देव हेडनम्। अरावा यो नो अभि
दुच्छुनायते तस्मिन्तदेनो वसवो निधेतन स्वाहा॥⁷⁷॥

॥कामोऽकार्षीत्-मन्युरकार्षीत् मन्त्रः॥

कामोऽकार्षीन्नमो नमः। कामोऽकार्षीत्कामः करोति नाहं करोमि कामः कर्ता
नाहं कर्ता कामः कारयिता नाहं कारयिता एष ते काम कामाय स्वाहा॥⁷⁸॥

मन्युरकार्षीन्नमो नमः। मन्युरकार्षीन्मन्युः करोति नाहं करोमि मन्युः कर्ता
नाहं कर्ता मन्युः कारयिता नाहं कारयिता एष ते मन्यो मन्यवे स्वाहा॥⁷⁹॥

॥विराजहोममन्त्राः॥

तिलाञ्जुहोमि सरसाः सपिष्टान् गन्धार मम चित्ते रमन्तु स्वाहा। गावो हिरण्यं
धनमन्नपानः सर्वेषां श्रियै स्वाहा। श्रियं च लक्ष्मीं च पुष्टिं च कीर्तिं
चानृण्यताम्। ब्रह्मण्यं बहुपुत्रताम्। श्रद्धामेधे प्रजाः सन्ददातु स्वाहा॥⁸⁰॥

तिलाः कृष्णास्तिलाः श्वेतास्तिलाः सौम्या वंशानुगाः। तिलाः पुनन्तु मे पापं
यत्किञ्चिद्दुरितं मयि स्वाहा। चोरस्यान्नं नवश्राद्धं ब्रह्महा गुरुतल्पगः। गोस्तेयः
सुरापानं भ्रूणहत्या तिला शान्तिः शमयन्तु स्वाहा। श्रीश्च लक्ष्मीश्च पुष्टीश्च कीर्तिं

चानृण्यताम्। ब्रह्मण्यं बहुपुत्रताम्। श्रद्धामेधे प्रज्ञा तु जातवेदः सन्ददातु स्वाहा॥⁸¹॥

[62]

प्राणापानव्यानोदानसमाना मे शुद्धन्तां ज्योतिरहं विरजां विपाप्मा भूयासुः स्वाहा।
वाङ्मनश्चक्षुःश्रोत्रजिह्वाघ्राणरेतोबुद्ध्याकूतिःसङ्कल्पा मे शुद्धन्तां ज्योतिरहं विरजां
विपाप्मा भूयासुः स्वाहा। त्वक्कर्ममांसरुधिरमेदोमज्जास्नायवोऽस्थीनि मे शुद्धन्तां
ज्योतिरहं विरजां विपाप्मा भूयासुः स्वाहा।

शिरःपाणिपादपार्श्वपृष्ठोरूदरजङ्घशिश्नोपस्थपायवो मे शुद्धन्तां ज्योतिरहं विरजां
विपाप्मा भूयासुः स्वाहा।

उत्तिष्ठ पुरुष हरित पिङ्गल लोहिताक्षि देहि देहि ददापयिता मे शुद्धन्तां ज्योतिरहं
विरजां विपाप्मा भूयासुः स्वाहा॥⁸²॥

[63]

पृथिव्यापस्तेजोवायुराकाशा मे शुद्धन्तां ज्योतिरहं विरजां विपाप्मा भूयासुः
स्वाहा।

शब्दस्पर्शरूपरसगन्धा मे शुद्धन्तां ज्योतिरहं विरजां विपाप्मा भूयासुः स्वाहा।

मनोवाक्कायकर्माणि मे शुद्धन्तां ज्योतिरहं विरजां विपाप्मा भूयासुः स्वाहा।

अव्यक्तभावैरहङ्कारैर्ज्योतिरहं विरजां विपाप्मा भूयासुः स्वाहा।

आत्मा मे शुद्धन्तां ज्योतिरहं विरजां विपाप्मा भूयासुः स्वाहा।

अन्तरात्मा मे शुद्धन्तां ज्योतिरहं विरजां विपाप्मा भूयासुः स्वाहा।

परमात्मा मे शुद्धन्तां ज्योतिरहं विरजां विपाप्मा भूयासुः स्वाहा।

क्षुधे स्वाहा। क्षुत्पिपासाय स्वाहा। विविट्यै स्वाहा। ऋग्विधानाय स्वाहा।

कर्षोत्काय स्वाहा। क्षुत्पिपासामलं ज्येष्ठामलक्ष्मीर्नाशयाम्यहम्। अभूतिमसंमृद्धिं च
सर्वान्निर्णुद मे पाप्मानं स्वाहा।

अन्नमय-प्राणमय-मनोमय-विज्ञानमय-मानन्दमय-मात्मा मे शुद्धन्तां ज्योतिरहं
विरजां विपाप्मा भूयासुः स्वाहा॥⁸³॥

[64]

॥वैश्वदेवमन्त्राः॥

अ॒ग्नये॑ स्वाहा॑। वि॒श्वेभ्यो॑ दे॒वेभ्यः॑ स्वाहा॑। ध्रु॒वाय॑ भू॒माय॑ स्वाहा॑। ध्रु॒वक्षि॑तये॒ स्वाहा॑।
अ॒च्युत॑क्षितये॒ स्वाहा॑। अ॒ग्नये॑ स्वि॒ष्टकृ॑ते स्वाहा॑ ॥ ध॒र्माय॑ स्वाहा॑। अध॑र्माय॒ स्वाहा॑।
अ॒द्भ्यः स्वाहा॑। ओ॒षधि॑वन॒स्पति॑भ्यः स्वाहा॑॥⁸⁴॥

र॒क्षोदे॑वजनेभ्यः स्वाहा॑। गृ॒ह्याभ्यः॑ स्वाहा॑। अ॒वसाने॑भ्यः स्वाहा॑। अ॒वसान॑पतिभ्यः
स्वाहा॑। स॒र्वभू॑तेभ्यः स्वाहा॑। का॒माय॑ स्वाहा॑। अ॒न्तरि॑क्षाय स्वाहा॑। यदे॒जति॑ जगे॒ति
यच्च॑ चेष्टेति॒ नाम्नो॑ भा॒गोऽयं॑ नाम्ने स्वाहा॑। पृ॒थिव्यै॑ स्वाहा॑। अ॒न्तरि॑क्षाय स्वाहा॑॥⁸⁵॥

दि॒वे स्वाहा॑। सू॒र्याय॑ स्वाहा॑। च॒न्द्रम॑से स्वाहा॑। नक्ष॑त्रेभ्यः स्वाहा॑। इन्द्रा॑य स्वाहा॑।
बृ॒हस्प॑तये स्वाहा॑। प्र॒जाप॑तये स्वाहा॑। ब्र॒ह्मणे॑ स्वाहा॑। स्व॒धा पि॑तृभ्यः स्वाहा॑। नमो॑
रु॒द्राय॑ पशुप॑तये स्वाहा॑॥⁸⁶॥

दे॒वेभ्यः॑ स्वाहा॑। पि॒तृभ्यः॑ स्व॒धाऽस्तु॑। भू॒तेभ्यो॑ नमः॑। म॒नुष्ये॑भ्यो ह॒न्ता॑। प्र॒जाप॑तये
स्वाहा॑। प॒रमे॑ष्ठिने स्वाहा॑। यथा॑ कू॒पः श॑तधा॒रः स॒हस्र॑धा॒रो अ॑क्षितः। ए॒वा मे॑ अस्तु
धा॒न्यः स॒हस्र॑धा॒रम॑क्षितम्। ध॒नं धा॑न्ये स्वाहा॑। ये भू॒ताः प्र॑चर॒न्ति दि॒वान॑क्तं
ब॒लिमि॑च्छ॒न्तो वि॒तुद॑स्य॒ प्रेष्याः॑। तेभ्यो॑ ब॒लिं पु॑ष्टि॒कामो॑ ह॒रामि॑ मयि॒ पुष्टि॑
पुष्टि॑पतिर्दधातु स्वाहा॑॥⁸⁷॥

[65]

ॐ तद्ब्र॒ह्म। ॐ तद्वा॒युः। ॐ तदा॒त्मा। ॐ तत्स॒त्यम्।

ॐ तत्सर्व॑म्। ॐ तत्पु॒रोर्नमः॑॥

अ॒न्तश्च॑रति॑ भू॒तेषु॑ गुहा॒यां वि॑श्वमूर्तिषु।

त्वं यज्ञ॑स्त्वं वष॒ट्कार॑स्त्वमिन्द्र॑स्त्वः रु॒द्रस्त्वं वि॑ष्णुस्त्वं ब्र॒ह्म त्वं प्र॑जापतिः।

त्वं तदा॑प॒ आपो॑ ज्योती॒ रसो॑ऽमृतं॒ ब्रह्म॑ भूर्भुव॒स्सुव॑रोम्॥⁸⁸॥

[66]

॥प्राणाहुतिमन्त्रः॥

श्रद्धायां प्राणे निविष्टोऽमृतं जुहोमि। श्रद्धायांमपाने निविष्टोऽमृतं जुहोमि। श्रद्धायां
व्याने निविष्टोऽमृतं जुहोमि। श्रद्धायांमुदाने निविष्टोऽमृतं जुहोमि। श्रद्धायां
समाने निविष्टोऽमृतं जुहोमि। ब्रह्मणि म आत्माऽमृतत्वाय॥ अमृतोपस्तरणमसि॥
श्रद्धायां प्राणे निविष्टोऽमृतं जुहोमि। शिवो मां विशाप्रदाहाय। प्राणाय स्वाहा॥
श्रद्धायांमपाने निविष्टोऽमृतं जुहोमि। शिवो मां विशाप्रदाहाय। अपानाय स्वाहा॥
श्रद्धायां व्याने निविष्टोऽमृतं जुहोमि। शिवो मां विशाप्रदाहाय। व्यानाय स्वाहा॥
श्रद्धायांमुदाने निविष्टोऽमृतं जुहोमि। शिवो मां विशाप्रदाहाय। उदानाय स्वाहा॥
श्रद्धायां समाने निविष्टोऽमृतं जुहोमि। शिवो मां विशाप्रदाहाय। समानाय
स्वाहा॥ ब्रह्मणि म आत्माऽमृतत्वाय। अमृतापिधानमसि॥⁸⁹॥

[67]

॥भुक्तान्नाभिमन्त्रणमन्त्रः॥

श्रद्धायां प्राणे निविश्यामृतं हुतम्। प्राणमन्त्रेनाप्यायस्व। श्रद्धायांमपाने
निविश्यामृतं हुतम्। अपानमन्त्रेनाप्यायस्व।
श्रद्धायां व्याने निविश्यामृतं हुतम्। व्यानमन्त्रेनाप्यायस्व। श्रद्धायांमुदाने
निविश्यामृतं हुतम्। उदानमन्त्रेनाप्यायस्व।
श्रद्धायां समाने निविश्यामृतं हुतम्। समानमन्त्रेनाप्यायस्व॥⁹⁰॥

[68]

॥भोजनान्ते आत्मानुसन्धानमन्त्रः॥

अङ्गुष्ठमात्रः पुरुषोऽङ्गुष्ठं च समाश्रितः। ईशः सर्वस्य जगतः प्रभुः प्रीणाति
विश्वभुक्॥॥91॥

॥ अवयवस्त्वस्थता-प्रार्थनामन्त्रः ॥

वाङ्मा॑ आ॒सन्। न॒सोः प्रा॒णः। अ॒क्ष्योश्चक्षुः॑। क॒र्णयोः श्रो॒त्रम्। बा॒हुवोर्बल॑म्।
ऊ॒रुवोरो॒जः। अ॒रि॒ष्टा वि॒श्वान्यङ्गो॑नि त॒नूः। त॒नुवा॑ मे स॒ह नम॑स्ते अस्तु मा मां
हि॒ंसीः॥⁹² ॥

॥ इन्द्रसप्तर्षि-संवादमन्त्रः ॥

वयः॑ सु॒पर्णा उ॒प॑ से॒दुरिन्द्रं॑ प्रि॒यमे॑धा ऋ॒षयो॑ नाध॑मानाः। अ॒प॑ ध्वा॒न्तमू॑र्णुहि पू॒र्धि
चक्षु॑र्मु॒ग्ध्यस्मान्नि॒धये॑ऽव ब॒द्धान्।

॥ हृदयालम्भनमन्त्रः ॥

प्रा॒णानां॑ ग्र॒न्थिर॑सि रु॒द्रो मां वि॒शान्त॑कः। तेना॒न्नेना॑प्याय॒स्व॥⁹³ ॥

॥ देवताप्राणनिरूपणमन्त्रः ॥

नमो॑ रु॒द्राय वि॒ष्णवे॑ मृ॒त्युर्मे॑ पा॒हि॥⁹⁴ ॥

॥ अग्निस्तुतिमन्त्रः ॥

त्वम॑ग्ने दु॒भि॒स्त्वमां॑शु॒क्षणि॒स्त्वम॒द्भ्यस्त्वम॒श्वम॑न॒स्पति॑। त्वं वनै॑भ्य॒स्त्वमोष॑धी॒भ्यस्त्वं नृ॒णां
नृ॒पते॑ जायसे शु॒चिः॥⁹⁵ ॥

॥ अभीष्टयाचनामन्त्राः ॥

शिवने॑ मे सन्ति॑ष्ठस्व स्योनेन॑ मे सन्ति॑ष्ठस्व सुभूतेन॑ मे सन्ति॑ष्ठस्व ब्रह्मवर्चसेन॑ मे
सन्ति॑ष्ठस्व यज्ञस्य॑र्धिमनु॑ सन्ति॑ष्ठस्वोप॑ ते यज्ञ॑ नम॑ उप॑ ते नम॑ उप॑ ते नमः॑ ॥⁹⁶ ॥

॥ परतत्त्व-निरूपणम् ॥

सत्यं॑ परं॑ परः॑ सत्यः॑ सत्येन॑ न सुव॑र्गाल्लो॒काध्य॑वन्ते क॒दाच॑न स॒ताः॑ हि स॒त्यं
तस्मा॑त्स॒त्ये र॑मन्ते ।

तप॑ इति॑ तपो॑ नान॑श॒नात्परं॑ यद्धि॑ परं॑ तप॑स्तद्दु॒र्द्धर्षं॑ तद्दु॒रा॑ध॒र्षं तस्मा॑त्तप॑सि रमन्ते॑ ।

दम॑ इति॑ निय॑तं ब्रह्म॑चा॒रिण॑स्तस्मा॑द्दमे॑ रमन्ते॑ ।

शम॑ इत्य॑रण्ये मु॒नय॑स्तस्मा॑च्छमे॑ रमन्ते॑ ।

दा॒नमि॑ति॒ सर्वा॑णि भू॒तानि॑ प्र॒शः॑सन्ति॒ दा॒नान्ना॑ति॒ दुष्करं॑ तस्मा॑द्दाने॑ रमन्ते॑ ।

ध॒र्म इति॑ ध॒र्मेण॑ सर्व॑मि॒दं परि॑गृहीतं ध॒र्मान्ना॑ति॒ दुष्करं॑ तस्मा॑द्ध॒र्मे र॑मन्ते॑ ।

प्र॒जन॑ इति॑ भू॒याः॑ स॒स्तस्मा॑द्भूयि॑ष्ठाः प्रजा॑यन्ते॒ तस्मा॑द्भूयि॑ष्ठाः प्र॒जन॑ने रमन्ते॑ऽग्नय॑ ।

इत्या॑ह॒ तस्मा॑द॒ग्नय॑ आधा॑तव्या अ॒ग्निहो॑त्रमित्या॑ह॒ तस्मा॑द॒ग्निहो॑त्रे रमन्ते॑ ।

य॒ज्ञ इति॑ य॒ज्ञो हि दे॒वास्तस्मा॑द्य॒ज्ञे र॑मन्ते॑ ।

मा॒न॒समि॑ति॒ वि॒द्वाः॑ स॒स्तस्मा॑द्वि॒द्वाः॑ स॒ एव॑ मा॒न॒से र॑मन्ते॑ ।

न्या॒स इति॑ ब्रह्मा॑ ब्रह्मा॑ हि परः॑ परो॑ हि ब्रह्मा॑ तानि॑ वा ए॒तान्य॑व॒राणि॑ परा॑सि
न्या॒स ए॒वात्य॑रेचय॒द्य ए॒वं वेदै॑त्युप॒निषत् ॥⁹⁷ ॥

॥ज्ञानसाधन-निरूपणम्॥

प्राजापत्यो हारुणिः सुपर्णेयः प्रजापतिं पितरमुपससार किं भगवन्तः परमं वदन्तीति तस्मै प्रोवाच ।

सत्येन वायुरावाति सत्येनाऽऽदित्यो रोचते दिवि सत्यं वाचः प्रतिष्ठा सत्ये सर्वं प्रतिष्ठितं तस्मात्सत्यं परमं वदन्ति ।

तपसा देवा देवतामग्र आयन्तपसर्षयः सुवरन्वविन्दं तपसा सपत्नान् प्रणुदामारातीस्तपसि सर्वं प्रतिष्ठितं तस्मात्तपः परमं वदन्ति ।

दमेन दान्ताः किंलिषमवधून्वन्ति दमेन ब्रह्मचारिणः सुवरगच्छन्दमो भूतानां दुराधर्षं दमे सर्वं प्रतिष्ठितं तस्माद्दमः परमं वदन्ति ।

शमेन शान्ताः शिवमाचरन्ति शमेन नाकं मुनयोऽन्वविन्दञ्छमो भूतानां दुराधर्षञ्छमे सर्वं प्रतिष्ठितं तस्माच्छमः परमं वदन्ति ।

दानं यज्ञानां वरूथं दक्षिणा लोके दातारः सर्वभूतान्युपजीवन्ति दानेनारातीरपानुदन्त दानेन द्विषन्तो मित्रा भवन्ति दाने सर्वं प्रतिष्ठितं तस्माद्दानं परमं वदन्ति ।

धर्मो विश्वस्य जगतः प्रतिष्ठा लोके धर्मिष्ठं प्रजा उपसर्पन्ति धर्मेण पापमपनुदति धर्मे सर्वं प्रतिष्ठितं तस्माद्धर्मं परमं वदन्ति ।

प्रजननं वै प्रतिष्ठा लोके साधु प्रजायास्तन्तु तन्वानः पितृणामनृणो भवति तदेव तस्यानृणं तस्मात् प्रजननं परमं वदन्त्यग्नयो वै त्रयीं विद्या ।

देवयानः पन्था गार्हपत्य ऋक्पृथिवी रथन्तरमन्वाहार्यपचनं यजुरन्तरिक्षं वामदेव्यमाहवनीयः सामं सुवर्गो लोको बृहत्तस्मादग्नीन्यं परमं वदन्त्यग्निहोत्रं सायं प्रातर्गृहाणां निष्कृतिः स्विष्टं सुहुतं यज्ञक्रतूनां प्रायणं सुवर्गस्य लोकस्य ज्योतिस्तस्मादग्निहोत्रं परमं वदन्ति ।

यज्ञ इति यज्ञेन हि देवा दिवं गता यज्ञेनासुरानपानुदन्त यज्ञेन द्विषन्तो मित्रा

भवन्ति यज्ञे सर्वं प्रतिष्ठितं तस्माद्वज्रं परमं वदन्ति ।

मानसं वै प्राजापत्यं पवित्रं मानसेन मनसा साधु पश्यति मानसा ऋषयः प्रजा
असृजन्त मानसे सर्वं प्रतिष्ठितं तस्मान्मानसं परमं वदन्ति ।

न्यास इत्याहुर्मनीषिणो ब्रह्माणं ब्रह्मा विश्वः कतमः स्वयम्भुः प्रजापतिः संवत्सर
इति संवत्सरोऽसावादित्यो य एष आदित्ये पुरुषः स परमेष्ठो ब्रह्मात्मा ।

याभिरादित्यस्तपति रश्मिभिस्ताभिः पर्जन्यो वर्षति पर्जन्येनौषधिवनस्पतयः
प्रजायन्त ओषधिवनस्पतिभिरन्नं भवत्यन्नेन प्राणाः प्राणैर्बलं बलेन तपस्तपसा श्रद्धा
श्रद्धया मेधा मेधया मनीषा मनीषया मनो मनसा शान्तिः शान्त्या चित्तं चित्तेन
स्मृतिः स्मृत्या स्मारः स्मारेण विज्ञानं विज्ञानेनात्मानं वेदयति तस्मादन्नं
ददन्त्सर्वाण्येतानि ददात्यन्नात् प्राणा भवन्ति ।

भूतानां प्राणैर्मनो मनसश्च विज्ञानं विज्ञानादानन्दो ब्रह्मयोनिः स वा एष पुरुषः
पञ्चधा पञ्चात्मा येन सर्वमिदं प्रोतं पृथिवी चान्तरिक्षं च द्यौश्च दिशश्चावान्तरदिशाश्च
स वै सर्वमिदं जगत्स च भूतं स भव्यं जिज्ञासक्लृप्त ऋतुजा रयिष्ठा ।

श्रद्धा सत्यो महस्वान्तपसो वरिष्ठाद्वाक्वा तमेवं मनसा हृदा च भूयो न
मृत्युमुपयाहि विद्वान्तस्मान्न्यासमेषां तपसामतिरिक्तमाहुर्वसुरण्वो विभूरसि प्राणे
त्वमसि सन्धाता ।

ब्रह्मन् त्वमसि विश्वधृत्तेजोदास्त्वमस्यग्निरसि वर्चोदास्त्वमसि सूर्यस्य द्युम्नोदास्त्वमसि
चन्द्रमस उपयामगृहीतोऽसि ब्रह्मणे त्वा ।

महस ओमित्यात्मानं युञ्जीतैतद्वै महोपनिषदं देवानां गुह्यं य एवं वेद ब्रह्मणो
महिमानमाप्नोति तस्माद्ब्रह्मणो महिमानमित्युपनिषत् ॥ १०८ ॥

[77]

तस्यै॒वं वि॒दुषो॑ य॒ज्ञस्याऽऽ॒त्मा य॒जमानः॑ श्रद्धा पत्नी शरीरमिध्ममुरो वेदिर्लोमानि
बर्हिर्वेदः शिखा हृदयं यूपः काम आज्यं मन्युः पशुस्तपोऽग्निर्दमः शमयिता
दक्षिणा वाग्धोता प्राण उद्गाता चक्षुरध्वर्युर्मनो ब्रह्मा ।

श्रोत्रमग्नीद्यावद्धियते सा दीक्षा यदश्नाति तद्धविर्यत्पिबति तदस्य सोमपानं यद्रमते
तदुपसदो यत्सध्वर्युपविशत्युत्तिष्ठते च स प्रवर्ग्यो यन्मुखं तदाहवनीयो या
व्याहृतिराहुतिर्यदस्य ।

विज्ञानं तज्जुहोति यत्सायं प्रातरत्ति तत्समिधं यत्प्रातर्मध्यं दिनं सायं च तानि
सवनानि ये अहोरात्रे ते दर्शपूर्णमासौ यैर्द्धमासाश्च मासाश्च ते चातुर्मास्यानि य
ऋतवस्ते पशुबन्धा ये सवत्सराश्च परिवत्सराश्च तेऽहर्गणाः सर्ववेदसं वा ।

एतत्सत्रं यन्मरणं तदेवभृथ एतद्वै जरामर्यमग्निहोत्रं सत्रं य एवं विद्वानुदगयने
प्रमीयते देवानामेव महिमानं गत्वाऽऽदित्यस्य सायुज्यं गच्छत्यथ ।

यो दक्षिणे प्रमीयते पितृणामेव महिमानं गत्वा चन्द्रमसः सायुज्यं गच्छत्येतौ वै
सूर्याचन्द्रमसौर्महिमानौ ब्राह्मणो विद्वानभिजयति तस्माद्ब्रह्मणो महिमानमाप्नोति
तस्माद्ब्रह्मणो महिमानमित्युपनिषत्॥ ११॥

[78]

ॐ सह नाववतु। सह नौ भुनक्तु। सह वीर्यं करवावहे। तेजस्वि नावधीतमस्तु
मा विद्विषावहे। ॐ शान्तिः शान्तिः शान्तिः॥

॥ ॐ शान्तिः शान्तिः शान्तिः॥ हरिः ॐ ॥

॥ कृष्णयजुर्वेदीयतैत्तिरीय-काठकम् ॥

॥प्रथमः प्रश्नः॥

संज्ञानं विज्ञानं प्रज्ञानं जानदभिजानत्।
सङ्कल्पमानं प्रकल्पमानमुपकल्पमानमुपकृतं क्लृप्तम्।
श्रेयो वसीय आयत्सम्भूतं भूतम्।
चित्रः केतुः प्रभानाभान्सम्भान्।
ज्योतिष्माऽस्तेजस्वानातपऽस्तपन्नभितपन्।
रोचनो रोचमानः शोभनः शोभमानः कल्याणः।
दर्शा दृष्टा दर्शता विश्वरूपा सुदर्शना।
आप्यायमाना प्यायमाना प्याया सूनृतेरा।
आपूर्यमाणा पूर्यमाणा पूरयन्ती पूर्णा पौर्णमासी।
दाता प्रदाताऽऽनन्दो मोदः प्रमोदः॥₅॥
आवेशयन्निवेशयन्त्संवेशनः सःशान्तः शान्तः।
आभवन्प्रभवन्त्सम्भवन्त्सम्भूतो भूतः।
प्रस्तुतं विष्टुतं सऽस्तुतं कल्याणं विश्वरूपम्।
शुक्रममृतं तेजस्वि तेजः समिद्धम्।
अरुणं भानुमन्मरीचिमदभितपत्तपस्वत्।
सविता प्रसविता दीप्तो दीपयन्दीप्यमानः।
ज्वलञ्ज्वलिता तपन्वितपन्त्सन्तपन्।
रोचनो रोचमानः शुम्भूः शुम्भमानो वामः।
सुता सुन्वती प्रसुता सूयमानाऽभिषूयमाणा।
पीती प्रपा सम्पा तृप्तिस्तर्पयन्ती॥₂॥

का॒न्ता का॒म्या का॒मजा॒ताऽऽयु॑ष्मती का॒मदु॒घा॑।
 अ॒भि॒शा॒स्ताऽनु॑मन्ताऽऽन॒न्दो मो॒दः प्र॒मोदः॑।
 आ॒सा॒दय॑न्निषा॒दय॑न्त्स॒सा॒दनः॑ स॒सन्नः॑ स॒न्नः।
 आ॒भूर्वि॒भूः प्र॒भूः श॒म्भूर्भुवः॑।
 प॒वित्रं॑ पवयिष्यन्पू॒तो मे॒ध्यः।
 य॒शो य॒शस्वा॒नायु॒रमृ॒तः।
 जी॒वो जी॑विष्यन्त्स्वर्गो लो॒कः।
 स॒ह॒स्वान्त॑स॒हीया॒नो ज॑स्वान्त॒सह॑मानः।
 ज॒यन्न॑भि॒जय॑न्त्सु॒द्रवि॑णो द्रवि॒णोदाः॑।
 आ॒र्द्रप॑वित्रो ह॒रि॒केशो॑ मो॒दः प्र॒मोदः॑॥३॥
 अ॒रु॒णोऽरु॒णर॑जाः पु॒ण्डरी॑को वि॒श्वजि॑द॒भिजि॑त्।
 आ॒र्द्रः पि॒न्व॒मानो॑ऽन्न॒वान्न॑स॒वानि॑रा॒वान्।
 स॒र्वो॒षधः॑ स॒म्भरो॑ मह॒स्वान्।
 ए॒ज॒त्का जी॑व॒त्काः।
 क्षु॒ल्ल॒काः शि॑पि॒विष्ट॒काः।
 स॒रि॒स्र॒राः सु॒शे॒रवः॑।
 अ॒जि॒रासो॑ ग॒मि॒ष्णवः॑।
 इ॒दानी॑ त॒दानी॑मे॒तर्हि॑ क्षि॒प्रम॑जि॒रम्।
 आ॒शु॒र्नि॒मेषः॑ फ॒णो द्र॑वन्नति॒द्रवन्।
 त्वर॑स्त्वर॒माण आ॑शु॒राशी॑याञ्ज॒वः।
 अ॒ग्नि॒ष्टोम उ॒क्थ्यो॑ऽति॒रात्रो॑ द्वि॒रात्र॑स्ति॒रात्रश्च॑तू॒रात्रः॑।
 अ॒ग्नि॒र्ऋ॒तुः सूर्य॑ ऋ॒तुश्च॒न्द्रमा॑ ऋ॒तुः।

भूर॒ग्निं च॑ पृ॒थि॒वीं च॑ मां च॑।
त्री॒ङ्श्च॑ लो॒कान्त्सं॑वत्स॒रं च॑।
प्रजाप॑तिस्त्वा सादयतु।
तया॑ दे॒वत॑याऽङ्गि॒रस्व॑द्भु॒वा सी॑द।
भुवो॑ वा॒युं चा॒न्तरि॑क्षं च॑ मां च॑।
त्री॒ङ्श्च॑ लो॒कान्त्सं॑वत्स॒रं च॑।
प्रजाप॑तिस्त्वा सादयतु।
तया॑ दे॒वत॑याऽङ्गि॒रस्व॑द्भु॒वा सी॑द।
स्व॑रादि॒त्यं च॑ दि॒वं च॑ मां च॑।
त्री॒ङ्श्च॑ लो॒कान्त्सं॑वत्स॒रं च॑।
प्रजाप॑तिस्त्वा सादयतु।
तया॑ दे॒वत॑याऽङ्गि॒रस्व॑द्भु॒वा सी॑द।
भूर्भुवः॑ स्व॑श्च॒न्द्रम॑सं च॑ दि॒शश्च॑ मां च॑।
त्री॒ङ्श्च॑ लो॒कान्त्सं॑वत्स॒रं च॑।
प्रजाप॑तिस्त्वा सादयतु।
तया॑ दे॒वत॑याऽङ्गि॒रस्व॑द्भु॒वा सी॑द॥₅॥

त्वमे॒व त्वां वै॑त्थ॒ योऽसि॑ सोऽसि॑।
त्वमे॒व त्वा॑म॒चैषीः॑।
चि॒तश्चा॑सि॒ सच्चि॑तश्चा॒स्यग्ने॑।
ए॒तावा॒ङ्श्चा॑सि॒ भूया॑ङ्श्चा॒स्यग्ने॑।

यत्ते॑ अ॒ग्ने न्यूनं॑ यदु॒ तेऽति॑रिक्तम्।
 आ॒दि॒त्यास्तदङ्गि॑रसश्चिन्वन्तु।
 वि॒श्वे ते दे॒वाश्चि॑तिमा॒पूर॑यन्तु।
 चि॒तश्चा॑सि स॒धित॑श्चास्यग्ने।
 ए॒तावा॑श्चा॒सि भू॒याश्चा॑स्यग्ने।
 मा ते॑ अ॒ग्ने च॒ येन॒ माऽति॑ च॒ येनाऽऽयु॑रावृक्षि।
 स॒र्वेषां॑ ज्योति॑षां ज्योति॒र्यद॑दावुदेति।
 तप॑सो जा॒तम॑निभृष्ट॒मोजः॑।
 तत्ते॑ ज्योति॑रिष्टके।
 तेन॑ मे तप।
 तेन॑ मे ज्वल।
 तेन॑ मे दीदिहि।
 याव॑द्दे॒वाः।
 याव॑दसा॒ति सूर्यः॑।
 याव॑दु॒तापि॒ ब्रह्म॑॥६॥

[३]

स॒व॒त्स॒रोऽसि॑ परि॒व॒त्स॒रोऽसि॑।
 इ॒दा॒व॒त्स॒रोऽसी॑दु॒व॒त्स॒रोऽसि॑।
 इ॒द्व॒त्स॒रोऽसि॑ व॒त्स॒रोऽसि॑।
 तस्य॑ ते वस॒न्तः शि॒रः॑।
 ग्री॒ष्मो दक्षि॑णः प॒क्षः॑।
 व॒र्षाः पु॒च्छ॑म्।
 श॒रदु॑त्तरः प॒क्षः॑।

हे॒म॒न्तो म॒ध्यम्।
 पू॒र्व॒प॒क्षाश्चि॑तयः।
 अ॒प॒र॒प॒क्षाः पु॒री॑षम्॥७॥
 अ॒हो॒रा॒त्राणी॑ष्टकाः।
 ऋ॒ष॒भो॑ऽसि स्व॒र्गो लो॒कः।
 यस्या॑ दि॒शि म॒हीय॑से।
 ततो॑ नो म॒ह् आव॑ह।
 वा॒युर्भू॑त्वा सर्वा॒ दि॒श आवा॑हि।
 सर्वा॒ दि॒शोऽनु॑विवा॑हि।
 सर्वा॒ दि॒शोऽनु॑संवा॑हि।
 चि॒त्या चि॒तिमा॑पृण।
 अचि॑त्या चि॒तिमा॑पृण।
 चि॒द॑सि स॒मु॒द्रयो॑निः॥८॥
 इ॒न्दु॒र्दक्षः॑ श्ये॒न ऋ॒तावा॑।
 हि॒र॑ण्यपक्षः शकु॒नो भु॑र॒ण्युः।
 म॒हान्त्स॒धस्थे॑ ध्रु॒व आ॑निष॑त्तः।
 नम॑स्ते अस्तु मा मा॑ हि॒ंसीः।
 ए॒ति प्रे॒ति वी॒ति स॑मित्यु॒दिति॑।
 दि॒वं मे॑ यच्छ।
 अ॒न्तरि॑क्षं मे॑ यच्छ।
 पृ॒थि॒वीं मे॑ यच्छ।
 पृ॒थि॒वीं मे॑ यच्छ।

अ॒न्तरि॑क्षं मे यच्छ।

दि॒वं मे यच्छ।

अ॒ह्ना प्रसा॑रय।

रा॒त्र्या सम॑च।

रा॒त्र्या प्रसा॑रय।

अ॒ह्ना सम॑च।

का॒मं प्रसा॑रय।

का॒मं॑ सम॑च॥९॥

[4]

भूर्भु॒वः स्वः॑।

ओ॒जो ब॒लम्॑।

ब्र॒ह्म क्ष॒त्रम्।

य॒शो म॒हत्।

स॒त्यं तपो॑ ना॒म॑।

रू॒पम॒मृत॑म्।

चक्षुः॑ श्रो॒त्रम्॑।

म॒न॒ आयुः॑।

वि॒श्वं य॒शो म॒हः।

स॒मं तपो॑ ह॒रो भाः॑।

जा॒तवे॑दा॒ यदि॑ वा पा॒वको॑ऽसि॑।

वै॒श्वान॒रो यदि॑ वा वैद्यु॒तोऽसि॑।

शं प्र॒जाभ्यो॑ यज॑मानाय लो॒कम्।

ऊ॒र्जं पु॒ष्टिं द॑द॒दभ्या॑व॑वृ॒त्स्व॥१०॥

रा॒ज्ञी॑ वि॒रा॒ज्ञी॑।
 स॒म्रा॒ज्ञी॑ स्व॒रा॒ज्ञी॑।
 अ॒र्चिः शो॒चिः।
 तपो॒ हरो॒ भाः।
 अ॒ग्नि॒रिन्द्रो॒ बृह॒स्पतिः॑।
 वि॒श्वे दे॒वा भुव॑नस्य गो॒पाः।
 ते मा॒ सर्वे॒ यश॑सा॒ सꣳसृ॑जन्तु॥¹¹॥

अ॒स॒वे स्वा॒हा व॒स॒वे स्वा॒हा॑।
 वि॒भु॒वे स्वा॒हा वि॒व॒स्वते॒ स्वा॒हा॑।
 अ॒भि॒भु॒वे स्वा॒हाऽधि॑पतये स्वा॒हा॑।
 दि॒वां प॒तये॒ स्वा॒हाऽह॑स्प॒त्याय॒ स्वा॒हा॑।
 चा॒क्षुष्म॒त्याय॒ स्वा॒हा॑ ज्योतिष्म॒त्याय॒ स्वा॒हा॑।
 रा॒ज्ञे स्वा॒हा वि॒रा॒ज्ञे स्वा॒हा॑।
 स॒म्रा॒ज्ञे स्वा॒हा स्व॒रा॒ज्ञे स्वा॒हा॑।
 शू॒षा॒य स्वा॒हा सू॒र्या॒य स्वा॒हा॑।
 च॒न्द्रम॑से स्वा॒हा ज्योति॑षे स्वा॒हा॑।
 सꣳस॒र्पा॒य स्वा॒हा क॒ल्या॒णाय॒ स्वा॒हा॑।
 अ॒र्जु॒नाय॒ स्वा॒हा॑॥¹²॥

वि॒प॒श्चिते॒ पव॑मानाय गायत।
 म॒ही न धा॒राऽत्य॑न्धो अ॒र्षति॑।

अहि॑र्ह जी॒र्णामति॑सर्पति॒ ब॒चम्।
 अत्यो॒ न क्रीड॑न्नसर॒द्धृषा॒ हरिः॑।
 उप॒याम॑गृहीतोऽसि मृत्य॑वे॒ ब॒ा जुष्टं॑ गृह्णामि।
 ए॒ष ते॒ योनि॑र्मृत्य॒वे॒ ब॒ा।
 अप॑मृत्युमप॒क्षुधम्॑।
 अपे॒तः श॒पथं॑ जहि।
 अधा॑ नो अ॒ग्र आव॑ह।
 रा॒यस्पोष॑ सह॒स्त्रिणम्॑॥₁₃॥
 ये ते॑ स॒हस्र॑म॒युतं॑ पाशाः॑।
 मृत्यो॒ मर्त्या॑य॒ हन्त॑वे।
 तान् य॒ज्ञस्य॑ मा॒यया॑।
 सर्वा॑नव॒यजाम॑हे।
 भ॒क्षोऽस्य॑मृत॒भक्षः॑।
 तस्य॑ ते मृत्युपी॑तस्यामृत॒वतः॑।
 स्व॒गाकृ॑तस्य॒ मधु॑मतः।
 उप॑हूतस्योप॑हूतो भक्षयामि।
 म॒न्द्राऽभि॑भूतिः के॒तुर्य॒ज्ञानां॑ वाक्।
 असा॑वेहि॑॥₁₄॥
 अ॒न्धो जा॑गृविः प्राण।
 असा॑वेहि॑।
 ब॒धि॒र आ॑क्रन्दयितरपान।
 असा॑वेहि॑।

अ॒ह॒स्तो॒स्त्वा चक्षुः॑।

असा॒वेहि॑।

अ॒पा॒दा॒शो मनः॑।

असा॒वेहि॑।

क॒वे वि॒प्र॒चि॒त्ते श्रो॒त्र।

असा॒वेहि॑ ॥ 15 ॥

सु॒ह॒स्तः सु॒वा॒साः।

शू॒षो ना॒मा॒स्य॒मृ॒तो म॒र्त्येषु॑।

तं त्वा॒ऽहं॑ त॒था वे॒द।

असा॒वेहि॑।

अ॒ग्नि॒र्मे वा॒चि श्रि॒तः।

वा॒ग्घृ॒द॒ये।

हृ॒द॒यं म॒यि।

अ॒ह॒म॒मृ॒ते।

अ॒मृ॒तं ब्र॒ह्म॒णि।

वा॒यु॒र्मे प्रा॒णे श्रि॒तः ॥ 16 ॥

प्रा॒णो हृ॒द॒ये।

हृ॒द॒यं म॒यि।

अ॒ह॒म॒मृ॒ते।

अ॒मृ॒तं ब्र॒ह्म॒णि।

सू॒र्यो मे चक्षु॑षि श्रि॒तः।

चक्षु॑र्हृ॒द॒ये।

हृद॑यं म॒यि।

अ॒हम॒मृते॑।

अ॒मृतं ब्रह्म॑णि।

च॒न्द्रमा॑ मे॒ मन॑सि श्रि॒तः॥¹⁷॥

मनो॑ हृद॑ये।

हृद॑यं म॒यि।

अ॒हम॒मृते॑।

अ॒मृतं ब्रह्म॑णि।

दि॒शो मे॒ श्रोत्रे॑ श्रि॒ताः।

श्रोत्र॑ हृद॑ये।

हृद॑यं म॒यि।

अ॒हम॒मृते॑।

अ॒मृतं ब्रह्म॑णि।

आपो॑ मे॒ रेत॑सि श्रि॒ताः॥¹⁸॥

रेतो॑ हृद॑ये।

हृद॑यं म॒यि।

अ॒हम॒मृते॑।

अ॒मृतं ब्रह्म॑णि।

पृ॒थि॒वी मे॒ शरी॑रे श्रि॒ता।

शरी॑र हृद॑ये।

हृद॑यं म॒यि।

अ॒हम॒मृते॑।

अ॒मृतं॑ ब्र॒ह्म॑णि।

ओ॒षधि॑व॒नस्प॑तयो॑ मे॒ लोम॑सु श्रि॒ताः॑ ॥ १९ ॥

लोमा॑नि हृद॑ये।

हृद॑यं मयि॑।

अ॒हम॑मृते॑।

अ॒मृतं॑ ब्र॒ह्म॑णि।

इन्द्रो॑ मे॒ बले॑ श्रि॒तः।

बल॑ हृद॑ये।

हृद॑यं मयि॑।

अ॒हम॑मृते॑।

अ॒मृतं॑ ब्र॒ह्म॑णि।

पर्जन्यो॑ मे॒ मूर्ध्नि॑ श्रि॒तः॑ ॥ २० ॥

मूर्धा॑ हृद॑ये।

हृद॑यं मयि॑।

अ॒हम॑मृते॑।

अ॒मृतं॑ ब्र॒ह्म॑णि।

ईशा॑नो मे॒ मन्यौ॑ श्रि॒तः।

म॒न्युर्हृद॑ये।

हृद॑यं मयि॑।

अ॒हम॑मृते॑।

अ॒मृतं॑ ब्र॒ह्म॑णि।

आ॒त्मा म॑ आ॒त्मनि॑ श्रि॒तः॑ ॥ २१ ॥

आ॒त्मा हृ॒दये।
हृ॒दयं म॒रि॒ये।
अ॒हम॒मृ॒तैः।
अ॒मृ॒तं ब्र॒ह्म॒णि।
पुन॑र्म आ॒त्मा पुन॑रायु॒रागा॑त्।
पुनः॑ प्रा॒णः पुन॑राकू॒तमा॑गात्।
वै॒श्वान॒रो र॒श्मिभि॑र्वावृ॒धानः॑।
अ॒न्तस्ति॑ष्ठ॒त्वमृ॑तस्य गो॒पाः॥₂₂॥

[8]

प्र॒जाप॑तिर्दे॒वान॑सृज॒त।
ते पा॒प्मना॑ सन्दि॒ता अ॑जायन्त।
तान्व्य॑द्यत्।
यद्व्य॑द्यत्।
तस्मा॑द्वि॒द्युत्।
तम॑वृश्चत्।
यदवृ॑श्चत्।
तस्मा॑द्वृष्टिः॑।
तस्मा॑द्यत्रै॒ते दे॒वते॑ अभि॒प्राप्नु॑तः।
वि च॑ ह॒वा॒स्य तत्र॑ पा॒प्मानं॑ द॒तः॥₂₃॥
वृश्च॑तश्च।
सैषा मी॑मा॒साऽग्नि॑हो॒त्र ए॒व स॑म्पन्ना।
अथो॑ आहुः।
सर्वे॑षु यज्ञ॒क्रतु॑ष्विति॑।

होष्यन्नप उपस्पृशेत्।

विद्युदसि विद्य मे पाप्मानमिति।

अथ हुबोपस्पृशेत्।

वृष्टिरसि वृश्च मे पाप्मानमिति।

यक्ष्यमाणो वेष्ट्वा वा।

वि च हैवास्येते देवते पाप्मानं दत्तः॥²⁴॥

वृश्चतश्च।

अत्य॒हो हाऽऽरुणिः।

ब्रह्मचारिणे॑ प्रश्नान्प्रोच्य प्रजिघाय।

परेहि।

प्लक्षं दय्याम्पातिं पृच्छ।

वेत्थं सावित्रा(3)न्न वेत्था(3) इति।

तमागत्यं पप्रच्छ।

आचार्यो मा प्राहैषीत्।

वेत्थं सावित्रा(3)न्न वेत्था(3) इति।

स होवाच वेदेति॥²⁵॥

स कस्मिन्नतिष्ठित इति।

परोरजसीति।

कस्तद्यत्परोरजा इति।

एष वाव स परोरजा इति होवाच।

य एष तपति।

एषोऽर्वाग्रजा इति।

स कस्मिन्नेष इति।

सत्य इति।

किं तत्सत्यमिति।

तप इति॥²⁶॥

कस्मिन्नु तप इति।

बल इति।

किं तद्वलमिति।

प्राण इति।

मा स्म प्राणमतिपृच्छ इति माऽऽचार्योऽब्रवीदिति होवाच ब्रह्मचारी।

स होवाच प्लक्षो दय्याम्पातिः।

यद्वै ब्रह्मचारिन्प्राणमत्यप्रक्ष्यः।

मूर्धा ते व्यपतिष्यत्।

अहमुत आचार्याच्छ्रेयान्भविष्यामि।

यो मा सावित्रे समवादिष्टेति॥²⁷॥

तस्मात्सावित्रे न संवदेत।

स यो ह वै सावित्रं विदुषा सावित्रे संवदते।

सहास्मिञ्छ्रियं दधाति।

अनु ह वा अस्मा असौ तपञ्छ्रियं मन्यते।

अन्वस्मै श्रीस्तपो मन्यते।

अन्वस्मै तपो बलं मन्यते।

अन्वस्मै बलं प्राणं मन्यते।

स यदाह।

संज्ञानं विज्ञानं दर्शा दृष्टेति।

एष एव तत्॥²⁸॥

अथ यदाहं।

प्रस्तुतं विष्टुतं सुता सुन्वतीति।

एष एव तत्।

एष ह्येव तान्यहानि।

एष रात्रयः।

अथ यदाहं।

चित्रः केतुर्दाता प्रदाता सविता प्रसविताऽभिशास्ताऽनुमन्तेति।

एष एव तत्।

एष ह्येव तेऽहो मुहूर्ताः।

एष रात्रेः॥²⁹॥

अथ यदाहं।

पवित्रं पवयिष्यन्त्सहस्रान्त्सहीयानरुणोऽरुणरजा इति।

एष एव तत्।

एष ह्येव तेऽर्धमासाः।

एष मासाः।

अथ यदाहं।

अग्निष्टोम उक्थ्योऽग्निर्ऋतुः प्रजापतिः संवत्सर इति।

एष एव तत्।

एष ह्येव ते यज्ञक्रतवः।

एष ऋतवः॥³⁰॥

एष संवत्सरः।

अथ॒ यदा॑हं।
 इ॒दानीं॑ त॒दानी॑मि॒ति।
 ए॒ष ए॒व तत्।
 ए॒ष ह्ये॑व ते मु॒हूर्तानां॑ मु॒हूर्ताः॑।
 ज॒न॒को ह॒ वैदे॑हः।
 अ॒हो॒रा॒त्रैः स॒माज॑गाम।
 त॒५ हो॑चुः।
 यो वा अ॒स्मान् वेद॑।
 वि॒जह॑त्पा॒प्मान॑मेति॥₃₁॥
 स॒र्वमा॒युरे॑ति।
 अ॒भि स्व॒र्गं लो॒कं ज॑यति।
 नास्यामु॒ष्मिँल्लो॒केऽन्नं॑ क्षी॒यत॒ इति॑।
 वि॒जह॑द्ध॒ वै पा॒प्मान॑मेति।
 स॒र्वमा॒युरे॑ति।
 अ॒भि स्व॒र्गं लो॒कं ज॑यति।
 नास्यामु॒ष्मिँल्लो॒केऽन्नं॑ क्षी॒यते।
 य ए॒वं वेद॑।
 अ॒हीना॑ हाऽऽश्व॑थ्यः।
 सा॒वि॒त्रं वि॒दां च॑कार॥₃₂॥
 स ह॑ ह॒५सो हि॒र॒ण्मयो॑ भू॒त्वा।
 स्व॒र्गं लो॒कमि॑याय।
 आ॒दि॒त्यस्य॑ सायु॑ज्यम्।

ह॒सो ह॒ वै हि॒र॒ण्म॒यो भू॒त्वा।
 स्व॒र्गं लो॒कमे॑ति।
 आ॒दि॒त्यस्य॒ सायु॑ज्यम्।
 य ए॒वं वेद॑।
 दे॒वभा॒गो ह॑ श्रौ॒तरू॒षः।
 सा॒वि॒त्रं वि॒दां च॑कार।
 त॒ ह॒ वाग॑दृश्यमा॒नाऽभ्यु॑वाच॥³³॥
 सर्व॑ ब॒त गौ॒तमो॑ वेद॑।
 यः सा॑वि॒त्रं वेदे॑ति।
 स हो॑वाच।
 कै॒षा वा॒गसी॑ति।
 अ॒यम॒ह॒ सा॑वि॒त्रः।
 दे॒वाना॑मु॒त्तमो॑ लो॒कः।
 गु॒ह्यं म॒हो बि॒भ्रदि॑ति।
 ए॒ताव॑ति ह॒ गौ॒तमः॑।
 य॒ज्ञोप॒वीतं॑ कृ॒त्वाऽधो॑ निप॑पात।
 नमो॑ नम॒ इति॑॥³⁴॥
 स हो॑वाच।
 मा भै॑षीर्गौ॒तम।
 जि॒तो वै ते॑ लो॒क इति॑।
 तस्मा॑द्ये के च॑ सा॒वि॒त्रं वि॒दुः।
 सर्वे॑ ते जि॒तलो॑काः।
 स यो ह॒ वै सा॑वि॒त्रस्या॒ष्टाक्ष॑रं प॒दं श्रि॒याऽभि॑षि॒क्तं वेद॑।

श्रिया है॒वाभिषि॑च्यते।

घृ॒णिरि॒ति द्वे अ॒क्षरे॑।

सूर्य॑ इति॒ त्रीणि॑।

आ॒दि॒त्य इति॒ त्रीणि॑॥³⁵॥

ए॒तद्वै सा॑वि॒त्रस्या॒ष्टाक्ष॑रं प॒दं श्रि॒याऽभिषि॑क्तम्।

य ए॒वं वेद॑।

श्रिया है॒वाभिषि॑च्यते।

तदे॒तदृ॒चाऽभ्यु॑क्तम्।

ऋ॒चो अ॒क्षरे॑ पर॒मे व्यो॑मन्।

यस्मि॑न्दे॒वा अधि॒ विश्वे॑ निषे॒दुः।

यस्तं न वेद॒ किमृ॒चा क॑रिष्यति।

य इ॒त्तद्वि॒दुस्त॒ इमे॒ समा॑सत॒ इति॑।

न ह॒ वा ए॒तस्य॑र्चा न यजु॑षा न साम्नाऽथो॑ऽस्ति।

यः सा॑वि॒त्रं वेद॑॥³⁶॥

तदे॒तत्प॑रि॒ यद्वै॑वच॒क्रम्।

आ॒र्द्रं पि॒न्व॑मानं॒ स्वर्गे॑ लो॒क ए॑ति।

वि॒जह॑द्वि॒श्वा भू॑तानि॒ सम्प॑श्यत्।

आ॒र्द्रो ह॒ वै पि॒न्व॑मानः।

स्व॒र्गे लो॒क ए॑ति।

वि॒जह॑न्वि॒श्वा भू॑तानि॒ सम्प॑श्यन्।

य ए॒वं वेद॑।

शू॒षो ह॒ वै वा॑र्ष्णे॒यः।

आ॒दि॒त्येन॑ स॒माज॑गाम।

त॒ ॥ हो॑वाच।

एहि॑ सा॒वि॒त्रं वि॑द्धि।

अ॒यं वै स्व॒र्ग्योऽग्निः॑ पा॒रयि॑ष्णु॒रमृ॒तात्स॒म्भू॒त इति॑।

ए॒ष वा॒व स सा॑वि॒त्रः।

य ए॒ष त॑प॒ति।

एहि॑ मां वि॑द्धि।

इति॑ है॒वेन॑ तदु॑वाच॥³⁷॥

[९]

इ॒यं वा॒व स॒र॒घा॑।

तस्या॑ अ॒ग्नि॒रे॒व सा॑र॒घं म॑धु।

या ए॒ताः पू॒र्व॒प॒क्षा॒पर॒प॒क्षयो॑ रा॒त्रयः॑।

ता म॑धु॒कृतः॑।

या॒न्यहा॑नि।

ते म॑धु॒वृषाः॑।

स यो ह॒ वा ए॒ता म॑धु॒कृत॑श्च म॒धुवृ॑षा॒श्च वेद॑।

कुर्व॑न्ति हा॒स्ये॒ता अ॒ग्नौ म॑धु।

नास्ये॑ष्टा॒पूर्तं॑ ध॒यन्ति॑।

अथ॑ यो न वेद॑॥³⁸॥

न हा॑स्ये॒ता अ॒ग्नौ म॑धु॒ कुर्व॑न्ति।

ध॒यन्त्य॑स्येष्टा॒पूर्तम्॑।

यो ह॒ वा अ॑हो॒रा॒त्राणा॑ नाम॒धेया॑नि वेद॑।

नाहो॑रा॒त्रेष्वार्ति॑मा॒र्च्छति॑।

संज्ञानं विज्ञानं दर्शा दृष्टेति।

एतावन्नुवाकौ पूर्वपक्षस्याहोरात्राणां नामधेयानि।

प्रस्तुतं विष्टुतं सुता सुन्वतीति।

एतावन्नुवाकावपरपक्षस्याहोरात्राणां नामधेयानि।

नाहोरात्रेष्वार्तिमाच्छति।

य एवं वेद॥³⁹॥

यो ह वै मुहूर्तानां नामधेयानि वेद।

न मुहूर्तेष्वार्तिमाच्छति।

चित्रः केतुर्दाता प्रदाता सविता प्रसविताऽभिशास्ताऽनुमन्तेति।

एतेऽनुवाका मुहूर्तानां नामधेयानि।

न मुहूर्तेष्वार्तिमाच्छति।

य एवं वेद।

यो ह वा अर्धमासानां च मासानां च नामधेयानि वेद।

नार्धमासेषु न मासेष्वार्तिमाच्छति।

पवित्रं पवयिष्यन्त्सहस्रान्त्सहीयानरुणोऽरुणरजा इति।

एतेऽनुवाका अर्धमासानां च मासानां च नामधेयानि॥⁴⁰॥

नार्धमासेषु न मासेष्वार्तिमाच्छति।

य एवं वेद।

यो ह वै यज्ञक्रतूनां चर्तूनां च संवत्सरस्य च नामधेयानि वेद।

न यज्ञक्रतुषु नर्तुषु न संवत्सर आर्तिमाच्छति।

अग्निष्टोम उक्थ्योऽग्निर्ऋतुः प्रजापतिः संवत्सर इति।

एतेऽनुवाका यज्ञक्रतूनां चर्तूनां च संवत्सरस्य च नामधेयानि॥⁴¹॥

न यं॑ज्ञ॒क्र॒तुषु॑ न॒र्तुषु॑ न सं॒वत्स॒र आ॒र्ति॒मा॒र्च्छ॑ति।
य ए॒वं वेद॑।
यो ह॒ वै मु॑हूर्तानाँ मुहूर्तान् वेद॑।
न मु॑हूर्तानाँ मुहूर्तेष्वार्ति॒मा॒र्च्छ॑ति।
इ॒दानीँ॑ त॒दानी॒मिति॑।
ए॒ते वै मु॑हूर्तानाँ मुहूर्ताः।
न मु॑हूर्तानाँ मुहूर्तेष्वार्ति॒मा॒र्च्छ॑ति।
य ए॒वं वेद॑।
अथो॒ यथाँ॑ क्षे॒त्रज्ञो॑ भू॒त्वाऽनु॑प्रवि॒श्यान्न॑म॒त्ति।
ए॒वमे॒वैता॑न्क्षे॒त्रज्ञो॑ भू॒त्वाऽनु॑प्रवि॒श्यान्न॑म॒त्ति।
स ए॒तेषा॑मे॒व सं॒लो॒कता॑ꣳ सायु॑ज्यमश्नुते।
अप॑ पुनर्मृत्युं जयति।
य ए॒वं वेद॑॥₄₂॥

[10]

कश्चि॑द्ध॒ वा अ॒स्माल्लो॒कात्प्रेत्य॑।
आ॒त्मानं॑ वेद।
अ॒यम॒हम॒स्मीति॑।
कश्चित्स्व॑ लो॒कं न प्र॒तिप्र॒जा॑नाति।
अ॒ग्निमु॑ग्धो ह॒ैव धू॒मता॑न्तः।
स्व॑ लो॒कं न प्र॒तिप्र॒जा॑नाति।
अथ॒ यो ह॒ैवैत॑म॒ग्निꣳ सा॑वि॒त्रं वेद॑।
स ए॒वास्माल्लो॒कात्प्रेत्य॑।

आ॒त्मानं॑ वेद।

अ॒यम॒हम॒स्मीति॑॥⁴³॥

स॒ स्वं लो॒कं प्र॒तिप्र॒जा॑नाति।

ए॒ष उ॑ वे॒वैनं॑ तत्सा॑वि॒त्रः।

स्व॒र्गं लो॒कम॒भिव॑हति।

अ॒हो॒रा॒त्रैर्वा॑ इ॒दं स॒युग्मिः॑ क्रियते।

इ॒ति॒रा॒त्राया॑दीक्षिषत।

इ॒ति॒रा॒त्राय॑ व्र॒तमु॒पा॑गु॒रिति॑।

ता॒नि॒हा॒ने॒वं वि॒दुषः॑।

अ॒मुष्मि॑ल्लो॒के शे॑व॒धिं ध॑यन्ति।

धी॒तं है॒व स॒ शे॑व॒धिम॒नु परै॑ति।

अथ॒ यो है॒वैत॒मग्नि॑ सा॒वि॒त्रं वेद॑॥⁴⁴॥

तस्य॑ है॒वाहो॑रा॒त्राणि॑।

अ॒मुष्मि॑ल्लो॒के शे॑व॒धिं न ध॑यन्ति।

अधी॑तं है॒व स॒ शे॑व॒धिम॒नु परै॑ति।

भ॒र॒द्वा॒जो ह॒ त्रि॒भि॒रायु॑र्भिर्ब्र॒ह्म॒चर्य॑मु॒वा॒स।

तं ह॒ जी॒र्णि॒ः स्थ॑वि॒रं श॑या॒नम्।

इ॒न्द्र उ॒प॒व्र॒ज्यो॑वाच।

भ॒र॒द्वा॒ज।

यत्ते॑ चतु॒र्थमा॑यु॒र्दद्या॑म्।

कि॒मे॒नेन॑ कुर्या॒ इति॑।

ब्र॒ह्म॒चर्य॑मे॒वैने॑न च॒रेय॑मि॒ति हो॑वाच॥⁴⁵॥

त॒ ह॒ त्री॒न्गिरि॒रूपा॒नवि॒ज्ञाता॒निव॒ द॒र्श॒यां च॑का॒र।
 तेषा॒ ह॒ कै॒कस्मा॒न्मुष्टि॒नाऽऽद॑दे।
 स हो॑वाच।
 भ॒र॒द्वाजे॒त्याम॒न्त्य॑।
 वेदा॒ वा ए॒ते।
 अ॒न॒न्ता वै वेदाः॑।
 ए॒तद्वा ए॒तैस्त्रि॒भिरा॒युर्भि॒रन्व॑वोच॒थाः।
 अथ॑ त॒ इ॒त॒र॒दन॑नू॒क्तमे॒व।
 ए॒ही॒मं वि॑द्धि।
 अ॒यं वै स॑र्ववि॒द्येति॑॥⁴⁶॥
 तस्मै॑ ह॒तम॒ग्नि॑ सा॒वि॒त्रमु॑वाच।
 त॒ स वि॑दि॒त्वा।
 अ॒मृ॒तो भू॒त्वा।
 स्व॒र्गं लो॒कमि॑याय।
 आ॒दि॒त्यस्य॒ सायु॑ज्यम्।
 अ॒मृ॒तो ह॒व भू॒त्वा।
 स्व॒र्गं लो॒कमे॑ति।
 आ॒दि॒त्यस्य॒ सायु॑ज्यम्।
 य ए॒वं वेद॑।
 ए॒षो ए॒व त्रयी॑ वि॒द्या॥⁴⁷॥
 याव॑न्त॒ ह॒ वै त्र॒य्या वि॒द्यया॑ लो॒कं ज॑यति।
 ताव॑न्तं लो॒कं ज॑यति।
 य ए॒वं वेद॑।

अ॒ग्ने॒र्वा ए॒तानि॑ नाम॒धेया॑नि।

अ॒ग्ने॒रे॒व सायु॑ज्य॒ः स॒लो॒कता॑माप्नोति।

य ए॒वं वेद॑।

वा॒यो॒र्वा ए॒तानि॑ नाम॒धेया॑नि।

वा॒यो॒रे॒व सायु॑ज्य॒ः स॒लो॒कता॑माप्नोति।

य ए॒वं वेद॑।

इन्द्र॑स्य वा ए॒तानि॑ नाम॒धेया॑नि॥⁴⁸॥

इन्द्र॑स्यै॒व सायु॑ज्य॒ः स॒लो॒कता॑माप्नोति।

य ए॒वं वेद॑।

बृह॑स्पते॒र्वा ए॒तानि॑ नाम॒धेया॑नि।

बृह॑स्पते॒रे॒व सायु॑ज्य॒ः स॒लो॒कता॑माप्नोति।

य ए॒वं वेद॑।

प्र॒जाप॑ते॒र्वा ए॒तानि॑ नाम॒धेया॑नि।

प्र॒जाप॑ते॒रे॒व सायु॑ज्य॒ः स॒लो॒कता॑माप्नोति।

य ए॒वं वेद॑।

ब्रह्म॑णो वा ए॒तानि॑ नाम॒धेया॑नि।

ब्रह्म॑ण ए॒व सायु॑ज्य॒ः स॒लो॒कता॑माप्नोति।

य ए॒वं वेद॑।

स वा ए॒षोऽग्नि॑र॒पक्ष॑पुच्छो वा॒युरे॒व।

तस्या॒ग्नि॒र्मुख॑म्।

अ॒सावा॑दि॒त्यः शि॒रः।

स यदे॒ते दे॒वते॒ अन्त॑रेण।

तत्सर्वं सीव्यति।

तस्मात्सावित्रः॥₄₉॥

[11]

॥इति कृष्णयजुर्वेदीयतैत्तिरीयकाठके प्रथमः प्रश्नः समाप्तः॥₁॥

॥द्वितीयः प्रश्नः॥

लो॒कोऽसि॑ स्व॒र्गोऽसि॑।

अ॒न॒न्तोऽस्य॑पा॒रोऽसि॑।

अक्षि॑तोऽस्य॒क्षय्योऽसि॑।

तप॑सः प्र॒तिष्ठा।

ब्र॒यीद॒मन्तः॑।

वि॒श्वं य॒क्षं वि॒श्वं भू॒तं वि॒श्वं सु॒भूत॑म्।

वि॒श्वस्य॑ भ॒र्ता वि॒श्वस्य॑ ज॒नयि॒ता।

तं ब्र॑ोप॒दधे॑ का॒मदु॒घम॒क्षित॑म्।

प्र॒जाप॑ति॒स्त्वा सा॒दय॑तु।

तया॑ दे॒वतया॑ऽङ्गि॒रस्व॒द्भुवा॑ सी॒द॥₁॥

तपो॑ऽसि॒ लो॒के श्रि॒तम्।

तेज॑सः प्र॒तिष्ठा।

ब्र॒यीद॒मन्तः॑।

वि॒श्वं य॒क्षं वि॒श्वं भू॒तं वि॒श्वं सु॒भूत॑म्।

वि॒श्वस्य॑ भ॒र्तृ वि॒श्वस्य॑ ज॒नयि॒तृ।

तच्चो॑प॒दधे॑ का॒मदु॒घम॒क्षित॑म्।

प्र॒जाप॑ति॒स्त्वा सा॒दय॑तु।

तया॑ दे॒वतया॑ऽङ्गि॒रस्व॒द्भुवा॑ सी॒द॥₂॥

तेजो॑ऽसि॒ तप॑सि श्रि॒तम्।

स॒मु॒द्रस्य॑ प्र॒तिष्ठा।

ब॒यीद॒मन्तः॑।

वि॒श्वं य॒क्षं वि॒श्वं भू॒तं वि॒श्वं सु॒भूत॑म्।

वि॒श्वस्य॑ भ॒र्तु वि॒श्वस्य॑ ज॒नयि॒तृ।

त॒त्त्वोप॑दधे का॒मदु॒घम॒क्षित॑म्।

प्र॒जाप॑तिस्त्वा सादयतु।

तया॑ दे॒वत॑याऽङ्गि॒रस्व॒द्भुवा॑ सी॒द॥₃॥

स॒मुद्रो॑ऽसि तेज॑सि श्रि॒तः।

अ॒पां प्र॑ति॒ष्ठा।

ब॒यीद॒मन्तः॑।

वि॒श्वं य॒क्षं वि॒श्वं भू॒तं वि॒श्वं सु॒भूत॑म्।

वि॒श्वस्य॑ भ॒र्ता वि॒श्वस्य॑ ज॒नयि॒ता।

तं त्वोप॑दधे का॒मदु॒घम॒क्षित॑म्।

प्र॒जाप॑तिस्त्वा सादयतु।

तया॑ दे॒वत॑याऽङ्गि॒रस्व॒द्भुवा॑ सी॒द॥₄॥

आपः॑ स्थ स॒मुद्रे॑ श्रि॒ताः।

पृ॒थि॒व्याः प्र॑ति॒ष्ठा यु॒ष्मासु॑।

इ॒दम॒न्तः॑।

वि॒श्वं य॒क्षं वि॒श्वं भू॒तं वि॒श्वं सु॒भूत॑म्।

वि॒श्वस्य॑ भ॒र्त्र्यो वि॒श्वस्य॑ ज॒नयि॒त्र्यः।

ता व॒ उप॑दधे का॒मदु॒घा अ॒क्षिताः॑।

प्र॒जाप॑तिस्त्वा सादयतु।

तया॑ दे॒वत॑याऽङ्गि॒रस्व॒द्भुवा॑ सी॒द॥₅॥

पृ॒थि॒व्य॑स्य॒प्सु श्रि॒ता।

अ॒ग्नेः प्र॑ति॒ष्ठा।

त्व॒यीद॑म॒न्तः।

वि॒श्वं य॒क्षं वि॒श्वं भू॒तं वि॒श्वं सु॒भू॒तम्।

वि॒श्वस्य॑ भ॒र्त्री वि॒श्वस्य॑ ज॒नयि॒त्री।

तां त्वो॒प॑द॒धे का॒म॒दु॒घा॒मक्षि॑ताम्।

प्र॒जाप॑ति॒स्त्वा सा॒दय॑तु।

तया॑ दे॒वत॑याऽङ्गि॒रस्व॑द्भु॒वा सी॑द॥६॥

अ॒ग्नि॒र॒सि पृ॒थि॒व्याऽश्रि॑तः।

अ॒न्त॒रि॒क्षस्य॑ प्र॑ति॒ष्ठा।

त्व॒यीद॑म॒न्तः।

वि॒श्वं य॒क्षं वि॒श्वं भू॒तं वि॒श्वं सु॒भू॒तम्।

वि॒श्वस्य॑ भ॒र्ता वि॒श्वस्य॑ ज॒नयि॒ता।

तं त्वो॒प॑द॒धे का॒म॒दु॒घ॒मक्षि॑तम्।

प्र॒जाप॑ति॒स्त्वा सा॒दय॑तु।

तया॑ दे॒वत॑याऽङ्गि॒रस्व॑द्भु॒वा सी॑द॥७॥

अ॒न्त॒रि॒क्षम॑स्य॒ग्नौ श्रि॑तम्।

वा॒योः प्र॑ति॒ष्ठा।

त्व॒यीद॑म॒न्तः।

वि॒श्वं य॒क्षं वि॒श्वं भू॒तं वि॒श्वं सु॒भू॒तम्।

वि॒श्वस्य॑ भ॒र्तृ वि॒श्वस्य॑ ज॒नयि॒तृ।

तत्त्वो॒प॑द॒धे का॒म॒दु॒घ॒मक्षि॑तम्।

प्र॒जाप॑तिस्त्वा सादयतु।

तया॑ दे॒वत॑या ऽङ्गि॒रस्व॑द्भुवा सीद॑॥८॥

वा॒युर॑स्यन्त॒रिक्षे॑ श्रि॒तः।

दि॒वः प्र॑ति॒ष्ठा।

त्वयी॑दमन्तः।

वि॒श्वं य॒क्षं वि॒श्वं भू॒तं वि॒श्वं सु॒भूत॑म्।

वि॒श्वस्य॑ भ॒र्ता वि॒श्वस्य॑ ज॒नयि॑ता।

तं त्वो॑प॒दधे॑ का॒मदु॒घम॑क्षि॒तम्।

प्र॒जाप॑तिस्त्वा सादयतु।

तया॑ दे॒वत॑या ऽङ्गि॒रस्व॑द्भुवा सीद॑॥९॥

द्यौ॒र॒सि वा॒यौ श्रि॒ता।

आ॒दि॒त्यस्य॑ प्र॑ति॒ष्ठा।

त्वयी॑दमन्तः।

वि॒श्वं य॒क्षं वि॒श्वं भू॒तं वि॒श्वं सु॒भूत॑म्।

वि॒श्वस्य॑ भ॒र्त्री वि॒श्वस्य॑ ज॒नयि॑त्री।

तां त्वो॑प॒दधे॑ का॒मदु॒घाम॑क्षि॒ताम्।

प्र॒जाप॑तिस्त्वा सादयतु।

तया॑ दे॒वत॑या ऽङ्गि॒रस्व॑द्भुवा सीद॑॥१०॥

आ॒दि॒त्यो॑ ऽसि दि॒वि श्रि॒तः।

च॒न्द्रम॑सः प्र॑ति॒ष्ठा।

त्वयी॑दमन्तः।

वि॒श्वं य॒क्षं वि॒श्वं भू॒तं वि॒श्वं सु॒भूत॑म्।

विश्वस्य भर्ता विश्वस्य जनयिता।
तं त्वोपदधे कामदुघमक्षितम्।
प्रजापतिस्त्वा सादयतु।
तया देवतया ऽङ्गिरस्वद्भुवा सीद॥¹¹॥
चन्द्रमा अस्यादित्ये श्रितः।
नक्षत्राणां प्रतिष्ठा।
त्वयीदमन्तः।
विश्वं यक्षं विश्वं भूतं विश्वं सुभूतम्।
विश्वस्य भर्ता विश्वस्य जनयिता।
तं त्वोपदधे कामदुघमक्षितम्।
प्रजापतिस्त्वा सादयतु।
तया देवतया ऽङ्गिरस्वद्भुवा सीद॥¹²॥
नक्षत्राणि स्थ चन्द्रमसि श्रितानि।
संवत्सरस्य प्रतिष्ठा युष्मासु।
इदमन्तः।
विश्वं यक्षं विश्वं भूतं विश्वं सुभूतम्।
विश्वस्य भर्तृणि विश्वस्य जनयितृणि।
तानि व उपदधे कामदुघान्यक्षितानि।
प्रजापतिस्त्वा सादयतु।
तया देवतया ऽङ्गिरस्वद्भुवा सीद॥¹³॥
संवत्सरो ऽसि नक्षत्रेषु श्रितः।
ऋतूनां प्रतिष्ठा।

द्वयीदमन्तः।

विश्वं यक्षं विश्वं भूतं विश्वं सुभूतम्।

विश्वस्य भर्ता विश्वस्य जनयिता।

तं त्र्योपदधे कामदुधमक्षितम्।

प्रजापतिस्त्वा सादयतु।

तया देवतया ऽङ्गिरस्वद्भुवा सीद॥¹⁴॥

ऋतवः स्थ संवत्सरे श्रिताः।

मासानां प्रतिष्ठा युष्मासु।

द्विदमन्तः।

विश्वं यक्षं विश्वं भूतं विश्वं सुभूतम्।

विश्वस्य भर्तारो विश्वस्य जनयितारः।

तान् व त्र्योपदधे कामदुधानक्षितान्।

प्रजापतिस्त्वा सादयतु।

तया देवतया ऽङ्गिरस्वद्भुवा सीद॥¹⁵॥

मासाः स्थर्तुषु श्रिताः।

अर्धमासानां प्रतिष्ठा युष्मासु।

द्विदमन्तः।

विश्वं यक्षं विश्वं भूतं विश्वं सुभूतम्।

विश्वस्य भर्तारो विश्वस्य जनयितारः।

तान् व त्र्योपदधे कामदुधानक्षितान्।

प्रजापतिस्त्वा सादयतु।

तया देवतया ऽङ्गिरस्वद्भुवा सीद॥¹⁶॥

अ॒र्ध॒मा॒साः स्थं॑ मा॒सु श्रि॒ताः।

अ॒हो॒रा॒त्रयोः॑ प्र॒ति॒ष्ठा यु॒ष्मासु॑।

इ॒दम॒न्तः।

वि॒श्वं य॒क्षं वि॒श्वं भू॒तं वि॒श्वं सु॒भू॒तम्।

वि॒श्वस्य॑ भ॒र्तारो॑ वि॒श्वस्य॑ ज॒नयि॒तारः॑।

ता॒न् व॒ उप॑द॒धे का॒म॒दु॒घा॒नक्षि॑तान्।

प्र॒जाप॑ति॒स्त्वा सा॒दय॑तु।

तया॑ दे॒वत॑या ऽङ्गि॒रस्व॑द्भु॒वा सी॑द॥¹⁷॥

अ॒हो॒रा॒त्रे स्थो॑ ऽर्ध॒मा॒सेषु॑ श्रि॒ते।

भू॒तस्य॑ प्र॒ति॒ष्ठे भ॒व्यस्य॑ प्र॒ति॒ष्ठे।

यु॒वयो॑रि॒दम॒न्तः।

वि॒श्वं य॒क्षं वि॒श्वं भू॒तं वि॒श्वं सु॒भू॒तम्।

वि॒श्वस्य॑ भ॒र्त्र्यो॑ वि॒श्वस्य॑ ज॒नयि॒त्र्यो॑।

ते वा॒मुप॑द॒धे का॒म॒दु॒घे अ॑क्षि॒ते।

प्र॒जाप॑ति॒स्त्वा सा॒दय॑तु।

तया॑ दे॒वत॑या ऽङ्गि॒रस्व॑द्भु॒वा सी॑द॥¹⁸॥

पौ॒र्ण॒मा॒स्यष्ट॑का ऽमा॒वास्या॑।

अ॒न्ना॒दाः स्था॑न्न॒दु॒घो यु॒ष्मासु॑।

इ॒दम॒न्तः।

वि॒श्वं य॒क्षं वि॒श्वं भू॒तं वि॒श्वं सु॒भू॒तम्।

वि॒श्वस्य॑ भ॒र्त्र्यो॑ वि॒श्वस्य॑ ज॒नयि॒त्र्यः॑।

ता व॒ उप॑द॒धे का॒म॒दु॒घा अ॑क्षि॒ताः।

प्र॒जाप॑तिस्त्वा सादयतु।

तया॑ दे॒वत॑याऽङ्गि॒रस्व॑द्भुवा सीद॑॥¹⁹॥

राड॑सि बृह॒ती श्री॒रसी॑न्द्रपत्नी॒ धर्म॑पत्नी।

विश्वं॑ भू॒तमनु॑प्रभू॒ता।

त्वयी॑दमन्तः।

विश्वं॑ य॒क्षं विश्वं॑ भू॒तं विश्वं॑ सुभू॒तम्।

विश्व॑स्य भ॒र्त्री विश्व॑स्य जनयि॒त्री।

तां त्वोप॑दधे का॒मदु॒घाम॑क्षिताम्।

प्र॒जाप॑तिस्त्वा सादयतु।

तया॑ दे॒वत॑याऽङ्गि॒रस्व॑द्भुवा सीद॑॥²⁰॥

ओजो॑ऽसि स॒होऽसि॑।

बल॑मसि॒ भ्राजो॑ऽसि।

दे॒वानां॑ धा॒मामृ॑तम्।

अम॑र्त्यस्तपो॒जाः।

त्वयी॑दमन्तः।

विश्वं॑ य॒क्षं विश्वं॑ भू॒तं विश्वं॑ सुभू॒तम्।

विश्व॑स्य भ॒र्ता विश्व॑स्य जनयि॒ता।

तं त्वोप॑दधे का॒मदु॒घम॑क्षितम्।

प्र॒जाप॑तिस्त्वा सादयतु।

तया॑ दे॒वत॑याऽङ्गि॒रस्व॑द्भुवा सीद॑॥²¹॥

[1]

त्वम॑ग्ने रु॒द्रो असु॑रो म॒हो दि॒वः।

त्वं शर्धो मारुतं पृक्ष ईशिषे।
 त्वं वातैररुणैर्यासि शङ्गयः।
 त्वं पूषा विधतः पांसि नु त्मना।
 देवा देवेषु श्रयध्वम्।
 प्रथमा द्वितीयेषु श्रयध्वम्।
 द्वितीयास्तृतीयेषु श्रयध्वम्।
 तृतीयाश्चतुर्थेषु श्रयध्वम्।
 चतुर्थाः पञ्चमेषु श्रयध्वम्।
 पञ्चमाः षष्ठेषु श्रयध्वम्॥²²॥
 षष्ठाः सप्तमेषु श्रयध्वम्।
 सप्तमा अष्टमेषु श्रयध्वम्।
 अष्टमा नवमेषु श्रयध्वम्।
 नवमा दशमेषु श्रयध्वम्।
 दशमा एकादशेषु श्रयध्वम्।
 एकादशा द्वादशेषु श्रयध्वम्।
 द्वादशास्त्रयोदशेषु श्रयध्वम्।
 त्रयोदशाश्चतुर्दशेषु श्रयध्वम्।
 चतुर्दशाः पञ्चदशेषु श्रयध्वम्।
 पञ्चदशाः षोडशेषु श्रयध्वम्॥²³॥
 षोडशाः सप्तदशेषु श्रयध्वम्।
 सप्तदशा अष्टादशेषु श्रयध्वम्।
 अष्टादशा एकान्नविंशेषु श्रयध्वम्।

ए॒कान्न॒वि॒शा वि॒शेषु॑ श्रयध्वम्।
 वि॒शा ए॒कवि॒शेषु॑ श्रयध्वम्।
 ए॒कवि॒शा द्वावि॒शेषु॑ श्रयध्वम्।
 द्वावि॒शास्त्रयोवि॒शेषु॑ श्रयध्वम्।
 त्रयोवि॒शाश्चतुर्वि॒शेषु॑ श्रयध्वम्।
 चतुर्वि॒शाः पञ्चवि॒शेषु॑ श्रयध्वम्।
 पञ्चवि॒शाः षड्वि॒शेषु॑ श्रयध्वम्॥²⁴॥
 षड्वि॒शाः सप्तवि॒शेषु॑ श्रयध्वम्।
 सप्तवि॒शा अष्टावि॒शेषु॑ श्रयध्वम्।
 अष्टावि॒शा ए॒कान्न॒त्रि॒शेषु॑ श्रयध्वम्।
 ए॒कान्न॒त्रि॒शास्त्रि॒शेषु॑ श्रयध्वम्।
 त्रि॒शा ए॒कत्रि॒शेषु॑ श्रयध्वम्।
 ए॒कत्रि॒शा द्वात्रि॒शेषु॑ श्रयध्वम्।
 द्वात्रि॒शास्त्रयस्त्रि॒शेषु॑ श्रयध्वम्।
 देवा॑स्त्रिरेकादशास्त्रिस्त्रयस्त्रि॒शाः।
 उत्तरे॑ भवत।
 उत्तर॑वर्त्मान् उत्तर॑सत्त्वानः।
 यत्का॑म इ॒दं जु॒होमि॑।
 तन्मे॑ समृ॒ध्यता॑म्।
 वय॑ः स्या॑म पत॑यो रयी॒णाम्।
 भूर्भुवः॑ स्वः॑ स्वाहा॑॥²⁵॥

अ॒ग्नावि॑ष्णू स॒जोष॑सा।

इ॒मा व॑र्धन्तु वा॒ गिरः॑।
द्यु॒मैर्वा॑जे॒भिरा॑ग॒तम्।
रा॒ज्ञी॑ वि॒राज्ञी॑।
स॒म्राज्ञी॑ स्व॒राज्ञी॑।
अ॒र्चिः शो॒चिः।
तपो॒ हरो॒ भाः।
अ॒ग्निः सोमो॒ बृह॒स्पतिः॑।
वि॒श्वे दे॒वा भुव॑नस्य गो॒पाः।
ते सर्वे॑ स॒ङ्गत्य॑।
इ॒दं मे॒ प्राव॑ता॒ वचः॑।
व॒य॑ꣳ स्या॑म॒ पत॑यो रयी॒णाम्।
भूर्भुवः॒ स्वः॑ स्वाहा॑॥₂₆॥

[3]

अ॒न्नप॑तेऽन्नस्य नो दे॒हि।
अ॒न॒मी॒वस्य॑ शु॒ष्मिणः॑।
प्र प्र॑दा॒तारं॑ ता॒रिषः॑।
ऊ॒र्जं नो॑ धे॒हि द्वि॒पदे॒ चतु॑ष्पदे।
अ॒ग्ने पृ॑थि॒वीप॑ते।
सोमं॑ वी॒रुधां॑ पते।
ब्र॒ष्टः स॑मि॒धां प॑ते।
वि॒ष्ण॑वा॒शानां॑ पते।
मि॒त्रं स॑त्यानां पते।
वरु॑ण ध॒र्मणां॑ पते॥₂₇॥
म॒रुतो॑ ग॒णानां॑ पतयः।

रुद्र॑ प॒शूनां प॑ते।
इन्द्रो॑जसां प॑ते।
बृह॑स्पते ब्रह्म॒णस्प॑ते।
आ रु॒चा रो॑चेऽह॒ङ् स्व॒यम्।
रु॒चा रु॑रुचे रोच॑मानः।
अ॒तीत्या॒दः स्व॑राभरे॒ह।
तस्मिन् यो॒नौ प्र॒ज॒नौ प्र॒जाये॑य।
व॒य॒ङ् स्या॑म॒ पत॑यो रयी॒णाम्।
भूर्भुवः॒ स्वः॑ स्वाहा॑॥²⁸॥

[4]

स॒प्त ते॑ अ॒ग्ने स॒मिधः॑ स॒प्त जि॒ह्वाः।
स॒प्तर्ष॑यः स॒प्त धाम॑ प्रि॒याणि॑।
स॒प्त हो॒त्रा अनु॑वि॒द्वान्।
स॒प्त योनी॑रापृ॒णस्वा घृ॑तेन।
प्राची॑ दिक्।
अ॒ग्निर्दे॒वता॑।
अ॒ग्नि॒ꣳ स दि॒शां दे॒वं दे॒वता॑नामृच्छतु।
यो मै॒तस्यै॑ दि॒शोऽभि॒दास॑ति।
दक्षि॑णा दिक्।
इन्द्रो॑ दे॒वता॑॥²⁹॥
इन्द्र॑ꣳ स दि॒शां दे॒वं दे॒वता॑नामृच्छतु।
यो मै॒तस्यै॑ दि॒शोऽभि॒दास॑ति।
प्रती॑ची दिक्।

सोमो देवता।

सोमः स दिशां देवं देवतानामृच्छतु।

यो मैतस्यै दिशोऽभिदासति।

उदीची दिक्।

मित्रावरुणौ देवता।

मित्रावरुणौ स दिशां देवौ देवतानामृच्छतु।

यो मैतस्यै दिशोऽभिदासति॥³⁰॥

ऊर्ध्वा दिक्।

बृहस्पतिर्देवता।

बृहस्पतिः स दिशां देवं देवतानामृच्छतु।

यो मैतस्यै दिशोऽभिदासति।

द्वयं दिक्।

अदितिर्देवता।

अदितिः स दिशां देवीं देवतानामृच्छतु।

यो मैतस्यै दिशोऽभिदासति।

पुरुषो दिक्।

पुरुषो मे कामान्त्समर्धयतु॥³¹॥

अन्धो जागृविः प्राण।

असावेहि।

बधिर आक्रन्दयितरपान।

असावेहि।

उषसमुषसमशीय।

अहमसो ज्योतिरशीय।

अ॒हम॒सोऽपोऽशी॒य।

व॒यः॑ स्या॒म प॒त॑यो र॒यी॒णाम्।

भूर्भुवः॑ स्वः॑ स्वाहा॑॥³²॥

[5]

य॒त्तेऽचि॑तं॒ यदु॑ चि॒तं ते॑ अ॒ग्ने।

य॒त्त ऊ॒नं यदु॑ तेऽति॑रि॒क्तम्।

आ॒दि॒त्यास्तदङ्गि॑रसश्चि॒न्वन्तु।

वि॒श्वे ते॑ दे॒वाश्चि॑ति॒मापू॑रयन्तु।

चि॒तश्चा॑सि॒ सञ्चि॑तश्चा॒स्यग्ने॑।

ए॒तावा॑ऽश्चा॒सि भू॒याऽश्चा॑स्यग्ने॑।

लो॒कं पृ॑ण च्छि॒द्रं पृ॑ण।

अथो॑ सी॒द शि॒वा त्व॑म्।

इ॒न्द्रा॒ग्नी त्वा॒ बृ॒ह॒स्पतिः॑।

अ॒स्मिन् यो॒ना॑वसी॒षद॑न्॥³³॥

तया॑ दे॒वत॑याऽङ्गि॒रस्व॑द्भु॒वा सी॑द।

ता अ॑स्य॒ सू॒द॑दो॒हसः॑।

सोम॑ऽश्री॒णन्ति॒ पृ॒श्न॑यः।

ज॒न्म दे॒वानां॑ वि॒शः॑।

त्रि॒ष्वा रो॑च॒ने दि॒वः॑।

तया॑ दे॒वत॑याऽङ्गि॒रस्व॑द्भु॒वा सी॑द।

अ॒ग्ने दे॒वा इ॒हाऽऽव॑ह।

ज॒ज्ञा॒नो वृ॒क्तब॑र्हिषे।

अ॒सि॒ होता॑ न॒ ई॒ड्यः॑।

अ॒ग॒न्म॒ म॒हा॒ म॒न॒सा॒ य॒वि॒ष्ठम्॑॥³⁴॥

यो दी॒दाय॒ समि॑द्ध॒ स्वे दु॑रो॒णे।

चि॒त्रभा॑नू॒ रोद॑सी॒ अ॒न्तरू॑र्वी।

स्वा॑हु॒तं वि॒श्वतः॑ प्र॒त्यक्ष॑म्।

मे॒धा॒का॒रं वि॒दथ॑स्य प्र॒साध॑नम्।

अ॒ग्निः॑ हो॒ता॒रं परि॒भूत॑मं म॒तिम्।

त्वा॒मर्भ॑स्य ह॒विषः॑ स॒मा॒न॒मि॒त्।

त्वां म॒हो वृ॑ण॒ते न॒रो ना॒न्यं त्व॑त्।

म॒नु॒ष्व॒च्चा नि॒धी॑महि।

म॒नु॒ष्व॒त्समि॑धीमहि।

अ॒ग्ने॑ म॒नु॒ष्वद॑ङ्गि॒रः॥³⁵॥

दे॒वान्दे॑वा॒य॒ते य॑ज।

अ॒ग्नि॒र्हि वा॒जिनं॑ वि॒शे।

ददा॑ति वि॒श्वच॑र्ष॒णिः।

अ॒ग्नी रा॒ये स्वा॒भुव॑म्।

स प्री॑तो या॒ति वा॒र्यम्॑।

इष॑ः स्तो॒तृभ्य॒ आभ॑र।

पृ॒ष्टो दि॒वि पृ॒ष्टो अ॒ग्निः पृ॑थि॒व्याम्।

पृ॒ष्टो वि॒श्वा ओष॑धी॒रावि॑वेश।

वै॒श्वा॒न॒रः स॒ह॒सा पृ॒ष्टो अ॒ग्निः।

स नो॒ दि॒वा स रि॒षः पा॑तु न॒क्तम्॑॥³⁶॥

[6]

अ॒यं वा॒व यः प॑व॒ते।

सौ॑ऽग्निर्ना॑चिके॒तः।

स यत्प्रा॑ङ् पव॑ते।

तद॑स्य शिरः॑।

अथ॑ यद्दक्षि॑णा।

स दक्षि॑णः पक्षः॑।

अथ॑ यत्प्र॒त्यक्।

तत्पु॒च्छम्।

यदु॒दङ् ग्।

स उत्त॑रः पक्षः॑॥³⁷॥

अथ॑ यत्सं॒वाति॑।

तद॑स्य स॒मश्न॑नं च प्र॒सार॑णं च।

अथो॑ स॒म्पदे॒वास्य॑ सा।

स॒ ह वा अ॑स्मै स कामः॑ पद्यते।

यत्का॑मो यज॑ते।

यौ॑ऽग्निं ना॑चिके॒तं चि॑नुते।

य उ॑ चैनमे॒वं वेद॑।

यो ह॒ वा अ॒ग्नेर्ना॑चिके॒तस्या॒ऽऽय॑तनं प्रति॒ष्ठां वेद॑।

आ॒यत॑नवान्भवति।

गच्छ॑ति प्रति॒ष्ठाम्॥³⁸॥

हिर॑ण्यं वा अ॒ग्नेर्ना॑चिके॒तस्या॒ऽऽय॑तनं प्रति॒ष्ठा।

य ए॒वं वेद॑।

आ॒यत॑नवान्भवति।

गच्छति प्रतिष्ठाम्।

यो ह वा अग्नेर्नाचिकेतस्य शरीरं वेद।

सशरीर एव स्वर्गं लोकमेति।

हिरण्यं वा अग्नेर्नाचिकेतस्य शरीरम्।

य एवं वेद।

सशरीर एव स्वर्गं लोकमेति।

अथो यथा रुक्म उत्तप्तो भाय्यात्॥³⁹॥

एवमेव स तेजसा यशसा।

अस्मिञ्च लोकेऽमुष्मिञ्च भाति।

उरवो ह वै नामैते लोकाः।

येऽवरेणाऽऽदित्यम्।

अथ हैते वरीयांसो लोकाः।

ये परेणाऽऽदित्यम्।

अन्तवन्तः ह वा एष क्षय्यं लोकं जयति।

योऽवरेणाऽऽदित्यम्।

अथ हैषोऽनन्तमपारमक्षय्यं लोकं जयति।

यः परेणाऽऽदित्यम्॥⁴⁰॥

अनन्तः ह वा अपारमक्षय्यं लोकं जयति।

योऽग्निं नाचिकेतं चिनुते।

य उ चैनमेवं वेद।

अथो यथा रथे तिष्ठन्पक्षसी पर्यावर्तमाने प्रत्यपैक्षते।

एवमहोरात्रे प्रत्यपैक्षते।

नास्या॑होरा॒त्रे लो॒कमा॑प्नुतः।
यौऽग्निं॑ ना॒चिके॒तं चि॑नुते।
य उ॑ चैनमे॒वं वेद॑॥⁴¹॥

[7]

उ॒शन् ह॒ वै वा॑जश्रव॒सः सर्व॑वेद॒सं द॑दौ।
तस्य॑ ह॒ नचि॑केता॒ नाम॑ पु॒त्र आ॑स।
त॰ ह॑ कुमा॒रः सन्त॑म्।
दक्षि॑णासु नी॒यमा॑नासु श्रद्धाऽऽवि॑वेश।
स हो॑वाच।
तत् क॒स्मै मां दा॑स्यसीति॑।
द्वि॒तीयं॑ तृ॒तीयम्॑।
त॰ ह॒ परी॑त उवाच।
मृ॒त्यवै॑ बा ददा॒मीति॑।
त॰ ह॒ स्मोत्थि॑तं वा॒गभि॑वदति॥⁴²॥
गौत॑म कुमा॒रमि॑ति।
स हो॑वाच।
परे॑हि मृ॒त्योर्गृ॑हान्।
मृ॒त्यवे॒ वै बा॑ऽदामि॒ति।
तं वै प्र॒वस॑न्तं ग॒न्तासी॑ति होवाच।
तस्य॑ स्म ति॒स्रो रा॒त्रीरना॑श्चान्गृ॒हे व॑सतात्।
स यदि॑ बा पृ॒च्छेत्।
कुमा॑र॒ कति॒ रात्री॑रवात्सीरि॒ति।
ति॒स्र इति॒ प्रति॑ब्रूतात्।

किं प्रथमा॑ रात्रिमाश्ना॒ इति॑॥⁴³॥

प्रजां॑ त॒ इति॑।

किं द्वितीया॑मिति॑।

पशू॑स्त॒ इति॑।

किं तृतीया॑मिति॑।

साधुकृ॑त्यां त॒ इति॑।

तं वै प्रव॑सन्तं जगाम।

तस्य॑ ह तिस्रो रात्रीरना॑श्चान्गृह उ॑वास।

तमागत्य॑ पप्रच्छ।

कुमा॑र॒ कति॒ रात्री॑रवात्सीरिति॑।

तिस्र॑ इति॒ प्रत्यु॑वाच॥⁴⁴॥

किं प्रथमा॑ रात्रिमाश्ना॒ इति॑।

प्रजां॑ त॒ इति॑।

किं द्वितीया॑मिति॑।

पशू॑स्त॒ इति॑।

किं तृतीया॑मिति॑।

साधुकृ॑त्यां त॒ इति॑।

नम॑स्ते अस्तु भगव॒ इति॑ होवाच।

वरं॑ वृणीष्वेति॑।

पितर॑मेव जीव॑न्नयानीति॑।

द्वितीयं॑ वृणीष्वेति॑॥⁴⁵॥

इष्टा॑पूर्तयो॒र्मेऽक्षि॑तिं ब्रूहीति॑ होवाच।

तस्मै है॒तम॒ग्निं ना॑चि॒के॒तमु॑वाच।
ततो॒ वै तस्यै॑ष्टापूर्ते॒ ना क्षी॑येते।
नास्यै॑ष्टापूर्ते॒ क्षी॑येते।
योऽ॒ग्निं ना॑चि॒के॒तं चि॑नुते।
य उ॑ चैनमे॒वं वेद॑।
तृतीयं॑ वृणी॒ष्वेति॑।
पुन॒र्मृ॒त्योर्मे॑ऽप॒चितिं॑ ब्रूहीति॑ होवाच।
तस्मै है॒तम॒ग्निं ना॑चि॒के॒तमु॑वाच।
ततो॒ वै सोऽ॒प पुन॑र्मृ॒त्युम॑जयत्॥⁴⁶॥
अप॑ पुन॒र्मृ॒त्युं ज॑यति।
योऽ॒ग्निं ना॑चि॒के॒तं चि॑नुते।
य उ॑ चैनमे॒वं वेद॑।
प्र॒जाप॑तिर्वै प्र॒जाका॑म॒स्तपो॑ऽतप्यत।
स हि॑र॒ण्यमु॒दा॑स्यत्।
तद॒ग्नौ प्रा॑स्यत्।
तद॑स्मै नाच्छ॑दयत्।
तद्वि॒तीयं॑ प्रा॑स्यत्।
तद॑स्मै नैवाच्छ॑दयत्।
तत्तृतीयं॑ प्रा॑स्यत्॥⁴⁷॥
तद॑स्मै नैवाच्छ॑दयत्।
तदा॒त्मन्ने॒व ह॑द॒य्येऽ॒ग्नौ वै॑श्वा॒नरे॒ प्रा॑स्यत्।
तद॑स्मा अ॒च्छ॑दयत्।

तस्मा॒द्धिर॑ण्यं॒ कनि॑ष्ठं॒ धना॑नाम्।
 भु॒ञ्ज॑त्प्रि॒यत॑मम्।
 हृ॒दय॒जꣳ हि।
 स॒ वै तमे॒व ना॑विन्दत्।
 यस्मै॒ तां दक्षि॑णा॒मनै॑ष्यत्।
 ताꣳ स्वा॒यैव॒ हस्ता॑य॒ दक्षि॑णायानयत्।
 तां प्रत्य॑गृह्णात्॥⁴⁸॥
 दक्षा॑य॒ त्वा दक्षि॑णां॒ प्रति॑गृह्णामीति।
 सोऽदक्ष॑त॒ दक्षि॑णां॒ प्रति॑गृह्य।
 दक्ष॑ते ह॒ वै दक्षि॑णां॒ प्रति॑गृह्य।
 य॒ एवं वेद॑।
 ए॒तद्ध॑ स्म॒ वै तद्वि॒द्वाꣳसो॑ वाज॒श्रव॒सा गोत॑माः।
 अप्य॑नू॒देश्या॑ दक्षि॑णां॒ प्रति॑गृह्णन्ति।
 उ॒भये॑न॒ वयं॑ दक्षि॑ष्यामह॒ ए॒व दक्षि॑णां॒ प्रति॑गृह्येति।
 तेऽदक्ष॑न्त॒ दक्षि॑णां॒ प्रति॑गृह्य।
 दक्ष॑ते ह॒ वै दक्षि॑णां॒ प्रति॑गृह्य।
 य॒ एवं वेद॑।
 प्र॒ हान्यं॑ क्ली॑नाति॥⁴⁹॥

[8]

तꣳ है॒तमे॑के॒ पशु॑बन्ध॒ ए॒वोत्त॑रवे॒द्यां चि॑न्वते।
 उ॒त्त॒रवे॒दिस॑म्मित॒ ए॒षोऽग्नि॑रिति॒ वद॑न्तः।
 तन्न॑ तथा॑ कुर्यात्।
 ए॒तम॑ग्निं॒ कामे॑न॒ व्य॑र्धयेत्।

स ए॒नं॑ का॒मे॒न॒ व्यृ॑द्धः।
 का॒मे॒न॒ व्य॑र्धयेत्।
 सौ॒म्ये वा॒वैन॑म॒ध्वरे चि॑न्वी॒त।
 यत्र॑ वा॒ भूयि॑ष्ठा॒ आहु॑तयो हू॒येरन्।
 ए॒तम॒ग्निं का॒मे॒न॒ सम॑र्धयति।
 स ए॒नं॑ का॒मे॒न॒ समृ॑द्धः॥₅₀॥
 का॒मे॒न॒ सम॑र्धयति।
 अथ॑ है॒नं पु॒रर्ष॑यः।
 उ॒त्त॒र॒वे॒द्यामे॒व स॒त्तिय॑मचिन्वत।
 ततो॒ वै तेऽवि॑न्दन्त प्र॒जाम्।
 अ॒भि स्व॒र्गं लो॒कम॑जयन्।
 वि॒न्दत॑ ए॒व प्र॒जाम्।
 अ॒भि स्व॒र्गं लो॒कं ज॑यति।
 योऽ॒ग्निं ना॑चिके॒तं चि॑नुते।
 य उ॑ चैनमे॒वं वेद॑।
 अथ॑ है॒नं वा॒युर्ऋ॑द्धि॒कामः॥₅₁॥
 य॒था॒न्यु॒प्तमे॒वोप॑दधे।
 ततो॒ वै स ए॒तामृ॑द्धि॒मार्धो॑त्।
 या॒मिदं॑ वा॒युर्ऋ॑द्धः।
 ए॒तामृ॑द्धि॒मृधो॑ति।
 या॒मिदं॑ वा॒युर्ऋ॑द्धः।
 योऽ॒ग्निं ना॑चिके॒तं चि॑नुते।
 य उ॑ चैनमे॒वं वेद॑।

अथ॑ है॒नं गो॒ब॒लो वा॒र्ष्णः प॒शुका॑मः।

पाङ्क्त॑मे॒व चि॑क्ये।

प॒ञ्च पु॒रस्ता॑त्॥₅₂॥

प॒ञ्च दक्षि॑णतः।

प॒ञ्च प॒श्चात्।

प॒ञ्चोत्त॑रतः।

एकां॑ म॒ध्यै।

ततो॑ वै स स॒हस्रं॑ प॒शून्प्राप्नो॑त्।

प्र स॒हस्रं॑ प॒शूना॑प्नोति।

योऽग्निं॑ ना॒चिके॒तं चि॑नुते।

य उ॑ चैनमे॒वं वेद॑।

अथ॑ है॒नं प्र॒जाप॑ति॒र्ज्यैष्ठ्य॑कामो॒ यश॑स्कामः प्र॒जन॑नकामः।

त्रि॒वृ॒तमे॒व चि॑क्ये॥₅₃॥

स॒प्त पु॒रस्ता॑त्।

ति॒स्रो दक्षि॑णतः।

स॒प्त प॒श्चात्।

ति॒स्र उ॑त्तरतः।

एकां॑ म॒ध्यै।

ततो॑ वै स प्र यशो॒ ज्यैष्ठ्य॑माप्नोत्।

ए॒तां प्रजा॑तिं प्राजा॑यत।

यामि॒दं प्र॒जाः प्र॒जाय॑न्ते।

त्रि॒वृ॒द्वै ज्यैष्ठ्य॑म्।

मा॒ता पि॒ता पु॒त्रः॥ ५४ ॥

त्रि॒वृ॒त्प्र॒ज॒न॒न॒म्।

उ॒प॒स्थो॒ योनि॑र्म॒ध्य॒मा।

प्र॒ य॒शो॒ ज्यै॒ष्ठ्य॑मा॒प्नोति॑।

ए॒तां प्र॒जा॑तिं प्र॒जा॑यते।

या॒मि॒दं प्र॒जाः प्र॒जा॑य॒न्ते।

यो॑ऽग्निं ना॑चि॒के॒तं चि॑नुते।

य उ॑ चैनमे॒वं वेद॑।

अथ॑ है॒न॒मिन्द्रो॒ ज्यै॒ष्ठ्य॑का॒मः।

ऊ॒र्ध्वा ए॒वोप॑दधे।

ततो॒ वै स ज्यै॒ष्ठ्य॑म॒गच्छ॑त्॥ ५५ ॥

ज्यै॒ष्ठ्यं गच्छ॑ति।

यो॑ऽग्निं ना॑चि॒के॒तं चि॑नुते।

य उ॑ चैनमे॒वं वेद॑।

अथ॑ है॒न॒म॒सावा॑दि॒त्यः स्व॒र्ग॒का॒मः।

प्रा॒ची॒रे॒वोप॑दधे।

ततो॒ वै सो॑ऽभि स्व॒र्गं लो॒क॒म॒जय॑त्।

अ॒भि स्व॒र्गं लो॒कं ज॑यति।

यो॑ऽग्निं ना॑चि॒के॒तं चि॑नुते।

य उ॑ चैनमे॒वं वेद॑।

स यदी॒च्छे॑त्॥ ५६ ॥

ते॒ज॒स्वी य॑श॒स्वी ब्र॑ह्मवर्च॒सी स्या॒मिति॑।

प्रा॒डा॒होतु॑र्धि॒ष्ण्या॒दुत्स॑र्पेत्।

येयं प्रागादशस्वती।

सा मा प्रोर्णोतु।

तेजसा यशसा ब्रह्मवर्चसेनेति।

तेजस्यैव यशस्वी ब्रह्मवर्चसी भवति।

अथ यदीच्छेत्।

भूयिष्ठं मे श्रद्धधीरन्।

भूयिष्ठा दक्षिणा नयेयुरिति।

दक्षिणासु नीयमानासु प्राच्येहि प्राच्येहीति प्राची जुषाणा वेत्वाऽऽज्यस्य स्वाहेति
स्रुवेणोपहत्याऽऽहवनीये जुहुयात्॥⁵⁷॥

भूयिष्ठमेवास्मै श्रद्धधते।

भूयिष्ठा दक्षिणा नयन्ति।

पुरीषमुपधाय।

चितिक्लृप्तिभिरभिमृश्य।

अग्निं प्रणीयोपसमाधाय।

चतस्र एता आहुतीर्जुहोति।

त्वमग्ने रुद्र इति शतरुद्रीयस्य रूपम्।

अग्नाविष्णू इति वसोर्धारायाः।

अन्नपत इत्यन्नहोमः।

सप्त ते अग्ने समिधः सप्त जिह्वा इति विश्वप्रीः॥⁵⁸॥

[9]

यां प्रथमामिष्टकामुपदधाति।

इमं तया लोकमभिजयति।

अथो या अस्मिँल्लोके देवताः।

तासा॑ꣳ सायु॑ज्यꣳ सलो॒कता॑माप्नोति।

यां द्वि॒तीया॑मुप॒दधा॑ति।

अ॒न्तरि॒क्षलो॒कं तया॑ऽभिज॑यति।

अथो॒ या अ॑न्तरि॒क्षलो॒के दे॒वताः॑।

तासा॑ꣳ सायु॑ज्यꣳ सलो॒कता॑माप्नोति।

यां तृ॒तीया॑मुप॒दधा॑ति।

अ॒मुं तया॑ लो॒कम॑भिज॑यति॥⁵⁹॥

अथो॒ या अ॒मुष्मि॑ल्लो॒के दे॒वताः॑।

तासा॑ꣳ सायु॑ज्यꣳ सलो॒कता॑माप्नोति।

अथो॒ या अ॒मूरि॑तरा अ॒ष्टाद॑श।

य ए॒वामी॑ उ॒रव॑श्च वरी॑याꣳसश्च लो॒काः।

ताने॒व ताभि॑र॒भिज॑यति॥

का॒म॒चारो॑ ह॒ वा अ॑स्यो॒रुषु॑ च॒ वरी॑यःसु च लो॒केषु॑ भवति।

योऽग्निं॑ ना॑चिके॒तं चि॑नुते।

य उ॑ चैनमे॒वं वेद॑।

स॒व॒त्स॒रो वा अ॒ग्निर्ना॑चिके॒तः।

तस्य॑ वस॒न्तः शिरः॑॥⁶⁰॥

ग्री॒ष्मो दक्षि॑णः प॒क्षः।

व॒र्षा उत्त॑रः।

श॒रत्पु॑च्छम्।

मा॒साः क॒र्मका॑राः।

अ॒हो॒रा॒त्रे श॑तरु॒द्रीय॑म्।

पर्जन्यो वसोर्धारा।
 यथा वै पर्जन्यः सुवृष्टं वृष्ट्वा।
 प्रजाभ्यः सर्वान्कामान्सम्पूरयति।
 एवमेव स तस्य सर्वान्कामान्सम्पूरयति।
 योऽग्निं नाचिकेतं चिनुते॥⁶¹॥
 य उ चैनमेवं वेद।
 संवत्सरो वा अग्निर्नाचिकेतः।
 तस्य वसन्तः शिरः।
 ग्रीष्मो दक्षिणः पक्षः।
 वर्षाः पुच्छम्।
 शरदुत्तरः पक्षः।
 हेमन्तो मध्यम्।
 पूर्वपक्षाश्चितयः।
 अपरपक्षाः पुरीषम्।
 अहोरात्राणीष्टकाः।
 एष वाव सोऽग्निरग्निमयः पुनर्णवः।
 अग्निमयो ह वै पुनर्णवो भूत्वा।
 स्वर्गं लोकमेति।
 आदित्यस्य सायुज्यम्।
 योऽग्निं नाचिकेतं चिनुते।
 य उ चैनमेवं वेद॥⁶²॥

[10]

॥इति कृष्णयजुर्वेदीयतैत्तिरीय काठके द्वितीयः प्रश्नः समाप्तः॥²॥

॥तृतीयः प्रश्नः॥

तुभ्यं ता अङ्गिरस्तमाऽश्याम तं काममग्ने।
आशानां त्वा विश्वा आशाः।
अनु नोऽद्यानुमतिरन्विदनुमते त्वम्।
कामो भूतस्य कामस्तदग्रे।
ब्रह्म जज्ञानं पिता विराजाम्।
यज्ञो रायोऽयं यज्ञः।
आपो भद्रा आदित्यश्यामि।
तुभ्यं भरन्ति यो देह्यः।
पूर्वं देवा अपरेण प्राणापानौ।
हव्यवाहृ स्विष्टम्॥₁॥

[1]

देवेभ्यो वै स्वर्गो लोकस्तिरोऽभवत्।
ते प्रजापतिमब्रुवन्।
प्रजापते स्वर्गो वै नो लोकस्तिरोऽभूत्।
तमन्विच्छेति।
तं यज्ञक्रतुभिरन्वैच्छत्।
तं यज्ञक्रतुभिर्नान्विन्दत्।
तमिष्टिभिरन्वैच्छत्।
तमिष्टिभिरन्वविन्दत्।
तदिष्टीनामिष्टित्वम्।

ए॒ष्टयो॑ ह॒ वै ना॒मः।
 ता इ॒ष्ट्य॑ इ॒त्याच॑क्षते प॒रोक्षे॑ण।
 प॒रोक्ष॑प्रि॒या इ॒व हि दे॒वाः॥२॥
 तमा॑शाऽब्रवीत्।
 प्रजा॑पत आ॒शया॒ वै श्रा॑म्यसि।
 अ॒हमु॒ वा आ॑शाऽस्मि।
 मां नु॑ यज॒स्व।
 अथ॑ ते स॒त्याऽऽशा॑ भविष्यति।
 अनु॑ स्व॒र्गं लो॒कं वे॒त्स्य॑सीति।
 स ए॒तम॒ग्नये॒ कामा॑य पुरो॒डाशं॑म॒ष्टाकं॑पा॒लं निर॑वपत्।
 आ॒शायै॑ च॒रुम्।
 अनु॑म॒त्यै च॒रुम्।
 ततो॒ वै तस्य॑ स॒त्याऽऽशा॑ऽभवत्।
 अनु॑ स्व॒र्गं लो॒कम॑विन्दत्।
 स॒त्या ह॒ वा अ॒स्यऽऽशा॑ भवति।
 अनु॑ स्व॒र्गं लो॒कं वि॑न्दति।
 य ए॒तेन॑ ह॒विषा॒ यज॑ते।
 य उ॑ चैन॒देवं वेद॑।
 सोऽत्र॑ जुहोति।
 अ॒ग्नये॒ कामा॑य॒ स्वाहा॑ऽऽशा॒यै स्वाहा॑।
 अनु॑म॒त्यै स्वाहा॑ प्र॒जाप॑तये॒ स्वाहा॑।
 स्व॒र्गाय॑ लो॒काय॒ स्वाहा॑ऽग्नये॑ स्वि॒ष्टकृ॑ते॒ स्वाहेति॑॥३॥
 तं कामो॑ऽब्रवीत्।

प्रजा॑पते॒ कामे॑न॒ वै श्राम्य॑सि।
 अ॒हमु॒ वै कामो॑ऽस्मि।
 मां नु॑ यज॑स्व।
 अथ॑ ते स॒त्यः कामो॑ भविष्यति।
 अनु॑ स्व॒र्गं लो॒कं वेत्स्य॑सीति।
 स ए॒तम॒ग्नये॒ कामा॑य पु॒रोडा॑शम॒ष्टाक॑पालं॒ निर॑वपत्।
 कामा॑य च॒रुम्।
 अनु॑मत्यै च॒रुम्।
 ततो॒ वै तस्य॑ स॒त्यः कामो॑ऽभवत्।
 अनु॑ स्व॒र्गं लो॒कम॑विन्दत्।
 स॒त्यो ह॒ वा अ॑स्य॒ कामो॑ भवति।
 अनु॑ स्व॒र्गं लो॒कं वि॑न्दति।
 य ए॒तेन॑ ह॒विषा॒ यज॑ते।
 य उ॑ चैन॒देवं वेद॑।
 सोऽत्र॑ जुहोति।
 अ॒ग्नये॒ कामा॑य॒ स्वाहा॒ कामा॑य॒ स्वाहा॑।
 अनु॑मत्यै॒ स्वाहा॑ प्र॒जाप॑तये॒ स्वाहा॑।
 स्व॒र्गाय॑ लो॒काय॒ स्वाहा॒ऽग्नये॑ स्वि॒ष्टकृ॑ते॒ स्वाहेति॑॥४॥
 तं ब्रह्मा॑ऽब्रवीत्।
 प्रजा॑पते॒ ब्रह्म॑णा॒ वै श्राम्य॑सि।
 अ॒हमु॒ वै ब्रह्मा॑ऽस्मि।
 मां नु॑ यज॑स्व।
 अथ॑ ते ब्रह्म॒ण्वान् य॒ज्ञो भ॑विष्यति।

अनु॑ स्व॒र्गं लो॒कं वे॒त्स्यसी॑ति।

स ए॒तम॒ग्नये॒ कामा॑य पु॒रोडा॑शम॒ष्टाक॑पालं॒ निर॑वपत्।

ब्रह्म॑णे च॒रुम्।

अनु॑म॒त्यै च॒रुम्।

ततो॒ वै तस्य॑ ब्रह्म॒ण्वान् य॒ज्ञोऽभ॑वत्।

अनु॑ स्व॒र्गं लो॒कम॑विन्दत्।

ब्रह्म॑ण्वान् ह॒ वा अ॑स्य य॒ज्ञो भ॑वति।

अनु॑ स्व॒र्गं लो॒कं वि॑न्दति।

य ए॒तेन॑ ह॒विषा॒ यज॑ते।

य उ॑ चैन॒देवं वेद॑।

सोऽत्र॑ जुहोति।

अ॒ग्नये॒ कामा॑य॒ स्वाहा॒ ब्रह्म॑णे॒ स्वाहा॑।

अनु॑म॒त्यै स्वाहा॑ प्र॒जाप॑तये॒ स्वाहा॑।

स्व॒र्गाय॑ लो॒काय॒ स्वाहा॒ऽग्नये॑ स्वि॒ष्टकृ॑ते॒ स्वाहे॑ति॥⁵॥

तं य॒ज्ञोऽब्र॑वीत्।

प्रजा॑पते य॒ज्ञेन॒ वै श्राम्य॑सि।

अ॒हमु॒ वै य॒ज्ञोऽस्मि॑।

मां नु॑ यज॒स्व।

अथ॑ ते स॒त्यो य॒ज्ञो भ॑विष्यति।

अनु॑ स्व॒र्गं लो॒कं वे॒त्स्यसी॑ति।

स ए॒तम॒ग्नये॒ कामा॑य पु॒रोडा॑शम॒ष्टाक॑पालं॒ निर॑वपत्।

य॒ज्ञाय॑ च॒रुम्।

अनु॑मत्यै च॒रुम्।

ततो॑ वै तस्य॑ स॒त्यो य॒ज्ञोऽभवत्।

अनु॑ स्व॒र्गं लो॒कम॑विन्दत्।

स॒त्यो ह॒ वा अ॑स्य य॒ज्ञो भ॑वति।

अनु॑ स्व॒र्गं लो॒कं वि॑न्दति।

य ए॒तेन॑ ह॒विषा॑ यज॑ते।

य उ॑ चैनदे॒वं वेद॑।

सोऽत्र॑ जुहोति।

अ॒ग्नये॒ कामा॑य॒ स्वाहा॑ य॒ज्ञाय॒ स्वाहा॑।

अनु॑मत्यै॒ स्वाहा॑ प्र॒जाप॑तये॒ स्वाहा॑।

स्व॒र्गाय॑ लो॒काय॒ स्वाहा॒ऽग्नये॑ स्वि॒ष्टकृ॑ते॒ स्वाहेति॑॥६॥

तमापो॑ऽब्रुवन्।

प्रजा॑पते॒ऽप्सु वै सर्वे॑ कामाः॑ श्रि॒ताः।

व॒यमु॒ वा आपः॑ स्मः।

अ॒स्मान्नु य॑जस्व।

अथ॒ त्वयि॑ सर्वे॑ कामाः॑ श्रयिष्यन्ते।

अनु॑ स्व॒र्गं लो॒कं वे॒त्स्यसी॑ति।

स ए॒तम॒ग्नये॒ कामा॑य॒ पुरो॒डाशं॑ म॒ष्टाकं॑ पा॒लं निर॑वपत्।

अ॒द्भ्यश्च॒रुम्।

अनु॑मत्यै च॒रुम्।

ततो॑ वै तस्मि॒न्सर्वे॑ कामा॑ अश्रयन्त।

अनु॑ स्व॒र्गं लो॒कम॑विन्दत्।

सर्वे॑ ह॒ वा अ॑स्मि॒न्कामाः॑ श्रयन्ते।

अनु॑ स्व॒र्गं लो॒कं वि॒न्दति॑।

य ए॒तेन॑ ह॒विषा॑ यज॑ते।

य उ॑ चैनदे॒वं वेद॑।

सोऽत्र॑ जुहोति॑।

अ॒ग्नये॑ का॒माय॑ स्वाहाऽ॒ग्न्यः स्वाहा॑॥

अनु॑मत्यै॒ स्वाहा॑ प्र॒जाप॑तये॒ स्वाहा॑॥

स्व॒र्गाय॑ लो॒काय॑ स्वाहाऽ॒ग्नये॑ स्वि॒ष्टकृ॑ते॒ स्वाहेति॑॥७॥

तम॑ग्निर्बलि॒मान॑ब्रवीत्।

प्रजा॑पतेऽ॒ग्नये॑ वै ब॑लि॒मते॒ सर्वा॑णि भू॒तानि॑ ब॒लिः ह॑रन्ति।

अ॒हमु॒ वा अ॒ग्निर्बलि॒मान॑स्मि।

मां नु॑ यज॑स्व।

अथ॑ ते॒ सर्वा॑णि भू॒तानि॑ ब॒लिः ह॑रिष्यन्ति।

अनु॑ स्व॒र्गं लो॒कं वे॒त्स्य॑सीति॑।

स ए॒तम॑ग्नये॒ कामा॑य पु॒रोडा॑शम॒ष्टाक॑पालं॒ निर॑वपत्।

अ॒ग्नये॑ बलि॒मते॑ च॒रुम्।

अनु॑मत्यै च॒रुम्।

ततो॒ वै तस्मै॒ सर्वा॑णि भू॒तानि॑ ब॒लिम॑हरन्।

अनु॑ स्व॒र्गं लो॒कम॑विन्दत्।

सर्वा॑णि ह॒ वा अ॑स्मै भू॒तानि॑ ब॒लिः ह॑रन्ति।

अनु॑ स्व॒र्गं लो॒कं वि॒न्दति॑।

य ए॒तेन॑ ह॒विषा॑ यज॑ते।

य उ॑ चैनदे॒वं वेद॑।

सोऽत्र जुहोति।

अ॒ग्नये॒ कामा॑य॒ स्वाहा॒ऽग्नये॒ बलि॒मते॒ स्वाहा॑।

अ॒नु॒म॒त्यै॒ स्वाहा॑ प्र॒जाप॑तये॒ स्वाहा॑।

स्व॒र्गाय॑ लो॒काय॒ स्वाहा॒ऽग्नये॑ स्वि॒ष्टकृ॑ते॒ स्वाहेति॑॥८॥

तम॑नु॒वित्ति॑रब्रवीत्।

प्रजा॑पते स्व॒र्गं वै लो॒कम॑नु॒विवित्स॑सि।

अ॒हमु॒ वा अ॑नु॒वित्ति॑रस्मि।

मां नु॑ यजस्व।

अथ॑ ते स॒त्याऽनु॑वित्ति॒र्भवि॑ष्यति।

अ॒नु॒ स्व॒र्गं लो॒कं वे॒त्स्य॑सीति।

स ए॒तम॒ग्नये॒ कामा॑य॒ पुरो॒डाशं॑म॒ष्टाकं॑पा॒लं नि॑रवपत्।

अ॒नु॒वित्त्यै॒ च॒रुम्।

अ॒नु॒म॒त्यै॒ च॒रुम्।

ततो॒ वै तस्य॑ स॒त्याऽनु॑वित्ति॒रभव॑त्।

अ॒नु॒ स्व॒र्गं लो॒कम॑विन्दत्।

स॒त्या ह॒ वा अ॒स्यानु॑वित्ति॒र्भव॑ति।

अ॒नु॒ स्व॒र्गं लो॒कं वि॑न्दति।

य ए॒तेन॑ ह॒विषा॒ यज॑ते।

य उ॑ चैन॒देवं॒ वेद॑।

सोऽत्र जुहोति।

अ॒ग्नये॒ कामा॑य॒ स्वाहा॒ऽनु॒वित्त्यै॒ स्वाहा॑।

अ॒नु॒म॒त्यै॒ स्वाहा॑ प्र॒जाप॑तये॒ स्वाहा॑।

स्व॒र्गाय॑ लो॒काय॒ स्वाहा॒ऽग्नये॑ स्वि॒ष्टकृ॑ते॒ स्वाहेति॑॥९॥

ता वा ए॒ताः स॒प्त स्व॒र्गस्य॑ लो॒कस्य॑ द्वा॒रः।
 दि॒वःश्र्ये॑न॒योऽनु॑वित्त॒यो नाम॑।
 आ॒शा प्र॒थमा॑ र॒क्षति॑।
 का॒मो द्वि॒तीया॑म्।
 ब्र॒ह्म तृ॒तीया॑म्।
 य॒ज्ञश्च॑तु॒र्थीम्।
 आ॒पः प॒ञ्चमी॑म्।
 अ॒ग्निर्ब॑लि॒मान्प॒ष्ठीम्।
 अ॒नु॒वित्तिः॑ स॒प्तमी॑म्।
 अ॒नु ह॒ वै स्व॒र्गं लो॒कं वि॑न्दति।
 का॒म॒चा॒रोऽस्य॑ स्व॒र्गे लो॒के भ॑वति।
 य ए॒ताभि॑रिष्टि॒भिर्य॑जते।
 य उ॑ चै॒ना ए॒वं वेद॑।
 तास्व॑न्विष्टि॒।
 प॒ष्ठौही॒वरां॑ द॒द्यात्क॒सं च॑।
 स्त्रि॒यै चाऽऽभा॑र॒सं मृ॑द्धौ॥¹⁰॥

[2]

तप॑सा दे॒वा दे॒वता॑म॒ग्रं आ॑यन्।
 तप॑स॒र्षयः॑ स्व॒रन्वि॑न्दन्।
 तप॑सा स॒पत्न्या॑न्प्र॒णु॒दामा॑र॒तीः।
 येने॒दं वि॒श्वं परि॑भूतं यदस्ति॑।
 प्र॒थम॑जं दे॒वः ह॒विषा॑ विधेम।
 स्व॒यम्भु॑ ब्र॒ह्म पर॑मं तपो॒ यत्।

स ए॒व पु॒त्रः स पि॒ता स मा॒ता।
तपो॑ ह य॒क्षं प्र॑थ॒मं सम्ब॑भूव।
श्रद्ध॑या दे॒वो दे॒वत्व॑मश्नुते।
श्रद्धा॑ प्र॒तिष्ठा॑ लो॒कस्य॑ दे॒वी॥¹¹॥
सा नो॑ जुषा॒णोप॑ य॒ज्ञमागा॑त्।
का॒मव॑त्साऽमृ॒तं दुहा॑ना।
श्रद्धा॑ दे॒वी प्र॑थ॒मजा॑ ऋ॒तस्य॑।
विश्व॑स्य भ॒र्त्री जग॑तः प्र॒तिष्ठा॑।
तां श्रद्धा॑ ह॒विषा॑ यजामहे।
सा नो॑ लो॒कम॒मृ॒तं दधा॑तु।
ईशा॑ना दे॒वी भुव॑न॒स्याधि॑प॒त्नी।
आगा॑त्स॒त्यं ह॒विरि॒दं जुषा॑णम्।
यस्मा॑द्दे॒वा ज॑ज्ञिरे भुव॑नं च॒ विश्वै॑।
तस्मै॑ विधेम ह॒विषा॑ घृ॒तेन॑॥¹²॥
यथा॑ दे॒वैः स॑ध॒मादं॑ मदेम।
यस्य॑ प्र॒तिष्ठा॑र्वन्त॒रिक्ष॑म्।
यस्मा॑द्दे॒वा ज॑ज्ञिरे भुव॑नं च॒ सर्वै॑।
तत्स॒त्यमर्च॑दुप॑ य॒ज्ञं न आगा॑त्।
ब्रह्मा॑ऽऽहु॒तीरु॒पमो॑द॒मानम्॑।
मन॑सो व॒शे सर्व॑मि॒दं ब॑भूव।
नान्य॑स्य॒ मनो॑ व॒शम॑न्वि॒याय॑।
भी॒ष्मो हि दे॒वः सह॑सः सही॑यान्।

स नो जुषाण उप यज्ञमागात्।
 आकूतीनामधिपतिं चेतसां च॥¹³॥
 सङ्कल्पजूतिं देवं विपश्चिम्।
 मनो राजानमिह वर्धयन्तः।
 उपहवैऽस्य सुमतौ स्याम।
 चरणं पवित्रं विततं पुराणम्।
 येन पूतस्तरति दुष्कृतानि।
 तेन पवित्रेण शुद्धेन पूताः।
 अतिं पाप्मानमरातिं तरेम।
 लोकस्य द्वारमर्चिमत्पवित्रम्।
 ज्योतिष्मद्भाजमानं महस्वत्।
 अमृतस्य धारां बहुधा दोहमानम्।
 चरणं नो लोके सुधितां दधातु।
 अग्निर्मूर्धा भुवः।
 अनु नोऽद्यानुमतिरन्विदनुमते बम्।
 हव्यवाहः स्विष्टम्॥¹⁴॥

[3]

देवेभ्यो वै स्वर्गो लोकस्तिरोऽभवत्।
 ते प्रजापतिमब्रुवन्।
 प्रजापते स्वर्गो वै नो लोकस्तिरोऽभूत्।
 तमन्विच्छेति।
 तं यज्ञक्रतुभिरन्वैच्छत्।
 तं यज्ञक्रतुभिर्नान्विन्दत्।

तमिष्टिभिरन्वैच्छत्।
तमिष्टिभिरन्वविन्दत्।
तदिष्टीनामिष्टिब्रम्।
एष्टयो ह वै नाम।
ता इष्टय इत्याचक्षते पुरोक्षेण।
पुरोक्षप्रिया इव हि देवाः॥¹⁵॥
तं तपोऽब्रवीत्।
प्रजापते तपसा वै श्राम्यसि।
अहमु वै तपोऽस्मि।
मां नु यजस्व।
अथ ते सत्यं तपो भविष्यति।
अनु स्वर्गं लोकं वेत्स्यसीति।
स एतमाग्नेयमष्टाकपालं निरवपत्।
तपसे चरुम्।
अनुमत्यै चरुम्।
ततो वै तस्य सत्यं तपोऽभवत्।
अनु स्वर्गं लोकमविन्दत्।
सत्यं ह वा अस्य तपो भवति।
अनु स्वर्गं लोकं विन्दति।
य एतेन हविषा यजते।
य उ चैनदेवं वेद।
सोऽत्र जुहोति।
अग्नये स्वाहा तपसे स्वाहा।

अनु॑मत्यै॒ स्वाहा॑ प्र॒जाप॑तये॒ स्वाहा॑।
 स्वर्गा॑य॒ लो॒काय॒ स्वाहा॒ऽग्नये॑ स्वि॒ष्टकृ॑ते॒ स्वाहेति॑॥ १६ ॥
 त॒ऽ श्र॒द्धाऽब्र॑वीत्।
 प्रजा॑पते श्रद्धया॒ वै श्राम्य॑सि।
 अ॒हमु॒ वै श्र॒द्धाऽस्मि॑।
 मां नु॑ यजस्व।
 अथ॑ ते स॒त्या श्र॒द्धा भ॑विष्यति।
 अनु॑ स्व॒र्गं लो॒कं वे॒त्स्यसी॑ति।
 स ए॒तमा॑ग्ने॒यम॒ष्टाक॑पालं॒ निर॑वपत्।
 श्र॒द्धायै॑ च॒रुम्।
 अनु॑मत्यै च॒रुम्।
 ततो॒ वै तस्य॑ स॒त्या श्र॒द्धाऽभ॑वत्।
 अनु॑ स्व॒र्गं लो॒कम॑विन्दत्।
 स॒त्या ह॒ वा अ॑स्य श्रद्धा भ॑वति।
 अनु॑ स्व॒र्गं लो॒कं वि॑न्दति।
 य ए॒तेन॑ ह॒विषा॒ यज॑ते।
 य उ॑ चैनदे॒वं वेद॑।
 सोऽत्र॑ जुहोति।
 अ॒ग्नये॒ स्वाहा॑ श्र॒द्धायै॒ स्वाहा॑।
 अनु॑मत्यै॒ स्वाहा॑ प्र॒जाप॑तये॒ स्वाहा॑।
 स्वर्गा॑य॒ लो॒काय॒ स्वाहा॒ऽग्नये॑ स्वि॒ष्टकृ॑ते॒ स्वाहेति॑॥ १७ ॥
 त॒ऽ स॒त्यम॑ब्रवीत्।

प्रजा॑पते स॒त्येन॒ वै श्राम्य॑सि।
 अ॒हमु॒ वै स॒त्यम॑स्मि।
 मां नु॑ यज॑स्व।
 अथ॑ ते स॒त्यं स॒त्यं भ॑विष्यति।
 अनु॑ स्व॒र्गं लो॒कं वे॒त्स्यसी॑ति।
 स ए॒तमा॑ग्नेयम॒ष्टाक॑पालं॒ निर॑वपत्।
 स॒त्याय॑ च॒रुम्।
 अनु॑मत्यै च॒रुम्।
 ततो॒ वै तस्य॑ स॒त्यं स॒त्यम॑भवत्।
 अनु॑ स्व॒र्गं लो॒कम॑विन्दत्।
 स॒त्यं ह॒ वा अ॑स्य स॒त्यं भ॑वति।
 अनु॑ स्व॒र्गं लो॒कं वि॑न्दति।
 य ए॒तेन॑ ह॒विषा॒ यज॑ते।
 य उ॑ चैनदे॒वं वेद॑।
 सोऽ॒त्र जु॑होति।
 अ॒ग्नये॒ स्वाहा॑ स॒त्याय॒ स्वाहा॑।
 अनु॑मत्यै॒ स्वाहा॑ प्र॒जाप॑तये॒ स्वाहा॑।
 स्व॒र्गाय॑ लो॒काय॒ स्वाहा॒ऽग्नये॑ स्वि॒ष्टकृ॑ते॒ स्वाहे॑ति॥¹⁸॥
 तं मनो॑ऽब्रवीत्।
 प्रजा॑पते मन॑सा॒ वै श्राम्य॑सि।
 अ॒हमु॒ वै मनो॑ऽस्मि।
 मां नु॑ यज॑स्व।
 अथ॑ ते स॒त्यं मनो॑ भविष्यति।

अनु॑ स्व॒र्गं लो॒कं वे॒त्स्यसी॑ति।
 स ए॒तमा॑ग्ने॒यम॒ष्टाक॑पालं॒ निर॑वपत्।
 मन॑से च॒रुम्।
 अनु॑मत्यै च॒रुम्।
 ततो॒ वै तस्य॑ स॒त्यं मनो॑ऽभवत्।
 अनु॑ स्व॒र्गं लो॒कम॑विन्दत्।
 स॒त्यं ह॒ वा अ॑स्य॒ मनो॑ भवति।
 अनु॑ स्व॒र्गं लो॒कं वि॑न्दति।
 य ए॒तेन॑ ह॒विषा॒ यज॑ते।
 य उ॑ चैन॒देवं वेद॑।
 सोऽत्र॑ जुहोति।
 अ॒ग्नये॒ स्वाहा॒ मन॑से॒ स्वाहा॑।
 अनु॑मत्यै॒ स्वाहा॑ प्र॒जाप॑तये॒ स्वाहा॑।
 स्व॒र्गाय॑ लो॒काय॒ स्वाहा॒ऽग्नये॑ स्वि॒ष्टकृ॑ते॒ स्वाहे॑ति॥¹⁹॥
 तं च॑रणमब्रवीत्।
 प्रजा॑पते च॒रणेन॒ वै श्राम्य॑सि।
 अ॒हमु॒ वै च॑रणमस्मि।
 मां नु॑ यजस्व।
 अथ॑ ते स॒त्यं च॑रणं भविष्यति।
 अनु॑ स्व॒र्गं लो॒कं वे॒त्स्यसी॑ति।
 स ए॒तमा॑ग्ने॒यम॒ष्टाक॑पालं॒ निर॑वपत्।
 च॑र॒णाय॒ च॒रुम्।
 अनु॑मत्यै च॒रुम्।

ततो॑ वै तस्य॑ स॒त्यं च॑रणमभवत्।
अनु॑ स्व॒र्गं लो॒कम॑विन्दत्।
स॒त्यः ह॒ वा अ॑स्य च॒रणं भ॑वति।
अनु॑ स्व॒र्गं लो॒कं वि॑न्दति।
य ए॒तेन॑ ह॒विषा॒ यज॑ते।
य उ॑ चैन॒देवं वेद॑।
सोऽत्र॑ जुहोति।
अ॒ग्नये॒ स्वाहा॒ च॑र॒णाय॒ स्वाहा॑।
अनु॑म॒त्यै स्वाहा॑ प्र॒जाप॑त॒ये स्वाहा॑।
स्व॒र्गाय॑ लो॒काय॒ स्वाहा॒ऽग्नये॑ स्वि॒ष्टकृ॑ते स्वाहेति॑॥²⁰॥
ता वा ए॒ताः प॑ञ्च स्व॒र्गस्य॑ लो॒कस्य॒ द्वा॒रः।
अपा॑घा॒ अनु॑वित्तयो॒ नाम॑।
तपः॑ प्रथ॒माः र॑क्षति।
श्र॒द्धा द्वि॒तीया॑म्।
स॒त्यं तृ॒तीया॑म्।
मन॑श्चतु॒र्थीम्।
च॒रणं प॑ञ्चमीम्।
अनु॑ ह॒ वै स्व॒र्गं लो॒कं वि॑न्दति।
का॒म॒चारौ॑ऽस्य स्व॒र्गे लो॒के भ॑वति।
य ए॒ताभि॑रिष्टि॒भिर्य॑जते।
य उ॑ चैना ए॒वं वेद॑।
तास्व॑न्विष्टि।

प॒ष्ठौ॒ही॒वरां॑ द॒द्यात्क्॒सं च॑।
स्त्रियै॑ चाऽऽभा॒रं॒ समृ॑द्ध्यै॥²¹॥

[4]

ब्र॒ह्म॒ वै च॑तु॒र्हो॒तारः॑।
च॑तु॒र्हो॒तृ॒भ्योऽधि॑य॒ज्ञो निर्मि॑तः।
नै॒नः॑ श॒प्तम्।
नाभि॑च॒रित॒माग॑च्छति।
य ए॒वं वेद॑।
यो ह॒ वै च॑तु॒र्हो॒तृणां॑ च॑तु॒र्हो॒तृ॒त्वं वेद॑।
अथो॑ प॒ञ्च॑हो॒तृ॒त्वं।
स॒र्वा हा॑स्मै दि॒शः॑ कल्पन्ते।
वा॒च॒स्पति॑र्हो॒ता द॑श॒हो॒तृ॒णाम्।
पृ॒थि॒वी हो॒ता च॑तु॒र्हो॒तृ॒णाम्॥²²॥
अ॒ग्नि॑र्हो॒ता प॑ञ्च॒हो॒तृ॒णाम्।
वा॒ग्धो॒ता ष॑ड्ढो॒तृ॒णाम्।
म॒हा॒ह॒वि॒र्हो॒ता स॒प्त॑हो॒तृ॒णाम्।
ए॒तद्वै च॑तु॒र्हो॒तृणां॑ च॑तु॒र्हो॒तृ॒त्वं।
अथो॑ प॒ञ्च॑हो॒तृ॒त्वं।
स॒र्वा हा॑स्मै दि॒शः॑ कल्पन्ते।
य ए॒वं वेद॑।
ए॒षा वै स॑र्व॒वि॒द्या।
ए॒तद्भै॑ष॒जम्।

ए॒षा प॒ङ्क्तिः स्व॒र्गस्य॑ लो॒कस्या॑अ॒साऽय॑निः स्मृ॒तिः॥ २३ ॥

ए॒तान् योऽध्यै॑त्य॒च्छदि॑र्शे याव॑त्त॒रस॑म्।

स्व॒रेति॑।

अ॒न॒प॒ब्र॒वः सर्व॑मायुरेति।

वि॒न्दते॑ प्र॒जाम्।

रा॒य॒स्पोष॑ गो॒प॒त्यम्।

ब्र॒ह्म॒व॒र्च॒सी भ॑वति।

ए॒तान् योऽध्यै॑ति।

स्पृ॒णो॒त्या॒त्मान॑म्।

प्र॒जां पि॒तृन्।

ए॒तान् वा अ॑रु॒ण औ॑प॒वेशि॑र्वि॒दां च॑कार॥ २४ ॥

ए॒तैर॑धि॒वा॒दम॑पा॒जय॑त्।

अथो॑ वि॒श्वं पा॒प्मान॑म्।

स्व॒र्य॑यौ।

ए॒तान्यो॑ऽध्यै॑ति।

अ॒धि॒वा॒दं ज॑यति।

अथो॑ वि॒श्वं पा॒प्मान॑म्।

स्व॒रेति॑।

ए॒तैर॑ग्निं चि॒न्वी॑त स्व॒र्गका॑मः।

ए॒तैरा॑यु॒ष्कामः॑।

प्र॒जाप॑शु॒का॑मो वा॥ २५ ॥

पु॒रस्ता॒द्दश॑हो॒तार॑मु॒द॒ध्मु॑प॒दधा॑ति याव॑त्प॒दम्।

हृ॒द॒यं य॑जु॒षी प॒त्न्यौ च॑।

दक्षिणतः प्राञ्चं चतुर्होतारम्।
 पश्चादुदञ्चं पञ्चहोतारम्।
 उत्तरतः प्राञ्चं षड्होतारम्।
 उपरिष्ठात्प्राञ्चं सप्तहोतारम्।
 हृदयं यजूंषि पत्न्यंश्च।
 यथावकाशं ग्रहान्।
 यथावकाशं प्रतिग्रहलोकं पृणाश्च।
 सर्वा हास्येता देवताः प्रीता अभीष्टा भवन्ति॥²⁶॥
 सदेवमग्निं चिनुते।
 रथसंमितश्चेतव्यः।
 वज्रो वै रथः।
 वज्रेणैव पाप्मानं भ्रातृव्यं स्तृणुते।
 पक्षः संमितश्चेतव्यः।
 एतावान् वै रथः।
 यावत्पक्षः।
 रथसंमितमेव चिनुते।
 इममेव लोकं पशुबन्धेनाभिजयति।
 अथो अग्निष्टोमेन॥²⁷॥
 अन्तरिक्षमुक्थ्येन।
 स्वरतिरात्रेण।
 सर्वाल्लोकानहीनेन।
 अथो सत्रेण।

व॒रो दक्षि॑णा।
 वरे॑णै॒व वर॑ः स्पृ॒णोति॑।
 आ॒त्मा हि वरः॑।
 ए॒कविं॑शतिर्दक्षि॑णा ददाति।
 ए॒कविं॑शो वा इ॒तः स्व॒र्गो लो॒कः।
 प्र स्व॒र्गं लो॒कमाप्नो॑ति॥²⁸॥
 अ॒सावा॑दित्य ए॒कविं॑शः।
 अ॒मुमे॒वाऽऽदि॒त्यमाप्नो॑ति।
 श॒तं ददा॑ति।
 श॒तायुः॑ पु॒रुषः॑ श॒तेन्द्रि॑यः।
 आ॒युष्ये॑वेन्द्रि॒ये प्र॒ति॑तिष्ठति।
 स॒हस्रं॑ ददाति।
 स॒हस्र॑स॒मि॒तः स्व॒र्गो लो॒कः।
 स्व॒र्गस्य॑ लो॒कस्या॒भिजि॑त्यै।
 अ॒न्विष्ट॑कं दक्षि॑णा ददाति।
 सर्वा॑णि वया॑सि॥²⁹॥
 सर्व॑स्याऽऽप्त्यै॑।
 सर्व॑स्याव॑रुद्ध्यै।
 यदि॑ न वि॒न्दे॒त।
 म॒न्थाने॑ताव॒तो द॑द्यादो॒दनान् वा॑।
 अ॒श्रुते॑ तं का॒मम्।
 यस्मै॑ का॒माया॑ग्निश्ची॒यते॑।

प॒ष्ठौ॒र्हीं ब॒न्तर्व॑तीं दद्यात्।

सा हि सर्वा॑णि वया॑सि।

सर्व॑स्याऽऽस्यै॑।

सर्व॑स्याव॑रुद्धौ॥₃₀॥

हिर॑ण्यं ददाति।

हिर॑ण्यज्योतिरे॒व स्व॒र्गं लो॒कमे॑ति।

वासो॑ ददाति।

तेन्ऽऽयुः॑ प्रति॑रते।

वेदि॑तृती॒ये य॑जेत।

त्रिष॑त्या हि दे॒वाः।

स संत्य॑मग्निं चि॑नुते।

तदे॒तत्प॑शुब॒न्धे ब्रा॑ह्मणं ब्रूयात्।

नेत॑रेषु य॒ज्ञेषु॑।

यो ह॒ वै चतु॑र्होतृ॒ननु॑स॒वनं त॑र्पयित॒व्यान् वेद॑॥₃₁॥

तृप्य॑ति प्र॒जया॑ प॒शुभिः॑।

उपै॑न॒ सोम॑पी॒थो न॑मति।

ए॒ते वै चतु॑र्होता॒रोऽनु॑स॒वनं त॑र्पयित॒व्याः।

ये ब्रा॑ह्म॒णा ब॑हु॒विदः॑।

तेभ्यो॑ यद्व॒क्षि॑णा न नये॑त्।

दुरि॑ष्टः स्यात्।

अ॒ग्निम॑स्य वृ॒ज्जीर॑न्।

तेभ्यो॑ यथा॒श्रद्धं॑ दद्यात्।

स्वि॑ष्टमे॒वैतत्क्रि॑यते।

नास्या॒ग्निं वृ॑ञ्जते॥³²॥

हि॒र॒ण्ये॒ष्टको भ॑वति।

याव॑दु॒त्तमम॑ङ्गुलिका॒ण्डं य॑ज्ञप॒रुषा॒ सम्मि॑तम्।

तेजो॑ हि॒र॒ण्यम्।

यदि॑ हि॒र॒ण्यं न वि॒न्देत्।

शर्क॑रा अ॒क्ता उप॑दध्यात्।

तेजो॑ घृ॒तम्।

सते॑जसमे॒वाग्निं चि॑नुते।

अ॒ग्निं चि॒त्वा सौ॑त्राम॒ण्या य॑जेत मै॒त्रावरु॑ण्या वा॑।

वी॒र्ये॑ण॒ वा ए॒ष व्य॑ध्यते।

योऽ॒ग्निं चि॑नुते॥³³॥

याव॑दे॒व वी॒र्यम्॑।

तद॑स्मिन्दधाति।

ब्रह्म॑णः सायु॑ज्यं सलो॒कता॑माप्नोति।

ए॒तासा॑मे॒व दे॒वता॑नां॒ सायु॑ज्यम्।

सा॒र्ष्टिता॑ स॒मानलो॒कता॑माप्नोति।

य ए॒तम॒ग्निं चि॑नुते।

य उ॑ चैनमे॒वं वेद॑।

ए॒तदे॒व सा॑वि॒त्रे ब्रा॑ह्मणम्।

अथो॑ नाचि॒केते॑॥³⁴॥

यच्चा॒मृतं॑ यच्च॒ मर्त्यम्॑।

यच्च प्राणि॑ति॒ यच्च॒ न।
सर्वा॑स्ता इष्ट॑काः कृ॒त्वा।
उप॑ काम॒दुघा॑ दधे।
तेन॑र्षि॒णा तेन॒ ब्रह्म॑णा।
तया॑ दे॒वत॑याऽङ्गि॒रस्व॑द्भु॒वा सी॑द।
सर्वाः॑ स्त्रियः॒ सर्वा॑न्पु॒ंसः।
सर्वं॑ न स्त्री॑पुमं च॒ यत्।
सर्वा॑स्ताः।
याव॑न्तः पा॒सवो॒ भूमेः॑॥³⁵॥
सङ्ख्या॑ता दे॒वमा॒यया॑।
सर्वा॑स्ताः।
याव॑न्त॒ ऊषाः॑ पशू॒नाम्।
पृथि॑व्यां पुष्टि॑र्हि॒ताः।
सर्वा॑स्ताः।
याव॑तीः सि॒कताः॒ सर्वाः॑।
अ॒प्स्वन्त॑श्च॒ याः श्रि॒ताः।
सर्वा॑स्ताः।
याव॑तीः श॒र्करा॒ धृत्यै॑।
अ॒स्यां पृथि॑व्यामधि॑॥³⁶॥
सर्वा॑स्ताः।
याव॑न्तोऽश्मा॑नोऽस्यां पृथि॑व्याम्।
प्रति॑ष्ठासु॒ प्रति॑ष्ठिताः।
सर्वा॑स्ताः।

याव॑तीर्वी॒रुधः॑ सर्वाः॑।

वि॒ष्टि॑ताः पृ॒थि॒वीम॑नु।

सर्वा॑स्ताः।

याव॑तीरोष॑धीः सर्वाः॑।

वि॒ष्टि॑ताः पृ॒थि॒वीम॑नु।

सर्वा॑स्ताः॥³⁷॥

याव॑न्तो वन॒स्पत॑यः।

अ॒स्यां पृ॒थि॒व्याम॑धि।

सर्वा॑स्ताः।

याव॑न्तो ग्रा॒म्याः प॒शवः॑ सर्वे॑।

आ॒र॒ण्याश्च॑ ये।

सर्वा॑स्ताः।

ये द्वि॒पाद॑श्चतु॒ष्पादः॑।

अ॒पाद॑ उ॒दर॑स॒र्पिणः॑।

सर्वा॑स्ताः।

याव॑दाञ्जन॑मुच्यते॑॥³⁸॥

दे॒व॒त्रा यच्च॑ मा॒नुष॑म्।

सर्वा॑स्ताः॥

याव॑त्कृ॒ष्णाय॑स॒र्वम्॑।

दे॒व॒त्रा यच्च॑ मा॒नुष॑म्।

सर्वा॑स्ताः।

याव॑ल्लो॒हाय॑स॒र्वम्॑।

दे॒व॒त्रा यच्च॑ मा॒नुष॑म्।

सर्वा॒स्ताः।

सर्व॑ः॒ सी॒सः॑ सर्वं॒ त्रपु॑।

दे॒व॒त्रा यच्च॑ मा॒नुष॑म्॥³⁹॥

सर्वा॒स्ताः।

सर्व॑ः॒ हि॒र॒ण्यः॑ रज॒तम्।

दे॒व॒त्रा यच्च॑ मा॒नुष॑म्।

सर्वा॒स्ताः।

सर्व॑ः॒ सु॒व॒र्णः॑ ह॒रि॒तम्।

दे॒व॒त्रा यच्च॑ मा॒नुष॑म्।

सर्वा॒स्ता इष्ट॑काः कृ॒त्वा।

उप॑ का॒म॒दु॒घा दधे॑।

तेन॑र्षि॒णा तेन॑ ब्रह्म॑णा।

तया॑ दे॒व॒त॒या ऽङ्गि॒र॒स्व॒द्भु॒वा सी॑द॥⁴⁰॥

[6]

सर्वा॑ दि॒शो दि॒क्षु।

यच्चा॒न्त॒र्भू॒तं प्र॒ति॒ष्ठि॒तम्।

सर्वा॒स्ता इष्ट॑काः कृ॒त्वा।

उप॑ का॒म॒दु॒घा दधे॑।

तेन॑र्षि॒णा तेन॑ ब्रह्म॑णा।

तया॑ दे॒व॒त॒या ऽङ्गि॒र॒स्व॒द्भु॒वा सी॑द॥

अ॒न्त॒रि॑क्षं च॒ के॒वल॑म्।

यच्चा॒स्मिन्न॑न्त॒राहि॑तम्।

सर्वा॒स्ताः।

आ॒न्तरि॒क्ष्यश्च॑ याः प्र॒जाः॥₄₁॥

ग॒न्ध॒र्वाप्सर॑सश्च॒ ये।

स॒र्वा॒स्ताः।

स॒र्वा॒नु॒दा॒रा॒न्त्स॒लिलान्॑।

अ॒न्तरि॑क्षे॒ प्रति॑ष्ठितान्।

स॒र्वा॒स्ताः।

स॒र्वा॒नु॒दा॒रा॒न्त्स॒लिलान्॑।

स्था॒वराः॑ प्रो॒ष्या॑श्च॒ ये।

स॒र्वा॒स्ताः।

स॒र्वा॒ धु॒निः॑ स॒र्वा॑न्ध्व॒सान्॑।

हि॒मो यच्च॑ शी॒यते॑॥₄₂॥

स॒र्वा॒स्ताः।

स॒र्वा॒न्म॒री॒चीन्॑ वि॒त॒तान्॑।

नी॒हा॒रो यच्च॑ शी॒यते॑।

स॒र्वा॒स्ताः।

स॒र्वा॒ वि॒द्युतः॑ स॒र्वा॑न्त्स्तनयि॒बून्॑।

ह्रा॒दु॒नी॒र्यच्च॑ शी॒यते॑।

स॒र्वा॒स्ताः।

स॒र्वाः॑ स्र॒व॑न्तीः स॒रितः॑।

स॒र्व॒म॒प्सु॒च॒रं च॑ यत्।

स॒र्वा॒स्ताः॥₄₃॥

याश्च॑ कू॒प्या॒ याश्च॑ ना॒द्याः॑ स॒मु॒द्रि॒याः॑।

याश्च॑ वै॒श॒न्ती॒रु॒त प्रा॑स॒ची॒र्याः॑।

सर्वा॒स्ताः।

ये चो॒त्तिष्ठ॑न्ति जी॒मूताः॑।

याश्च॒ वर्ष॑न्ति वृ॒ष्टयः॑।

सर्वा॒स्ताः।

तप॒स्तेज॑ आका॒शम्।

यच्चा॑ऽऽका॒शे प्र॑ति॒ष्ठित॑म्।

सर्वा॒स्ताः।

वा॒युं वया॑ःसि॒ सर्वा॑णि॥⁴⁴॥

अ॒न्त॒रि॒क्ष॒च॒रं च॒ यत्।

सर्वा॒स्ताः।

अ॒ग्निः॑ सूर्यं च॒न्द्रम्।

मि॒त्रं वरु॑णं भ॒गम्।

सर्वा॒स्ताः।

स॒त्यः॑ श्र॒द्धां तपो॑ द॒मम्।

नाम॑ रू॒पं च॑ भू॒ताना॑म्।

सर्वा॒स्ता इष्ट॑काः कृ॒त्वा।

उप॑ का॒मदु॒घां दधे॑।

तेन॑र्षि॒णा तेन॑ ब्रह्म॑णा।

तया॑ दे॒वत॑याऽङ्गि॒रस्व॑द्भु॒वा सी॑द॥⁴⁵॥

[7]

सर्वा॒न्दि॒वः॑ सर्वा॑न्दे॒वान्दि॒वि।

यच्चा॑न्त॒र्भूतं॑ प्र॑ति॒ष्ठित॑म्।

सर्वा॒स्ता इष्ट॑काः कृ॒त्वा।

उप॑ काम॒दुघा॑ दधे।
 तेन॑र्षि॒णा तेन॑ ब्रह्म॑णा।
 तया॑ दे॒वत॑या ऽङ्गि॒रस्व॑द्भुवा सी॑द।
 याव॑ती॒स्तार॑काः सर्वाः॑।
 वित॑ता रोच॒ने दि॒वि।
 सर्वा॑स्ताः।
 ऋ॒चो यजू॑ंषि॒ सामा॑नि॥⁴⁶॥
 अ॒थ॒र्वाङ्गि॑रसं॒श्च ये।
 सर्वा॑स्ताः।
 इति॑हा॒सपु॒राणं॑ च।
 सर्प॑दे॒वज॒नाश्च॑ ये।
 सर्वा॑स्ताः।
 ये च॑ लो॒का ये चा॑लो॒काः।
 अ॒न्तर्भू॑तं प्र॒ति॑ष्ठितम्।
 सर्वा॑स्ताः।
 यच्च॑ ब्रह्म॒ यच्चा॑ब्रह्म।
 अ॒न्तर्ब्र॑ह्मन्प्र॒ति॑ष्ठितम्॥⁴⁷॥
 सर्वा॑स्ताः।
 अ॒हो॒रा॒त्राणि॑ सर्वा॑णि।
 अ॒र्धमा॑सांश्च॒ केव॑लान्।
 सर्वा॑स्ताः।
 सर्वा॑नृ॒तूत्स॑र्वा॒न्मा॒सान्।
 सं॒वत्स॑रं च॒ केव॑लम्।

सर्वास्ताः।

सर्वं भूतं सर्वं भव्यम्।

यच्चातोऽधिभविष्यति।

सर्वास्ता इष्टकाः कृत्वा।

उप कामदुघां दधे।

तेनर्षिणा तेन ब्रह्मणा।

तया देवतयाऽङ्गिरस्वद्ध्रुवा सीद॥⁴⁸॥

[8]

ऋचां प्राचीं महती दिगुच्यते।

दक्षिणामाहुर्यजुषामपाराम्।

अथर्वणामङ्गिरसां प्रतीचीं।

साम्नामुदीचीं महती दिगुच्यते।

ऋग्भिः पूर्वाह्णे दिवि देव ईयते।

यजुर्वेदे तिष्ठति मध्ये अहः।

सामवेदेनाऽस्तमये महीयते।

वेदैरशून्यस्त्रिभिरेति सूर्यः।

ऋग्भ्यो जातां सर्वशो मूर्तिमाहुः।

सर्वा गतिर्याजुषी हैव शश्वत्॥⁴⁹॥

सर्वं तेजः सामरूप्यं हं शश्वत्।

सर्वं हेदं ब्रह्मणा हैव सृष्टम्।

ऋग्भ्यो जातं वैश्यं वर्णमाहुः।

यजुर्वेदं क्षत्रियस्याऽऽहुर्वीर्योनिम्।

सामवेदो ब्राह्मणानां प्रसूतिः।

पूर्वे॑ पूर्वै॑भ्यो॒ वच॑ ए॒तदू॑चुः।
 आ॒दर्श॑म॒ग्निं चि॑न्वा॒नाः।
 पूर्वे॑ वि॒श्वसृ॑जोऽमृ॒ताः।
 श॒तं व॑र्षसह॒स्राणि॑।
 दी॒क्षि॒ताः स॒त्रमा॑सत॥⁵⁰॥
 तप॑ आसीद्बृ॒हप॑तिः।
 ब्र॒ह्मं ब्र॒ह्माऽभ॑वत्स्व॒यम्।
 स॒त्यं ह॒ होतै॑षामासीत्।
 यद्वि॑श्वसृ॒ज आ॑सत।
 अ॒मृत॑मे॒भ्य उ॑द॒गाय॑त्।
 स॒हस्रं॑ परि॒वत्स॑रान्।
 भू॒तं ह॒ प्र॑स्तोतैषामासीत्।
 भ॒विष्य॑त्प्रति॑ चा॒हर॑त्।
 प्रा॒णो अ॑ध्व॒र्युर॑भवत्।
 इ॒दं स॒र्वं सि॑षा॒सता॑म्॥⁵¹॥
 अ॒पा॒नो वि॒द्वाना॑वृ॒तः।
 प्र॒ति॒प्रा॒तिष्ठ॑दध्व॒रे।
 आ॒र्त॒वा उ॑पगा॒तारः॑।
 स॒द॒स्या ऋ॒तवो॑ऽभवन्।
 अ॒र्धमा॑साश्च॒ मासा॑श्च।
 च॒म॒साध्व॑र्यवोऽभवन्।
 अ॒शंस॑द्ब्र॒ह्मण॑स्तेजः।

अ॒च्छा॒वा॒कोऽभ॑वद्य॒शः॑।
 ऋ॒तमे॑षां प्र॒शा॒स्ताऽऽसी॑त्।
 यद्वि॑श्व॒सृज॒ आस॑त॥⁵²॥
 ऊ॒र्ग॒जा॒न॒मुद॑वहत्।
 ध्रु॒व॒गो॒पः स॒होऽभ॑वत्।
 ओ॒जोऽभ्य॑ष्टौ॒द्वाव॑णः।
 यद्वि॑श्व॒सृज॒ आस॑त।
 अ॒प॒चि॒तिः पो॒त्रीया॑मयजत्।
 ने॒ष्ट्रीया॑मयज॒त्त्रि॑षिः।
 आ॒ग्नी॑द्वा॒द्वि॒दुषी॑ स॒त्यम्।
 श्र॒द्धा है॒वाय॑जत्स्व॒यम्।
 इ॒रा प॒त्नी वि॒श्व॒सृजा॑म्।
 आ॒कू॒तिर॑पि॒नडू॒विः॥⁵³॥
 इ॒ध्म॑ ह॒ क्षु॒च्चै॑भ्य उ॒ग्रे।
 तृ॒ष्णा चाऽऽव॑हतामु॒भे।
 वा॒गे॒षा॑ सु॒ब्र॒ह्म॒ण्याऽऽसी॑त्।
 छ॒न्दो॒यो॒गान् वि॑जा॒न॒ती।
 क॒ल्प॒त॒न्त्रा॒णि त॒न्वा॒नाऽहः॑।
 स॒॒स्थाश्च॑ स॒र्व॒शः।
 अ॒हो॒रा॒त्रे प॑शुपा॒ल्यौ।
 मु॒हूर्ताः प्रे॒ष्या॑ अ॒भवन्।
 मृ॒त्युस्त॑द॒भव॑द्वा॒ता।

श॒मि॒तो॒ग्रो वि॒शां पतिः॑॥⁵⁴॥

वि॒श्व॒सृ॒जः प्रथ॒माः स॒त्रमा॑सत।

स॒हस्र॑स॒मं प्र॑सृ॒तेन॑ यन्तः।

ततो॑ ह जज्ञे भुव॑नस्य गो॒पाः।

हि॒र॒ण्म॒यः श॒कु॒निर्ब्र॑ह्म॒ नाम॑।

येन॑ सूर्य॒स्तप॑ति॒ तेज॑से॒द्धः।

पि॒ता पु॒त्रेण॑ पि॒तृमा॑न् योनि॑यो॒नौ।

नावे॑दवि॒न्मनु॑ते॒ तं बृ॑हन्त॒म्।

स॒र्वा॒नु॒भु॒मा॒त्मा॒नः॑ सम्प॒रा॒ये।

ए॒ष नि॒त्यो म॑हि॒मा ब्रा॑ह्म॒णस्य॑।

न क॑र्म॒णा वर्ध॑ते॒ नो क॑नी॒यान्॥⁵⁵॥

तस्यै॒वाऽऽत्मा॑ प॒दवि॑त्तं वि॒दि॒त्वा।

न क॑र्म॒णा लि॑प्यते॒ पाप॑केन।

प॒ञ्चप॑ञ्चा॒शत॑स्त्रि॒वृ॒तः सं॒वत्स॒राः।

प॒ञ्चप॑ञ्चा॒शतः॑ प॒ञ्चद॒शाः।

प॒ञ्चप॑ञ्चा॒शतः॑ स॒प्तद॒शाः।

प॒ञ्चप॑ञ्चा॒शत॑ एक॒विं॒शाः।

वि॒श्व॒सृ॒जाः॑ स॒हस्र॑सं॒वत्स॒रम्।

ए॒तेन॑ वै वि॒श्व॒सृ॒जं इ॒दं वि॒श्व॑म॒सृज॑न्त।

यद्वि॒श्व॑म॒सृज॑न्त।

तस्मा॑द्वि॒श्व॒सृ॒जः॑।

वि॒श्व॑मे॒नान॑नु प्रजा॑यते।

ब्रह्म॑णः सायु॑ज्यं सलो॒कता॑ यन्ति।
ए॒तासा॑मे॒व दे॒वता॑नां॒ सायु॑ज्यम्।
सा॒र्ष्टिता॑ समानलो॒कता॑ यन्ति।
य ए॒तदु॑प॒यन्ति॑।
ये चै॑न॒त्प्राहुः॑।
येभ्य॑श्चै॒नत्प्राहुः॑ ॥ ५६ ॥
ॐ ॥

[९]

॥ इति कृष्णयजुर्वेदीयतैत्तिरीयकाठके तृतीयः प्रश्नः समाप्तः ॥ ३ ॥
॥ इति कृष्णयजुर्वेदीयतैत्तिरीयकाठकं समाप्तम् ॥
हरिः ॐ ॥

